





Presented to
The Library
of the
University of Toronto
by

The Estate of the late
G. Percival Best, Esq.







Digitized by the Internet Archive
in 2011 with funding from
University of Toronto

Tome II

Plutarch. Vitae parallelae
(Chive)

Le vie des hommes
illustres... tr. Amyot. 2d. ed

LGr
P737v
Fa. 3

606361
21.4.55



PERICLES.



ÆSAR uoyant un iour à Rome quelques estrangers hommes riches & opulents, qui auoyent tousiours entre leurs bras de petits chiés & de petites guenons, & les cherissoyent merueilleusement, leur demanda si les femmes en leur país ne faisoient pas des enfans, reprenant tressagement ceulx qui employent enuers les bestes l'inclination à aimer, & l'affection de charité que la nature a mise en nous, pour en user enuers les hommes, & non pas enuers les bestes. Au cas pareil, aussi ayant la nature empraint en nostre ame un desir naturel d'apprendre & de sçauoir, il est bien raisonnable de reprendre ceulx qui abusent de ce desir, à ouir & apprendre choses qui n'apportent aucun fruiçt, & ce pendant mettent à nonchaloir celles qui sont utiles & honnêtes. Car quant au sens exterieur qui avec quelque passió reçoit impression

de son obiect, il luy est à l'adventure force de considerer indifferemment tout ce qui se presente à luy utile ou inutile qu'il soit: mais il n'est pas ainsi de l'entendement, pource que chascun en peut user à sa uolunté, & le tourner facilement à toute heure, & appliquer à ce que bon luy semble: à raison dequoy il le fault tousiours addonner à ce qui est le meilleur, à fin que non seulement il le contemple, mais aussi qu'il s'en repaisse & nourrisse en le contemplant. Car tout ainsi que la couleur la plus propre pour l'œil, est celle qui de sa uiuacité iointe avec une gayeté resiouit & conforte la ueuë: aussi doit on appliquer son entendement à contemplations, qui en delectant le tirent quand & quād à ce qui est son propre bien: comme sont les effects de la uertu, lesquelz en les oyant ou lisant imprimant es cueurs une affection & un zele de les ensuyure. Ce qui n'est pas en toutes autres choses que nous auons en quelque estime, & ne sommes pas tousiours incitez à desirer faire ce que nous trouuons bien fait: ains au contraire, bien souuent prenans plaisir à l'œuure, nous en mesprisons l'ouurier, comme es compositions des parfums & es teinctures de pourpre: car nous nous delectons de l'un & de l'autre, & neantmoins estimons les parfumeurs & teinturiers personnes uilles & mechaniques. Pourtant respondit tresbien Antisthenes à un qui luy disoit que Ismenias estoit

20 excellent ioueur de flustes, C'est-mon, dit il,
30 mais au demourant homme qui ne uault rien :
20 car autrement il ne seroit point si excellent
30 ioueur de flustes. Auquel propos Philippus
Roy de Macedoine dit une fois à son filz Ale-
xandre le grand, qui auoit chanté en un festin
fort plaismment, & en homme qui entendoit
20 bien l'art de Musique, N'as tu point de honte
30 de chanter si bien? Pource qu'il suffit bien que
un Roy employe quelquefois son loisir à ouir
chanter les chantres, & fait beaucoup d'hon-
neur aux Muses, de uouloir estre aucunesfois
auditeur des ouriers de tel art, quand ilz font
à l'enuy les uns les autres à qui chantera le
mieux. Mais qui actuellement exerce quelque
art basse & uile, il produit en tesmoignage con-
tre soy mesme le labeur qu'il a employé en cho-
ses inutiles, pour prouuer qu'il a esté paresseux
à apprendre les honnestes & utiles. Et n'y eut
iamais ieune homme de bon cueur & de gen-
tille nature, qui en regardant l'image de Iupi-
ter, laquelle est en la uille de Pise, souhaitast
deuenir Phidias, ny Polycletus en regardant
celle de Iuno qui est en Argos, ne qui desirast
estre Anacreon, ou Philemon, ou Archilochus
pour auoir quelquefois pris plaisir à lire leurs
œuvres: car il ne s'ensuit pas necessairement, si
l'ouurage delecte, que tousiours l'ouurier en
soit à louer. Ainsi ne profitent point telles cho-
ses à ceulx qui les contemplent, pource qu'elles

n'engendrent point es cueurs des regardans un zele de les imiter, ny n'excitent point une affection de les ressembler & de s'y cōformer: mais la uertu a cela de propre en ses actions, qu'elle rend l'homme qui la cognoist affectionné de sorte, que tout ensemble il en treuve les actes beaux, & desire ressembler à ceulx qui les font. Car des biens de la fortune nous en aimons la fruition & la possession, & de la uertu l'action: au moyen dequoy nous sommes bien contents d'auoir ces biens la des autres, mais ceulx cy, nous uoulons que les autres les ayent de nous. Car la uertu a ceste force qu'elle incite la uolunté de l'homme, qui la considere, à la uouloir incontinent exercer, & engendre en son cueur une enuie de la mettre en execution, formât les meurs de celuy qui la cōtemple, non point par imitation, ains par la seule intelligence & cognoissance de l'acte uertueux, qui tout soudain luy apporte un instinct & un propos deliberé de faire le semblable. C'est pourquoy i'ay estimé, que ie deuois cōtinuer à mettre par escript les uies des hommes illustres, & en ay composé ce dixieme liure, auquel sont contenues celles de Pericles, & de Fabius Maximus qui sousteint la guerre contre Hannibal: pource que ce ont esté deux personnages semblables en plusieurs autres uertus, & mesmement en douceur & en iustice, & qui pour auoir sceu patiemment supporter les folies de leurs peuples & de leurs

compagnons es charges de gouuernement, ont esté trefutiles à leurs païs : mais si nous auons bien rencontré de les assortir & conferer l'un à l'autre, on le pourra mieulx iuger par ce que nous en mettrôs cy deffoubs en escript. Pericles donques estoit de la lignee Acamantide, du bourg de Cholarge, de l'une des meilleures maisons, & plus anciennes races de la uille d'Athenes, tât du costé de sa mere, que du costé de son pere. Car Xantippus son pere, qui desfeit en bataille les lieutenans du Roy de Perse en la iournee de Mycale, espousa Agariste, laquelle estoit descendue de Clisthenes, celuy qui chassa d'Athenes les descendans de Pisistratus, & ruina uaillâment leur tyrannie: puis establit des loix, & ordonna une forme de gouuernement fort bié temperé, pour maintenir ses citoyës en paix & en concorde les uns avec les autres. Ceste Agariste songea une nuit qu'elle auoit enfanté un lion : & peu de iours apres elle accoucha de Pericles, si bien formé en toutes les parties de son corps, qu'il n'y auoit que redire, excepté qu'il auoit un peu la teste longue, & desproportionnee en grosseur au reste de la personne: qui est la cause pourquoy toutes ses statues presque ont l'armet en teste, n'ayâs pas les ouuriers, ainsi qu'il est uray-semblable, uoulu luy reprocher celle deformité. Mais les poëtes Attiques l'appelloyent Schinocephalos, qui uault autant à dire cōme, teste d'ougnon, pource que les Atti-

ques appellent aucunesfois ce qui s'appelle en langue commune Scilla, c'est à dire, ougnon de Barbarie, Schinos: & Cratinus poëte Comique en la Comedie qu'il a intitulee Chirones dit,

» Le uieil Saturne aucc Sedition

» Ont engendré par leur conionction

» Ce grand Titan, qu'en la cour immortelle

» Des Dieux du ciel Grosse teste on appelle .

Et de rechef en celle qui se nomme Nemesis, en parlant de luy il dit,

» Vien Iupiter, hostelier, longue teste.

Et Teleclides aussi se moquant de luy, dit en un lieu :

» Aucunesfois ne sachant bonnement

» Ou il en est de son gouuernement,

» Il se tient coy, & point ne se presente,

» Sentant du mal en sa teste pesante :

» Mais quelquefois aussi seul il desferre

» De son grand chef un merueilleux tonnerre.

Et Eupolis en la Comedie qu'il intitule Demi, en interrogant & demandant particulierement de chascun des orateurs, qu'il feinct estre retournez des enfers, quand on luy nomme Pericles le dernier, il dit :

» Certainement amené tu nous as

» Le chef de tous ceulx qui estoyent là bas .

Or quant à la Musique, la pluspart des auteurs escrit que Damō fut celuy qui la luy enseigna, le nom duquel, comme lon dit, se doibt pronōcer la premiere syllabe briefue : mais toutefois

Aristote dit, qu'il apprit la Musique chez Pythoclines . Comment que ce soit, il est certain que cestuy Damon estoit homme fort entédu & ruzé en matiere de gouuernement, qui pour dissimuler & cacher au peuple sa suffisance en cela, se couuroit du nom de Musicien, & hátoit autour de Pericles comme un maistre de luéte ou d'escrime, qui luy enseignoit comme il se deuoit conduire es affaires d'estat : toutefois à la fin il ne peut si bien dissimuler, que le peuple ne cogneust qu'il se seruoit de sa lyre & de la Musique pour couerture : & comme homme remuant, entreprenant, & fauorisant à la tyrannie, fut banny pour cinq ans : ce qui donna aux poétes Comiques matiere de parler, entre lesquels Platon en une de ses Comedies introduit quelcun qui luy demande,

22 Dis moy premier Chiron, car il est bruit

23 Que Pericles tu as fait & instruit .

Il fut aussi quelque temps auditeur & disciple du Philosophe Zenon natif de la uille d'Elee, qui enseignoit la philosophie naturelle comme Parmenides : mais il faisoit profession de contredire à tout le monde, & alleguer tant d'oppositions en disputant, qu'il rengeoit son homme à ne sçauoir que respondre, ny à quoy se resouldre, ainsi comme Timon Phliasien le tesmoigne en ces uers :

22 Grande eloquence, & grande force d'art

23 Pour disputer en l'une & l'autre part

29 Auoit Zenon, reprenant tout le monde

30 Quand il uouloit desployer sa faconde .

Mais celuy qui frequenta plus avec luy, & qui luy dōna celle grauité & celle dignité qu'il gar-
doit en tous ses faictz & ses dictz, plus seigneu-
riale que ne comporte la condition & l'estat de
ceulx qui ont à harenguer deuant un peuple li-
bre, & qui brief luy eleua ses meurs iusques à
une certaine maiesté qu'il auoit en toutes ses
façons de faire, fut Anaxagoras le Clazome-
nien, lequel par les hōmes de ce siecle la estoit
communement appellé Nus, c'est à dire, l'en-
tendement, fust ou pource qu'ilz auoyent en
singuliere admiration la uiuacité & subtilité de
son esprit à rechercher les causes des choses na-
turelles, ou pource que ce fut le premier qui at-
tribua la disposition & le gouuernement de ce
monde, non à la fortune ny à la necessité fata-
le, ains à une pure & simple intelligence ou en-
tendement, lequel separe, comme cause pre-
miere agente, les substances de parties sembla-
bles, qui sont en tous les autres corps de l'uni-
uers meslez & cōposez de diuerses substances .
Pericles donques ayant ce personnage en sin-
guliere admiration, par lequel il auoit à plein
esté instruit en la cognoissance des choses na-
turelles, mesmemēt de celles qui se font en l'air
& au ciel, en prit non seulement une grandeur
& hauteur de courage, & une dignité de langa-
ge, ou il n'y auoit rien d'affetté, de bas, ny

de populaire, mais aussi une constance de visage qui ne se mouuoit pas facilement à rire, une grauité en son marcher, un ton de uoix qui iamais ne se perdoit, une contenance rassise, & un port honneste de son habillement, qui iamais ne se troubloit pour chose quelcōque qui luy aduinſt en parlant, & autres semblables choses, qui apportoyent à tous ceulx qui les uoyoyēt & cōsideroyent un merueilleux esbahissement. Auquel propos on compte, qu'il y eut quelquefois un meschant effronté, qui fut tout un iour à l'oultrager de paroles diffamatoires en pleine place, & à luy dire toutes les iniures dont il se pouuoit aduiser: ce qu'il endura patiemment sans iamais luy respondre un seul mot, de peschant ce pendant quelque affaire de consequence, iusques au soir qu'il se retira tout doucement en son logis, sans se monſtrer alteré en façon quelconque, combien que cest importū la le suyuiſt tousiours en luy disant tous les outrages qu'il est possible de dire: & comme il fut prest à entrer dedans son logis, estant desia nuict toute noire, il cōmanda à l'un de ses seruiteurs qu'il prist une torche, & qu'il allast reconduire cest homme, & l'accompagner iusques en sa maison: toutefois le poëte Ion escrit que la frequentation de Pericles estoit superbe & arrogāte, & que parmy sa grauité & sa magnanimité il y auoit beaucoup d'orgueil & de mespris des autres: & au

contraire il louë grandement la ciuilité, humanité & courtoisie de Cimon, en ce qu'il se scauoit dextremement accommoder à toutes compagnies. Mais il ne nous faut pas arrester à ce que dit ce poëte Ion, qui uouldroit qu'en la uertu il y eust, comme en quelques Tragedies, une partie ou ló introduisist des Satyres pour faire rire: & au contraire, Zenon conseilloit à ceulx qui disoyēt que la grauité de Pericles estoit une presumption & une arrogance, qu'ilz feissent les presumptueux comme luy: pource que ceste maniere de contrefaire les choses hōnestes & uertueuses, apporte secretement, avec le temps, une affectiō de les aimer & de sy uouloir accostumer à bon esciant. Si ne receut pas seulemēt Pericles ces biens la de la conuersatiō d'Anaxagoras, ains y apprit aussi à chasser hors de soy & mettre soubs les pieds toute superstitieuse crainte des signes celestes, & des impressions qui se forment en l'air: lesquelles apportent grande terreur à ceulx qui en ignorent les causes, & à ceulx qui craignent les Dieux d'une frayeur esperdue, pource qu'ilz n'en ont aucune cognoissance certaine, que la uraye philosophie naturelle donne, & au lieu d'une tréblante & tousiours effroyee superstition, engendre une uraye deuotion accompagnée d'asseuree esperance de bien. Lon dit à ce propos, que lon apporta un iour à Pericles de l'une de ses terres la teste d'un belier qui n'auoit qu'une

corne seule, & que le deuin Lampō ayant cōsideré ceste teste qui n'auoit qu'une corne forte & dure au milieu du front, interpreta que cela uouloit dire, que y ayant deux ligues & deux parts en la uille d'Athenes touchant le gouuernement, celle de Pericles & celle de Thucydides, la puissance des deux seroit toute reduitte en une, & notamment en celle de celuy en la maison duquel ce signe estoit aduenu: mais que Anaxagoras qui se trouua là present, feit fendre le test en deux, & monstra aux assistans comme le cerueau du belier n'emplissoit pas la capacité de son lieu naturel, ains se resserroit de toutes parts, & alloit aboutissant en pointe comme un œuf, à l'endroit ou la corne prenoit le commencement de sa racine: si en fut Anaxagoras fort estimé sur l'heure par tous les assistans, mais Lampon le fut aussi bien tost apres, quand Thucydides fut chassé, & que tous les affaires de la chose publique uniuersellement tumberent entre les mains de Pericles. Aussi n'est il pas inconuenient, à mon aduis, que le philosophe naturel, & le deuin ayent bien & ueritablement rencontré tout ensemble, ayant l'un bien pris la cause, & l'autre la fin de cest euenement: car la profession de l'un est de rechercher comment il se fait, & de l'autre pourquoy il se fait, & de sçauoir predire ce qu'il signifie. Car quant à ceulx qui disent, que rendre la cause soit oster la signifiante du signe, ilz

ne considerent pas , qu'en uoulant abolir par ceste raison les predictions des signes & prodiges celestes, ilz ostét aussi ceulx qui se font par artifice , comme les sons des bassins, les lumieres des feus le long de la marine , les umbres des aguilles es horologes au Soleil , toutes lesquelles choses se font par quelque cause & quelque manufacture, pour estre signe de quelque chose . mais ceste dispute à l'adventure appartient miculx à un autre traitté . Et pour retourner à Pericles , estant encore ieune il redoubtoit fort le peuple , pource qu'il sembloit retraire un peu de uisage à Pisistratus , & les plus uieux de la uille craignoyent aussi fort sa uoix qui estoit douce , sa langue diserte , & sa parole aisee , à cause qu'elle ressembloit à celle de Pisistratus . Dauantage il auoit beaucoup de biens , & estoit de l'une des plus nobles maisons de la uille, & si estoient ses amis ceulx qui auoyent le plus de credit & d'authorité au maniment des affaires : au moyen dequoy , craignant qu'il ne fust banny du ban de l'Ostracisme , il ne s'entremettoit point du gouuernement en façon quelconque , & à la guerre se monstroit uaillant homme, & qui n'espargnoit point sa personne. Mais apres que Aristides fut mort , que Themistocles eut esté chassé , & que Cimon ayant charge des armées se trouua la plus part du réps hors de la Grece , occupé en guerres lointaines , alors il se rengea à la ligue

du menu peuple , preferant la multitude de la cōmune pauvre au petit nōbre des nobles & des riches: ce qui estoit cōtre son naturel, pource que de soymesme il n'estoit point populaire: mais il le feit, cōme il est uraysemblable, pour euiten la suspicion qu'il pretendist à usurper la tyrannie: & aussi, pource qu'il uoyoit que Cimon inclinait entierement du costé de la noblesse, & estoit singulierement aimé & porté des gens de bien, luy au contraire se ietta entre les bras de la commune, se prouoyant par ce moyen de seureté pour soymesme, & d'auctorité contre luy. Si commença incontinct à suyure une toute nouvelle maniere de uiure, depuis qu'il se fut mis aux affaires: car on ne le ueit onques-puis aller par la uille, sinon qu'il allast ou en la place ou au Senat. Il desista d'aller aux banquetz ou lon le conuioit, & laissa tout autre tel entretien d'amis, & toute telle maniere de conuersation, tellement qu'en tout le temps qu'il se mesla du gouuernement de la chose publique, qui fut fort long, il n'alla iamais soupper chez pas un de ses amis, sinō qu'il fut au festin des nopces de Euryptolemus son nepueu, encore n'y demoura il que iusques aux graces quād lō offre du uin aux Dieux, & se leua de table incontinent, pource que ces amiables priualtez la abaissent fort toute haultesse affectee pour apparoir, & est bien difficile de maintenir une seure grauité pour garder sa

reputation, en se laissant familièrement hanter à tout le monde. Il est uray qu'en une uraye uertu entiere, cela est tousiours le plus beau qui est le plus apparent, & n'y a rien es gens de bien & d'honneur que les estrangers trouuent si admirable, comme leurs domestiques qui sont tousiours à l'entour d'eulx trouuent leur uie ordinaire. Pericles donques pour obuier à ce que le peuple ne se saoulast de luy, s'il le uoyoit continuellement, ne s'approchoit de luy, & ne se presentoit deuant luy que par interualles, ny ne parloit pas de toutes matieres, & ne sortoit pas en public, ains se reseruoit ne plus ne moins que lon gardoit à Athenes la galere Salaminienne, comme dit Critolaus, pour les matieres de grande consequence: & ce pendât manioit les autres affaires de moindre importance par l'entremise de quelques orateurs qui estoyent ses familiers, entre lesquels Ephialtes, à ce que lon dit, en estoit l'un, celuy qui osta l'authorité & la puissance à la cour d'Areopage, & donna trop grande & trop effrenee licence au peuple, ainsi que dit Platon: à l'occasion de laquelle, ce disent les poëtes Comiques, il deuint si insolent qu'on ne le pouoit plus tenir nō plus qu'un ieune cheual qui n'a point de bride, & prit une audace telle, qu'il ne uoulut pl⁹ obeïr, ains mordit l'isle d'Eubœe, & faulta dessus les autres isles. Pericles donques se uoulant former un stile de parler, &

une façon de langage comme un outil conuenable & conforme à la maniere de uiure & à la grauité qu'il auoit prise, y employoit à tous propos ce qu'il auoit appris de Anaxagoras, coulourât ses raisons de philosophie naturelle par l'artifice de Rhetorique: car ayant acquis par l'estude de ceste philosophie une haultesse de conceptions, & une efficace de uenir à bout de tout ce qu'il prenoit à prouuer, avec ce que de nature il estoit doué de bon entendement, cōme escrit le diuin Platon, & en tirant ce qui conuenoit à son propos, qu'il accoustroit puis apres par artifice d'eloquēce, il se rēdit de beaucoup plus excellēt orateur que nul autre de son temps: au moyen dequoy luy fut, comme lon dit, imposé le surnom d'Olympien, qui uault autant à dire comme, celeste ou diuin: encore que quelques uns ueuillent dire, que ce fut à cause des beaux ouurages & edifices publiques, dōt il embellit la uille d'Athenes: & d'autres à cause de la grande authorité & puissance qu'il auoit au gouvernement tant en guerre qu'en paix. Mais il n'est pas inconuenient, que ceste gloire ne luy ait esté deferee, à raison de plusieurs excellentes qualitez ensemble qui estoient en luy: toutefois les Comedies que firent iouer les poētes de ce temps la, esquelles il y a plusieurs paroles dites de luy, les unes à bon esciant, les autres en ieu & avec risée, tesmoignent que ce fut pour son eloquence prin-

cipalement que luy fut donné ce furnom : car
 ilz disent qu'il tōnoit , qu'il esclairoit en haren-
 guant , & qu'il portoit sur sa langue une foul-
 dre terrible . Auquel propos on fait un compte
 d'une responce de Thucydides filz de Milesius,
 qu'il feit touchant la force d'eloquence de Pe-
 ricles assez plaisamment : car il estoit homme
 de bien & d'honneur , & auoit longuemēt fait
 teste au gouuernement des affaires à Pericles.
 Comme donques Archidamus Roy de Lace-
 dānone luy demandaſt un iour, lequel luçtoit
 le mieulx de luy ou de Pericles , il luy respon-
 dit , Quand ie l'ay ietté par terre en luçtant , il
 ſçait ſi bien dire en le niant, qu'il fait croire aux
 aſſiſtans qu'il n'eſt point tumbé, & leur perfua-
 de le contraire de ce qu'ilz ont ueu . Toutefois
 il estoit fort retenu & reſerué en ſon parler, de
 ſorte que toutes les fois qu'il ſ'alloit preſenter
 à la Tribune des harengues pour preſcher le
 peuple , il faiſoit prieres aux Dieux qu'il ne luy
 eſchappaſt de la bouche , ſans y penſer, aucune
 parole qui ne ſeruiſt biē à la matiere qu'il auoit
 à traiter : toutefois il n'eſt rien demouré de ſes
 œuures par eſcrit , ſi ce ne ſont quelques edicts
 qu'il met en auant : encore a lon retiré par me-
 moire bien peu de ſes dicts notables , comme
 quand il dit , qu'il falloit oſter la uille d'Ægine,
 pource qu'elle estoit comme une paille en l'œil
 du port de Pyrae : & une autre fois qu'il dit, qu'
 il uoyoit ia de loing la guerre qui leur couroit
 ſuſ de

20 fus de deuers le Peloponese . Vne autre fois,
 ainsi cōme il s'embarquoit avec Sophocles, qui
 lors estoit son cōpagnon en la charge de Ca-
 pitaine general, & qui luy louoit la beauté d'un
 ieune garson qu'ilz rencontrerent par le che-
 25 min : Il faut, luy dit il, Sophocles, qu'un Gou-
 30 uerneur ait non seulement les mains nettes,
 35 mais les yeux aussi. Et Stefimbrot⁹ escrit, qu'en
 la harengue funebre qu'il feit à la louange de
 ceulx qui estoient morts en la guerre de Sa-
 mos, il dit qu'ilz estoient immortelz comme
 les Dieux : car nous ne uoyons pas les Dieux
 en leur essence, mais par les honneurs que lon
 leur fait, & par les grands biens dont ilz iouif-
 sent, nous coniecturons qu'ilz soyent immor-
 telz, & les mesmes choses sont en ceulx qui
 meurent pour la defense de leur pais. Or pour-
 ce que Thucydides décrit le gouuernement
 de la chose publique sous Pericles, comme
 un gouuernement de la noblesse, & qui en ap-
 arence sembloit bien estre populaire, mais en
 effect estoit une principauté regie par le sens &
 l'authorité du premier hōme de la uille: & que
 plusieurs autres disent, que ce fut luy qui pre-
 mierement meit en auant la coustume de de-
 partir au peuple les terres conquises en guerre,
 & de leur distribuer des deniers commūs pour
 ueoir les ieux, & qui leur ordonna salaire pour
 toutes choses : qui fut une mauuaise accoustu-
 mance, à cause que le commun populaire, qui

parauant se passoit à peu , & qui gaignoit sa uie à la peine de son corps, en deuint superflu, sumptueux & dissolu , pour les choses qui furent lors introduites: lon pourra ueoir par la simple exposition du faict la cause de ceste mutation. Car Pericles à son aduenement, ainsi que nous auons dit par cy deuant , pour acquerir reputation pareille à celle de Cimon , tascha à se mettre en la bonne grace du commun populaire : mais n'ayant pas la richesse ny les biens si grands que luy, pour soustenir la despense telle que faisoit Cimon , par laquelle il entretenoit les pauures , en tenant maison ouuerte à tous uenans , en reuestant les pauures uieilles gens, & faisant oster les clostures de ses terres , uergers & heritages , à fin que chascun y peust entrer & y cueillir des fruiçts à son plaisir: se uoyant par ces moyens la surmonté en la bienuueillance du commun populaire , il se meit à introduire ces distributions de deniers communs , à la suggestion & par le conseil de Demonides natif de l'isle d'Ios , ainsi comme Aristote le recite : & ayant en peu de temps gaigné la bonne grace du menu populaire par ces distributions de deniers communs , qu'il leur faisoit departir, tât pour auoir lieu à ueoir iouer les ieux, comme pour le salaire d'assister aux iugemens, & par autres semblables corruptiõs, il s'en seruit puis apres à l'encontre de la cour d'Areopage , du corps de laquelle il ne fut ia-

mais, pource qu'il ne luy estoit onques escheut par le sort d'estre ny Preuost annuel, ny Conseruateur des loix, ny Roy des sacrifices, ny Maistre des guerres, qui estoient offices, lesquels de toute ancienneté se creoyent par le sort: & ceulx à qui le sort touchoit, filz festoyent bien portez en l'administratiō de leurs magistrats, montoient, & uenoient à estre du corps de la cour d'Areopage. Pericles donques, par ces moyens ayant acquis grand credit & grande authorité entre le menu peuple, embrouilla tellement ce Senat d'Areopage, qu'il luy fait oster la cognoissance de plusieurs matieres, par l'entremise d'Ephialtes, & fait bannir d'Athenes à temps, Cimon, comme fauorissant aux Lacedemoniens, & contrariant au bien & à l'authorité du peuple, encore que ce fust le plus riche & le plus noble de toute la uille, & qui auoit gagné de plus glorieuses uictoires, & auoit emply la cité d'Athenes de despouilles conquises sur les ennemis, ainsi cōme nous auons escrit en sa uie: tant estoit grande l'authorité de Pericles enuers le peuple. Or le bannissement dont il fut banny, que lon appelle Ostracisme, estoit par la loy limité à dix ans, durans lesquels estans les Lacedemoniēs descendus avec grosse puissance en la contrée de Tanagre, les Atheniens leur allerent incōtinent au deuant: là ou Cimon uoulant faire uoicir par effect que lon le calumnioit faulse-

ment de fauoriser aux Lacedæmoniens, s'y en alla se presenter en armes pour combatre avec ceulx de sa lignee : mais les amis de Pericles se banderent ensemble, qui le contraignirent de se retirer comme banny . Ce qui fut aussi cause que Pericles combatit celle iournee plus asprement que iamais, & y acquit l'honneur d'auoir fait preuue de sa personne autant & plus que nul autre qui fust en toute l'armee. Mais les amis de Cimon que Pericles chargeoit aussi de porter faueur aux affaires des Lacedæmoniens, y moururent tous entierement: dont les Atheniens se repentirent bien d'auoir chassé Cimon, & le regretterent fort apres auoir esté desfaicts en celle bataille sur les confins du pais d'Attique, mesmement pource qu'ilz s'attendoient bien d'auoir à la saison nouuelle une bien aspre & forte guerre. Ce que sentant Pericles, il ne feignit point de gratifier en cela à la cõmune, ains luy mesme proposa & meit en auant le decret, qu'il fust rappellé: comme il fut fait. Et retourné que fut Cimon, il moyena la paix entre ces deux citez, pource que les Lacedæmoniens luy portoyent bonne affection, & à l'opposite ilz haïssoyent Pericles, & tous les autres gouuerneurs. Toutefois il y en a qui escriuent, que iamais Pericles ne condescendit à le faire rappeller, que premieremēt ilz n'eussent fait un accord secret entre eulx par l'entremise d'Elpinice sœur de Cimon, à sçauoir que Cimon

iroit avec une armee de deux cents galeres faire la guerre aux pais de l'obeïssance du Roy de Perse, & Pericles demoureroit en sa maison avec l'authorité du gouvernement dedans la uille. Ceste sœur Elpinice auoit ia auparauant une autre fois adoulcy Pericles enuers sō frere, lors qu'il fut mis en iustice pour un crime capital: car Pericles estoit l'un de ceulx à qui l'accusation en auoit esté deleguee & commise par le peuple. Elpinice alla deuers luy, & le pria de ne faire pas du pis qu'il pourroit à son frere.

⁂ Pericles luy respōdit en riant, Tu es trop uieille,

⁂ le, Elpinice, tu es trop uieille, pour uenir à

⁂ bout de si grandes choses. Toutefois quand ce uint au iugement que la cause fut plaidee, il ne se leua qu'une seule fois pour parler cōtre luy, comme par maniere d'acquit: & s'en alla, ayant fait moins de mal à Cimon, que nul autre des accusateurs. Qui pourra dôques adiouxter foy à Idomeneus, lequel met sus à Pericles qu'il auoit fait occire en trahison l'orateur Ephialtes qui estoit son amy, & auoit tousiours esté de son aduis & de son party au gouvernement de la chose publique, par ialouzie & enuie qu'il portoit à sa gloire? Car telles paroles diffamatoires, ie ne sçay d'ou ramassées, a Idomeneus uomy comme une humeur cholerique à l'encontre de Pericles: lequel encore qu'il ne fust pas à l'aduenture du tout irreprehensible, si est ce qu'il auoit le cueur grād & noble, & la natu-

re desiruse d'honneur, esquelles manieres d'homes lon ne uoit pas gueres auenir que telles passios si brutales & si cruelles s'engendrent. Mais cest orateur Ephialtes estant redoubtable à ceulx qui soustenoyent le party de la noblesse, pource qu'il ne pardonnoit aucunement à ceulx qui auoyét en chose quelle qu'elle fust ofensé l'authorité du peuple, ains les en poursuy uoit & persecutoit en toute rigueur iusques au bout, ses ennemis luy dresserent embusche par l'entremise d'un Aristodicus Tanagrien, & le feirent tuer en trahison, ainsi comme l'escrit Aristote. Or en ces entrefaittes mourut Cimō en l'isle de Cypre, estant general de l'armee de mer d'Athens: parquoy ceulx qui tenoyent le party de la noblesse, uoyans que Pericles estoit desia grand, & qu'il marchoit deuant tous les autres citoyens de la uille, uoulans qu'il y eust quelcun de leur part qui luy feist teste, & luy rabbatist un peu son authorité, de maniere qu'il ne uinst pas à auoir puissance absoluë, ilz luy opposerent Thucydides du bourg de Alopecce, homme sage, beaupere de Cimon, pour luy resister. Cestuy Thucydides s'entendoit moins de la guerre que Cimon, mais plus des affaires de uille & du gouuernement de la chose publique, & se tenoit le plus du temps en la uille, là ou combatant continuellement à l'encontre de Pericles en la Tribune des harengues à prescher contre luy, il eut en peu de temps mis sus

une ligue pareille à celle de Pericles : car il engarda que les gens de bien & d'honneur, que lon appelle, qui sont les nobles, ne se meslasent & confundissent parmy la commune, ainsi comme auparauant, là ou leur dignité estoit offusquee & effacee par la multitude du peuple : ains les separa d'avec la commune, & les assembla tous en un corps, qui uint à auoir puissance egale à l'autre ligue, & meit par maniere de dire, le contrepois à la balance. Car du commencement il n'y eut que un peu de debat occulte seulement entre ces deux partialitez, comme une fueille superficielle en une lame de fer, qui fait un peu apparoir la difference de ceulx qui tenoyent le party du peuple, & de ceulx qui tenoyent le party de la noblesse: mais la contention & dissension de ces deux personages fut comme une profonde incision, qui mespartit la uille en deux partialitez, dont l'une tout publiquement fut appelée la noblesse, & l'autre le peuple. Et pourtant Pericles relaschant encore plus alors la bride au peuple, faisoit toutes choses pour luy aggreer & complaire, donnant ordre qu'il y eust tousiours en la uille quelques ieux, quelques festes, banquets & passetemps publiques, pour entretenir la commune de telz plaisirs honnestes : & oultre cela, il enuoyoit tous les ans à la guerre une armee de soixante galeres, sur lesquelles y auoit bon nombre de pauures citoyens, qui

neuf mois de l'an durans prenoyent soude du public, & ensemble s'apprenoyent & s'exercitoient à l'experience de la marine. Dauantage il enuoya au pais de la Cherronese mille bourgeois pour y habiter, & departir les terres entre eulx, cinq cents en l'isle de Naxe, en celle d'Andros deux cents cinquante, en la Thrace mille, pour habiter avec les Bifaltes, & d'autres en Italie quand la cité de Sybaris fut rebastie, qui depuis fut surnōmee la uille des Thuriens; ce qu'il faisoit pour descharger la uille d'une multitude oisue, qui pour son oisueté estoit curieuse & desireuse de choses nouvelles, & aussi pour prouueoir à la necessité des pauvres bourgeois qui n'auoyent rien, avec ce que en logeant ainsi des naturelz citoyens d'Athenes aupres de leurs subiects ou alliez, ce leur estoit comme une garnison qui les tenoit en bride, & les gardoit d'attenter aucune nouuelleté. Mais ce qui donna plus de plaisir, & adiouxta plus d'ornement à la uille d'Athenes, qui apporta plus d'esbahissement aux estrangers, & qui seul porte suffisant tesmoignage, que ce que lon dit de l'ancienne puissance, richesse & opulence de la Grece, n'est point chose faulsc, c'est la magnificēce des ourages & edifices publics qu'il feit faire. Aussi est-ce l'œuure de toutes celles de Pericles, pour iaquelle ses enuieux & maluueillans luy porterent plus d'enuie, & dont ilz le calumnièrent

plus, crians contre luy en toutes les assemblees de conseil, que le peuple d'Athenes estoit difamé pour auoir transporté les deniers comptans de toute la Grece, qui estoient en depost dedans l'isle de Delos: & encore que la plus honneste excuse que lon eust pour couvrir ce fait, en disant que c'estoit pour la crainte des Barbares, à fin de le mettre en lieu fort, ou il fust en plus seure garde, Pericles la leur auoit ostee, & que c'estoit une trop grande iniure faite à tout le demourant de la Grece, & un tour de manifeste tyrânie, attendu qu'elle uoit deuant ses yeux que l'argent que lon luy a fait contribuer à force pour les affaires de la guerre contre les Barbares, nous l'employons à faire dorer, embellir & accoustrer nostre uille, ne plus ne moins qu'une femme glorieuse, qui ueult estre patee de riches ioyaulx & de pierres precieuses, & en faisons faire des images, & bastir des temples d'une excessifue despense. Pericles au contraire remonstroit aux Atheniens, qu'ilz n'estoyent point tenus de rendre compte de ces deniers à leurs alliez, attendu qu'ilz combatoyent pour eulx, & qu'ilz tenoyent les Barbares loing de la Grece, sans qu'eulx contribuassent pour ce faire un seul hōme, un seul cheual, ny un seul uaisseau, ains seulement de l'argent, lequel n'est plus à ceulx qui le payent, ains à ceulx qui le reçoient, moyenant qu'ilz fassent ce pourquoy ilz le reçoient, & qu'estât

leur uille bien prouueue de toutes choses necessaires pour la guerre, il estoit honneste d'employer le surplus de ses finances en choses qui à l'aduenir, quand elles seroyent paracheuees, leur apporteroient gloire sempiternelle: & des lors que lon estoit encore apres à les faire, les enrichiroient d'une opulence presente pour la diuersité des ouurages de toutes sortes, & des matieres qui y seroyent besoing, pour lesquelles amener & mettre en œuure seroyent employez ouuriers de tous mestiers & toutes mains qui uouldroyent trauailler, de maniere que tous les habitans de la uille uiendroyent à en receuoir paye & salaire du public, & elle par mesme moyen s'embelliroit & se nourriroit quand & quand de soy mesme. Car ceux qui estoient forts & dispos de leurs personnes, & en aage de porter armes, auoyent entretencement de la soulde publique, qu'ilz touchoyent en allant à la guerre: & les autres qui ne se mesloyent point des armes, comme les gens mechaniques & uiuans de leurs bras, il uouloit bien qu'ilz eussent aussi part aux deniers communs, mais nō pas sans les gagner ne sans rien faire. Ce qui fut cause, qu'il meit en auant au peuple des entreprises de grands edifices, & des desseings d'ouurages de plusieurs mestiers qui ne se pouuoient acheuer que avec long traict de temps, à fin que les citoyēs qui demouroyēt en la maison eussent moyen de prendre part

aux deniers publiques, & de s'en enrichir aussi bien comme ceulx qui alloient à la guerre, qui seruoient aux uaisseaux sur la mer, ou qui estoient en garnison à la garde des places: pour ce que les uns gaignoyēt à fournir les matieres, cōme la pierre, le cuyure, l'yuoire, l'or, l'ebene & le cyprez: les autres à les mettre en œuvre, & à en besongner, cōme les charpentiers, mouleurs, fondeurs, imagers, maçons, tailleurs de pierres, teinturiers, orfeures, menuisiers besongnās d'yuoire, peintres, ouuriers de marquetterie, tourneurs: les autres à conduire les estoifes, & à les fournir, comme marchands, mariniers, pilotes es choses qui s'amenoyent par la mer, & par terre les charrōs, uoituriers, chartiers, cordiers, carriers, felliers, bourreliers, pionniers pour applanir les chemins, fouilleurs de mines. Davantage chascun mestier comme Capitaine auoit soubz soy sa propre armee de maneuures, gaignans leur uie à la peine de leurs bras seulement, pour seruir comme d'outils & d'aides aux maistres ouuriers: de maniere que la besongne par ce moyen uenoit à esprendre & distribuer le gaing à toute aage & à toute qualite & condition de gens. Ainsi uenoient les ouurages à se haulser & auancer, estans superbes en magnificence de grandeur, & nonpareilz en grace & beaulte, pour ce que les ouuriers, chascun en son endroit, s'efforçoient à l'enuy les uns des autres, à surmonter la grandeur de leurs ouura-

ges par l'excellence de l'artifice : mais encore n'y auoit il chose qui fust tant admirable, comme la celerité : car là ou lon estimoit chascun desdits ouurages deuoir à peine estre paracheué en plusieurs aages, & plusieurs successions de uies d'homme les unes apres les autres, tous furent entierement faits & parfaits dedans le temps que dura en uigueur le credit & l'authorité d'un seul gouuerneur . Et toutefois lon dit qu'en ce mesme temps la, comme le peintre Agatharchus se glorifiait de ce qu'il peignoit promptement & facilement des bestes, Zeusis l'ayant entendu respondit, Et moy, au contraire, ie me glorifie de demourer long temps à les faire : pource que ordinairement la soudaineté & facilité ne peult donner une fermeté perdurable ny une beaulté parfaite à l'œuure : mais la longueur du temps adiouxtee à l'assiduité de labeur en la manufacture d'un ouurage, luy donne force & uigueur de longue duree . Voila pourquoy les ouurages que fait alors Pericles sont plus esmerueillables, attendu qu'ilz ont esté parfaits en si peu de temps, & ont duré si longuement : pource que chascun d'iceulx des lors qu'il fut parfait, sentoit desia son antique quant à la beaulté, & neantmoins quant à la grace & uigueur, il semble iusques auiourdhuy qu'il uiene tout freschement d'estre fait & parfait, tant il y a ne sçay quoy de florissante nouveaulté, qui empesche que l'iniure du temps

n'en empire la ueuë , comme si chascun desdits ouurages auoit au dedans un esprit tousiours renieunissant , & une ame non iamais uieillifante qui les entreteinst en celle uigueur . Or celuy qui luy conduisoit tout , & auoit la superintendance sur toute la besongne , estoit Phidias , combien qu'il y eust plusieurs autres maistres souuerains & ouuriers tresexcellents à chasque ouurage : car le temple de Pallas qui s'appelle Parthenon , comme qui diroit , le temple de la uierge , & se surnomme Hecatompodon , pource qu'il a cent pieds en tout sens , fut edifié par Ictinus & Callicratidas : & la chapelle d'Eleusine , ou se faisoient les secrettes ceremonies des mysteres , fut plantee par Corcebus , lequel dressa le reng des premieres coulōnes qui sont à fleur de terre , & les lia avec leurs architraues : mais , luy mort , Metagenes natif du bourg de Xypete fit la ceinture , & puis y rengea les coulōnes qui sont au dessus , & Xenocles du bourg de Cholarge , fut celuy qui fit la lanterne ou cul de lampe , qui couure le sanctuaire : mais la longue muraille , dont Socrates dit auoir luy mesme ouy proposer la structure à Pericles , ce fut Callicrates qui la prit à faire . Le poëte Cratinus en une siene Comedie se moque de cest ouurage la , comme qui alloit trop laschement en auant , & qui demouroit trop à sacheuer , en disant ,

20 Long temps y a que Pericles de bouche

L'auãce fort, mais de faiçt point n'y touche,
 Quant au Theatre ou auditoire de Musique
 destiné à ouir les ieux des Musiciens, qui s'appelle Odeon, il est bien par dedans fait à plusieurs ordres de sieges, & plusieurs rêgs de coulonnes, mais la couuerture est un seul comble rond, qui se ua tout à l'entour courbant & couchant en soymesme, aboutissant en pointe: & dit on qu'il fut fait sur le patron & à la semblãce du paillon du Roy Xerxes, & que Pericles en bailla le deuis & l'ordonnance: parquoy Cratinus en un autre passage de la Comedie des Thraciens s'en iouè, & s'en moque de luy en disant,

» Voicy uenir Pericles au furnom
 » De Iupiter à la teste d'ougnon,
 » Qui a dedans son large test compris
 » De l'Odeon la forme & le pourpris,
 » Depuis qu'il est eschappé du danger
 » D'aller banny en pais estrangeur.

Ce fut lors premier que Pericles procura fort affectueusement, qu'il fust ordonné par le peuple, qu'au iour de la feste qui s'appelle Panathe-nea, lon celebraft des ieux de pris de Musique: & ayant esté luy mesme cleu recteur desdicts ieux, pour adiuger le pris à ceulx qui l'auroyent gaigné, ordonna la maniere cõment pour tousiours à l'aduenir les Musiciés deuroyent chanter de la uoix, ou iouer des flustes, ou de la cithre & autres instrumens de Musique. Si fut ce

premier ieu de pris de Musique fait dedans l'Odeon, & tousiours depuis y ont aussi esté les autres celebres. Quant au portail & aux portiques du chasteau, ilz furent faits & parfaits dedans l'espace de cinq ans, sous la conduite de Mnesicles qui fut maistre de l'œuvre: & aduint pendant qu'on les bastissoit un accident merueilleux, qui monstra bien que la Deesse Minerue ne reprouvoit point celle fabrique, ains l'auoit pour bien agreable: car le plus diligent & le plus affectionné de tous les ouuriers qui y besongnoyent, tumba d'adventure du hault en bas: de laquelle cheute il fut si malade que les medecins & chirurgiens n'esperoyent pas qu'il en peust eschapper. Dequoy Pericles estat fort desplaisant, la Deesse s'apparut à luy de nuict en dormant, qui luy enseigna une medecine, de laquelle il guarit facilement le patient, & en peu de temps: & fut l'occasion pour laquelle il feit depuis fondre en cuyure l'image de Minerue que lon surnomme de Santé, laquelle il feit mettre dedans le temple du chasteau, aupres de l'autel qui y estoit auparauant, comme lon dit. Or quant à l'image d'or de la Deesse Minerue, ce fut Phidias qui la feit, & est ainsi escrit en la base: mais au demourant il auoit la superintendance de tous les autres ouurages presque, & commadoit à tous les autres ouuriers pour l'amitié que luy portoit Pericles: ce qui apporta à l'un enuie, & à l'autre mauuais bruit: pource

que les enuieux & mesdifans allerent semans par tout un bruit, que Phidias receuoit en sa maison les dames de la uille, soubz couleur d'aller ueoir ses ouurages, pour les liurer à Pericles. Et les poëtes Comiques prenans l'occasion de ce bruit, espendirent à l'encontre de luy force paroles iniurieuses & diffamatoires, le calumnians qu'il entretenoit la femme d'un Menippus, qui estoit son amy & son lieutenant en guerre, & luy mettans sus aussi que Pyrilampes l'un de ses familiers nourrissoit des oyseaux, & notamment des pans, qu'il enuoyoit secretement aux femmes dont Pericles iouissoit. Mais il ne se fault point esbahir de ces hommes Satyriques la, qui font profession de mesdire & de picquer tout le monde, & qui ordinaiement sacrifient à l'enuie du commun populaire, comme à un esprit maling, les iniures & oultrages qu'ilz iettent à l'encontre des gens de bien & d'honneur, ueu que Stefimbrotus le Thasien osa bien reprocher à Pericles un crime detestable controuué faulusement, qu'il entretenoit la femme de son propre filz. Voila pourquoy il est, à mon aduis, bien difficile & malaisé d'auoir entiere cognoissance de la uerité des choses anciennes par les monumens des histoires, attendu que les sucresseurs ont la longueur du tēps, qui leur brouille & offusque la nette intelligence des affaires: & l'histoire qui est escrite du uiuant des hommes dont elle parle, & du

temps

temps des choses dont elle fait mention , quel-
 quefois par haine & par enuie , & quelquefois
 par faueur ou par flatterie desguise & corrompt
 la uerité. Mais comme les orateurs qui estoÿēt
 de la ligue de Thucidydes criaissent à l'encontre
 de Pericles en leurs harengues ordinaires, qu'il
 consommoit en uain les finances de la chose
 publique , & y despendoit tout le reuenu de la
 uille , Pericles un iour en pleine assemblee de
 uille demanda à l'assistance du peuple , s'il luy
 sembloit qu'il eust esté trop despēdu : le peuple
 23 respondit , Beaucoup trop : Bien donques , dit
 23 il, ce fera, si uous uoulez, à mes despēs, & nō pas
 23 aux uostres, pourueu qu'il n'y ait aussi que mon
 23 nom seul escrit en la dedication des ouurages .
 Quand Pericles eut dit ces paroles, le peuple,
 soit ou pource qu'il eust en admiration sa ma-
 gnanimité , ou qu'il ne luy uoulust point ceder
 l'honneur & la louange d'auoir fait faire de si
 sumptueux & si magnifiques ouurages, luy cria
 tout hault, qu'il ne le uouloit point, ains entē-
 doit qu'il les feist paracheuer aux despens du
 public, sans y rien espargner. Mais à la fin estant
 ouuertement descendu en cōtention avec Thu-
 cydides , & s'estant mis au hazard à qui feroit
 bannir son compagnon du ban de l'Ostracif-
 me , il le gaigna sur luy , & le chassa de la uille ,
 & par mesme moyen desfeit aussi la ligue qui
 luy estoit contraire . Parquoy estant toute par-
 tialité entierement esteincte , & la uille totale-

ment reduitte en union & concorde, il se trouua adonc toute la puissance d'Athenes en sa main, & tous les affaires des Atheniens en sa disposition, les finances, les armes, les galeres, les isles, la mer, & une si grande seigneurie, laquelle s'estendoit partie sur les Grecs, & partie sur les Barbares, si bien fortifiee & munie d'obeissance de nations subiettes, d'amitez de Roys, & d'alliance de diuers princes & puissans seigneurs. Au moyen dequoy il commença des lors à estre enuers le peuple autre qu'il n'auoit accoustumé, & à ne ceder & n'obtemperer plus ainsi facilement à tous les appetits du commun populaire, ne plus ne moins qu'à des uêts contraires: & roidit un peu celle trop lasche, trop molle & trop populaire maniere de gouverner, dont il auoit usé iusques à lors, comme une trop delicate & trop effeminee armonie de Musique, en la conuertissant en un gouuernement plus seigneurial, & tenant plus de l'authorité royale: en cheminant neantmoins tousiours droit, & se maintenant tousiours irreprehensible à faire, à dire & conseiller ce qui estoit le plus expedient pour la chose publique. Il menoit le plus souuent par remonstrances & raisons le peuple à faire uoluntairement & de bon gré ce qu'il mettoit en auant: mais quelquefois aussi le tiroit il par force, & luy faisoit faire contre sa uolunté, ce qui estoit pour le miculx. Suyuant en cela le stile du sage mede-

cin, lequel en une longue & diuerſe maladie permet aucunesfois à ſon patient, avec une meſure reſeruee touteſois, des choſes ou il prent plaiſir: mais quelqueſois auſſi luy donne des medecines, qui le trauaillent & le tourmētent, pour le guarir. Car, comme il eſt neceſſaire en un peuple tenant ſi grand empire, il aduenoit ordinairement des accidents, qui luy apportoyent diuerſes paſſions, leſquelles luy ſeul ſçauoit regir & manier dextrement avec deux timons principaux, la crainte & l'eſperāce, reſrenant avec l'une la fierté & temerité insolente de la commune en proſperité, & avec l'autre reconfortant ſon ennuy & ſon deſcouragement en aduerſité. En quoy il monſtra & prouua euidentement, que la Rhetorique, comme dit Platon, & l'eloquēce, eſt un art qui mene & manie les eſprits des hommes à ſon plaiſir, & que ſon principal artifice eſt, de ſçauoir bien mouuoir à propos les paſſions & les affectionſ, qui ſont comme des tons & des ſons de l'ame, qui ueulent eſtre touchez & ſonnez de main de bon maĩſtre. Dequoy touteſois eſtoit cauſe, non la force de ſon eloquence ſeulement, aĩns, comme teſmoigne Thucydides, la reputation de ſa uie; l'opinion & la fiance que lon auoit de ſa preudhommie, pource qu'il n'eſtoit aucunemēt corrumptible par preſens, & que l'auarice ne luy commandoit nullement, attendu qu'ayant rendu ſa uille de grande treſgrande & treſopulente

te, & ayant surmonté en autorité & puissance plusieurs Roys & plusieurs tyrans, mesme de ceulx qui ont peu par testament laisser leurs estats à leurs enfans, il n'augmenta neantmoins iamais les biens que son pere luy auoit laissez, d'une seule drachme d'argent. Et toutefois l'historien Thucydides décrit assez clairement la grandeur de sa puissance : & les poëtes Comiques de ce temps la, la donnent malignement soubz paroles couuertes à entendre, appellans ses familiers & amis les nouveaux Pisistratides, & difans qu'il luy falloit faire protester & iurer qu'il n'usurperoit point la tyrannie, uolans donner à entendre que son autorité estoit par trop excessiue pour une chose publique populaire. Et Teleclides, entre autres, dit que les Atheniens luy auoyent mis entre mains le reuenu des uilles de leur obeissance, & les uilles mesmes, pour en lier les unes & deslier les autres, & leurs murailles, pour les abbatre ou rebastir à son plaisir, le pouuoir de traiter paix & alliance, leur force, leur puissance, leurs finances, & tout leur bien entierement. Mais cela ne fut point pour une boutee seulement, ny pour une uogue de faueur qui passast en peu de temps, ains dura quarante ans, estant tousiours le premier de sa cité entre des Ephialtes, Leocrates, Mironides, Cimons, Tolmides & Thucydides : car apres auoir ruiné & fait bannir Thucydides, il demoura encore par dessus tous

les autres l'espace de quinze ans: & ayant acquis une principaulté & authorité de commāder, qui dura tousiours continuellement pendant ce temps la, ou celle des autres Capitaines ne duroit qu'un an, il se mainteint tousiours inuincible & imprenable par argent, combien qu'au demourant il ne fust point du tout mauvais mesnager ny paresseux de cōseruer le sien. Car quant aux biens qui estoient iustement siens, & que ses predecesseurs luy auoyent laissez, à fin que par negligence ilz ne deperissent point, & aussi qu'ilz ne luy dōnassent trop d'affaires, & ne le reteinssent trop sil se uouloit amuser à les faire ualoir, il les mesnageoit d'une maniere qui luy sembloit la plus aisee & la plus certaine: c'estoit, qu'il uendoit à un coup tous les fruiçts qu'il recueilloit de son reuenu annuel, & puis enuoyoit à la iournee achepter au marché ce qui faisoit besoing pour l'entretènement & despense ordinaire de sa maison. Cela ne fut point agreable à ses enfans quand ilz deuindrent un peu grands, ny ne pleut point à ses femmes, lesquelles uouloyent qu'il despendist plus largement, & se plaignoyent d'une si estroite & si reserree despense ordinaire, attendu qu'en une si grosse & si riche maison il n'y auoit iamais rien de demourant, ains y alloit toute recepte & toute mise par compte & par mesure iuste. Car tout ce mesnagement estoit cōduit & entretenu par un sien seruiteur nom-

mé Euangelus, fort habille homme & tresbien
 entendu au faict du gouvernement d'une gran-
 de maison, soit qu'il eust esté ainsi fait & in-
 struiet par Pericles, ou qu'il eust ceste prouoy-
 ance de nature. Ces choses estoient bien diffe-
 rentes de la sâpience d'Anaxagoras, attendu
 qu'il abandonna sa maison, & laissa ses terres
 uenir en friches & en pasturages par un con-
 temnement des choses terrienes, & un rauisse-
 ment de l'amour des celestes. Mais aussi y a il, à
 mon aduis, grande difference entre la uie d'un
 philosophe contemplatif, & d'un personnage
 actif s'entremettant du gouvernement d'une
 chose publique: car l'un employe son entende-
 ment à la speculation des choses belles & hon-
 nestes, sans pour ce faire auoir besoing d'aucun
 instrumēt, ny de matiere quelconque exterieu-
 re: & l'autre accommodant sa uertu à la cōmu-
 ne utilité des hommes, a besoing de richesse,
 comme d'un instrument, non seulement neces-
 saire, mais aussi honneste, ainsi qu'elle fut à Pe-
 ricles, qui en secourut plusieurs pauvres gens,
 & mesinement Anaxagoras entre autres: du-
 quel on compte, qu'estant Pericles si empesché
 ailleurs qu'il n'auoit pas loisir de penser de luy,
 il se trouua delaissé de tout le mōde en sa uieil-
 lesse, & se coucha la teste affublee, en resolu-
 tion de se laisser mourir de faim. Dequoy Peri-
 cles estant aduertiy, s'encourut aussi tost tout es-
 perdu deuers luy, & le pria le plus affectueuse-

ment qu'il luy fut possible, qu'il retournast en uoulunté de uiure, en lamentant, non luy, mais soy mesme, de ce qu'il perdoit un si feal & si sage conseiller es occurences des affaires publiques. Adonc Anaxagoras se descourit le uifage &

20 luy dit, Ceulx qui ont affaire de la lumiere d'u-

20 ne lampe, Pericles, y mettent de l'huile pour

20 l'entretenir. Or comméceoyent ia en ce temps la les Lacedæmoniens à auoir ialouzie de l'accroissement des Atheniens: parquoy Pericles uoulant eleuer encore dauantage le cueur au peuple d'Athenes, & le faire penser à toutes choses haultes & grandes, meit en auant un decret, Que lon depeschast ambassadeurs pour aller solliciter tous les Grecs, en quelque partie qu'ilz habitassent de l'Europe ou de l'Asie, & autant la petite que la grande uille, d'enuoyer leurs deputez à Athenes en l'assemblee generale qui s'y tiendroic, pour deliberer touchant les temples des Dieux que les Barbares auoyent bruslez, & touchant les sacrifices que lon auoit uouez pour le salut de la Grece, lors que lon donna la bataille aux Barbares: & aussi, touchant la marine, à fin que chascun peust nauiger seurement là ou bon luy sembleroit, & que tous uescussent amiablement en bonne paix les uns avec les autres. Si furent enuoyez à ceste commission uingt personages, chascun desquelz auoit cinquante ans passez, dont les cinq allerent deuers les Doriens qui habitent en

Asie, & deuers les habitans des isles, iusques à celles de Lesbos & de Rhodes : cinq autres suyuirét tout le país de l'Hellepont & de la Thrace, iusques à la cité de Byzance : les autres cinq eurent charge d'aller en la Bœoece, en la Phociede, & par tout le Peloponèse, & de là passer par le país des Locriens en toute la terre ferme adiacente, iusques en la contree de l'Acarnanie & de l'Ambracie : & les autres allerent premier en l'isle d'Eubœe, & de là aux Oeræiës & par tout le gouffre de Malea, aux Phtiotes, aux Achaiës & aux Theffaliens, faisans des remonstrances par tout aux peuples pour leur suader d'euoyer à Athenes, & assister au conseil qui s'y tiendrait pour la pacification & union de toute la Grece : mais il ne s'en feit du tout rien à la fin, & ne s'assemblerent point lescdites uilles Grecques, par les menées des Lacedæmoniens, qui l'empescherent, comme lon dit : car ce fut au Peloponèse que ceste semonce fut premierement reiettee . I'ay bien uoulu escrire cela, pour donner à cognoistre la magnanimité de Pericles, & comment il auoit le cueur & l'entendement eleué . Au demourant, es charges de Capitaine, il estoit fort estimé de ce qu'il menoit les gens à la guerre scurement : car iamais de sa uoulüté il ne hazarda la bataille, là ou il sentist qu'il y eust grande doubte ny apparent danger : & n'estimoit pas bons Capitaines, ny ne uouloit ensuyure ceulx qui auoyent gaigné de grandes

victoires par f'estre aduéturez, encore qu'on les
 louast & estimast beaucoup: ains souloit dire,
 20 Que si autre que luy ne les menoit à la bouche-
 20 rie, entât qu'en luy estoit, ilz demoureroyét im-
 mortelz. Et uoyant que Tolmides filz de Tol-
 mæus, sur la confiance de ses prosperitez pas-
 sées, pour lesquelles il estoit grâdement prisé
 & honoré à cause de ses beaux faicts d'armes,
 se preparoit pour entrer sans propos ny occa-
 sion quelconque dedans le país de la Bœoce, &
 auoit ia induit mille des plus hardiz & plus
 uaillans ieunes hommes de la uille, à s'offrir
 uoluntairement pour aller quand & luy en ce
 uoyage, oultre & par dessus le demourant de
 l'armee qu'il auoit leuee, il tascha à l'en diuer-
 tir, & le retenir à la maison par remonstrances
 qu'il luy feit publiquement deuant le peuple:
 là ou il dit une parole qui a bié depuis esté no-
 20 tee, Que fil ne uouloit croire au conseil de
 20 Pericles, à tout le moins qu'il attendist le tēps,
 20 qui estoit le plus sage conseiller que lon sçau-
 20 roit auoir. Ce propos sur l'heure fut moyene-
 ment loué, mais peu de iours apres quand on
 apporta nouvelle, que Tolmides luy mesme
 auoit esté tué en une bataille qu'il auoit per-
 due pres la uille de Coronee, là ou plusieurs
 autres gens de bien & uaillans hommes Athe-
 niens estoient demourez morts aussi, cela
 augmenta grandement la reputation & la bié-
 uueillance de la commune enuers Pericles,

pource qu'il en fut estimé homme sage & qui aimoit ses citoyens . Mais de tous ses uoyages qu'il feit estant Chef de l'armée d'Athenes, ce luy de la Cherronese fut le plus aimé & le plus estimé, à cause qu'il fut tressalutaire à tous les Grecs habitās au pais: car oultre ce qu'il y mena mille bourgeois d'Athenes pour y habiter, en quoy faisant il fortifia les uilles d'autant de bons hommes, il rempara encore l'encouleure qui empesche que ce ne soit une isle, avec une fortification qu'il tira d'une mer à autre: de maniere qu'il garentit le pais des courses, surprises & pilleries des Thraces habitans à l'enuirō, & en ietta hors une trespernicieuse guerre, dōt la prouince estoit continuellement trauaillee, pour le uoisinage des Barbares leurs uoifins ou habitans parmy eulx, qui ne uiuoient que de brigandage . Aussi fut il grandement estimé & renommé entre les estrangers, quand il enuironna tout le Peloponese, partant du port de Peges en la coste Megarique avec une flotte de cent galeres: car il ne pilla pas seulement les uilles maritimes, comme auoit fait deuant luy Tolmides, mais entrant bien auant en la terre arriere de la mer, avec les hommes de guerre qu'il auoit sur ses galeres, feit retirer les uns au dedans de leurs murailles, tant il leur donna d'effroy, & en la contree de Nemees desfeit en bataille les Sicyoniens qui l'attendirent en campagne, & en dressa un trophée pour marque

de sa uictoire . Et embarquant sur ses uaisseaux quelque renfort de gens de guerre qu'il prit en Achaïe pour lors alliee des Atheniens , passa en la terre ferme qui est uis à uis , & cinglant oultre la bouche de la riuere d' Achelous , alla courir toute la prouince d' Acarnanie , là ou il renferma les Oeneades au dedans de leurs murailles : & apres y auoir gasté & destruit tout le plat país s'en retourna à la maison , s'estant fait cognoistre en ce uoyage Capitaine redoutable , aux ennemis , & executant seurement , à ses citoyens : car il n'aduint pas un seul sinistre accident , par cas fortuit ou autrement , en toute celle expedition , à ceulx qui y furent soubs sa charge . Depuis estant allé avec une grosse flotte de uaisseaux fort bié en poinct au royaume de Pont , il y traitta humainement les citez Grecques , & feit tout ce qu'elles luy requirent , donnant à cognoistre aux Barbares habitans à l'environ , & aux princes & Roys d'iceulx , la grandeur de la puissance des Atheniens , qui nauigeoyent sans rié craindre par tout iusques ou bon leur sembloit , tenans toute la mer en leur obeïssance . Dauantage il laissa aux Sino-piens treze galeres avec quelque nombre de gens de guerre soubs la charge du Capitaine Lamachus , pour les defendre à l'encontre du tyran Timesileon , lequel ayant esté dechassé avec ceulx de sa ligue , Pericles feit publier & passer un edict à Athenes , que six cents bour-

geois de la uille qui uoudroyent, sans contraindre, peussent aller demourer à Sinope : là ou leur seroyent departiz les biës & heritages qui auoyent esté au tyran & à ses adherens . Mais au reste il n'obtempéra pas aux folz appetits de ses citoyens , ny ne se laissa pas aller à leur conuoitise trop eleuee pour se ueoir des forces si grandes , & la fortune si fauorable , iusques à uouloir de rechef attenter de conquerir l'Ægypte , & remuer les prouinces maritimes de l'empire du Roy de Perse : car il y en auoit desia plusieurs qui estoient espris du maleureux & calamiteux desir de la Sicile, que depuis Alcibiades alluma dauantage . Et encore y en auoit il , qui songeoyent desia à conquerir la Thoscane & l'empire de Cartage : ce qui n'estoit pas du tout sans apparence , ny sans occasion d'esperance , ueu la grande estendue de la seigneurie qu'ilz tenoyét, & l'heureux cours de leurs affaires qui leur succedoyent à soubhait . Mais Pericles empescha ceste faillie , & retrenchâ toute ceste curieuse conuoitise , employât la plus part de leur puissance à conseruer & asseurer ce qu'ilz auoyent acquis , estimant que c'estoit beaucoup fait que d'engarder que les Lacedæmoniens ne s'accressent : car il leur estoit tousiours contraire , comme il declara en plusieurs autres endroits , & mesmement par ce qu'il feit en la guerre sainte . Car les Lacedæmoniens ayans osté aux Phociens la super-

intendance du temple d'Apollo en la uille de Delphes, qu'ilz auoyent usurpee, & l'ayans remise entre les mains des Delphiés, si tost qu'ilz eurent le dos tourné, Pericles y alla aussi avec une armee, qui y remeit les Phociens. Et cōme les Lacedæmoniens eussent fait engrauer sur le front d'un loup de cuyure la prerogatiue que les Delphiens leur auoyent ottroyee, de pouuoir les premiers proposer leurs demandes à l'oracle, luy ayant obtenu le mesme droit des Phociens, le feit engrauer sur le flanc droit de la mesme statue du loup de bronze. Et qu'il soit uray qu'il ait sagement contenu les forces des Atheniens au dedans de la Grece, les effects le tesmoignent: car premierement ceulx de l'Eubæe se rebellerent, contre lesquelz il mena incontinent l'armee d'Athenes: & tout soudain luy uindrent nouvelles d'un autre costé comme les Megariens auoyent aussi pris les armes contre eulx, & que les ennemis estoyēt ia en grosse puissance dedans le pais d'Attique, soubz la conduitte de Plistonax Roy de Lacedæmone. A l'occasion dequoy il s'en retourna incontinent en diligence, pour prouueoir à ceste guerre qui estoit au dedans de l'Attique mesme: si n'ozapas se presenter en bataille cōtre si grand nombre de bons combatans, mais sachant que le Roy Plistonax, qui estoit encore fort ieune, se gouernoit par le conseil de Cleandrides principalement, pource que les

Ephores le luy auoyent baillé pour luy assister, & pour le conseiller & le guider, il essaya de le corrompre secretement : & l'ayant bien tost gagné par argent , luy persuada qu'il remenast les Peloponesiens hors du pais d'Attique . ce qu'il fit . Mais quand les Lacedæmoniens ueirent l'armee rompue , & que les peuples festoyent retirez chascun en sa uille , ilz en furent si courroucez, qu'ilz condamnerēt le Roy en une grosse amende : laquelle luy ne pouuant payer , fut contraint de s'absenter de Lacedæmone : & Cleandrides s'en estant fouy de bonne heure , fut par contumace condamné à mourir. Cestuy Cleandrides estoit pere de Gylippus qui desfeit depuis les Atheniens en la Sicile , auquel il semble que nature imprima l'auarice comme une maladie hereditaire passant de pere en filz : car en ayāt aussi esté ignominieusement attainct & conuaincu pour aucuns uillains actes qu'il combeit , il en fut bāny de Sparte , comme nous auons plus au long declaré en la uie de Lyfander. Mais comme Pericles en la reddition des cōptes de ceste charge la , eust couché un article de despense de dix talents , qu'il disoit auoir employez ou il falloit , le peuple l'alloua , sans uouloir enquerir comment , ny en quoy , ny aduerer sil estoit uiray : & y en a quelques uns, entre lesquelz est le philosophe Theophrastus, qui escriuent que

a Six mil-
le escus.

Pericles enuoyoit par chascun an ^a dix talents à

Sparte, avec lesquelz il entretenoit ceulx qui y auoyent authorité, à fin qu'on ne leur feist point la guerre, non qu'il acheptast la paix, mais bien le temps : durant lequel, se preparant tout à loisir, il peust auoir meilleure commodité de soustenir la guerre. Si tost donc que l'armee des Peloponesiens fut hors de l'Attique, il s'en retourna contre les rebelles, & passa en l'isle d'Eubœe avec cinquante uoiles, & cinq mille combatans à pied tous bien armez, & là subiugua toutes les uilles qui festoyent soubleuees, chassa les Hippobates, qui estoyent les plus renommez d'entre les Chalcidiens, tât pour leurs richesses que pour leur uaillance & prouesse : & chassa aussi semblablement les Estieiens, qu'il feit uider hors de tout le país, & en leur uille logea des bourgeois d'Athenes seulement. Et la cause pour laquelle il les traittoit ainsi rigoureusement, sans leur uouloir pardonner, estoit pource que eulx ayans pris une galere d'Athenes prisonniere, ilz auoyent fait mourir toutes les personnes qui estoyent dessus. Depuis ayant esté faite une trefue pour trente ans entre les Atheniens & les Lacedæmoniens, il feit decerner la guerre contre ceulx de l'isle de Samos, les chargeant de ce que leur ayant esté enioint de par les Atheniens, qu'ilz eussent à pacifier les querelles qu'ilz auoyent contre les Milesiens, ilz n'auoyent pas uolü obeir. Mais pource que lon a opinion qu'il en-

reprit ceste expedition contre Samos en fa-
ueur de Aspasia, il ne fera point hors de pro-
pos de rechercher & declarer en cest endroit,
qui estoit ceste femme, & quel artifice ou puis-
sance si grande il y auoit en elle, qu'elle peust
ainsi prendre en ses retz les principaux hom-
mes qui s'entremettoyent pour lors du gou-
uernement de la chose publique, & que les
philosophes mesmes parlassent tant & si am-
plement d'elle. Tout premierement donques,
c'est chose bien certaine qu'elle estoit natifue
de la uille de Milet, fille d'un Axiochus, la-
quelle suyuant l'exemple d'une ancienne cour-
tisane d'Ionie nommee Thargelia, s'accointa
des principaux & plus grands personages de
son temps: car ceste Thargelia estant belle de
uifage, & ayant bonne grace, avec un esprit
uif, & doulx langage, eut l'accointace de plu-
sieurs grands personages de la Grece, & gai-
gna au seruice du Roy de Perse tous ceulx qui
s'approcherent d'elle, si bien qu'elle sema par
les uilles de la Grece de grands commencemés
de la faction Medoise, pource que c'estoyent
tous les plus grands & les plus puissans hom-
mes qui fussent en chasque uille de qui elle
s'accointoit. Mais quant à Aspasia, les uns di-
sent que Pericles la hanta comme femme sça-
uante & bien entendue en matiere de gou-
uernement d'estat: car Socrates mesme l'alloit
aussi ueoir quelquefois avec ses amis, & ceulx
qui

qui la hantoyent y menoyent aucunes fois leurs propres femmes pour l'ouir deuifer, combien qu'elle menast un train qui n'estoit gueres beau ny honneste, pource qu'elle tenoit en sa maison de ieunes garces qui faisoient gaing de leurs corps. Et Æschines escrit que Lyficles, un reuendeur de bestail, qui parauant estoit homme de basse & uile nature, se fait le premier homme d'Athenes par la frequentation qu'il eut avec ceste Aspasia, depuis la mort de Pericles: & au liure de Platon intitulé Menexenus, encore que le commencement soit escrit par maniere de ieu & de rifee, il y a cela cōme de ueritable histoire, que ceste femme auoit le bruit d'estre hātee par plusieurs Atheniēs pour apprendre d'elle l'art de Rhetorique. Toutefois il semble plus uray-semblable, que l'affectiō que luy portoit Pericles uint plus d'amour que d'autre cause: car il auoit bien espousé une femme qui estoit sa parente, & qui parauant auoit esté mariee à Hipponicus, duquel elle auoit eu Callias surnommé le riche, & eut depuis Xantippus & Paralus de Pericles: mais ne luy estant point sa compagnie agreable, il la bailla, du bon gré & consentement d'elle mesme, à un autre, & prit Aspasia, laquelle il aima singulierement: car toutes les fois qu'il sortoit de sa maison pour aller en la place, ou qu'il en retournoit, il la saluoit en la baisant. Au moyen dequoy es anciennes Comedies elle

est appelée en plusieurs lieux la nouvelle Omphale, & quelquefois Deïanira, & aucunes fois Iuno : mais Cratinus l'appelle tout ouuertement putain en ces uers,

» Elle luy a sa Iuno enfantee

» Aspasia la putain effrontee.

Et semble qu'il en eut un bastard : car Eupolis l'introduit en une siene Comedie nommee Demosij, interrogant ainsi Pyronides,

» Mon filz bastard est il encore en uie?

Et puis Pyronides luy respond:

» Il fust pieça homme fait pour certain,

» N'estoit qu'il craint ceste male putain.

Brief ceste Aspasia fut tã celebree & tant renommee, que Cyrus, celuy qui cõbatit cõtre le Roy Artaxerxes son frere pour l'empire de Perse, appella Aspasia celle de ses cõcubines qu'il aimoit pl⁹, laquelle parauãt s'appelloit Milto, estãt natifue de la Phocide, fille de Hermotimus : & ayant Cyrus esté tué en la bataille, elle fut prise & menee au Roy son frere, enuers lequel elle eut depuis beaucoup de credit. Cela m'est uenu en memoire en escriuant ceste uie, & m'a semblé que ceust esté trop durement fait de le reietter ou obmettre. Mais pour retourner à nostre propos : On charge Pericles d'auoir fait decerner la guerre contre ceulx de Samos en faueur de ceulx de Milet, à la requeste d'Aspasia, à cause que ces deux citez auoyent guerre ensemble pour la uille de Priene, &

estoyent les Samiens les plus forts : mais les Atheniens leur commanderent qu'ilz eussent à laisser la uoye des armes, & à uenir plaider leur different deuant eulx, pour leur en estre fait droit : ce qu'ilz ne uoulurent faire : parquoy Pericles y alla, & y abolit le gouvernement du petit nombre de la noblesse, prenant pour ostages cinquante des principaulx personages de la uille, & autant d'enfans, lesquelz il meit en depost en l'isle de Lemnos . Toutefois il y en a qui disent, que chascun desditz ostages luy uoulut donner un talent : oultre lesquelz luy en furent encore presentez plusieurs autres, par ceulx qui ne uouloyent point que l'authorité souveraine du gouvernement fust mise entre les mains de la commune. Dauantage Pissuthnes Persien lieutenant du Roy de Perse, pour quelque amitié qu'il portoit à ceulx de Samos, luy enuoya dix mille escus, à fin qu'il leur pardonnast : mais de tout cela Pericles n'en prit iamais rien, ains ayant fait en Samos tout ce qu'il auoit proposé d'y faire, & y ayant estably un gouvernement populaire, s'en retourna à Athenes . Mais les Samiens se rebellerent incontinent apres, ayans recouuré leurs ostages par le moyen de ce Pissuthnes qui les desrobba, & leur fournit ce qui estoit necessaire pour soustenir la guerre . Parquoy Pericles retourna une autre fois

contre eulx , lesquelz il ne trouua point oyseux ny estonnez en façon quelconque , ains tresbien deliberez de le receuoir , & combatre pour la principaulté de la mer : si y eut une grosse bataille entre eulx aupres de l'isle qui s'appelle Tragia : & la gaigna Pericles , ayant desfait fort glorieusement , avec quarante & quatre uoiles seulement , ses ennemis qui en auoyent soixante & dix , dont les uingt estoient uaisseaux de guerre : & quand & quand poursuyuant sa uictoire , il gaigna aussi le port de Samos , & teint les Samiens assiegez dedans leur uille , ou ilz auoyent encore bien la hardiesse de sortir aucunefois , & combatre au deuant de leurs murailles : mais depuis estant arriué à Pericles un renfort de plus grand nombre de uaisseaux , ilz furent adonc enfermez de tout poinct . Et lors Pericles prenant soixante galeres se ietta en pleine mer , uoulant , comme aucuns disent , aller rencontrer , le plus loing de la uille qu'il pourroit , quelques uaisseaux Phœniciens , qui uenoyent au secours de ceulx de Samos : ou , comme dit Stesimbrotus , pour s'en aller en Cypre : ce qui ne me semble pas uray-semblable . Mais à quelque intention qu'il le feist , il commeit une treslourde faulte : car Melissus filz de Ithagenes grand philosophe , estant pour lors Capitaine des Samiens , uoyant qu'il estoit demou-

ré peu de uaisseaux au siege deuant la uille, & encore que les Capitaines qui en auoyent la charge, n'estoyent pas gens gueres experimentez, persuada à ses citoyens de faire une saillie sur eulx : & y eut bataille donnee, que les Samiens gagnerent, ou ilz prirent plusieurs Atheniens prisonniers, & meirent plusieurs de leurs uaisseaux à fond : au moyen dequoy estans demourez seigneurs de la marine, ilz meirent dedans leur uille plusieurs choses necessaires pour la guerre, dont ilz auoyent faulte auparauant : toutefois Aristote escrit, que Pericles mesme en personne auoit desia auparauant esté uaincu en une bataille nauale par Melissus. Au demourant, les Samiës pour rendre aux prisonniers d'Athenes pareille iniure qu'ilz auoyent receuë d'eulx, leur engrauerent sur le front des cheufches, pource que la cheufche est la marque de la monnoye d'Athenes, ne plus ne moins que les Atheniens auoyent imprimé sur les fronts de leurs prisonniers une Samæne, c'est à dire, une sorte de nauire Samiëne, basse de prouë, mais creuse & large de uentre, de sorte qu'elle est bonne à cingler en haulte mer, & legere à la uoile : & a esté ainsi appelée, pource que la premiere de ceste façon fut bastie en l'isle de Samos par le tyran Polycrates, qui la y fit faire. Lon dit que pour l'impression de ces caracteres, le poëte Aristophanes, par une maniere

de moquerie couuerte, dit en un passage de ses Comedies.

30 Les Samiens sont hommes fort lettrez.

Pericles donques aduertiy de la route de son armee, s'en retourna incontinent au secours. Melissus luy alla au deuant, & luy donna la bataille, qu'il perdit, & fut rembarré iusques dedans la uille, ou Pericles l'enferma d'une closture de muraille tout à l'entour, aimant mieulx emporter la uictoire & prendre la uille par longueur de temps & avec despense, que par exposer ses citoyens au danger d'estre tuez ou blecez: mais toutefois quand il ueit qu'ilz se faschoyent de la longueur, & qu'ilz uouloyent à toute force uenir aux mains, de maniere qu'il estoit bien malaisé de les retenir, il diuisa toute son armee en huit troupes, lesquelles il feit tirer au sort, & celle à qui escheoit une febue blanche demouroit en repos à faire bonne chere pendant que les autres sept cōbatoyent:& dit on que de là uient, que lon appelle encore auiourd'hui un iour blanc, auquel on a fait bonne chere, & receu du plaisir, à cause de la febue blanche. Si escrit l'historiē Ephorus, que ce fut là premierement que lon commença à user d'engins de baterie pour abatre grosses murailles, & que Pericles en trouua la nouueauté fort esmerueillable: car ce fut Artemon un ingenieur qui les inuenta, lequel se faisoit porter par tout dedans une

chaire, pour conduire & haster les ouurages, à cause qu'il estoit impotent d'une iambe, & que pour ceste cause il fut appellé Periphoretos. Mais Heraclides le Pontique reprét en cela Ephorus par les uers d'Anacreon, esquelz Artemon est nommé Periphoretos, plusieurs aages auant ceste guerre de Samos: & dit que ce Periphoretos estoit un homme fort delicat, & qui craignoit toutes choses si follement, que la plus part du temps il ne bougeoit de sa maison, ou il se tenoit tousiours assis, ayant deux de ses seruiteurs à ses costez, qui luy tenoyent sur la teste un pauois de cuyure, de peur qu'il ne tumbast rien sur luy: & si d'adventure il estoit quelquefois contraint de sortir hors de son logis, il se faisoit porter dedans un petit lict suspendu bien pres de terre, & que pour ceste cause il fut surnommé Periphoretos. A la fin, au bout de neuf mois, les Samiens furent contraints de se rendre, & Pericles fait abbatre & raser leurs murailles, leur osta tous leurs uaisseaux, & les condamna en une grosse somme de deniers, dont ilz payerent promptement une partie, & le reste à certain terme qui leur fut prefix, pour la seureté duquel payement ilz donnerent ostages. Mais Duris le Samien amplifie les choses en cest endroit fort pitoyablement, pour charger les Atheniës, & Pericles mesme, d'inhumaine cruauté, dequoy Thucydides, ny Epho-

rus , ny Aristote mesme , ne font aucune mention : & si ne me semble pas que ce qu'il en escrit soit ueritable , ç'est à sçauoir , qu'il fait mener les Capitaines des galeres , & les soldards mesmes Samiens , sur la place de la uille de Milet , ou il les fait attacher sur des ais de bois par l'espace de dix iours , au bout desquelz les pauures gens n'en pouans plus , furent assommez à coups de bastons , dont on leur froissa les testes , & puis fait on ietter les corps , sans permettre qu'ilz fussent ensepulturez . Ainsi Duris estant assez coustumier , encore ailleurs ou il n'y a rien qui luy touche particulièrement , d'extrauaguer hors de la uerité , semble en ce lieu augmenter de paroles , outre le deuoir , les calamitez de son pais , pour en calumnier les Atheniens , & les en rendre odieux . Ayant doncques Pericles subiugué la uille de Samos , il s'en retourna à Athenes , là ou il fait honorablement inhumer les os de ceulx qui estoient morts en ceste guerre , & luy mesme fait le blason funebre à leur louange selon la coustume , dont il fut merueilleusement estimé : de sorte que quand il descédit de la chaire ou il auoit harengué , les autres Dames de la uille luy uenoyent baiser les mains , & luy mettoyent des chapeaux de fleurs & des couronnes sur la teste , comme lon fait aux champions uictorieux , quand ilz retournent des ieux ou ilz ont

emporté le pris: Mais Elpinice s'approchant de
 22 luy, Vrayement, dit elle, ce sont de beaux faicts
 22 que les tiens, Pericles, & bien dignes de cha-
 22 peaux de triumphe, de nous auoir perdu beau-
 22 coup de bons & uailans citoyens, non point
 22 en guerroyant les Medois, Phœniciens & Bar-
 22 bares, comme fait mon frere Cimon, ains en
 22 destruisant une cité qui est de nostre propre na-
 22 tion & nostre alliee. A ces paroles respondit
 Pericles tout doucement, en riant, ce uer d'Ar-
 chiloclus,

22 Si uieille estant ne te parfume plus.

Mais Ion escrit qu'il se glorifia grandement, &
 conceut une merueilleuse opinion de soy mes-
 me depuis qu'il eut subiugué les Samiens, di-
 sant qu'Agamemnon auoit demouré dix ans à
 prendre une cité barbare, & luy en neuf mois
 auoit conquis la plus puissante uille de toute la
 nation Ionique. Si n'estoit pas sans occasion
 qu'il s'attribuoit tant de gloire: car certainemēt
 il y eut grande doute & non moins de peril
 en telle conqeste, s'il est uray ce qu'en escrit
 Thucydides, qu'il s'en fallut bien peu que les
 Samiens n'ostassent la seigneurie & domina-
 tion de la mer à ceulx d'Athenes. Depuis estant
 ia la guerre Peloponesiaque en branle, comme
 ceulx de Corfou fussent guerroyez par les Co-
 rinthiens, il persuada au peuple Athenien d'en-
 uoyer secours aux Corfiots, & de ioindre à sa
 ligue ceste isle qui estoit puissante par mer, di-

sant que bien tost ilz auroyent les Peloponnesiens ennemis declarez . Si conclut le peuple à la suscitation de secourir ceulx de Corfou, & y fut enuoyé Lacedæmonien filz de Cimon avec dix galeres seulement, par une maniere de moquerie , pource que toute la maison de Cimon portoit affection & amitié grande aux Lacedæmoniens : & à ceste cause feit Pericles bailler ainsi petit nombre de uaisseaux à Lacedæmonien , & l'y enuoya malgré luy, à fin que sil ne faisoit en ceste charge aucun exploit digne de memoire, il en fust de tant plus soupçoné de fauoriser aux Lacedæmoniens : & tant qu'il uescut empescha tousiours, le plus qu'il peut, de paruenir les enfans de Cimon, comme n'estans point par leurs noms mesmes naturelz Atheniens, ains estrangers, pource que l'un s'appelloit Lacedæmonien, l'autre Theffalien, & le tiers Elien, & estoient tous nez d'une mere natieue du pais d'Arcadie . Mais Pericles estant blasme d'auoir enuoyé ces dix galeres seulement, qui estoit bien peu de secours pour ceulx qui leur en auoyent requis, & beaucoup de matiere à ceulx qui mesdisoyent de luy, il y en enuoya depuis encore d'autres en plus grand nombre, lesquelles arriuerent apres la bataille : de quoy les Corinthiens estans fort courroucez, s'en allerent plaindre au conseil des Lacedæmoniens, ou ilz proposerent plusieurs charges & plaintes à l'encontre des Atheniens, & au-

tant en feirent auffi les Megariés , allegans que ceulx d'Athenes leur auoyent defendu leurs ports, leurs estappes, & tout commerce & trafic es lieux de leur obeïſſance, qui estoit directement contre les loix communes, & contre les articles de paix accordez & iurez entre tous les Grecs. Dauantage les Æginetes se sentans foulez & trop uiolentement traittez, enuoyèrent ſecrettement faire leurs doleances & lamentations aux Lacedæmoniens, n'ofans pas ouuertement ſe plaindre de ceulx d'Athenes. Sur ces entrefaittes la uille de Potidæe pour lors ſubiette aux Atheniens, & ayant eſté anciennement fondee par les Corinthiens, ſe rebella, & fut aſſiegee par les Atheniens, ce qui haſta bien la guerre. Ce neantmoins ambassadeurs furent premieremēt enuoyez à Athenes ſur ces plaintes, & Archidamus Roy des Lacedæmoniens feit tout ce qu'il peut pour accorder la plus part de ces differents, en appaiſant & addouciſſant leurs alliez, de maniere que les Atheniens n'euffent point eu la guerre pour les autres charges qu'on leur mettoit ſus, filz ſe fuſſent uoulu condeſcendre à reuoquer le decret qu'ilz auoyent fait contre les Megariens : au moyen dequoy Pericles, qui reſiſta plus que nul autre à ceſte reuocation, & qui aguifa & incita le peuple à perſeuerer opiniaſtremment en ce qu'il auoit une fois ordonné contre les Megariens, fut ſeul eſtimé cauſe & autheur de la

guerre Peloponesiaque . Car on dit que les Lacedæmoniens enuoyerent des ambassadeurs à Athenes sur ce poinct la : & comme Pericles alleguast une loy qui defendoit d'oster le tableau, sur lequel un edict public auroit une fois esté escrit , il y eut l'un des ambassadeurs de Lacedæmone nommé Polyarces , qui luy dit : Et bien ne l'oste pas, mais tourne le seulement, car vous n'avez point de loy qui defende cela . Ce mot fut trouué plaisant, mais non pour cela Pericles n'en fleschit iamais : & pourtant semble il qu'il auoit quelque occasion secrette de propre & particuliere malueillance contre eulx , mais la uoulant couvrir d'une cause publique & manifeste, il leur osta & retrencha les terres sacrees, qu'ilz mettoyét en labourage : & pour ce faire, meit en auant un decret, Que lon leur enuoyast un herault pour les sommer de s'en deporter , & que le mesme herault allast aussi deuers les Lacedæmoniens pour en accuser deuant eulx les Megariens . Il est bien certain que ce decret fut mis en auant par Pericles, aussi n'y a il rien qui ne soit iuste & raisonnable : mais il aduint que le herault qui y fut enuoyé mourut, & pensa lon que les Megariens l'eussent fait mourir . Parquoy Charinus incontinent proposa un decret contre eulx , Qu'ilz fussent declarez ennemis mortelz des Atheniës à iamais, sans espoir de reconciliation quelconque : & que si un Megarien mettoit le pied seulement

dedans le territoire d'Attique, qu'il fust puny de mort : & que les Capitaines annuelz quand ilz feroient leur serment ordinaire, iurassent entre les autres articles, que tous les ans ilz entreroient en armes par deux fois dedás le païs & au dommage des Megariens : & que le herault Anthemocritus fust enterré au lieu qui s'appelloit lors les Portes Thriasiennes, & maintenant s'appelle Dipylon . Mais les Megariens nians fort & ferme qu'ilz eussent esté cause de la mort de cestuy Anthemocritus, en reiettoyét la cause sur Aspasia & sur Pericles, allegás pour tesmoignage ces uers du poëte Aristophanes en sa Comedie intitulee les Acharnes, qui sont si uulgaires que le commun peuple mesme les a en la bouche :

- 23 Noz ieunes gens enyurez s'en allerent
 23 Deuers Megare un iour, ou ilz emblerent
 23 Vne putain qui Simatha s'appelle :
 23 Ceulx de Megare irritez, au lieu d'elle
 23 S'en sont uenus par furtiue saisie
 23 Enleuer deux des garfes d'Aspasie .

Ainsi est il bien malaisé de sçauoir dire à la uerité la premiere origine & cause primitiue de ceste guerre : mais bien sont tous les historiens d'accord, que Pericles fut principalement auteur de ce que le decret fait à l'encontre des Megariens, ne fut point reuoqué . Et tiennent aucuns que ce fut par uraye magnanimité avec bon iugement, qu'il persista en ce qui luy sem-

bla le plus expedient: pource qu'il estimoit que ce commandement des Lacedæmoniens, n'estoit qu'un essay, pour sonder si les Atheniens leur uoudroyent ceder: & que leur obtemperer en cela, seroit euidemment confesser qu'ilz se sentoient les plus foibles: les autres au contraire disent, que ce fut par une arrogance & opiniastrété, pour montrer son autorité & sa puissance, qu'il mesprisa les Lacedæmoniens. Mais la plus mauuaise occasion, & qui toutefois a plus de tesmoings qui la confirment, se racompte presque en ceste maniere: Phidias le faiseur d'images, comme nous auons ia dit auparauant, auoit entrepris de faire l'image de Pallas, & estant amy de Pericles auoit fort grand credit enuers luy: cela luy suscita l'enuie de quelques malueillâs, lesquelz uoulans sonder quel iugement le peuple feroit de Pericles, attiltrent Menon l'un des ouuriers qui besongnoient sous Phidias, & le feirent uenir sur la place requerir au peuple seureté publique, pour pouuoir deceler & accuser Phidias d'aucun crime par luy commis. Le peuple receut son indice, & fut son accusation ouïe en pleine assemblee du peuple sur la place, là ou il ne fut fait aucune mention de larcin, pource que Phidias, par le conseil & aduis de Pericles, auoit tellement apposé & appliqué l'or en la composition de l'image des le commencement, que lon le pouuoit oster tout, & le peser: ce

que Pericles allegua adonc publiquement aux accusateurs, leur disant qu'ilz le pelassent. Mais la gloire de ses ouurages luy suscitoit celle enuie, pour autant mesmement qu'ayant engraué sur l'escu de la Deesse la bataille des Amazones, il y auoit entaillé son portraict au naturel, sous le personnage d'un uieillard chaulue, qui leue une grosse pierre à deux mains : & y auoit aussi fait la portraiture de Pericles fort belle apres le naturel, qui combattoit contre une Amazone en tel geste, que sa main haulsant une iaueline au deuant du uisage de Pericles, par un singulier artifice semble uouloir cacher & couvrir celle similitude, laquelle neantmoins se decouure & se monstre d'un costé & d'autre. Si fut Phidias mis en prison, là ou il mourut de maladie, ou bien de poison que ses ennemis luy preparerēt, cōme aucuns disent, pour faire dauantage sousspeçonner & calumnier Pericles. Comment que ce soit, le peuple donna immunité & affranchissement de tous subsides à l'accusateur Menon, suyuant un decret qu'en meit en auant Glycon, & enioignit aux Capitaines qu'ilz le prissent en leur sauuegarde, & eussent soing de la seureté de sa personne. Environ ce mesme temps fut aussi Aspasia accusée de ne croire point aux Dieux, estant l'accusateur Hermippus faiseur de Comedies, qui la chargea dauantage qu'elle seruoit de macquerele à Pericles, receuāt en sa maison des bour-

geois de la uille, dont Pericles iouissoit. Diopithes au mesme temps meit en auant un decret, Que lon feist inquisition des mescreās qui n'adiouxtoyent point de foy aux choses diuines, & qui enseignoient certains propos nouveaux touchant les effects qui se font en l'air & au ciel, tournant la suspicion sur Pericles à cause d'Anaxagoras. Le peuple receut & approuua ceste inquisition : & adonc fut aussi proposé par Dracōtides, Que Pericles meist le compte de l'argent qu'il auoit despendu, entre les mains des Pritanes, qui estoient comme superintendans des finances, & que les iuges qui auroient à en iuger, donnassent leurs sentences dedans la uille dessus l'autel. Mais Agnon osta ce mot du decret, & y meit au lieu, que le proces fust iugé par quinze cents iuges, & que l'actiō fust nommee de larcin, ou de cōcussion, ou d'iniustice, comme lon uoudroit. Or quant à Aspasia, il la sauua par la pitié & compassion qu'il feit aux iuges, en priant de tresgrande affection pour elle, & plorant à chauldes larmes, pendant que la cause se plaidoit, ainsi comme l'escrit *Æschines* : mais quant à Anaxagoras, craignant qu'il n'en peust faire autant, il l'enuoya hors la uille, & luy mesme l'accompagna. Au demourant, uoyant qu'il auoit encouru la malegrace du peuple pour le faict de Phidias, & à ceste cause redoubtant l'issue du iugement, il enflamma la guerre qui reculoit tousiours, &

ne faisoit

ne faisoit encore que fumer, esperant que par ce moyen il feroit esuanouir les charges que lon luy mettoit sus, & abbatroit l'euie que lon auoit contre luy, par ce que le peuple se trouuant en grands affaires & pleins de danger, se ietteroit du tout entre ses bras, & se commettrait à luy seul, tant il auoit acquis d'authorité & de reputation. Ce sont les causes pour lesquelles il ne uoulut pas souffrir, à ce que lon dit, que les Atheniens cedassent en rien aux Lacedæmoniens, toutefois on ne scauroit qu'en asseurer à la uerité: mais ceulx de Lacedæmone sachans bien que filz le pouuoÿt oster & ruiner, ilz iouiroÿent mieulx à leur plaisir des Atheniens, leur maderent qu'ilz eussent à purger leur uille du crime Cylonien, pource qu'ilz scauoÿent bien que la race de Pericles du costé de sa mere en estoit entachée, ainsi comme l'escrit Thucydides. Mais ceste espreuue leur tourna tout au rebours de l'esperance de ceulx qui y furent enuoyez pour cest effect: car au lieu de faire souspeçonner & calumnier Pericles, ses citoyens l'en honorerent dauantage, & s'en fierent encore plus que deuant en luy, d'autant qu'ilz uoyoyent que les ennemis le craignoÿent & le haïssoyent ainsi. Parquoy auant que le Roy Archidamus entraist avec l'armée des Peloponesiens dedans le pais d'Attique, il predict aux Atheniens, que si d'adventure Archidamus en gastant & destruisant le plat

païs à l'enuiron , espargnoit ses terres & ses biés pour l'amitié & l'hospitalité qu'ilz auoyēt entre eulx , ou plus tost pour donner occasion à ses malueillans de le calumner, que des lors il donnoit à la chose publique les terres & les maisons qu'il auoit aux champs . Si descendirent les Lacedæmoniens & leurs alliez & confederez avec grosse puissance au païs de l'Attique, sous la conduite du Roy Archidamus, & en ruinant tout par ou ilz passoyent entrerent iusques au bourg d'Acharnes , là ou ilz se camperent , estimans que les Atheniens ne les y souffriroyent iamais , ains leur sortiroyent à l'encontre pour defendre leur païs , & monstrier qu'ilz n'auoyent point le cueur failly . Mais Pericles consideroit qu'il seroit trop dangereux de hazarder la bataille, ou il estoit question de la propre uille d'Athenes , contre soixante mille combatans à pied, tant du Peloponese que de la Bœoce : car autant y en auoit il au premier uoyage qu'ilz y feirent . Et quant à ceulx qui uouloyent combatre à quelque peril que ce fust , & qui perdoyent patience de uoir ainsi destruire leur païs deuant leurs yeux, il les reconfortoit & appaisoit, en leur remonstrant,

„ Que les arbres taillez & coupeez reuenoyent
 „ en peu de temps, mais qu'il est impossible de re-
 „ couurer les hommes quand on les a une fois
 „ perdus. Toutefois il ne faisoit iamais assembler le peuple en conseil , craignant qu'il ne fust

forcé par la multitude à faire aucune chose contre sa uoulûté:ains comme le sage pilote, quand la tourmente le surpré en haulte mer, donne bon ordre à toutes choses en sa nauire, & tient ses defenses toutes prestes, faisant ce que son art requiert, sans s'arrester aux larmes ny aux prieres des passagers qui se tourmentent d'effroy:& tirent du cueur:aussi luy ayant bien fermé la uille, & disposé de bonnes & seures gardes par tout, se gouernoit par son iugement, sans se soucier de ceulx qui crioyent & se courrouceoyent cõtre luy: encore qu'il y eust beaucoup de ses amis qui le prioient à grande instance, & plusieurs de ses ennemis qui le menaçoient & le chargeoyent, & que lon chantaist par la uille des chansons pleines de moqueries au deshonneur & au blasme de son gouuernement, cõme d'un Capitaine lasche de cueur, & qui par couardise abandonnoit toutes choses en proye aux ennemis. Cleon entre les autres estoit desia l'un de ceulx qui plus le piquoyent, & commenceoit à entrer en credit & en grace de la cõmune, par le courroux & malcontentement que lon auoit de Pericles, comme il appert par ces uers diffamatoires de Hermippus, qui furent alors publiez :

- » Roy des Satyres, pourquoy est-ce
- » Que tu n'as pas la hardiesse
- » De prendre en main picque ny lance,
- » Veu qu'en homme plein de uaillance

- » Tu nous parles si fierement
 » De la guerre ordinairement,
 » Et promet ton braue langage
 » D'un preux cheualier le courage ?
 » Puis tu enrages quand l'ardent
 » Cleon te donne coups de dent,
 » Ne plus ne moins que la cueux bise
 » Le trenchant de l'espée aguise .

Ce nonobstant, Pericles pour tout cela ne se
 meut en façon quelconque, ains endurant pa-
 tiemment, sans mot dire, toutes ces iniures,
 toutes ces moqueries & picqueures de ses mal-
 uueillans, il enuoya une flotte de cent uoiles
 au Peloponese, en laquelle il ne uoluit point
 aller en personne, ains demoura à la maison,
 pour tousiours retenir la uille en bride, iusques
 à ce que les ennemis se fussent retirez : & pour
 entretenir le commun peuple, qui se courrou-
 ceoit, & se faschoit de ceste guerre, il reconfor-
 toit les pauures en leur faisant distribuer quel-
 ques deniers publiques, & aussi par le departe-
 ment des terres cõquises: pource qu'ayant chas-
 sé tous les Æginetes entierement hors de leur
 país, il feit departir toute l'isle d'Ægine entre
 les bourgeois d'Athenes au sort: & si leur estoit
 encore quelque cõsolation en leurs aduersitez,
 d'entendre le dommage que souffroyent aussi
 leurs ennemis: car ceulx de l'armee de mer qui
 furent enuoyez au Peloponese gasterent beau-
 coup de plat país, & saccagerent plusieurs

bourgs & plusieurs petites uilles : & luymesme entrant par terre dedans le pais des Megariens, le courut & pilla tout, de maniere que les Peloponesiens receuans bien autant de dommage & de perte des Atheniens par mer, comme ilz leur en faisoient par terre, n'eussent pas si longuement duré ne soustenu la guerre, ains s'en fussent bien tost lassez, ainsi que Pericles leur auoir predict, fil n'y eust eu quelque diuine puissance, qui eust secrettemēt empesché le discours de la raison humaine . Car il aduint premiere-ment une pestilence si contagieuse & si uiolente, qu'elle emporta toute la fleur de la ieunesse, & affoiblit grandement les forces d'Athenes : & puis lés corps des suruiuans estans trauaillez de ceste maladie, les cueurs aussi consequemment s'en aigriront si asprement à l'encôte de Pericles, que leur ayant le mal troublé le sens, ilz se mutinerent cōtre luy, comme font les patients contre leur medecin, ou les enfans contre leur pere, iusques à luy faire oultrage, à la suscitation de ses malueillans, lesquelz alloient disans que la pestilence ne procedoit d'autre cause, que de la multitude des paisans qui festoyēt iettez à la foule dedás la uille, au cueur d'Esté, ou ilz estoient cōtraints de se loger pesle mesle plusieurs ensemble dessoubs petites tentes & cabannes estouffees, y demourans accroupis tout le long du iour, sans pouuoir rien faire, au lieu qu'ilz auoyent accoustumé de uiure en air

libre , pur & ouuert : dequoy, disoyent ilz , est cause celuy, qui par la fuscitatiõ de ceste guerre a entassé tout le peuple des champs dedans les murailles d'une uille, sans les employer à chose quelconque , ains les tenant enfermez comme des bestes brutes dedans une estable, & les laissant infecter l'un l'autre de contagion pestilente, en ne leur donnant aucun moyen de chāger un peu d'air, pour pouuoir à tout le moins nettement respirer . Parquoy Pericles uoulant remedier à cela, & aussi endommager un peu l'ennemy, feit armer cent cinquante uaisseaux , sur lesquelz il embarqua bon nombre de gens de pied armez, & de gens de cheual aussi. Cela donna grande esperance à ses citoyens, & nõ moins d'espouuementement aux ennemis uoyans une si grosse puissance. Mais comme il fut prest à faire uoile, estans ia tous ses gens embarquez, & luy mesme monté dedans la galere Capitainesse , il aduint que le Soleil eclipsa soudainement, & le iour faillit: ce qui effroya merueilleusement toute la compagnie, comme si c'eust esté un fort sinistre & dangereux presage . Parquoy Pericles uoyant le pilote de sa galere tout esperdu, & ne sachant qu'il deuoit faire, estendit son manteau, & luy en couvrir les yeux, puis luy demanda si cela luy sembloit mauuaise chose . Le pilote luy respondit, que non : & adonc luy dit Pericles, Il n'y a autre difference entre cecy & cela, sinon que le corps qui fait ces te-

nebres est plus grand, que mon manteau qui
 te bouche les yeux . Ces choses se disent ainsi
 es escoles des philosophes , mais toutefois Pe-
 ricles se mettant à la uoile , ne fait aucun ex-
 ploit digne d'un si grand equippage : & estant
 allé mettre le siege deuant la uille saincte d'E-
 pidaure , à l'heure que lon esperoit certaine-
 ment qu'elle deust estre prise , il fut contraint
 de leuer son siege pour la peste , qui fut si uio-
 lente , qu'elle ne fait pas mourir les Atheniens
 seulement , mais aussi tous autres , qui , pour peu
 que ce fust , s'approcherent d'eulx & de leur
 camp . A l'occasion dequoy , uoyant les Athe-
 niens fort indignez & irritez encontre luy , il
 essaya de les consoler & reconforter : mais il ne
 peut uenir à bout de les appaiser , ains à la plu-
 ralité des uoix luy osterent la charge de Capi-
 taine general , & le condamnerent en l'amende
 d'une grosse somme de deniers , laquelle ceulx
 qui disent le moins , escriuēt auoir esté de^aquin-
 ze talents , & ceulx qui disent le plus^b de cin-
 quante . L'accusateur soubscript en ceste con-
 damnation fut Cleon , comme dit Idomeneus ,
 ou Simmias , comme escrit Theophrastus : tou-
 tefois Heraclides le Pontique , met un nommé
 Lacratidas . Or quant à ses maulx publiques , ilz
 luy passerent bien tost , pource que le peuple
 laissa le courroux qu'il auoit contre luy , ne plus
 ne moins que la mouche guespe laisse l'aguil-
 lon en donnant le coup : mais en son priué , ses

a Neuf
mille e-
scus.

b trente
mille e-
scus.

affaires domestiques se portoyent mal , tant pource que la peste luy auoit emporté plusieurs de ses parents & amis, comme aussi pource que de longue main il estoit en dissension avec ceulx de sa maison : car Xantippus l'aîné de ses enfans legitimes , estant homme de mauuaise nature , & dauantage ayant espousé une femme ieune & despenriere, fille d'Isander filz de Epilycus, estoit mal content de l'estroite espargne de son pere , qui ne luy fournissoit argent que bien escharsement & bien peu à la fois : au moyen dequoy il enuoya un iour au nom de Pericles , chez l'un de ses amis , luy demander de l'argent à emprunter : qui luy en enuoya : mais comme depuis il uint à le redemander , tant s'en fallut que Pericles le uoulust payer , que qui plus est, il l'en appella en iustice . Dont le ieune homme Xantippus estant griefuement indigné contre son pere, alloit mesdisant de luy en public par la uille , comptant par une maniere de moquerie les occupations aufquelles il uaquoit & passoit son temps quand il estoit en son priué, & les propos qu'il tenoit avec des Sophistes & maistres de Rhetorique: car comme il fust aduenu , qu'en un ieu de pris l'un des champions qui combatoyent à qui lanceroit mieulx le dard , eust par meschef atteint & tué un Epitimus Thessalien , il alloit par tout raconter que Pericles auoit tout un iour esté à disputer avec Protagoras le Rhetoricien ,

à ſçauoir qui deuoit eſtre iugé coupable de ce meurtre, ſelon la uraye & droitturiere raiſon, le dard, ou celuy qui l'auoit lancé, on bien ceulx qui auoyét dressé le ieu de pris. Dauantage Stelimbrotus eſcrit, que le bruit qui courut par la uille, que Pericles entretenoit ſa femme, fut ſemé par Xantippus meſme. Tant y a, que ceſte querelle & diſſenſion entre le pere & le filz dura, ſans iamais ſe reconcilier, iuſques à la mort: car Xantippus mourut en la peſtilence generale, & mourut auſſi la ſœur germaine de Pericles, qui y perdit ſemblablement la plus grande part de ſes amis, alliez & parents, meſmement ceulx qui luy eſtoyent plus utiles au gouuernement de la choſe publique. Mais touteſois iamais il ne ſeſchit pour tout cela, ny n'en rabaiſſa de rien la grandeur & haulteſſe de ſon courage, quelques malheurs qui luy ſuruinſſent, ny ne le ueit on iamais plorer, ny mener dueil aux funerailles d'aucun de ſes parents ou amis, iuſques à la mort de Paralus le dernier de ſes enfans legitimes: car la perte de celuy la ſeul luy attendrit le cueur: encore taſcha il à ſe maintenir en ſa conſtance naturelle, & ſe conſeruer en ſa grauité accouſtumeé, mais ainſi comme il luy uouloit mettre un chapeau de fleurs ſur la teſte, la douleur le força quand il le ueit au uiſage, de maniere qu'il ſe prit ſoudainement à eſcrier tout hault, & eſpandit ſur l'heure grande quantité de larmes: ce qu'il n'a-

uoit iamais fait en toute sa uie . Au demourãt, ayant le peuple ia essayé les autres Capitaines & autres gouverneurs , & cogneu par experience qu'il n'y en auoit pas un de pois ny d'authorité suffisante pour une si grande charge , il le rappella à la fin luy mesme à la tribune des harengues pour ouir ses conseilz, & à l'estat de Capitaine pour la conduite des affaires : car il se tenoit lors renfermé en sa maison pour le dueil & la douleur de ses aduersitez domestiques : mais Alcibiades & ses autres familiers & amis luy persuaderent de se mōstrer au peuple : lequel s'excusa enuers luy du tort qu'il luy auoit ingratement fait . Et adonc Pericles reprit en main le gouvernement des affaires, cōme deuãt : & la premiere chose qu'il y feit, fut, qu'il requit que lon reuoquast l'ordonnance qu'il auoit luy mesme mise en auant touchant les bastards, de peur qu'à faulte d'hoir legitime de son corps, son nom & sa maison ne uinst à faillir en luy. Mais quant à celle loy, uoicy cōment il en alloit : Pericles estant en la fleur de son credit, auoit fait passer une ordonnance, que ceulx la seuls fussent tenus pour bourgeois d'Athenes , qui seroyent nez de pere & de mere Atheniens : quelque temps apres , le Roy d'Egypte ayant enuoyé au peuple d'Athenes , en don, quarante mille mines de bled , pour estre distribué entre les bourgeois de la uille , plusieurs à l'occasion de ceste loy furent accu-

sez de bastardise & d'estre mestifz , dont parauant on ne scauoit rien , ou pour le moins on n'en faisoit compte , & y en auoit aucuns , qui faullement & à tort en estoient condamnez . Tant y a qu'il y en eut de cōuaincus & uendus comme esclaués , non gueres moins de cinq mille : & ceulx qui demourerent pour iouir des priuileges de bourgeoisie , & qui furent iugez citoyens d'Athenes , se trouuerēt iusques au nombre de quatorze mille & quarante . Or trouuoit on fort mauuais , qu'une ordonnance qui auoit eu tant de pouuoir , fust reuoquee & cassee par celuy mesme qui en auoit esté auteur : mais toutefois la calamité presente , qui estoit suruenue en la propre maison de Pericles , rompit le cueur aux Atheniens : lesquelz estimerent qu'il auoit suffisammēt payé la peine de celle sienne arrogance : & croyans qu'il en auoit esté puny par expresse permission & uengeance des Dieux , & que sa requeste estoit humaine , ilz luy permeirent de faire enroller son bastard au registre des legitimes citoyens de sa lignee , en luy donnant son propre nom . C'est celuy qui depuis ayant desfait les Peloponesiens en une grosse bataille naualle , pres les isles Arginuses , fut executé à mort par sentence du peuple , avec les autres Capitaines ses compagnons . Au reste Pericles fut lors atteint de la peste , non pas si uiolente ne si aguë que les autres , ains foible & lente , & qui par long

traict de temps, & avec plusieurs changemens luy amortit peu à peu la force & uigueur de son corps, & surmonta la grauité de son courage & de son bon iugemēt : & pourtāt Theophrastus en ses morales, au lieu ou il dispute si les meurs des hommes se changent selon leurs aduentures, & si les passions & afflictions du corps les peuuent tant alterer, qu'elles les fassent issir hors des lices & des bornes de la uertu, recite que Pericles en ceste maladie monstra un iour à l'un de ses amis, qui l'estoit allé uisiter, ne sçay quel charme preseruatif, que les femmes luy auoyent attaché cōme un carcan autour du col, pour luy donner à entendre qu'il estoit fort mal, puis qu'il enduroit qu'on luy applicast une telle folie. A la fin, comme il fut arriué biē pres de passer le pas de la mort, les plus gens de bien de la uille, & ceulx qui estoient demourez encore uiuans de ses amis, estans au tour de son liēt, se meirent à parler de sa uertu, & de la grande puissance & autorité qu'il auoit eüe, en pesant la grandeur de ses faicts, & comptant le nombre des uictoires qu'il auoit emportees : car il auoit gaigné neuf batailles estant Capitaine general d'Athenes, & en auoit erigé autant de trophées à l'honneur de son païs, & deuisoyent de toutes ces choses entre culx, comme sil ne les eust point entendues, pensans qu'il eust ia perdu tout sentiment : mais au contraire, ayant en-

core l'entendement sain, il auoit tout bien noté. si se prit à leur dire, qu'il s'esmerueilloit cōme ilz louoyent si haultement ce qui luy estoit commun avec plusieurs autres Capitaines, & en quoy la fortune mesme auoit sa part, & ee pendant ilz omettoyent à dire ce qui estoit en luy le plus beau & le plus grand : c'est que nul Athenien, pour occasion de luy, n'auoit onques porté robbe noire. Aussi estoit il ueritablement grand & excellent personnage, non seulement pour la douceur & clemence qu'il auoit tousiours conseruee au maniemment de si grands affaires, entre tant d'ennemis & de malueillans, mais aussi pour auoir eu ce iugement, de reputer que le meilleur de ses plus glorieux actes estoit, n'auoir en si absoluë puissance iamais rien concedé à haine, enuie, ny à courroux, ny s'estre sans mercy uengé d'aucun sien ennemy. Si me semble que cela seul rendoit son surnom d'Olympien, c'est à dire, diuin ou celeste, lequel autrement estoit trop arrogant & trop superbe, non odieux ny enuie, ains plus tost bien seant & bien conuenable pour auoir eu la nature si benigne & tant debonaire, & en si grande licence auoir conserué ses mains pures & nettes, ne plus ne moins que nous reputons les Dieux pour estre auteurs de tous biens, & cause de nulz maux, dignes de gouverner & regir tout le monde: non pas comme disent les poëtes, qui mettent

noz esprits en trouble & en cōfusion par leurs folles fictions , lesquelles se contredifent à elles mesmes , attendu qu'ilz appellent le ciel, ou les Dieux habitent , seiour tresasseuré , & qui point ne tremble , & n'est point agité de uents ny offusqué de nuees , ains est tousiours doux & serein , & en tout temps egalemeut esclairé d'une lumiere pure & nette , comme estant telle habitation propre & conuenable à la nature souuerainement heureuse & immortelle : & puis ilz les descriuent eulx mesmes , pleins de dissensions, d'inimitiez, de courroux & d'autres passions, qui ne conuiennent pas seulement à hommes sages & de bon entendement . Mais ce discours seroit à l'aduenture mieux à propos en un autre traité . Au demourant , les affaires ou se trouuerent les Atheniens incontinent apres la mort de Pericles , leur feirent bien sentir & regretter la perte qu'ilz auoyent faite en luy : car ceulx qui de son uiuant supportoyent maluouluntiers sa trop grande autorité, pour ce qu'elle offusquoit la leur, soudain apres qu'il fut decedé, & qu'ilz uindrent à essayer d'autres harengueurs , & d'autres gouuerneurs furent contraints de confesser , qu'il ne pouuoit estre une nature d'homme plus moderee en grauité, ne plus graue en douceur & bonté, que la siene : & celle tant enuiee puissance, qu'ilz appelloyent durant sa uie Monarchie & tyrannie , leur apparut alors euidemment

auoir esté le rampar salutaire de route la chose publique, tant il fourdit & se descouurit incontinent apres son deces, au gouuernement de leurs affaires, de corruption & de meschanceté, laquelle luy, tant qu'il uescut, auoit tousiours tenue basse & foible, de sorte qu'elle n'apparoissoit point, ou pour le moins ne pouuoit uenir à telle licence, qu'elle peust commettre des faultes ausquelles il fust impossible de remedier.



FABIVS MAXIMVS.



YANT donques Pericles esté tel es choses dignes de memoire, dont nous auons peu auoir cognoissance, il est temps desormais que nous escriuions aussi quel a esté Fabius. Lon dit que le premier Fabius, duquel est descendue la maison & la race des Fabiens, qui est l'une des plus grandes & des plus nobles de Rome, fut engédré par Hercules, qui engrossa une Nymphe, ou comme les autres disent, une femme du pais au long de la riuere du Tybre. Et y en a qui disent, que les premiers de ceste maison furent au commencement appellez Fodiens, pource qu'ilz chassoyent aux bestes sauuages avec des pieges & des fosses: car iusques aujourdhuy les Romains appellent encore des fosses, fossæ: & fossoyer, fodere: mais que depuis les deux premieres lettres ont esté changees, & les a lon appellez les Fabiens. Com-
ment

ment que ce soit, il est certain que d'icelle maison sont issus plusieurs grands personnages : mais entre les autres il y en eut un nommé Fabius Rullus, qui pour la grandeur de ses faicts fut par les Romains surnommé Maximus, c'est à dire, tresgrand : apres lequel, Fabius Maximus, celuy dont nous escriuons presentement, fut le quatrieme en droite ligne, & fut surnommé Verrucosus, à cause d'un seing naturel qu'il auoit sur l'une des leures comme une petite uerrue : & fut aussi surnommé Ouicula, qui uault autant à dire comme, brebiette, pour la douceur, tardité & pesanteur de ses façons de faire des qu'il estoit encore enfant : car sa nature lente, coye & reposesee, avec une taciturnité, & ce que lon le uoyoit peu souuent & reserueement s'esbatre à ieux d'enfans : & aussi que lon le uoyoit dur d'entendement, & qu'il auoit peine à comprendre ce qu'on luy enseignoit, ioinct que lon en faisoit ce que lon uouloit, tant il estoit obeissant à tous ceulx avec qui il hantoit : le tout ensemble faisoit, que plusieurs qui ne le cognoissoyent que par dehors, iugeoyent qu'il ne seroit iamais qu'un lourdault & un niais : mais il y en auoit d'autres, qui le considerans de plus pres, apperceuoyent en sa nature une constance immuable, & une magnanimité de lion. Et luy mesme depuis estant excité par les affaires, donna bien tost à cognoistre, que ce que lon estimoit

en luy bestise, estoit grauité qui ne semouuoit de rien: & que ce que lon iugeoit timidité, estoit prudence: ce qu'il n'estoit point hatif ne remuât en chose quelconque, estoit fermeté & constance. Parquoy considerant la grandeur de la seigneurie de leur chose publique, & les continuelles guerres qu'ilz auoyent, il endurecit & exercita son corps, comme unes armes nees avec luy, pour s'en pouuoir mieulx seruir à la guerre, & son eloquence aussi comme un instrument de persuasion, pour en pouuoir mener le peuple à la raison. Si estoit son langage conforme & cōuenable à ses meurs & à sa maniere de uiure: car il n'y auoit fard ny affecterie quelconque, ains estoit toute substance avec pois & profondeur de sentences & de conceptions singulieres & propres à luy, sinon que lon dit, qu'elles ressemblent fort à celles de Thucydides: car on treuve encore auiourdhuy un blason ou harengue funebre qu'il feit deuant le peuple à la louange de son filz, lequel mourut au sortir de son Cōsulat. Mais quant à luy, ayant esté par cinq fois eleu Consul, en son premier Consulat il triompha des Liguriés, qui sont ceulx des mōtagnes & de la coste de Genes: lesquelz ayans esté par luy desfaits en une grosse bataille, ou ilz auoyent perdu beaucoup de gens, furent contraints de soy retirer & resferrer au dedans de leurs Alpes, sans plus courir ny fourrager les marches de l'Italie qui leur

confine. Depuis estant Hannibal avec grosse puissance entré en Italie, & y ayant gaigné la premiere bataille pres la riuere de Trebia, il tira oultre à trauers la Thoscane gastant & destruisant tout par ou il passoit: ce qui meit la uille de Rome en grand trouble & en grand effroy: & si aduint des signes & prodiges, aucuns ordinaires & assez accoustumez aux Romains, comme ceulx des foudres & des tonnerres, & d'autres fort estranges, & non iamais ouiz ne ueuz. Car on rapporta que quelques boucliers estoient deuenuz tous sanglants d'eulx mesmes, & qu'entour la uille d'Antium on trouuoit les espics de bléd, en les moissonnant, tous ensanglantez, qu'il estoit tumbé du ciel des pierres routes ardentes & en feu, & que au carrier des Phaleriens le ciel sembla s'entreouuir, & en tumba plusieurs petits escriteaux, en l'un desquelz y auoit escrit de mot à mot, Mars se-
 couë ses armes. Mais neantmoins, il n'y eut rien de tout cela qui peust arrester ny faire reboucher l'audace du Consul Caius Flaminius: lequel, outre ce que naturellement il auoit le cueur grand & conuoiteux d'honneur, estoit encore eleué dauantage pour aucunes merueilleuses prosperitez qu'il auoit eues auparauant, contre toute raison. Car combien que le Senat le rappellast, & que son compagnon au Consulat s'opposast à son intention, il auoit neantmoins donné une bataille aux Gaulois, malgré

tout le monde, & en auoit emporté la uictoire, Or quant à tous ces signes & prodiges celestes, encore qu'ilz troublassent beaucoup de gens, si n'emouuoient ilz point Fabius, pource qu'il n'y ueoit apparéce quelcōque pour s'en emouuoir: mais entendant le peu de nombre des ennemis, & la faulte d'argent qu'ilz auoyent, il conseilloit, & estoit d'aduis, que lon deuoit auoir un peu de patience, & ne auāturer point la bataille, contre un homme qui auoit son armee aguerrie de longue main, & ia exercitee par plusieurs combats à ceste fin seulement: & estoit d'opiniō qu'il falloit enuoyer du secours à leurs subiects & alliez, selon qu'il en seroit besoing, pour retenir les uilles en leur deuotion, & ce pendant laisser amortir d'elle mesme la uigueur des forces de Hannibal, qui estoit comme un feu de paille, & une flamme allumee en une matiere de peu de duree: mais quelque chose qu'il sceust alleguer, il ne le peut onques mettre en teste de Flaminius, lequel dit qu'il n'attendroit point que la guerre s'approchast iusques aux portes de Rome, ny ne cōbatroit point dedans la uille pour la defendre, comme auoit anciennement fait Camillus. Si commanda incontinent à ses Capitaines qu'ilz tirassent leurs compagnies aux champs, & luy mesme monta sur son cheual, lequel sans cause apparente s'effroya si estrangement, & se tourmenta tant, qu'il ietta le Consul la teste

deuant par terre : cela neantmoins ne luy feit point changer d'opiniõ, ains fuyuât fa premiere resolution, fen allà au deuant de Hannibal, & luy presenta la bataille en la Thoscane, au long du lac qui se nomme Thrasimene, qui est le lac de Peruse. Ceste bataille fut si asprement combatue d'une part & d'autre, que combien qu'à l'instant mesme du combat, il se fust leué un tremblement de terre si uiolent, que quelques uilles en furent réuersees sans dessus dessous, aucunes riuieres destournees de leurs cours, & les pieds des montagnes esbranlez & ouuerts, il n'y eut toutefois pas un des combatans qui en sentist rien. Si y demoura mort sur le champ le Consul mesme Flaminius, apres auoir fait de sa personne plusieurs actes de grande force & de grande hardiesse, & autour de luy les plus gés de bien qui fussent en l'armee ; le demourant s'estant mis en fuitte, il en fut fait un fort grand meurtre, car il fut taillé en pieces bien quinze mille hommes, & y en eut autant de prisonniers. Apres la desconfiture, Hannibal feit toute la diligence qui luy fut possible pour trouuer le corps de Flaminius, à fin de le faire inhumer honorablement, à cause de sa uertu, mais il ne le peut onques trouuer entre les morts, ny n'a lon iamais sceu depuis qu'il estoit deuenue. Or quât à la premiere desfaitte de Trebia, ny le Capitaine general qui l'escruiuit, ny le messager qui en appporta la nouvelle

premiere à Rome, ne la dit à la uerité, ainſi
 comme elle eſtoit, ains faignit que l'iſſue en a-
 uoit eſté douteuſe, de forte que lon ne ſça-
 uoit qui en auoit eu du meilleur : mais de ceſte
 cy, incontinent que le Præteur Pomponius en
 eut entendu la nouvelle, il feit aſſembler le
 peuple en conſeil, là ou ſans uſer de deſguiſe-
 ment ne de diſſimulation, leur dit tout ouuer-
 23 tement : Seigneurs Romains, nous auons per-
 23 du la bataille, en laquelle noſtre armee a eſté
 23 deſconfitte & deſfaite tout à plat, & le Con-
 23 ſul meſme y eſt demouré mort : parquoy adui-
 23 ſez ce que uous auez à faire pour uoſtre ſalut
 23 & feureté. Ces paroles iettees comme un ora-
 ge de uent impetueux ſur la mer d'une infinie
 multitude de peuple, meirent la uille en grand
 trouble, & en fut l'effroy ſi grand, qu'il n'y a-
 uoit homme qui fuſt à ſoy, ne qui euſt le ſens
 rallis : toutefois ſi furét ilz bien tous d'accord,
 que les affaires auoyent neceſſairemēt beſoing
 du ſouuerain magiſtrat que lon appelle en La-
 tin la Dictature, & d'un perſonnage qui la
 ſceuſt exercer uertueuſement ſans eſpargner
 ny craindre perſonne, & que Fabius Maximus
 ſeuł eſtoit tel, ayant la grandeur de courage, &
 la grauité de meurs, egale à la dignité & autho-
 rité ſouueraine de ce magiſtrat : avec ce qu'il
 eſtoit en l'aage ou la force du corps eſt encore
 ioincte à la maturité de l'entendement, & la
 hardieſſe meſlee avec l'experience & ſageſſe.

Cest aduis estant approuué de tous, Fabius fut eleu Dictateur, lequel nomma pour Chef de la cheualerie Lucius Minutius. si requit premicrement au Senat, qu'il luy fust permis de monter à cheual à la guerre, car il n'estoit pas permis au Dictateur, ains expressement defendu par une ordonnance ancienne, soit ou pource qu'ilz reputoyét la principale force de leur armee consister en leurs gens de pied, & à ceste cause uouloyent que le Chef demourast entre eulx au iour de la bataille, & ne les abandonast point: ou pource que l'authorité de ce magistrat en toute autre chose est si grande, qu'elle approche de la tyrannique, ilz uouloyent qu'à tout le moins en cela le Dictateur eust affaire de la souueraine puissance du peuple. Fabius donques uoulant d'entree monstrier la maiesté & la grandeur de son magistrat, à fin que chacun luy en fust plus obeissant, & plus prompt à faire son commandement, il sortit en public avec uingt & quatre sergés portás les faisceaux de uerges & les haches deuant luy: & comme l'un des Cósuls luy uint au deuat, il luy enuoya cōmander par un sergent, qu'il eust à laisser les faisceaux de uerges qu'on portoit deuat luy, & les autres marques & enseignes de magistrat, & qu'il le uinst trouuer en estat d'hōme priué. Puis cōmenceant, par un tresbeau & bon commencement, au seruice des Dieux, il remōstra au peuple cōme la perte qu'ilz auoyét receuë, leur

estoit aduenue par la temerité & nonchalance estourdie de leur Capitaine, qui n'auoit tenu compte des choses diuines, non point par la faute ny par la lascheté des cōbatans : & les enhorta pour ceste cause de ne craindre point leurs ennemis, ains d'appaiser l'ire des Dieux, en leur portant honneur & reuerence: nō qu'il les rendist superstitieux en ce faisant, ains asceuroit leur uertu par uraye deuotion enuers les Dieux, & leur estoit ou diminueoit la crainte des ennemis, en leur donnant certaine esperance de l'aide des Dieux. Si furent adonc uisitez les saincts liures prophetiques, que lon appelle les liures de la Sibylle, qui sont tenus fort secrets, & y trouua lon quelques anciennes propheties & oracles, qui se rapportoyent & se conformoyent aux accidens lors aduenus, mais il n'est pas loisible de publier ny redire à autruy ce que lon y a cogneu : puis le Dictateur en pleine assemblee du peuple, deuāt toute l'assistance uoua solennellement aux Dieux, qu'il leur sacrifieroit tout tant de fruiēt que porteroyent à la prochaine saison nouvelle les brebis, les truyes, les uaches & les cheures, en toutes les montagnes, plaines, riuieres, ou prairies de l'Italie, & feroit celebrer des jeux de Musique & iouer autres mysteres en l'honneur des Dieux, iusques à y despendre la somme de trois cents trente trois sesterces, & trois cents trente trois deniers Romains.

& un tiers de denier dauantage . Ceste somme reduitte à la monnoye Grecque monte à la ualeur de ^a quatre uingts trois mille cinq cents quatre uingts trois drachmes d'argent, & deux oboles . Or feroit il bien malaisé de rendre la raison pour laquelle il specifica nōmeemēt ceste somme ainsi precise, & pourquoy il la distribuua par trois , si ce n'est que lon ueuille exalter la puissance du nombre ternaire, pource que c'est un nombre de sa nature parfait, & le premier des nompers, qui est le commencement de multitude, & qu'il comprend en soy les premieres differences & les premiers elements & principes de tous les nombres uniz & ioincts ensemble. Ainsi Fabius ayant fait que le peuple eust bonne esperance en l'aide & faueur des Dieux, le rendit en ce faisant mieulx deliberé de bien faire à l'aduenir: mais luy mettant tout son espoir de uictoire en soy mesme, comme celui qui estimoit que les Dieux enuoyent aux hommes l'heur & la prosperité par le moyen de uertu & de prudence, s'en alla trouuer Hannibal, non point en intention de le combattre, ains en ferme deliberation de luy consumer la uigueur de son armee par long traict de temps, sa pauureté par force d'argent, & le petit nombre de ses gens par grande multitude de combatans. Si s'en alloit tousiours campant en lieux forts & haults sur les montagnes, hors du danger de la cheualerie de son ennemy, qu'il cou-

a Ce sont
enuiro
n huit mil-
le cinq
cēs escus.

stoyoit tousiours, de sorte que quand l'ennemy s'arrestoit en quelque lieu, aussi faisoit il luy, & si luy se remuoit, il le suyuoit à la trace, & rouoit à l'entour de luy, sans iamais esloigner les montagnes, ny s'approcher de si pres qu'il peust estre contraint de combattre si luy ne uouloit: & neantmoins se monstroit tousiours à la queuë de son ennemy, & le tenoit en cõtinuele crainte, par ce qu'il estimoit qu'il allast espiant le point de son occasiõ pour le charger à son aduantage. Mais en dilayant & prolongeant ainsi le temps, il uint à la fin à estre mesprisé de chacun: car & en son camp on mesdisoit publiquement de luy, & les ennemis mesmes le tenoyët pour homme couard & de fort lasche cueur, excepté Hannibal seul, lequel apperceuant bien son bon iugement, & la maniere de laquelle il le uouloit combattre, estima que par toute uoye de ruzes ou de force, il le falloit attirer au combat, ou autrement que les affaires des Cartagiinois s'en alloient ruinez, attendu qu'ilz ne se pouuoient seruir ne ualoir de leurs armes, en quoy ilz estoient les plus forts, & ce pendant estoient minez & consumez par multitude d'hommes, & à force d'argent, en quoy ilz estoient les plus foibles. Si se meit à imaginer & à essayer toutes sortes de ruzes de guerre, dõt il se pouuoit aduiser, ne plus ne moins que fait le ruzé champiõ de lucte, qui cherche tout moyé d'auoir prise sur son aduersaire pour luy

donner le bond : car tantost il s'approchoit de luy, & luy faisoit donner des alarmes en son camp, tantost il s'en reuloit, & se remuoit souuent de lieu à autre, pour uoir s'il le pourroit point attirer hors de ceste resolutiõ, de ne mettre rien en hazard, ains iouer tousiours au plus seur. Et quant à luy, il perseuera tousiours constamment en sa premiere deliberation, croyant certainement que c'estoit le plus expedient de le faire ainsi : mais le General de la cheualerie, Minutius, luy faisoit beaucoup d'ennuy, lequel ardent du desir de combatre sans propos, & faisant de l'audacieux, alloit gaignant la bonne grace des soudards par une furieuse ardeur de uouloir combatre qu'il leur imprimoit, & une uaine esperance dont il les remplissoit, de maniere qu'ilz se moquoyent de Fabius, en l'appellant le pedagogue de Hannibal, & au contraire louoyent haultement Minutius, comme Capitaine hardy, & digne de la magnanimité de Rome. Cela le faisoit encore plus arrogamment monter en gloire, & en presumptueuse opinion de soy mesme, en piquant Fabius de ce qu'il alloit ainsi logeant tousiours son camp sur les montagnes, disant que le Dictateur leur appareilloit de beaux ieux, en leur faisant uoir l'Italie que lon brusloit, pilloit & gastoit ainsi deuant leurs yeulx : & demandoit à ceulx qui estoient bons amis de Fabius, s'il feroit point à la fin monter son camp iusques au ciel, se def-

fiant de la terre, ou si c'estoit de peur que les
 ennemis ne le trouuassent, qu'il falloit ainsi ca-
 chant dedás les nues & les brouees. Les amis de
 Fabius luy rapportoyent tous ces brocards, &
 luy conseilloyent de hazarder plus tost la ba-
 taille, que de supporter plus tant de paroles in-
 iurieuses, qui se disoyent contre luy. Mais Fa-
 bius leur respondit, Si ie faisois ce que uous me
 conseillez, ie serois encore plus couard qu'ilz
 ne cuident que ie le sois maintenant, en sortát
 hors de ma deliberation pour crainte de leurs
 paroles piquantes & traicts de moquerie. Car
 ce n'est point honte que d'auoir crainte pour le
 bien & le salut de son país: ains, au contraire,
 f'estonner pour le bruit & l'estime d'une com-
 mune, ou pour les impropres & calumnies
 des hommes, n'est point acte de personnage di-
 gne d'une si grande charge, ains plus tost d'hó-
 me seruant & obeissant à ceulx à qui il doit
 commander, & qu'il doit gouverner, pource
 qu'ilz ne sont pas sages. Depuis il aduint que
 Hannibal tomba en un erreur bien grád, pour-
 ce que uoulát f'esloigner de Fabius, & par mes-
 me moyen mener son armee en país plain, ou il
 y eust uiures & fourrages pour les bestes, il cõ-
 manda à ses guides, qu'ilz le conduisissent in-
 continent apres soupper en la plaine de Cafi-
 num. Les guides n'ayans pas bien entendu ce
 qu'il leur auoit dit, à cause qu'il prononçoit
 barbarement le langage Italien, prirent l'un

pour l'autre, & l'allerēt ietter luy & son armee en un bout de la Champagne pres la uille de Casilinum, par le milieu de laquelle passe la riuiere que les Romains appellent Vulturnus, & le pais d'alentour est une uallee ceincte & enuironnee de montagnes tout à l'entour, excepté qu'elle s'estend deuers la mer, là ou ceste riuiere se respandant hors de son liêt, fait des marertz & des bancs de sable fort profonds, & finalement se ua descharger en celle coste de mer, qui est fort dangereuse, & ou il n'y a nul abry. Estant donques Hannibal descendu en ce fond de sac, Fabius qui cognoissoit le pais & sçauoit les adresses des chemins, s'uyuant ses brisecs, luy ferra le pas par ou il pouuoit sortir de ceste uallee, avec quatre mille hommes de pied qu'il y ordonna, & disposa le demourant de son armee sur les croupes des montagnes, aux endroits plus opportuns tout à l'enuiron, puis avec ses coueurs, & les plus dispos & legeremēt armez de ses gens, fait charger la queuë des ennemis : ce qui meit toute leur armee en desordre, & y en eut bié huit cents de tuez. Parquoy Hannibal uoulant tirer son camp hors de là, & cognoissant la faulte que ses guides auoyent faitte, en prenant l'un pour l'autre, & le danger auquel ilz l'auoyent mis, les fait pendre. Mais au demourant, de forcer ses ennemis qui tenoyēt les cymes des coustaux, & les en dechasser à force, il n'y uoyoit point de moyen, ny

n'en auoit point d'esperance : à l'occasion de
quoy les gens estans effroyez & descouragez ,
pource qu'ilz se uoyoyent de tous costez enfer
mez , sans ordre d'en pouuoir eschapper , il se
delibera d'affiner son ennemy par une telle ru
ze : C'est , qu'il feit choisir enuiron deux mille
bœufs , de ceulx que lon auoit pris au pillage ,
& leur feit attacher à chasque corne des flam
beaux , ou des fagots de saule , & des iauelles de
farment , & ordonna à ceulx qui en auoyent la
charge , que la nuict quand il leur hausseroit un
signe en l'air , ilz meissent le feu en ces fagots , &
chassasēt les bœufs cōtremōt les coustaux uers
les pas & les endroits que les ennemis auoyent
occupez . Pendant que cela se preparoit , luy de
son costé ordonna son armee en bataille , puis
quand la nuict fut uenue la feit marcher le pe
tit pas . Or les bœufs , tant que le feu , qui brus
loit ce qu'ilz auoyent attaché aux cornes , fut
petit , cheminerent tout bellement contremont
le pied des montagnes , là ou on les chassoit ,
dont les bergers & bouuiers qui estoient sur
les cymes des coustaux , s'esmerueillèrent fort
de uoir ainsi des flammes & des feuz attachez
aux cornes de ces bœufs , comme si c'eust esté
une armee marchant en ordonnance aux lu
mieres des torches : mais quand les cornes uin
drent à estre bruslees iusques à la racine , & que
le sentiment du feu fut passé iusques à la chair
uifue , adonc commencerent les bœufs à se de

batte, & à secouër leurs testes, & en ce faisant, se couvrirent de feu les uns les autres de plus en plus. si ne cheminerent plus bellement, ny en ordre, ains pour la frayeur qu'ilz auoyent, & la douleur qu'ilz sentoient, se prirent à courir ça & là à trauers les montagnes, portans de la flamme à leurs cornes & à leurs queuës, dont ilz mettoient le feu es bois & buissons par lesquels ilz passoyent. Cela sembloit bien estrange à uoir, & estonnoit fort les Romains qui gardoyent les pas des montagnes, car ilz cuidoient que ce fussent hommes qui courussent ainsi ça & là auéc des torches aux mains: au moyen dequoy ilz en estoient tous effroyez & troublez, pensans que ce fussent les ennemis, qui accourussent ainsi contre eulx, pour les environner de tous costez, tellement qu'ilz n'oserent plus s'arrester aux passages, ou ilz auoyent esté ordonnez, ains abandonnans les destroits se meirent à fouir uers leur grand camp, & aussi tost les auantcoureurs de Hannibal armez à la legere, se saisirent de ces pas, de maniere que le reste de l'armee eut tout loisir de marcher à son aise iusques là; sans crainte ny peril, encore que elle fust chargée & empeschée d'une quantité grande de route sorte de butin. Or quant à Fabius, il s'apperceut bien des la nuict mesme, que c'estoit une ruzé de Hannibal, pource que quelques uns des bœufs, ainsi qu'ilz s'en fuyoyent ça & là, tumberent entre ses mains: à

l'occasion dequoy , craignant de tumber en quelque embusche pour les tenebres de la nuict , il teint ses gens en bataille sans autrement bouger ny faire bruit , & le matin si tost que le iour comméça à poindre, se meit à suyure son ennemy à la trace , donnant sur la queue, & escarmouchât les derniers dedans les destroits des montagnes, de maniere qu'il meit tout l'ost des ennemis en desarroy, iusques à ce que Hannibal enuoya de l'auantgarde quelque nombre d'Espagnolz, hommes legers & dispos, accoustumez de grauir aux môtagnes, lesquelz uenans à charger les Romains armez de pesantes armes en tuerent plusieurs, & feirent retirer Fabius : lequel en fut adonc encore bien plus mesprisé & blasmé que deuât, pource qu'il auoit tousiours monstré de ne uouloir point à force ouuerte combattre Hannibal , ains le miner & desfaire par astuce & prudence, en quoy il se trouuoit luy mesme abusé & affiné par luy. Dauantage Hannibal uolant enflammer encore plus l'ire & le courroux des Romains cōtre luy , quand il approcha de ses terres , commanda que lon bruslast & gasta tout à l'enuiron, mais que lon ne touchast aucunement aux sienes , & y meit expressement des gardes pour empescher que lon n'y prist rien, & que lon n'y feist aucun dommage. Cela fut rapporté à Rome , qui aggraua bien encore plus le mescontentement que lon auoit de luy : ioinct que les

Tribuns

Tribuns du peuple ne cessoyent de crier contre luy es harengues qu'ilz faisoient deuant le peuple, à la suscitation d'un Metellus principalement, non pour inimitié qu'il eust encontre Fabius, mais pource qu'il estoit parent de Minutius Maistre de la cheualerie, & estimoit que la mauuaise opinion que lon prendroit de l'un, tourneroit à la louange & à l'auantage de l'autre. Le Senat mesme estoit courroucé contre luy pour l'accord qu'il feit avec Hannibal, touchant les prisonniers de guerre: car il accorda que lon eschangeroit les prisonniers en rendât homme pour homme, ou bien^a deux cents cinquante drachmes d'argent pour chascun teste, si les uns en auoyent plus que les autres. Quand l'eschange eut esté ainsi fait, il se trouua que Hannibal en auoit encore de reste deux cents quarante Romains. Le Senat ordonna que lon n'enuoyeroit point d'argent pour les deliurer, & blasma grandement Fabius d'auoir fait cest accord, comme n'estant ny honorable ny profitable à la chose publique, pour recouurer des gens qui par lascheté de cueur s'estoyent laissez prendre aux ennemis. Ce qu'entédant Fabius, supporta patiemment le courroux du Senat, mais n'ayant point d'argent, & ne uoulât point faillir à sa parole, ny abandonner ses citoyens prisonniers, il enuoya son filz à Rome avec procuracion pour uendre ses terres, & luy en apporter l'argent incontinent. Le ieune hom-

^a Ce sont
environ
vingt &
cinq e-
scus.

me y alla, uendit les heritages de son pere, & luy en porta bien tost l'argent au camp, dont il rachep^ta les prisonniers, en enuoyant leur rençon à Hannibal. Plusieurs de ceulx qu'il auoit rachep^tez le uolurēt depuis rembourser, mais il n'en uolut onques rien prédre, & leur donna leur rençon à tous. Depuis estant appellé à Rome par les presbtres pour faire quelques solēnelz sacrifices, il laissa l'armee entre les mains de Minutius pour la gouverner en son absence, avec condition de ne s'attacher point à l'ennemy, & de ne combattre point: ce que non seulement il luy defendit tresexpressément, cōme ayant souueraine puissance, ains encore l'en admonesta, & l'en pria tres instamment comme son amy. Minutius se souciant bien peu de toutes ses prieres & commandemens, aussi tost qu'il eut le dos tourné commença incontīnēt à harasser les ennemis: & un iour entre les autres ayant obserué que Hannibal auoit enuoyé bonne partie de son armee au fourrage & recouurement de uiures, il alla charger ceulx qui estoient demourez, & les mena batant iusque dedans leur camp avec grand meurtre, & plus grand effroy de ceulx qui festoyent sauuez, lesquels n'attendoyent pas moins que d'estre assiegez dedans leur camp: & encore apres que toute leur armee se fut rassemblée en un, il se retira malgré eulx, & sans rien perdre. Cela le remplit d'arrogāce, & les soudards de temerité,

encore plus que iamais . Si courut incontinent la nouuelle de ceste desfaitte iusques à Rome, & la fait on beaucoup plus grande qu'elle n'estoit : & Fabius l'ayant entendue dit, qu'il craignoit beaucoup plus la prosperité de Minutius, qu'il ne faisoit son aduersité . Mais le commun peuple s'en esioit fort, & avec grande demonstration de ioye accourut sur la place: là ou Metellus, l'un des Tribuns du peuple, montant en la chaire aux harengues, leur feit un sermón, auquel il magnifia & loua haultement la uertu de Minutius, & à l'opposite chargea Fabius, non plus de lascheté & de couardise, ains de trahison: accusant aussi les autres principaux personnages de Rome, disant que des le cōmencemēt ilz auoyent tenu moyen de tirer ceste guerre en lōgueur, à fin de ruiner l'authorité & la puissance du peuple, & auoyent incontinent fait tumber les affaires sous la main d'une monarchie, laquelle avec ses remises & delais donneroit loisir à Hannibal de se planter & maintenir en Italie, iusques à ce que les Cartaginois eussent moyen, avec le temps, de luy enuoyer renfort d'une seconde armee, pour de tout poinct se saisir & s'emparer de toute l'Italie. Quoy entendu, Fabius se tira en auant pour parler au peuple, là ou il ne s'amusa point à respōdre aux charges que le Tribun luy auoit mises sus, ains dit qu'il falloit promptement acheuer les sacrifices & cerimonies du seruice diuin, à fin qu'il

ſen peult ſoudainement retourner au camp, pour y chaſtier Minutius, lequel par deſſus ſon expreſſe deſenſe auoit combatu contre l'ennemy. Il n'eut pas plus toſt acheué ces paroles, qu'il ſe leua incontinent un grand bruit & un tumulte parmy le peuple, pour le danger de Minutius, à cauſe que le Dictateur a puiffance de mettre en priſon, & de faire mourir qui bõ luy ſemble, ſans forme de proces ny de iugement: & eſtimoit on, puis que Fabius eſtoit une fois ſorty hors de ſon accouſtumee clemence & bõté, qu'il deuiédroit ſi aſpre en ſon courroux, qu'il ſeroit bien malaiſé de l'appaiſer. Parquoy il n'y eut celuy en toute l'aſſiſtence qui ne ſe teuſt de peur, excepté le Tribun Metellus, lequel ayant loy de tout dire, pour la ſeureté que luy donne ſon magiſtrat, qui ſeul retient ſon autorité quand il y a un Dictateur eleu, & demeure en ſon entier, eſtans les autres ſupprimez, ſupplia lors à grande inſtance le peuple, de ne uouloir point abandonner Minutius, ny ne permettre qu'il ſouffriſt ce que Manlius Torquatus iadis auoit fait à ſon filz, auquel il feit trancher la teſte apres auoir uaiſſamment uaincu & deſfait ſon ennemy: les admonéſtant d'oſter à Fabius ceſte puiffance tyrannique de la Dictature, & de mettre leurs affaires entre les mains de celuy qui uouloit & ſçauoit bien les conduire à port de ſalut. Le peuple fut fort emeu par ces ſeditieufes paroles, mais touteſois

encore n'ozà il contraindre Fabius, de quitter la souueraine authorité de sa Dictature, combien qu'il en eust bien mauuaise opinion, & qu'il fust tresmal content de luy : ains ordonna que Minutius auroit de là en auant egale puissance, & authorité pareille à celle du Dictateur, en la conduite des affaires : ce qui iamais n'auoit encore esté ouy ne ueu, mais bien tost apres il fut aussi fait une autre fois, apres la desconfiture de Cannes. Car estant lors Marcus Iunius le Dictateur au camp, lon eleut à Rome un autre Dictateur, qui fut Fabius Buteo, pour nommer & creer de nouueaux Senateurs, au lieu de ceulx qui estoient morts en la bataille : mais apres qu'il en eut nommé, & remply le conseil du Senat, le iour mesme il laissa les sergens qui portoyent les haches deuant luy, & renuoya la suite qui l'accompagnoit par honneur, & se ietta à trauers la presse du peuple sur la place, uaquât à ses particuliers affaires, ne plus ne moins qu'une personne priuee. Or cuidoyêt bien les Romains, que Fabius uoyant comme lon auoit donné à Minutius puissance egale à la siene, le prendroit fort à cueur, & en seroit tres desplaisant : mais ilz ne cognoissoyent pas du tout sa nature, pource qu'il n'estima point que leur folie luy tournast à malheur, ny à dommage ou deshonneur, ains comme Diogenes le sage respondit à un qui luy disoit, Ceulx la se moquent de toy : Je ne m'en tiens, dit il, point pour

moqué. uoulât dire qu'il reputoit ceulx la seuls estre moquez, qui se passionnēt & se troublent pour des moqueries. Ainsi enduroit Fabius doucement, & sans passion quelconque, quant à ce qui le touchoit particulièrement, tout ce que le peuple faisoit, seruant d'exemple & de preuue manifeste aux philosophes, qui maintiennent que l'homme sage & homme de bien ne peult estre nullement iniurié ne deshonoré: car tout le desplaisir qu'il receuoit de la folie du peuple, estoit pour le regard de la chose publique, à cause qu'ilz auoyent donné moyen à un estourdy & temeraire de seruir à sa folle ambition au faict des armes. A l'occasiō dequoy craignant que luy aucuglé de uaine gloire & de presumptueuse opinion de soymésme, ne se precipitast, & hastast de faire quelque grād mal auant qu'il fust arriué, il se partit soudainement de Rome, sans que personne en sceust rien, pour s'en retourner au Camp: là ou il trouua Minutius si fier & si superbe, qu'il n'estoit plus aucunement supportable: car il uouloit auoir authorité de commander à toute l'armee à son tour. Ce que Fabius ne luy uoulut point consentir, ains departit par moitié tout l'exercite avec luy, estimant qu'il ualoit mieulx qu'il cōmandast tousiours seul à une partie de l'armee, que par tour à la totalité: si choisit pour soy la premiere & la troisieme legion, & luy donna la seconde & la quatrieme, & partagea aussi sera-

blablement le secours des alliez. Et comme Minutius se uantast & glorifiast de ce, que la maiesté du souuerain magistrat auoit esté rauallée & abbaissee pour l'amour de luy, Fabius luy remonstra qu'il deuoit penser, si estoit sage, que ce n'estoit point à luy, ains à Hannibal, qu'il auoit à combattre: & encore si se uouloit opiniastrer à estriuer par ialousie encontre son compagnon, à tout le moins deuoit il regarder, que luy qui auoit gagné, & qui auoit esté tant honoré par ses citoyens, ne fust pas moins soigneux de leur seureté & de leur salut, que celuy qui auoit esté uaincu & ignominieusement traitté par eulx. Minutius prit cest aduertissement comme pour une moquerie finulee & couuerte, à la maniere des uieillards, & prenant sa moitié de l'armee, se logea seul à part. Hannibal n'ignoroit rien de tout ce debat, ains espioit toutes les occasions pour se seruir de leur discord. Or y auoit il entre leurs deux camps une motte non gueres malaisée à gagner, & estoit une belle assiette pour loger un camp à seureté, ayant commodité & aisance de toutes choses. La campagne d'alenuiron à la uoir de loing sembloit toute plaine & toute unie, pour ce qu'elle n'estoit point couuerte de boscaiges: mais toutefois il y auoit quelques fontaines & quelques uallées entre deux: à l'occasion de quoy, Hannibal, encore qu'il eust bien le moyen de s'en saisir facilement d'emblee, si

eust uoulu, ne le uoulut point faire, ains la laiffa au milieu pour luy seruir d'emorche à attirer ses ennemis au combat. Parquoy quand il ueit que Minutius estoit separé d'avec Fabius, il espendit une nuict quelque nombre de ses gens par ces fonceaux & uallees, puis le matin au poinct du iour enuoya une troupe non guerres grosse à la descouuerte pour occuper laditte motte, esperant qu'il pourroit bien attirer par ce moyen Minutius à combatre pour ce logis: comme il en aduint. Car Minutius y enuoya premierement ses coureurs, puis toute sa gendarmerie: & finablement uoyant que Hannibal luy mesme uenoit pour soustenir ses gens qui estoient dessus la motte, il s'y en alla aussi avec tout le demourât de ses forces en bataille régee, & fit un grad effort pour chasser ceulx qui defendoyent la motte. Le cōbat dura quelque temps egal entre les deux parties, iusques à ce que Hannibal, uoyant que son aduersaire auoit à bon esciant donné dedans ses rets, & qu'il monstroit le derriere de son bataillon tout nud à ceulx de ses gens qu'il auoit mis en embusche, leua incontinent le signe qu'il leur auoit baillé, auquel ilz se leuerent tous à un coup, & se ruerent avec grands cris sur la queue des Romains, dont ilz tuerent de primfault un bon nombre, & meirent les autres en un tel trouble, & en si grand effroy, qu'il n'est possible de le sçauoir bien exprimer,

Si fut bien adonc la brauerie de Minutius & sa fiere audace rauallee : car il regardoit tantost l'un , tantost l'autre de ses Capitaines au uisage , & n'en uoyoit pas un qui eust courage de demourer, ains estoient tous prests de se tourner en fuitte : ce qui eust esté cause de leur totale ruine , pource que les Numides , soy sentans les plus forts , commenceoyent ia à se respandre par la plaine tout à l'environ , mettans en pieces tous ceulx qui se desbandoyent pour foir . Estans donques les gens de Minutius tumbez en tel inconuenient, Fabius, qui auoit bien preueu le dâger auquel ilz estoient pour tumber , & qui pour ceste cause tenoit son armee toute prestee en bataille, eut le soing de sçauoir ce qui se feroit , nō par le rapport d'aucuns messagers , ains par le ueoir luy mesme à l'œil de dessus une butte qui estoit au deuant de son camp . Parquoy quand il ueit Minutius & ses gens enueloppez de tous costez , & ia en branle de foir , & qu'il entendit leurs cris, nō comme de gēs qui eussent cueur de combattre , ains qui estoient effroyez , & regardoyent à se sauuer de uistesse, il frappa de la main sur sa cuisse, en gettant un grand souspir, & dit à
» ceulx qui estoient autour de luy: O Dieux, cō-
» ment Minutius s'est allé precipiter luy mesme
» en sa ruine, plus tost que ie n'attendoye, & plus
» tard qu'il ne uouloit ! Mais en disant cela, il
fit quand & quand marcher les enseignes en

diligence criant tout hault, Mes amis, il nous
 fault haster pour aller secourir Minutius, qui
 est uailant homme de sa personne, & aimât
 le bien & l'honneur de son pais: & si d'aduen-
 ture il a failly en se precipitant par trop, pour
 cuider chasser les ennemis, il n'est pas mainte-
 nant temps de l'en accuser, nous le luy remô-
 strerons une autre fois. Si rompit incontînêt
 à son arriuee & escarta les Numides, qui es-
 toyent au guet emmy la campagne: puis tira
 oultre iusques à ceulx qui chargeoyent sur la
 queuë des Romains, ou il en tua ceulx qui s'ar-
 resterent pour luy faire teste: car les autres, de
 peur qu'ilz tumbassent eulx mesmes au danger
 ou ilz auoyent rengé les Romains, auant que
 d'estre de tout poinct enfermez, se tournerét
 en fuitte. Parquoy Hannibal uoyant ceste mu-
 tation, & regardant comme Fabius en person-
 ne, avec plus grand effort que son aage ne por-
 toit, alloit fendant la presse des cōbatans, con-
 tremont la motte, pour penetrer iusques au
 lieu ou estoit Minutius, feit cesser le combat,
 commandant que lon sonnast la retraite, &
 remena ses gens dedans son camp, estans les
 Romains bien aises de se pouuoir aussi retirer
 à sauueté: & dit on que Hannibal, en se reti-
 rant, dit à ses amis un tel mot en riât, Ne uous
 ay-ie pas dit plusieurs fois que ceste nuee que
 nous uoyions tousiours attachee à la cyme des
 montagnes, se creueroit à la fin quelque iour,

avec orage & tēpeste qui tumberoit sur nous ?
Après ceste rencōtre, Fabius ayant despouillé
ceulx qui estoyēt demourez morts sur le chāp,
se retira aussi en son camp, sans se laisser eschap-
per de la bouche une seule parole oultrageuse
ny fascheuse de son compagnon. Mais Minu-
tius, si tost qu'il fut de retour en son camp, af-
semblant ses gens, leur parla en ceste maniere :

Mes amis, ne faillir iamais en maniant de grāds
affaires, est chose qui surpasse la nature de l'hō-
me : mais se seruir des faultes passées pour in-
struction de l'aduenir, est fait en hommes sages
& uertueux. Quant à moy, ie confesse n'auoir
pas moins d'ocasiō de me louer de la fortune,
que de m'en plaindre: car ce que le long temps
ne m'auoit peu enseigner, ie l'ay appris en une
bien petite partie d'un seul iour: c'est, que ie ne
suis point suffisant pour commander, ains ay
moy mesme besoing d'estre regy & gouuerné
par autruy: & que ie ne me doy point opinia-
strer follemēt à cuider uaincre ceulx, desquelz
il m'est plus honorable confesser estre uaincu.
Si uous declare, que le Dictateur Fabius fera
celuy qui desormais uous commandera seul en
toute autre chose: mais pour luy donner à en-
tendre que nous recognoissons la grace, qu'a-
uons presentement receuē de luy, ie seray ce-
luy qui uous guideray à l'en aller remercier, en
me rendant le premier obeïssant à ses commā-
demens, & faisant tout ce qu'il m'ordonnera.

Ayant acheué ces paroles, il commanda aux
 portenseignes de le suyure, & luy marcha le
 premier deuers le camp de Fabius, là ou estât
 arriué, il s'en alla droit à la tente du Dictateur:
 dequoy chascū s'emerveilla, ne sachant ce qu'il
 uouloit faire. Fabius luy sortit audeuant. Et
 Minutius, luy ayāt mis ses enseignes à ses pieds.
 l'appella à haulte uoix son pere: & ses souldards
 appellerēt semblablemēt ceulx de Fabius, leurs
 patrons, qui est le nom duquel les serfs affran-
 chiz appellēt ceulx qui les ont deliurez de ser-
 uitude. Puis quand le bruit fut appaisé, Minu-
 tius se prit à dire hault & clair: Seigneur Di-
 ctateur, tu as ce iourd'hui gagné deux uictoi-
 res, l'une sur Hannibal, que tu as uaincu par
 prouesse, & l'autre sur moy ton compagnon,
 que tu as uaincu par prudence & bonté: & par
 l'une tu nous as sauuez, par l'autre tu nous as
 enseignez: ainsi auons nous esté semblablemēt
 uaincus en deux sortes, l'une par luy à nostre
 honte, & l'autre par toy à nostre honneur &
 salut. Pourtant t'appelle ie mon pere, ne trou-
 uāt autre appellatiō plus uenerable, de laquel-
 le ie te puisse honorer, & me sentant plus obli-
 gé à toy, pour la grace que i'ay presentement
 receuē de toy, qu'à celuy mesme qui m'a engē-
 dré, à cause que i'ay esté seul engendré par luy,
 & ay esté sauué par toy avec tant d'autres gens
 de bien qui sont icy. En disant ces paroles, il
 embrassa Fabius: & le semblable feirēt aussi les

foldards qui s'entracollèrent estroittement, & se baisèrent les uns les autres : de maniere que tout le camp se trouua plein de careffes & de larmes tresdoulces & espraintes à force de ioye. Depuis festant Fabius desmis du magistrat de la Dictature, furent de rechef cleuz des Consuls, les premiers desquelz suyurent la mesme forme de gouuerner, que Fabius auoit commencee, se gardans de presenter bataille à Hannibal, & enuoyans tousiours du secours à leurs subiects & alliez pour les entretenir, & les garder de se rebeller, iusques à ce que Terentius Varro homme de petit lieu, mais bien cogneu pour son audace temeraire, & pour le credit qu'il auoit acquis enuers le peuple par ses flateries, fut paruenü à la dignité cousulaire : car on pensa bien que par sa temerité & faulte d'experience, il mettroit incontinent le tout au hazard d'une bataille, par ce qu'il crioit en toutes les assemblees du peuple, que ceste guerre dureroit tousiours, tant que le peuple eliroit pour Capitaines des Fabiens, & se uantoit publiquement, que des le premier iour qu'il uerroit les ennemis, il les desferoit. En disant ces braues paroles, il assemblea une telle puissance, que iamais les Romains n'en auoyēt eu de si grande ensemble, contre quelque enemy que ce fust : car il meit en un camp iusques au nombre de quatre uingts huit mille combatans : ce qui mettoit Fabius & les au-

tres Romains qui auoyent bon sens, en grande crainte, pour autant qu'ilz ne uoyoyent point de ressource aux affaires de Rome, si aduenoit qu'ilz perdissent un si grand nombre de ieunesse. Si s'adressa Fabius à l'autre Cōsul, qui se nommoit Paulus Æmilius, homme bien entendu au faict de la guerre, mais mal uoulu de la commune, dont il redoubtoit encore la fureur, à raison de quelque amende, en laquelle le peuple auparauant l'auoit condamné enuers la chose publique, & en le reconfortant l'admonesta & encouragea de resister à la folle temerité de son compagnon, luy remonstrant comme il n'auroit pas plus d'affaire contre Hannibal, que contre Terentius Varro, pour le salut de son pais, à cause que tous deux cherchoyent à combattre: l'un, pource qu'il n'entendoit pas en quoy consistoit l'auantage de ses forces: & l'autre, pource qu'il cognoissoit bien sa foiblesse. Mais il est plus raisonnable que tu me croyes en ce qui concerne les affaires de Hannibal, que Terentius Varro: & ie t'asseure que si lon ne luy baille point moyen de combattre ceste annee, qu'il est force forcee, ou qu'il se ruine de soy mesme s'il demeure, ou qu'il s'en fouye honteusement avec son armee, attendu que iusques icy, quoy qu'il semble estre uictorieux & maistre de la campagne, il n'y a encore eu personne de ses ennemis qui se soit tourné de son costé, & que de

20 l'armee qu'il a amenee de son pais quand &
20 luy, il ne luy en est pas demouré aujourdhuy
20 un tiers. A ces remonstrances le Consul respō-
20 dit en ceste maniere, ainsi que lon dir : Quand
20 ie considere l'estat de mes affaires, seigneur
20 Fabius, il me semble estre meilleur pour moy,
20 de tumber mort entre les picques de noz en-
20 nemis, que retumber une autre fois entre les
20 uoix & suffrages de noz citoyens. Toutefois,
20 puis que le bien de la chose publique requiert
20 que lon face comme tu dis, ie m'efforceray de
20 me monstrier sage Capitaine à toy seul, plus
20 tost qu'à tous les autres ensemble qui me
20 uouldront tirer au contraire. Ainsi se partit de
Rome Paulus en ceste intention : mais Teren-
tius son cōpagnon, uolul à toute force qu'ilz
commandassent à toute l'armee souueraine-
ment l'un apres l'autre, chascun son iour, &
falla camper tout au plus pres de Hannibal,
au long de la riuere d'Aufide, pres du bourg
qui s'appelle Cannes. Et le iour que ce fut à
luy à commander à son tour, il feit mettre hors
de grand matin le signe de la bataille, qui e-
stoit une cotte d'armes teincte en esscarlatte,
que lon estendoit dessus la tente du Capitaine
general, tellement que les ennemis mesmes
du commencement s'effroyerent de ueoir la
hardiesse de ce nouveau Capitaine, & le grand
nombre de combatans qu'il auoit en son ost à
comparaison d'eulx, qui n'estoyent pas de la

moitié tant : toutefois Hannibal leur com-
 manda qu'ilz s'armassent & se teinssent prests
 pour la bataille : & ce pendant luy avec peu de
 suite s'en alla à cheual monter sur une petite
 butte, non gueres roide, de laquelle il pou-
 uoit descouurer euidentement tout le camp des
 Romains, & ueit comment ilz se rengeoyent
 desia en bataille. Et comme l'un de ceulx qui
 estoyent en sa compagnie, homme de pareil-
 le noblesse & condition que luy, nommé Gi-
 fcon, dit que le nombre des ennemis luy sem-
 bloit merueilleusement grand à le ueoir ainsi
 de loing : Hannibal se fronçant le uisage luy
 23 respondit : Encore y a il une autre chose bien
 23 plus esmerueillable, de laquelle tu ne t'es point
 23 aduisé, Gifcon. Gifcon luy demanda inconti-
 23 nent : Et quelle ? C'est, dit il, que de tout ce
 23 grand nombre de combatans que tu uois là, il
 23 n'y en a pas un qui s'appelle Gifcon cōme toy.
 Ce mot de risée, dit au contraire de ce que les
 assistens attendoyent, qui pensoyent bien que
 ce deust estre chose de consequence, les fait ri-
 re à bon esciant : si descendirent de dessus la
 butte tous rians, & racōptèrent à ceulx qu'ilz
 rencontrèrent par le chemin ceste sornette, de
 sorte que la risée en alla incontinent de main
 à main en la pluspart du camp, & ne se pou-
 uoit pas Hannibal mesme estancher de rire.
 Ce que uoyans les soudards Cartaginois, en
 prirent une grande assurance, faisant leur
 compte,

compte , que leur General ne se seroit pas ainfi mis à plaifanter & à rire fi pres du peril , fil ne se fust senty de beaucoup le plus fort , & qu'il n'eust bonne cause de mespriser les ennemis . Dauantage en la bataille il ufa de deux ruses de Capitaine bien aduisé: la premiere fut , de l'affiette du lieu , ou il renga ses gens en bataille , de sorte qu'ilz auoyent le uent au dos : car il tiroit un uent impetueux , & bruslant cōme un estourbillon de foudre , lequel enleuoit de la plaine , qui estoit de grande estendue & sablonneuse , une poudre ardente comme feu , & la passant par dessus le bataillon des Cartaginois , la iettoit droit contre les yeux & les uifages des Romains , par telle uiolence qu'ilz estoient contraints de tourner les uifages en arriere , & troubler leurs rengs . La seconde ruse fut , la forme de laquelle il ordonna sa bataille : car il mit deça & dela aux deux ailes les meilleurs cōbatans & les plus uaillans hōmes qu'il eust en tout son ost , & remplit le milieu des pires & des plus inutiles qui y fussent , dont il feit comme une poincte , laquelle se iettoit en auant , & passoit de beaucoup les deux costez du front de sa bataille , ayant enioint à ceulx des ailes , que quand les Romains auoyent rompu de premier front , & qu'ilz pouruyuroyent les reculans en arriere , de façon que le milieu de sa bataille uiedroit à senfoncer & à se courber en croissant , & que les en-

nemis se trouueroient au dedans, alors ilz se ruassent d'un costé & d'autre sur eulx, & les chargeassent incontinent par les flancs, & les enuelopassent par derriere. Cela fut cause du plus grand meurtre: car quand le milieu commença à reculer & à receuoir au dedans les Romains, qui poursuyuoient asprement, la bataille de Hannibal changea de forme, & au lieu qu'elle estoit au commencement en poincte, elle se trouua enfoncée au milieu en figure de croissant: & adonc les Capitaines des bendes choisies qui estoient aux deux ailes, feirent tourner leurs gens, les uns à la main gauche, les autres à la droite, & chargerent les Romains par les flancs & par derriere ou ilz estoient nuds, & ainsi meirent en pieces tous ceulx qui ne se peurent sauuer de uistesse auant que d'estre enueloppez. Encore dit on qu'il aduint un autre inconuenient fortuit à la cheualerie Romaine: ce fut, que le cheual du Consul Paulus Æmilius, ayant esté blecé, le porta par terre: à l'occasion dequoy ceulx qui estoient les plus prochains de luy, meirent incontinent pied à terre pour le secourir: ce que uoyans les autres qui en estoient plus loing, imaginerent incontinent que ce fust un commandement fait à tous generalement: à l'occasion dequoy ilz descendirent de cheual, & combattirent à pied. Quoy uoyant Hannibal dit: Je les aime miculx ainsi, que filz

me les eussent liurez piedz & poings liez. Mais quant à ces particularitez la, ceulx qui ont escrit les histoires au long, les exposent plus à plein: Au demourant, des deux Consuls, Varro se sauua à cheual avec peu de suite de ses gens dedans la uille de Venouze, & Paulus en la foule & presse de ceste route, ayant le corps plein de traicts, qui estoient demourez dedans ses playes, & le cueur aggraué d'un si angoisseux regret, que de ueoir la desconfiture de ses gens, estoit assis aupres d'une roche attendant que quelcun des ennemis uinst l'acheuer de tuer: mais pour la grande quantité de sang, dont il auoit toute la teste & la face souillee, peu de gens le recognoissoyent, de maniere que ses amis & ses seruiuers mesmes passoyent oultre sans le cognoistre, & n'y eut qu'un ieune homme de maison noble & patriciene nommé Cornelius Lentulus, qui l'ayant apperceu, se meit en deuoir de le sauuer: car il se ietta incontinent à pied, & luy amena son cheual, le priant de uouloit monter dessus, pour essayer de se reseruer à la necessité de son pais, qui auoit plus grand besoing que iamais d'un bon & sage Capitaine: mais il refuza l'offre & la priere du ieune gentilhomme, & le contraignit de remonter à cheual, quoy qu'il en plorast de pitié, & festant soubleué pour luy toucher en la main luy dit:

Tu diras de ma part à Fabius Maximus, & luy

33 tesmoigneras, comme Paulus Æmilius a tou-
 33 siours obserué & suyuy son conseil iusques au
 33 bout, & n'a iamais rien trangressé de ce qu'il
 33 luy auoit accordé: mais qu'il a esté forcé par
 33 Varro premierement, & puis apres par Han-
 nibal. Ayant dit ces paroles il donna congé à
 Lentulus, & se reiecta en la presse de ceulx
 que lon tuoit, là ou il mourut. On tient qu'il
 fut tué en ceste bataille cinquante mille Ro-
 mains, & en fut pris de prisonniers quatre mil-
 le, & dix autres mille qui depuis la bataille fu-
 rent pris es deux camps. Ceste belle uic-
 toire gaignee, les amis de Hannibal luy conseil-
 loyent qu'il suyuiſt sa fortune, & qu'il entre-
 roit pesse mesle quand & les fuyans dedans la
 uille de Rome, tellement que à cinq iours de
 là il pourroit soupper dedás le Capitole. Il n'est
 pas aisé à dire quelle raison l'en destourna, si-
 non que ie pense, plus tost qu'autrement, que
 ce fut quelque bõne fortune, ou quelque Dieu
 fauorable à l'empire Romain, qui se meit au
 deuant, & qui le feit auoir peur & reculer à le
 faire. A l'occasion dequoy lon dit qu'un Car-
 taginois nommé Barca, luy dit en cholere:
 33 Hannibal, tu sçais bien uaincre, mais tu ne
 33 sçais pas user de la uic-
 33 toire luy apporta une mutation si grãde, qu'au
 lieu qu'il n'auoit pas au parauant une seule uil-
 le, une seule estappe, ny un seul port en Italie,
 & qu'il auoit grande difficulté & grande pei-

ne à nourrir son armee de ce qu'il pouuoit rauer & desrober à la iournee, n'ayant pas une retraitte asseuree, ny aucun lieu certain sur quoy il peust fonder l'esperance de l'entretenement de ceste guerre, ains allant ça & là errant & tenant les champs avec son armee, cōme avec une grosse troupe de brigands & de larrons, alors il receut en son obeïssance presque toute l'Italie : car la plus part des plus grādes & plus puissantes nations d'icelle se rendirent incontinent à luy : & la cité de Capoue, qui estoit la plus grosse qui y fust, apres celle de Rome, se tourna de son costé. Ainsi peut on clairement ueoir par ce bel exemple, que c'est un grand mal d'auoir à esproouer la sagesse d'un Capitaine, & non pas seulement la feaulté d'un amy, ainsi que dit le poëte Euripides : car ce que parauant on appelloit couardise & froideur en Fabius, incontinent apres la bataille fut estimé, non point discours de sens humain, ains plus tost de quelque celeste & diuin entendement, qui preueoit les choses à aduenir de si loing, qu'elles ne sembloient pas croyables à ceulx mesmes qui les enduroyent. Au moyen dequoy, Rome tout aussi tost reietta le demourant de son esperance sur luy, & recourut à son conseil ne plus ne moins qu'à la sauuegarde d'un temple ou d'un autel, de sorte que la premiere & principale cause de faire demourer le peuple ensemble, sans s'escar-

ter ça & là, comme il feit du temps que Rome fut prise par les Gaulois, fut l'opinion & confiance que lon eut en sa prudence. Car au lieu que parauant il sembloit couard & desfiant, lors qu'il n'estoit point encore arriué de dangereux inconuenient, à l'heure que chacun se plongeoit en pleur, & en dueil infiny qui ne seruoit de rien, & que tout le monde estoit si troublé, qu'on ne donnoit ordre à chose quelconque, luy seul au contraire alloit par la uille d'un pas moderé, avec un uisage constant & asseuré, saluant courtoisement un chacun, ostant les cris & lamentations femines, & defendant les assemblees des conuois, qui se font pour lamenter publiquement un trespasé à son enterrement. Et au contraire il suada à ceulx du Senat de s'assembler en conseil, dōna courage à ceulx qui estoient en magistrat, estant luy mesme toute leur force & toute leur uertu, pource qu'il n'y auoit homme ayant charge publique, qui ne iettaist ses yeux sur luy, pour sçauoir ce qu'il auoit à faire. Si feit mettre aux portes de la uille des gardes pour empescher de sortir ceulx qui sen uoudroyent fouir & abandonner Rome: & dauantage limita le temps & le lieu du dueil, ordonnant que qui le uoudroit faire, le feist en son priué dedans sa maison, & durant l'espace de trente iours seulement, apres lesquelz il falloit que tout dueil cessast, à fin que la uille

fust pure & nette de toutes telles choses . Et estant la feste de Ceres escheute enuiron ces iours la , il luy sembla qu'il ualloit mieulx omettre du tout les sacrifices & la processió que lon auoit accoustumé de faire à tel iour , que de donner à cognoistre par le petit nombre , & la tristesse de ceulx qui y assisteroyent , la grádeur de la perte qu'ilz auoyent faite , pour ce que les Dieux prennent plaisir à estre seruis ioyeusement par ceulx qui sont en prosperité . Ce neantmoins tout ce que les deuins ordonnerét estre fait pour pacifier l'ire des Dieux , ou pour diuertir les menaces des sinistres prodiges , fut fait : car on enuoya à l'oracle d'Apollo , en la uille de Delphes , un parent de Fabius que lon surnommoit Pictor : & ayás esté deux religieuses Vestales corrupues , l'une fut enterree toute uiue , selon la loy & la coustume , & l'autre se feit mourir elle mesme . Mais bien fait en cest endroit à admirer la grandeur de courage & magnanime cleméce des Romains , en ce que retournant le Consul Varro de la desconfiture le plus malheureusement & le plus honteusement qu'homme en eust sceu retourner , & en estant luy mesme si honteux & si desplaisant , qu'il n'ozoit pas leuer la teste : le Senat toutefois luy alla encore au deuant iufques à la porte de la uille , avec tout le peuple entierement , & le receurent honorablement .

Qui plus est ceulx qui estoient en magistrat ,

& les principaux du Senat, entre lesquels estoit Fabius, quand on eut fait silence, le louerent de ce qu'il n'auoit point desespéré du salut de la chose publique, apres une calamité si grande, ains estoit retourné en la uille pour donner ordre aux affaires, & user de l'autorité des loix, & du seruice de ses citoyens, comme ayans encore moyen de se sauuer & resfourdre. Mais quand ilz entendirent, que Hannibal apres la bataille, s'estoit tourné uers les autres contrees de l'Italie, alors ilz reprirent courage, & enuoyerent des Capitaines & des armées aux champs, entre lesquels les deux principaux furent, Fabius Maximus, & Claudius Marcellus, qui par uoyes presque du tout contraires auoyent acquis louange egale & reputation pareille: pource que Marcellus, ainsi que nous auons escrit en sa uie, estoit homme qui executoit uiuement, comme celuy qui estoit prompt à la main, hardy de nature, & proprement tel, que ceulx que Homere appelle Martiaux & belliqueux, pour se hazarder & aduenter hardiment à tout danger: au moyé dequoy, ayant affaire à un autre Capitaine hardy & auantureux aussi, il s'attachoit à tout propos de pareille audace en toutes rencontres à luy. Mais au contraire, Fabius perseverant tousiours en son premier aduis, esperoit que qui ne combatroit ny ne harasseroit point Hannibal, il se ruineroit & se

desferoit de soy mesme, & que son armee se mineroit d'elle mesme à force de guerroyer continuellement, ne plus ne moins que le corps d'un champion de lucte, qui pour auoir fait trop d'efforts se trouue cassé & rompu. Pourtant escrit Posidonius, que l'un fut appellé l'espee, & l'autre le bouclier des Romains, & que la fermeté & constâce de Fabius à faire la guerre seurement, sans commettre rien à la fortune, meslee avec la uehemençe de Marcellus, fut ce qui preserua l'empire de Rome: car Hannibal rencontrant à toutes heurtes en son chemin, l'un qui estoit impetueux comme un torrent, trouuoit que son armee en estoit toute esbranlee, froissée & harassée: & l'autre, qui estoit cōme une petite riuere qui luy couloit tout doucement par dessous, sans faire bruit, mais continuellemēt l'alloit mināt, & consumāt petit à petit, iusques à ce que finalement il se trouua reduit à telz termes, qu'il estoit las de cōbatre contre Marcellus, & si redoubtoit Fabius, qui ne combattoit point: pource que pendant tout le temps que dura ceste guerre, il eut presque tousiours en teste ces deux Capitaines estans Prateurs, ou Consuls, ou Proconsuls: car l'un & l'autre fut par cinq fois eleu Consul. Et quāt à Marcellus, il luy dressa une embusche en son cinquieme Cōsulat, ou il le surprit & tua. Mais quant à Fabius, il le tenta & le fonda bien par plusieurs fois, & par toutes sortes d'eschoguet-

tes, de ruzes & d'embusches: mais il ne luy sceut
iamais rien faire, sinon qu'une fois qu'il l'a-
uoit ia esbranlé, il luy cuida faire donner de-
dans les filez: car il auoit contrefait des lettres
missiues, comme si les principaux de la uille de
Metapont luy eussent escrit qu'il s'en uinst cel-
le part, & qu'ilz luy liureroient la uille entre
ses mains, & que ceulx qui estoient de l'intelli-
gence n'attendoient autre chose, sinon qu'il
s'approchast de là. Ces lettres emeurent un peu
Fabius, de sorte qu'il auoit ia resolu de prendre
une nuit partie de son armee, & s'y en aller:
mais pource que les signes des oiseaux ne luy
en promettoient point bonne issue, il s'en de-
porta: & tantost apres il descouurit que c'e-
stoyent lettres que Hannibal auoit finement
contrefaittes pour le surprétre, & que luy mes-
me en personne s'estoit embusché pres de la uil-
le pour l'attendre: mais cela se doit à l'aduen-
ture attribuer à la grace des Dieux, qui le uou-
lurent preseruer. Au demourant, quant aux re-
bellions des uilles subiettes & souleuemens des
peuples alliez, Fabius estoit d'opinion qu'il ual-
loit mieulx les contenir par doulx & humain
traitement, de maniere qu'ilz eussent honte de
se remuer sans occasion, que d'aller seuerement
rechercher toutes suspicions, ny se porter trop
aigrement enuers ceulx qui seroyent aucune-
ment sousspeçonnez. Auquel propos on racôm-
pte, qu'il y auoit en son ost un soudard Marsien

de nation, uaillant homme de sa personne, & d'aussi noble maison qu'il y en eust entre tous les alliez, lequel auoit tenu quelques paroles avec d'autres soudards de s'en aller rendre aux ennemis: Fabius qui en sentit le uent, ne luy fait point pire chere pour cela, ains l'appellant
» à foy, luy dit, qu'il confessoit que lon n'auoit
» pas tenu tel compte de luy comme il meritoit:
» dequoy, dit il, pour le present ie blasme les par-
» ticuliers Capitaines, qui uont ainsi distribuans
» les appointemens & honneurs par grace & par
» faueur, non pas par merite: mais cy apres ie t'en
» donneray le tort à toy mesme, si tu ne parles
» quelquefois à moy, & ne me dis priueement tes
» necessitez, quand tu auras besoing de quelque
» chose. Luy ayant dit ces paroles, il luy donna
un cheual de seruire pour la guerre, & l'honora d'autres pris d'honneur, dont on a accoustumé de recompenser les gens de bien: ce qui fait que le soudard depuis ce iour la, deuint tresfidele & tresaffectionné au seruire des Romains. Car il estoit bien aduis à Fabius, qu'il n'y auoit raison quelconque, que les ueneurs, escuyers & autres qui se messent de dompter les bestes irraisonnables, leur ostassent la fierté sauuage & farouche qu'elles ont de nature, par diligence, accoustumance & soing de leur nourriture, plus tost que par les battre à coups de fouet, ny les tenir empestrees: & que celuy qui prend à gouverner des hommes, n'usast plus de patien-

ce, de douceur & de clemence, que de rudesse pour les corriger:& qu'il les traittast plus rudement & plus durement que les laboureurs ne font les figuiers, oliuiers & pommiers sauuaiges, lesquelz ilz appriuoisent & addoulcissent si bien, qu'ilz en font à la fin de bons figuiers, bons oliuiers & bons pommiers. Vne autre fois quelques particuliers Capitaines luy rapporterēt, qu'il y auoit un de leurs souldards qui sescartoit souuent du camp & s'esloignoit de son enseigne: il leur demanda, quel homme il estoit au demourant: ilz luy respondirent tous unanimemēt, que c'estoit un fort bon homme de guerre, & que lon faudroit bien à en trouuer un pareil en toutes leurs bendes, & quand & quand luy reciterent quelques prouesses notables, & quelques preuues de sa personne que ilz luy auoyent ueu faire. Parquoy Fabius feit soigneusement enquerir quelle estoit la cause qui le faisoit ainsi souuent sortir hors du camp, & trouua qu'il estoit amoureux d'une ieune femme, & que pour l'aller uoir il sescartoit à tous coups de son enseigne, & mettoit sa uie en grand danger, pource qu'il y auoit assez loing: cela entendu, il y enuoya quelques gens, sans que le souldard en sceust rien, & la feit prendre & cacher dedans sa tente, puis appella le souldard qui estoit Lucanien de nation, & le retirāt

à part, luy dit, l'ay bien sceu comme tu as couché plusieurs nuits hors du camp cōtre les loix

» & ordonnances militaires des Romains : mais
» aussi ay-ie bien entendu que tu es homme de
» bien au demourant : pourtant te pardonne-ie
» les faulces passees, en consideration de tes bons
» seruices : mais dorefnauant ie te ueux donner
» en garde à un autre qui me rendra compte de
» toy . Le soudard se trouua bien estonné quand
il entendit ces paroles . Et Fabius faisant sortir
son amie, la luy meit entre ses mains, en luy di-
» fant, Ceste cy me respondra que cy apres tu de-
» moureras au camp avec nous : & au reste, ce se-
» ra à toy à nous faire cognoistre par effect, que
» ce n'estoit point pour autre cause meschâte que
» tu te desfrobois, en te seruant de l'amour de ce-
» ste cy pour une couuerture . Voila ce que lon
treuve par escript quât à ce propos. Au demou-
rant, Fabius regaigna en ceste maniere, & re-
meit en l'obeissance des Romains la uille de
Tarente, qui leur auoit esté emblee par trahi-
son : Il y auoit en son camp un ieune homme
Tarentin, qui auoit dedans la uille une sœur, la-
quelle luy estoit fort fidele & l'aimoit cordia-
lement : or estoit amoureux d'elle un Capitai-
ne Brutien de nation, l'un de ceulx à qui Han-
nibal auoit commis la garde de la uille: cela dô-
na esperance & moyen au ieune homme Taré-
tin, de conduire à chef son entreprise, laquelle
il communiqua à Fabius, & de son consente-
ment s'en fouit, & s'alla rédre dedans Tarente,
donnant à entendre qu'il se uouloit de tout

poinct retirer auprès de sa sœur. Et pour les
 premiers iours qu'il y fut, le Capitaine Brutien
 coucha tout seul à part, à la requeste de la fille,
 qui pensoit que son frere ne sceust rien de son
 faict: mais au bout de quelques iours, le ieune
 » homme la tira à l'escart, & luy dit, Ma sœur, il
 » estoit grand bruit iusques au cãp des Romains,
 » que l'un des principaulx hommes de ceste gar-
 » nison t'entretenoit, ie te prie dis moy qui il est:
 » car pourueu qu'il soit gentil cõpagnon, & aussi
 » homme de bien de sa personne comme lon dit,
 » la guerre qui confond toutes choses, fait, qu'il
 » ne peut chaloir de quel lieu il soit, & n'y a rien
 » de deshoneste en ce que lon fait par force: c'est
 » un grand heur en temps, ou le droit & la raison
 » n'ont point de lieu, à tout le moins de se ren-
 » contrer entre les mains d'un doulx & gracieux
 » seigneur. La sœur ayant ouy ces paroles de son
 frere, enuoya querir le Capitaine Brutien, &
 luy fait cognoistre son frere, lequel se meit in-
 continent à luy faciliter la iouissance de ses a-
 mours, & à luy rendre sa sœur encore plus trait-
 table & plus amoureuse qu'elle ne l'estoit au
 parauant. au moyen dequoy le Capitaine aussi
 commença à prendre assurance de luy, de ma-
 niere qu'il fut desormais facile au ieune Taren-
 tin, de gagner & faire tourner la uoulunté de
 cest homme amoureux & mercenaire, soubz
 l'esperance de grands presents qu'on luy pro-
 mettoit, & que Fabius luy deuoit faire. Ainsi

l'escrit la plus grande partie des historiens: toutefois il y en a qui escriuent, que la femme qui gagna le Capitaine Brutien n'estoit point Tarentine, ains estoit Brutienne, de laquelle (ce disent ilz) Fabius se seruoit pour concubine: & qu'elle ayant sceu, que le Capitaine des Brutiens qui estoient en garnison dedans Tarente, estoit aussi Brutien, & de son propre pais, en parla à Fabius, du consentement duquel elle s'approchant des murailles de la uille parla à luy, & feit si bien qu'elle le gagna. Mais pendant que ceste trame s'ourdissoit, Fabius uoulant distraire & escarter Hannibal de ce quartier la, escriuit aux gens de guerre qui estoient pour les Romains dedans la uille de Rege, qu'ilz courussent le pais des Brutiens, & qu'ilz allassent mettre le siege deuant la uille de Caulonie pour la raser & destruire: car ilz estoient bien iusques au nombre de huit mille hommes, la plus part traistres, estans passez d'un camp à l'autre, & les plus inutiles de ceulx qui ayans esté notez d'infamie pour leurs mauuais deportemens, auoyent illec esté transportez de la Sicile par Marcellus, de sorte qu'en les perdant, la chose publique ne faisoit pas grande perte, ny n'estoit pas pour en auoir grand regret. Si pensa Fabius que les exposant en proye à Hannibal, comme un appast pour le tirer arriere de ce quartier la, il le diuertiroit des enuirs de Tarente: comme il aduint: car incontinent Hannibal se coula celle

part avec son armee pour les attrapper: & cõ pendant Fabius alla mettre le siege deuant Tarente, là ou six iours apres qu'il y fut arriué, le ieune homme qui auoit avec sa sœur conduit la trame du Capitaine Brutie, s'en uint une nuit deuers luy, apres auoir bien noté & remarqué l'endroit de la muraille que le Brutien auoit à garder, lequel auoit promis de se faindre & de laisser entrer ceulx qui uiendroyent assaillir ce costé la. Toutefois Fabius ne uoulut pas du tout fonder l'esperance de ceste execution sur la trahison du Brutien: il est bien uray qu'il alla luy mesme en personne se presenter deuant cest endroit la, mais ce fut sans rien attenter pour un temps: & ce pendant il fait donner l'assault uiuement à tous les autres costez de la uille, tant par mer que par terre, avec grands cris & grand bruit, iusques à ce que le Capitaine Brutien, uoyant que tous ceulx de la uille & de la garnison couroyét la part ou ilz entédoient le bruit si grand, fait signe à Fabius qu'il estoit temps: lequel adonc fait apporter force eschelles, par ou il monta avec sa troupe sur les murailles, & ainsi se saisit de la uille. Mais il semble qu'en cest endroit il se laissa uaincre à l'ambition: car il commanda que lon tuaist les Brutiens les premiers, à fin que lon ne sceust point qu'il auoit emporté la uille par trahison: en quoy il se trompa, car non seulement il n'en rapporta pas la gloire qu'il en esperoit, ains y

acquit

acquit le blasme de desloyaulté & de cruaulté . Il mourut aussi en ceste prise grand nombre des Tarentins, & si en fut encore uendu trente mille chefz, toute la uille saccagee, & du pillage furent portez aux coffres de l'espargne publique à Rome^a trois mille talents . Lon dit qu'ainsi

a Vn million & huit cés mille cens.

comme lon pilloit & emportoit tout l'autre butin, le greffier qui en tenoit le registre, demanda à Fabius qu'il uouloit que lon feist des Dieux, entendant les tableaux & les images d'iceulx : & que Fabius luy respōdit, Laissons aux Tarentins leurs Dieux courroucez à eulx. Toutefois il feit transporter à Rome la statue de Hercules d'excessiue grandeur, qui estoit à Tarente, & la feit poser au Capitole, ioignant laquelle il feit aussi dresser son image de bronze estant à cheual : en quoy il se monstra de beaucoup plus uiolēt que Marcellus, ou, pour mieux dire, il feit cognoistre au monde combien l'humanité, clemence & bonté de Marcellus estoit admirable, ainsi comme nous auons escrit en sa uie. Hannibal ayant entendu la nouvelle de ce siege, s'estoit mis en chemin pour uenir en diligence secourir Tarente, & dit on qu'il ne faillit à y arriuer à temps, que d'enuirō deux lieues & demie : & quād il sceut au uray qu'elle estoit prise, il dit tout hault en public, Les Romains ont donques aussi leur Hannibal, car nous auons perdu Tarente tout en la mesme sorte que nous l'auions gaignee . Mais puis apres

quand il fut retiré en son priué, ce fut la première fois qu'il dit entre ses familiers, que de longue main il auoit bien preueu qu'il leur seroit difficile, mais lors qu'il cognoissoit euidément qu'il leur estoit du tout impossible de tenir l'Italie avec les forces qu'ilz auoyent. Fabius entra dedans Rome en triumphe pour la seconde fois à cause de ceste prise, & fut son second triumphe plus magnifique que son premier, comme d'un uaillant champion de lucte, qui souuent faisoit teste à Hannibal, & qui se desmesloit aiseemēt de toutes ses ruzes, ne plus ne moins que des prises & accrochemens de lucte, qui n'auoyent plus la mesme force ny roideur, qu'elles souloyent au parauant auoir, à cause que son armee estoit en partie effeminee pour les delices & les richesses qu'elle auoit amassées, & en partie aussi recreüe & diminuee par les cōtinuelles secousses & récontres qu'elle auoit endurees. Or y auoit il un Romain nommé Marcus Liuius, qui auoit esté gouverneur de Tarente lors que Hannibal l'auoit prise, & neātmoins auoit retenu le chasteau, & l'auoit gardé iusques à ce que la uille retourna une autre fois en la puissance des Romains: il fut marry de uoir tant d'hōneur que lon faisoit à Fabius, de sorte qu'un iour en plein Senat, estant transporté d'ambition & d'enuie, il ne se peut tenir de dire que c'estoit luy, & non pas Fabius qui estoit cause de la prise de Tarente.

Fabius s'en prit à rire, & luy respondit sur le
 20 champ : Tu as dit la uerité, car si tu ne l'eusses
 20 point perdue, ie ne l'eusse point reprise. Mais les
 Romains honorerent grandement Fabius en
 toutes autres choses, & mesmemét en ce qu'ilz
 eleurent son filz Consul, lequel estant ia entré
 en possession de son magistrat, ainsi comme il
 despeschoit quelques affaires touchant le faict
 de la guerre, son pere, fust ou pour la debilité
 de sa uieillesse, ou pource qu'il uoulust espro-
 uer son filz, monta à cheual pour aller deuers
 luy, & passa à trauers la presse des gens qui e-
 stoyent autour de luy, & qui auoyent affaire à
 luy: mais le ieune hōme l'ayant aduisé de loing,
 ne le uolut pas supporter, ains luy enuoya un
 officier luy faire commandement de descendre
 de cheual, & de uenir à pied, si d'adventure il a-
 uoit aucune chose à faire au Consul. Ce com-
 mandement despleut à tous les assistans, qui iet-
 terent incontinent leurs yeux sans dire mot sur
 Fabius, comme estimans que lon faisoit tort à sa
 grandeur: mais luy descendit incōtinent à pied,
 & s'en alla plus uiste que le pas, embrasser & ca-
 20 resser son filz, en luy disant : Tu as raison, mon
 20 filz, & fais tresbien de monstrier que tu sçais à
 20 qui tu commandes, & que tu cognois la gran-
 20 deur de l'authorité Cōsulaire que tu as receuë.
 20 C'est le uray moyen, par lequel nous & noz an-
 20 cestres auons augmenté l'empire de ceste cité,
 20 en ayant tousiours plus cher le bien & l'hon-

neur de nostre païs, que pere ne mere ny enfans. Aussi à la uerité dit on, que le bisayeul de Fabius, le plus grand & le plus honoré personnage qui fust en Rome de son tēps, cōme celuy qui auoit esté Consul par cinq fois, & qui auoit eu plusieurs triumphes, à raison de plusieurs grandes & glorieuses uictoires qu'il auoit gaignees, uolul bien depuis estre encore lieutenant de son filz, & aller soubs luy à la guerre quand il fut eleu Consul: & finablement retournant son filz uictorieux en la uille sur un chariot de triumph, tiré par quatre cheuaux, il le suyuit à cheual parmy la troupe des autres, faisant gloire de ce qu'ayant par droit d'authorité paternelle domination sur son filz, & qu'estant le plus grand homme de ses citoyens, & pour tel tenu & réputé, neâtmoins il se soubmettoit uoluntairement à la loy, & au magistrat qui auoit l'authorité d'icelle: toutefois ce personnage la auoit bien d'autres uertus qui le rendoyēt d'ailleurs admirable. Mais il aduint que ce filz de Fabius mourut auant luy, la mort duquel il supporta modereement, comme personne sage & comme bon pere: car estant la coustume qu'à la mort des personnages illustres, leurs plus proches parents feissent une funebre harengue à leur louange, au conuoy de leurs obseques, il fit luy mesme l'oraison à l'honneur de son filz, & la prononça luy mesme publiquement sur la place: & qui plus est, la redigea par escript, &

la publica. Enuiron ce temps Cornelius Scipion fut enuoyé en Espagne, dont il dechassa les Carthaginois, apres les auoir desfaits en plusieurs batailles, & y auoir conquis plusieurs grosses uilles, & mis en grande reputation les affaires des Romains, dont il fut à son retour autant ou plus honoré, aimé & estimé que nul autre qui fust en la uille. Au moyen dequoy, ayant esté eleu Consul, il considera que le peuple Romain attendoit & exigeoit de luy quelque chose plus grande que des autres: si pensa que de s'attacher à combatre Hannibal au dedans de l'Italie, seroit trop fait à la uieille mode, & sentiroit trop son uieillard, & pourtant resolut incontinent en soy mesme de faire uoir les armes Romaines en Afrique, & aller piller le país iusques aux portes de Cartage mesme, en transferant la guerre de l'Italie en Libye, s'efforceant de tout son pouuoir de le mettre en teste au peuple, & le luy faire trouuer bon. Mais Fabius au contraire, se persuadant que ce qu'entreprenoit ce ieune homme mal aduisé, fust aller precipiter la chose publique en un extreme danger, s'estudia de mettre Rome en la plus grande frayeur qu'il luy fut possible, sans y esparger ne parole ne fait, qu'il pensast pouuoir seruir à destourner le peuple de ceste uolunté: & sceut si bien dire & faire, qu'il auoit tiré le Senat à son opinion: mais le peuple estima que c'estoit l'enuie qu'il portoit à la gloire de Scipiõ, qui luy faisoit pro-

curer tout cela, pour arrester le cours de sa bonne fortune, de peur que si d'adventure il uenoit à faire quelque grand & memorable exploit, comme d'esteindre de tout poinct ceste guerre, ou de chasser Hannibal hors de l'Italie, il ne semblast que luy se fust porté trop laschement & trop mollement d'auoir fait trainner ceste guerre si longuement. Quant à moy, ie cuide bien que ce qui meut Fabius du cōmencement à luy contredire, ne fut autre chose que le soing du salut de la chose publique, pour le grand danger qu'il y auoit en telle resolution: mais aussi pense-ie, que depuis il passa oultre le deuoir, & s'acheurta trop opiniastrément, fust ou par ambition, ou par obstination, à uouloir empescher l'accroissemēt de Scipion, attendu mesmement qu'il feit tout ce qu'il peut, pour persuader à Crassus compagnon de Scipion au Consulat, qu'il ne luy cedast ny ne luy quittast point la conduite de l'armee, ains si bon luy sembloit de passer en Afrique pour aller faire la guerre aux Cartaginois, qu'il y allast plus tost luy mesme, &, qui plus est, empescha que lon ne luy deliurast argent pour ceste guerre. Au moyen dequoy Scipion estant contraint de s'en prouuoir d'ailleurs sur son credit, en amassa es uilles de la Thoscane, lesquelles pour l'amour qu'elles luy portoyent, contribuerent à son entreprise, & demoura Crassus en la maison, tant pource qu'il estoit homme doux, &

non ambitieux ny contentieux de sa nature, comme aussi pource qu'il tenoit la prelatiure du souuerain Pontife, qui par la loy de leur religion est contraint de demourer en la uille. Parquoy Fabius uoyant qu'il ne faisoit rien par ce chemin la, alla de rechef par un autre à l'encontre de Scipion, taschant à retenir & arrester les ieunes hommes, qui desiroyent aller à ce uoyage avec luy : car il crioit ordinairement en toutes les assemblees du Senat & du peuple, qu'il ne suffisoit pas à Scipion de fouir Hannibal, mais qu'il emmenoit encore quād & luy, ce qui restoit de forces en Italie, abusant la ieunesse de uaine esperance, & persuadant aux ieunes gens d'abandonner leurs femmes, leurs peres & meres, & leur pais, lors que l'ennemy, qui tousiours auoit esté uictorieux, & non iamais uaincu, estoit à leurs portes. Ces paroles de Fabius donnerent si grāde crainte aux Romains, qu'ilz ordonnerent que Scipion se seruiroit donques en son entreprise de l'armee qui estoit en la Sicile seulement, excepté qu'il pourroit mener d'auantage trois cents hommes, qui l'auoyent bien & fidelemēt seruy en la guerre d'Espagne. Ainsi sembla il que iusques icy Fabius feist & dist toutes ces choses suyuant sa coustume & l'humeur de sa nature. Mais au demourant, Scipion ne fut pas plus tost passé en Afrique, que lon entendit incontinent à Rome des exploits admirables, & des effects grands & glorieux

à merueilles, ioint une grande quantité de despouilles & de butin, qui tesmoignoit les nouvelles estre urayes, le Roy des Numides prisonnier, deux camps des ennemis arz & bruslez tout en un mesme temps, avec perte d'un grand nombre de gens, de harnois & de cheuaux qui furent consummez dedans, force lettres & mesagers expres que lon enuoyoit de Cartage à Hannibal pour le rappeler, & le prier de ne s'arrester plus à poursuyure une esperâce uaine qui ne uieldroit iamais à fin, ains s'en reuenir au plus tost que faire pourroit, secourir son país. Pour lesquelles prosperitez estant Scipiõ si fort estimé & renommé dedans Rome, que lon ne parloit que de luy, Fabius neantmoins requit encore, & fut d'aduis, que lon luy enuoyast un successeur, sans alleguer autre cause ny raison, sinon un commun dire, Qu'il n'estoit pas seur de commettre tant & de si grâdes choses à la fortune d'un seul homme, pource qu'il est bien malaisé qu'un mesme personnage soit en tout & par tout heureux. Ces langages adõc despleurent si fort au peuple, que lon l'en estima homme importun, fascheux & enuieux, ou que pour sa uieillesse il estoit deuenu couard, & auoit perdu toute uigueur de courage, redoubtant Hannibal trop plus effroyement qu'il ne deuoit: car encore alors qu'il eut esté contraint d'abandonner l'Italie, & s'en retourner en Afrique, il ne permettoit pas que la ioye &

l'assurance que le peuple en prenoit, fust entiere & nette de toute crainte, & de toute defiance, ains alloit disant que c'estoit adonc que les affaires estoient en plus grand danger, & que la chose publique couroit plus grande fortune que iamais, pource que Hannibal estant de retour en Afrique deuant les murailles de Cartage mesme, seroit bien plus rude à soustenir, qu'il n'auoit onques esté, & que Scipion y rencontreroit une armee encore toute chaude du sang de tant de Præteurs, Dictateurs & Cōsuls Romains, qu'elle auoit desfaits en Italie: de maniere que par telz lāgages, la uille se trouua encore de rechef toute troublee, & combié que la guerre fust transferee de l'Italie en Afrique, estima neantmoins l'occasion de craindre estre plus prochaine de Rome que iamais. Mais peu de temps apres ayant Scipion desfait Hannibal en bataille rengee, abbatu & mis sous ses piedz la gloire & l'orgueil de Cartage, donna à ses citoyens une ioye plus grande qu'ilz n'auoyent onques esperée: & en ce faisant redressa & assura l'empire Romain, qui peu deuant auoit esté en grand branle. Toutefois la uie de Fabius ne s'estendit pas iusques à la fin de ceste guerre, & n'entendit onques de son uiuant la nouvelle de la routte de Hannibal, ny ne ueit onques celle grande & assurée prosperité de son país: car enuiron le temps que Hannibal se partit de l'Italie, il tūba en une

maladie, dont il mourut. Or trouue lon par les histoires, que les Thebains enseuelirent Epaminondas aux despens du public, pource qu'il mourut en si grande pauureté, que quand il fut mort lon ne trouua rien qui soit en sa maison, sinon une petite broche de fer : mais les Romains n'inhumerent pas Fabius aux despens de la chose publique, ains contribuerent à ses funerailles pour teste la moindre piece de monnoye qui eust cours alors, nō pource qu'il eust faulte de biens pour se faire inhumer, mais seulement pour honorer sa memoire, en faisant ses obseques à leurs despens, comme de leur pere commun. Ainsi eut il à sa mort honneur conuenable à la uertu de sa uie.

LA COMPARAISON DE PERICLES AVEC FABIVS.

VOILA donques ce que lon treuve par escript de ces deux grands personnages. Et comme ainsi soit qu'ilz ayent laissé l'un & l'autre plusieurs beaux exemples de uertu, tant en faict de guerre qu'en matiere de gouuernement, commençons à les cōferer ensemble. Premièrement Pericles uint au maniemēt des affaires de sa chose publique, lors que le peuple Athenien estoit au comble de sa prosperité, & en la fleur de sa puissance, &

richesse plus grande que iamais n'auoit esté au-
parauât, ny ne fut onques depuis. Ce qui pour-
roit sembler auoir esté cause de le maintenir
sur ses piedz en seureté perpetuelle, sans iamais
succumber, non tant pour sa ualeur que pour la
puissance & prosperité publique: là ou, au con-
traire, les actes de Fabius se rencontrerent aux
plus malheureux & plus deshonnez temps de
son pais, esquels il ne mainteint pas sa uille en
ses biens sans dechoir, ains la tirant d'un tresca-
lamiteux estat ou il la trouua, la rendit en un
meilleur. Dauantage les heureux exploits de
Cimon, les uictoires & trophées de Myroni-
des & de Leocrates, & plusieurs beaux & grâds
faicts d'armes de Tolmides, donnerent moyen
à Pericles de tenir sa uille en festes & en ieux
tant qu'il en eut le gouuernemēt, & ne la trou-
ua pas en necessité qu'il la falust garder à force
d'armes, ou reconquerir ce qu'elle auroit per-
du. Et à l'opposite Fabius uoyant deuant soy
plusieurs fuittes, routtes & desfaittes, plusieurs
meurtres & morts de Capitaines generaux
des armes Romaines, les lacs, les plaines, les
bois remplis de leurs desconfitures, les fleues
& ruisseaux regorgeans de sang & de corps
morts iusques à la mer, prit en main le gouuer-
nement de la siene, & par un moyen de proce-
der tout different des autres, la sousteint &
estaya dessoubz, de maniere qu'il la garda de
succumber à plat par les demolitiōs & ruines que

les autres y auoyét faittes. Toutefois on pourroit aussi dire qu'il n'est pas si difficile de manier une uille humiliée par aduersitez, & qui contrainte par la necessité, se laisse gouverner au plus sage, comme de refrener la fierté & l'insolence d'un peuple enorgueillly & eleué par longue prosperité, ainsi comme Pericles uint à bout des Atheniens. Aussi la grande multitude de tant & de si griefues calamitez qui aduindrent lors aux Romains, monstra bien que Fabius estoit un graue & cōstant personnage, qui ne se laissa point aller aux crieries d'une commune, ny iamais ne se departit de ses premiers cōseilz. Et peut on opposer à la prise de Samos, que Pericles prit à force, le recouurement de Tarente, & à l'isle d'Eubœe, les uilles de la Cāpagne, qu'il retira, exceptee celle de Capoue, que les Consuls Frurius & Appius recouurent. Mais il semble que Fabius ne gagna iamais bataille, sinon celle la dont il triompha la premiere fois, là ou Pericles dressa neuf trophées des batailles & uictoires qu'il auoit gaignees, tant par mer que par terre. Vray est aussi que lon ne sçauroit alleguer un tel acte de Pericles, comme fut celuy de Fabius quand il recourut Minutius des mains de Hānibal, & preserua une armee toute entiere de Romains: qui fut sans point de doubte un faict digne de grāde gloire, comme procedant de prouesse, sagesse & bonté tout ensemble: mais aussi ne feit

onques Pericles un tel erreur, comme feit Fabius, quand il fut affiné & abusé par la ruse des bœufs de Hannibal, ayant trouué son ennemy, qui par cas d'adventure s'estoit de luy mesme enfermé dedás le destroit d'une uallee, & l'ayát laissé eschapper la nuict par subtilité, & le iour par force: car il fut preuenü par trop dilayer, & batu par celuy qu'il tenoit enfermé. Et s'il fault qu'un bon Capitaine non seulement use bien de ce qu'il a present en main, mais aussi qu'il iuge sagement de ce qui est à aduenir: la guerre des Atheniens se termina tout en la mesme sorte que Pericles leur auoit predict: car par ambition de uouloir trop embrasser, ilz perdirent leur estat: & au contraire, les Romains ayans enuoyé Scipiõ en Afrique pour y faire la guerre aux Cartaginois, gaignerent tout ce qu'ilz uoulurēt, ayát leur Capitaine uaincu, nõ par fortune, mais par uaillâce & par prouesse leurs ennemis: de maniere que le bon iugement de l'un est tesmoigné par la ruine de son país, & l'erreur de l'autre adueré par l'heureux euene-mēt de ce qu'il auoit uoulu empescher. Or est-ce faulte pareille à un Capitaine de tumber en un inconuenient non attendu ne preueu, que par deffiance faillir à embrasser l'occasion de faire un grand exploit quand elle se presente: car mesme default d'experience engendre temerité à l'un, & oste l'asseurance à l'autre. Voila quant à leurs faiçts de guerre. Et quant aux

actes de gouvernement ciuil, c'est un grand reproche à Pericles d'auoir esté autheur de la guerre: car on tient que luy seul en fut cause; en s'aheurtant à ne uouloir point que lon cedast pour peu que ce fust, aux Lacedæmoniens: toutefois il m'est aduis que Fabius Maximus ne ceda luy mesme non plus aux Cartaginois, ains se presenta hardiement & courageusement à tout danger pour maintenir contre eulx l'empire de son pais. Mais la debonaireté & clemence que Fabius monstra enuers Minutius, condamne fort les brigues & menees de Pericles à l'encontre de Cimon & de Thucydides, tous deux gens de bien & d'honneur & tenans le party de la noblesse, qu'il feit chasser de la uille & les bannir à certain temps. Aussi estoit l'authorité & la puissance de Pericles en sa chose publique plus grande, moyenant laquelle il empescha qu'il n'y eust de son temps aucun Capitaine qui executast sa folie & sa temerité au dommage du public, excepté Tolmides seul qui luy eschappa, & malgré luy s'alla aheurter contre les Bœotiens, ou il demoura: car tous les autres au demourant luy adhererent, & se renegerent à sa uolunté pour la grandeur de son autorité: là ou Fabius, encore que quant à luy il ne feist point de faulte, & qu'il allast seurement en besongne, si est-ce, que pour n'auoir pas esté assez fort pour empescher les autres de faillir, semble auoir esté en ce regard defectueux: car les

Romains ne feussent pas tumbéz en tant de calamitez s'il eust eu autant d'authorité à Rome, comme Pericles en auoit à Athenes. Et quant à la liberalité, l'un la môstra en ne uoulât point accepter l'argent qu'on luy presenta, & l'autre en en dônant à ceulx qui en auoyent besoing, & racheptant ses citoyens qui estoient prisonniers: toute fois il n'y despendit pas grãde somme de deniers, ains enuirõ trois mille six cents escus seulement: là ou il ne seroit pas facile à dire combien Pericles pouuoit amasser d'argent & de presens par le moyen de son authorité, tant des subiects & alliez mesmes des Atheniens, comme aussi des Roys & princes estrangers: en quoy neantmoins il teint tousiours ses mains nettes de toute concussion. Mais au reste, quant à la beaulté & magnificence des temples, ourages & edifices publiques, tous les ornemens ensemble qui furent onques à Rome auant le temps des Cæsars, ne sont pas à cõparer à ceulx dont Pericles embellit & orna la uille d'Athenes: car il n'y a point de proportiõ ny de comparaison de la sumptuosité excellente & magnificence des uns aux autres.



ALCIBIADES.



LA R A C E d'Alcibiades du costé de son pere estoit anciennemēt descēdue d'Euryfaces, qui fut filz d'Aiax, & du costé de sa mere d'Alcmæon: car sa mere Dinomache estoit fille de Megacles: & son pere Clinias ayāt armé & équipé une galere à ses propres cousts & despens, acquit fort grād honneur en la bataille nauale qui fut donnee le long de la coste d'Artemisium, & mourut depuis en une autre bataille pres de Coronee cōtre les Bœotiens, & furent tuteurs de son filz, Pericles, & Ariphton filz de Xantippus, qui estoient ses proches parents. On dit, & est uray, que l'amitié & biēueillāce de Socrates seruit beaucoup à la gloire d'Alcibiades: & qu'il soit ainsi, il appert par ce que de Nicias, de Demosthenes, de Lamachus, de Phormiō, de Thrasylulus & de Theramenes, qui tous furent grās & renōmez
 personnages

personnages de son temps, on ne sçait pas seulement comme leurs meres auoyent nom : & au contraire, nous trouuons iusques à la nourrice mesme d'Alcibiades, qu'elle estoit Lacedaemoniene, & qu'elle s'appelloit Amycla, & que son pædagogue se nommoit Zopyrus, ainsi comme Antisthenes a escrit l'un, & Platon l'autre. Or quant à sa beauté, à l'aduëture n'est il ia besoing d'en rien dire : toutefois si en diray-ie cela seulement en passant, qu'elle se maintreint tousiours florissante en son enfance, en son adolescence, & encore apres qu'il fut deuenu homme parfait, de maniere qu'elle le rendit plaisant & agreable par toutes les saisons de son aage : car ce que dit Euripides

en un passage, que de tous les beaux l'arriere-
saison est encore belle, n'est pas uniuersellement ueritable, ains est cela propre & peculier à Alcibiades avec bien peu d'autres, pour la parfaitement belle & bonne temperature de sa personne. On dit dauantage qu'il auoit la langue un peu grasse, ce qui ne luy scoit pas mal, ains donnoit une certaine grace naifue & attrayante à son parler, dequoy Aristophanes mesme fait mention en un passage, ou il se moque d'un Theorus, en contrefaisant la pronõciation de ceulx qui parlent gras,

- Regalde moy Theolus en la face,
Ce me disoit, avec sa langue grasse,
De Clinias le filz qui est si beau :

a La ren-
contre ne
se peut
trouuer
au l'agage
Francois
cōme au
Grec, à
cause de
ces deux
dictions,
corax &
colax, dōt
l'une si-
gnifie cor-
beau &
l'autre fla-
teur.

Il a, vois tu, la teste d'un colbeau.
Son parler gras luy a certainement
Fait rencontrer ce coup la urayement.

Et Archippus un autre poëte, se moquant au-
si du filz d'Alcibiades dit ainsi,

A fin qu'à ceulx qui le uoyent, il semble,
Que de tout poinct à son pere il ressemble,
Il ua trainnant sa robbe par la place
En cheminant d'une alleure mollace,
Et contrefait, mettant son parler hors,
La langue grasse, & porte le col tors.

Quant à les meurs, elles se changerent & tour-
nerent avec le temps par plusieurs fois, & ne
s'en fault pas esbahir, ueu les grandes fortunes
& les diuers accidents ou il se trouua depuis:
mais entre plusieurs grandes passions ausquel-
les il estoit subiect de sa nature, l'ambition de
uouloir en toutes choses auoir le dessus, & e-
stre par tout le premier, estoit la plus forte & la
plus uehemente qui fust en luy, comme il ap-
pert par quelques faictz & dictz notables de
son enfance, que lon a recueillis par memoire.
Comme un iour qu'il s'esbaroit à la lucte, il se
trouua d'adventure fort pressé par son compa-
gnon, & en grand danger d'aller par terre: mais
il feit tant qu'il approcha de sa bouche le bras
de celuy qui l'estraignoit, & le mordit si serré,
qu'il sembloit qu'il luy uoulut manger la main.
L'autre se sentant ainsi mordre, lascha incontien-
nent sa prise, & luy dit, Quoy? tu mors comme

une femme, Alcibiades: Non fais, respondit il,
mais comme un lion. Vne autre fois, estant en-
core petit garsonnet, il iouoit avec quelques
autres siens compagnons au ieu des osselets au
beau milieu d'une rue, & quand ce uint à son
tour à ietter les osselets, il suruint d'adventure
un chariot chargé: il pria le chartier qui le con-
duisoit d'attēdre un peu que son ieu fust ache-
ué, pource que les osselets estoient tumbez iu-
stement en la place par ou il falloit que le cha-
riot passast. Le chartier fut si mal gracieux
qu'il n'en uoulut rien faire, & ne laissa pas pour
ses prieres de chasser ses cheuaux, de maniere
que les autres enfans se fendirent pour le lais-
ser passer: mais Alcibiades se ietta tout de son
long emmy la place au deuant du chariot, &
dit au chartier qu'il passast donc ainsi sil uou-
loit. Le chartier tout effroyé retira inconti-
nent ses cheuaux en arriere: & les uoisins qui
apperceurent cela, accoururent tous esperdus
celle part, en criant. Depuis, quand on commē-
cea à le faire apprendre, il obeit uoluntiers à
tous autres maistres qui luy uolurent ensei-
gner quelque chose, excepté qu'il desdaigna
d'apprendre à iouer des flustes, disant que ce
n'estoit point artifice honeste, ne digne d'un
gentilhomme: pource, disoit il, que l'usage de la
uiole & de l'archet ne gaste rien ny de la con-
tenance, ny de la forme de uisage conuenable à
un gentilhomme: là ou quād on soufle dedans

une fluste, le uisage s'en altere & s'en change si fort, que ses plus familiers ne le peuuent à peine pas recognoistre. Dauantage la lyre ne la uiole n'empeschent point celuy qui en iouë de chanter & de parler en iouât: là ou la fluste ferme tellement la bouche de celuy qui en iouë, qu'elle luy oste non seulement la parole, mais

» aussi la uoix: Pourtant, disoit il, laissons iouer
 » de la fluste aux enfans des Thebains qui ne sçauent parler: car nous autres Atheniës, ainsi que
 » nous enseignent noz peres, auons pour protecteurs & patrõs de nostre pais la Deesse Pallas
 » & le Dieu Apollo, dont l'une ancienement, cõme lon dit, ietta la fluste, & l'autre escorcha le
 » flusteur. Ainsi Alcibiades alleguant ces raisons, partie en ieu, & partie à bon esciant, non seulement se deporta d'apprendre à iouer des flustes, ains en destourna aussi semblablement ses compaignons: car ce propos courut incontinent de main en main parmy les ieunes enfans, que Alcibiades avec bonne raison haïssoit & mesprisoit le ieu des flustes, & se moquoit de ceulx qui en apprenoyent: tellemēt qu'il en aduint que depuis cest artifice fut à Athenes mis hors du nombre des arts honestes & exercices liberaux, & en fut la fluste deshonorée, & tenue pour instrument infame. Au reste, on treuve escript dedans le libelle diffamatoire qu'un Antiphon composa contre Alcibiades, qu'estāt encore enfant, il s'enfouit de la maison de ses

tuteurs en celle de Democrates, l'un de ses amoureux, & que Ariphron l'un de ses tuteurs fut d'aduis de le faire crier par la uille: mais que Pericles l'en engarda, disant que si d'adventure il estoit mort, ilz ne le scauroyēt que d'un iour plus tost par la crie, & s'il estoit uiuant, que le demourāt de sa uie en seroit si deshonoré, qu'il n'auldroit mieulx pour luy qu'il eust du tout esté perdu. Il luy reproche dauantage qu'il auoit tué d'un coup de baston dedans le parc à la lucte de Sibyrrius, un des seruiteurs qui auoyent charge de le suyure par tout. mais il n'est à l'adventure pas bien raisonnable, d'adiouster foy à tout ce que dit un qui confesse l'iniurier expressément pour inimitié qu'il auoit encontre luy. Or y eut il incontinent plusieurs gens de qualité & d'apparence, qui se renegerent autour de luy à le caresser & tascher d'acquérir sa bonne grace, tous lesquelz donnoyent assez euidement à cognoistre qu'ilz le suyuoÿēt pour l'excellente & singuliere beauté qui estoit en luy, excepté Socrates seul, l'amour duquel porte grand tesmoignage, que l'enfant estoit bien né à la uertu, laquelle luy apperceuant reluisante à trauers la beaulté corporelle de son uisage, & craignāt les richesses, la dignité & l'authorité, & le grand nombre de poursuyuans qui estoÿent apres, tant des principaux personnages de la uille que des estrangers, taschans à le gagner par flatterie & par tous attraiçts de plaisir,

se uolulit entremettre de le defendre, & ne souffrir point qu'une si belle plante perdist ou gastaft son fruiet en la fleur. Car iamais la fortune ne rempara ny n'environna tant homme par le dehors, de ce que communement lon appelle ses biens, pour empescher que la philosophie n'y attaignist avec ses remonstrances libres, seueres & poignantes au uif, comme Alcibiades fut au commencement assiegé de delices, & enfermé de ceulx qui luy subministroyent tous plaisirs & toutes uoluptez, à fin de le diuertir qu'il ne uoulust point escouter les propos de celuy qui le uoloit instruire de son bien & l'enseigner: & neantmoins pour la bonté de sa nature, encore cogneut il Socrates & l'approcha de soy, repoulsant & escartant ses autres riches & puissans amoureux. si se le rendit incontinent familier: & apres auoir ouy ses discours, qui n'estoyent point deuis d'homme qui allast cherchant aucune uolupté deshoneste, ne qui demandast à baiser ny à toucher, ains qui luy remonstroit, & reprenoit les imperfections qui estoyent en son ame, & luy rabaissoit son orgueil & son outrecuidance: adonc, comme lon dit en commun prouerbe,

Il baissa l'aile, ainsi comme le coq,

Qui ua fuyant de la iouste le choc.

Et estima que toute la poursuite & l'affection de Socrates enuers les ieunes gens, estoit à la uerité une entremise des Dieux, & un

moyen dont ilz uoyent enuers ceulx qu'ilz uouloyent preseruer , & mettre en uoye de salut . Si commença à se mespriser soy-mesme , & à l'auoir en admiration prenant plaisir aux caresses qu'il luy faisoit , & neantmoins portant reuerence à sa uertu , de maniere qu'il ne se donna garde qu'il eut formé en son cueur une image d'Amour , ou plus tost comme dit Platon , un Contr'amour , c'est à dire , un amour sainct & honeste : tellement que tout le monde s'esmeruilloit de le ueoir ordinairement boire & manger , iouer , lucter & loger à la guerre avec Socrates , & au contraire rudoyer ses autres amoureux , sans qu'ilz peussent auoir aucune bonne chere de luy , & mesme se porter oultrageusement enuers aucuns : comme il feit un iour enuers Anytus filz de Anthemion , car il estoit un de ceulx qui l'aimoyent , & comme il feist un festin à quelques siens amis estrangers qui l'estoyent uenus ueoir , il y conuia Alcibiades aussi , lequel refusa d'y aller , & estant demouré à faire bonne chere en sa maison avec quelques siens compagnons , apres auoir bien beu , il sen alla follastrer chez Anytus , là ou s'arrestant à la porte de la sale , il ueit la table & le buffet tout couuerts de uaisselle d'or & d'argent , & commanda à ses seruiteurs qu'ilz en allassent prendre la moitié , & la portassent en sa maison : mais au reste

ne daigna pas entrer dedans, ains cela fait s'en retourna. Les estrangers qui estoient au festin, trouuerent ce tour bien estrange, & dirent qu'il s'estoit fort oultrageusement & superbement porté enuers Anytus: Mais bien gracieusement, leur respondit Anytus: car de ce qu'il pouuoit tout emporter, il nous en a laissé la moitié. Il en faisoit autant, & traittoit tout de mesme les autres qui estoient aussi amoureux de luy, excepté un estrange, qui s'estoit uenu habituer à Athenes, & estant pauvre, comme lon dit, uendit tout ce qu'il auoit, dont il fit iusques à la somme de ²cent stateres qu'il luy apporta, & le pria de les prendre. Alcibiades s'en meit à rire, & estant bien aise d'auoir cogneu sa bonne uolunté, le pria de soupper avec luy, là ou il le traicta bien, & luy fit bonne chere, puis apres soupper luy rendit son argent, & luy commanda que le lendemain il ne faillist pas à se trouuer au lieu ou lon bailloit les fermes publiques au plus offrant, & qu'il y meist enchere par dessus tous les autres. Le pauvre homme s'en uoulut excuser, disant que les fermes estoient trop grosses pour luy: mais Alcibiades le menaça de le faire fouetter, sil ne le faisoit: car oultre ce qu'il luy uoloit faire plaisir, il auoit encore quelque picque particuliere à l'encôtre des fermiers ordinaires. Le lendemain au matin l'estrange se trouua sur la place, au lieu ou l'on estrouffoit les fer-

a Ce peu-
uent estre
environ
cent flo-
rins.

mes, & y meit ^a un talét d'enchere, dequoy les autres fermiers furét biē courroucez, & se ben- dans ensemble contre luy, requirent qu'il eust à nommer promptement son respondant, pensans qu'il ne trouueroit iamais qui le uoulust cautionner. L'estranger se trouua bien empesché, & commenceoit ia à se tirer arriere, quand Alcibiades cria de loing tout hault aux officiers qui presidoyét à ceste enchere, C'est moy qui responds pour luy, escriuez moy, car c'est l'un de mes amis. Les fermiers oyans cela, ne sceurent plus que dire ne que faire, pource que ayans tousiours accoustumé de payer les fermes des annes precedentes à l'aide des subsequentes, ilz se uoyoyent priuez de ce moyen de s'acquitter enuers le public, & ne trouuans autre meilleur expedient, le prierent de prendre une piece d'argent, pour se departir de son marché: mais Alcibiades ne uolul pas qu'il en prist moins d'un talent, ce qu'ilz luy baillerent: & alors il luy permet de s'en departir. ainsi fut il cause de ce gaing à ce pauvre estrangeur. Or donques l'amour de Socrates, encore qu'il eust plusieurs grands & puissans aduersaires, arrestoit aucunesfois Alcibiades pour la gentillesse de sa nature, par le moyen des beaux discours & bonnes remonstrances qu'il luy faisoit, dont les raisons luy touchoyent le cueur au uif, & l'emouuoient iusques à luy faire uenir les larmes aux yeux: mais quelquefois aussi se laissant

a Ce sont
six cents
escus.

aller aux allechemens des flatteurs, qui luy subministroyent tous plaisirs & toutes uoluptez, il eschappoit à Socrates, & falloit qu'il courust apres pour le reprendre, comme un esclau qui s'en seroit fouy de la maison de son maistre: car il n'y auoit que celuy la seul qu'il craignist, & auquel il portast reuerence, mesprisant tous les autres au demourant. Auquel propos, le philosophe Cleanthes souloit dire, qu'il ne tenoit que par les oreilles le ieune enfant, dōt il estoit amoureux, & qu'au contraire il donnoit à ses concurrens beaucoup d'autres prises, ausquelles luy ne uouloit point toucher, uoulant entendre le boire & le manger, & autres plaisirs deshonestes: car à dire la uerité, Alcibiades estoit de luy mesme assez facile à tirer aux uoluptez, & est à l'adventure, ce que Thucydides a uoulu dire, quand il escrit qu'il estoit desordonné en son uiure ordinaire, quant à sa personne: mais toutefois ceulx qui le gastoyent, s'attachoyent plus tost à son ambition & à sa cupidité de gloire, luy mettans en teste qu'il deuoit entreprendre toutes grandes choses auant qu'il en fust temps, & luy faisans à croire que si tost qu'il commenceroit à s'entremettre du gouvernement des affaires, non seulement il obscurciroit & effaceroit tous les autres gouuerneurs, mais aussi surmonteroit la reputation, l'authorité & la puissance de Pericles entre les Grecs. Ainsi, ne plus ne moins que le fer amolly

& fondu par la force du feu, se rendurcit de re-
 chef par le froid, & se referre en soy mefme: auffi
 eftant Alcibiades enflé de uanité & de prefum-
 ptueufe opinion de foy, toutes & quantes fois
 que Socrates uenoit à le prendre, il le refferroit
 par fes remonftrances, & le rengeoit de forte,
 qu'il le rendoit bas & humble, quand il uenoit
 à recognoiftre combien de chofes luy defail-
 loyent, & combien il eftoit loing de la uraye
 uertu. Mais un iour, eftant ia forty hors de fon
 enfance, il entra en une efcole de Grammaire,
 & demanda au maiftre quelque liure d'Home-
 re. Le maiftre luy répondit, qu'il n'en auoit pas
 un: il luy donna un foufflet, & s'en alla. Vn au-
 tre Grammarié luy dit quelque autre fois, qu'il
 auoit Homere corrigé de fa main: Alcibiades
 » luy repliqua, Et comment t'amufes tu à ensci-
 » guer les premieres lettres aux petits enfans, fi
 » tu es fuffifant pour corriger Homere, & que tu
 » ne te mets plus toft à mōftrer aux ieunes hom-
 » mes? Vne autre fois uoulant parler à Pericles, il
 » alla battre à fa porte: on luy répondit, qu'il n'a-
 » uoit pas loisir de parler à luy, pource qu'il e-
 » ftoit empesché à penser à part foy comment il
 » rendroit fes comptes aux Atheniens: Commēt,
 » dit il en s'en allant, ne uaudroit il pas miculx
 » qu'il penfāst, cōment il pourroit faire qu'il n'en
 » rendift du tout point? Au refte, eftant encore
 » ieune garfon, il fut au uoyage de Potidæ, là ou
 » il logea tousiours avec Socrates, & l'eut touf-

iours à ses costez en toutes les récôtres & escar
mouches ou il se trouua, entre lesquelles il y
en eut une fort aspre, ou ilz se portèrent tous
deux tresbien, & y fut Alcibiades blecé: mais
Socrates se ietta au deuant de luy pour le cou-
rir, & le secourut si bien à la ueuë de tout le
monde, qu'il le sauua luy & ses armes, qu'ilz ne
uinssent en la puissance des ennemis. Si estoit
selon le droit & la raison le pris d'honneur de
ce combat deu, sans aucune doubte, à Socrates:
mais toutefois les Capitaines desiroient l'ad-
iuger à Alcibiades, pource qu'il estoit de gran-
de & noble maison: & Socrates uoulant aug-
menter & aguifer sa conuoitise d'honneur & de
gloire es choses honestes & louables, fut le pre-
mier qui tesmoigna qu'il l'auoit merité, & qui
pria les Capitaines de luy adiuuger la couronne
& le harnois complet. Depuis en la bataille de
Delion les Atheniës ayans esté rōpus & des-
faits, Socrates se retiroit avec peu d'autres à
pied. Alcibiades, qui estoit à cheual, l'ayant
trouué, ne uoulut point passer oultre, ains l'ac-
compagna, & le defendit contre une troupe
d'ennemis qui le poursuyuoient, & en tuoyent
plusieurs de sa compagnie: mais cela fut quel-
que temps apres. Et au parauant il donna un
soufflet à Hipponicus pere de Callias, qui estoit
l'un des plus grands & des plus puissans hom-
mes de sa uille, tant pour la noblesse de sa mai-
son, que pour ses biës & sa richesse, & ne le feit

point par courroux , ne pour aucune querelle qu'il eust à desmesler avec luy : mais de gayeté de cueur pour une gageure qu'il auoit faite avec ses compagnons . Ceste insolence fut incōtinent semee & diuulguee par toute la uille, & n'y auoit celuy comme lon peut penser, qui ne trouuast le faict fort mauuais : mais le lendemain matin, il s'en alla en sa maison, & batāt à la porte entra dedans, & se despouilla deuant luy, en luy abandonnant son corps à fouetter & chastier à son plaisir . Hipponicus luy pardonna & luy remeit tout son courroux , & depuis luy donna en mariage sa fille Hipparete : toutefois aucuns disent que ce ne fut pas Hipponicus qui la luy donna, ains Callias son filz, avec ^a dix talents de douaire : mais depuis au premier enfant qu'elle feit, il en demanda autres dix, disant qu'il luy auoit esté ainsi promis par son contract de mariage, sil aduenoit que sa femme eust enfans . Mais Callias craignant que ce ne fust une occasion cherchée pour l'aguetter & le faire mourir, à fin d'auoir ses biēs, declara publiquement au peuple, qu'il le faisoit son heritier uniuersel de tous ses biens, sil aduenoit qu'il decedast sans hoirs sortis de son corps . Ceste dame Hipparete estant honeste & gardant loyaulté à son mary, eut despit du tort qu'il luy faisoit, d'entretenir plusieurs folles femmes, tant de la uille mesme que des estrangeres, tellemēt qu'elle sortit de sa maison & s'en

^a Ce sont
six mille
escuts .

alla chez son frere. Alcibiades ne s'en soucia point, ny n'en fait autre compte, sinon qu'il la pria qu'elle portast elle mesme la declaration des causes de son diuorce au magistrat, & qu'elle ne les y enuoyast point par autre personne interposee. Parquoy y estant elle mesme allee pour se faire departir d'avec luy, selon que la loy l'ordonnoit, Alcibiades qui s'y trouua aussi, la saisit au corps & l'emporta à trauers la place iusques en sa maison, sans que personne s'osast entremettre de l'en empescher ne la luy oster: elle y demoura iusques à sa mort, qui fut bien tost apres, pendant un uoyage que fait Alcibiades en la uille d'Ephese. Ceste force ne fut point trouuee du tout illicite ny inhumaine, pource qu'il semble que c'estoit l'occasion pour laquelle la loy uouloit, que la femme qui uouloit faire diuorce avec son mary, allast elle mesme en public deuant le iuge en exposer les causes, à fin que le mary eust moyen de parler avec elle, & tascher à la retenir. Il auoit un chié beau & grand à merueilles, qui luy auoit cousté sept cents escus, il luy couppa la queuë, qui estoit la plus belle partie qu'il eust: dequoy ses familiers le tenferent fort, disans qu'il auoit donné à parler à tout le monde, & que chascun le blasmoit fort d'auoir ainsi diffamé un si beau chien. Il ne

» s'en fait que rire, & leur dit, C'est tout ce que ie
 » demande: car ie ueux que les Atheniens aillent
 » cacquetans de cela, à fin qu'ilz ne dient rien pis

de moy. Au demourant, il se dit que sa premiere entree à parler en public, & à se mesler des affaires, fut par une donation d'argent qu'il feit au public: non qu'il eust de longue main proietté de ce faire: mais un iour en passant de cas d'adventure par la place, il entendit un grand bruit du peuple, & demanda que c'estoit: on luy dit, que c'estoit de l'argent que quelques particuliers auoyent donné à la chose publique: adonc il se tira en auant, & en offrit aussi du sien. Le peuple en fut si aisé qu'il se prit à crier & à battre des mains, par une maniere de remerciement: dont il fut si ioyeux, qu'il s'oublia d'auoir soubz sa robbe en son sein une caille, laquelle eut peur du bruit, & s'en uola. Le peuple s'escria, & feit encore plus de bruit que deuant: & y en eut plusieurs qui se leuerent de leurs places pour courir apres, si qu'elle fut reprise par un pilote de nauire nommé Antiochus, qui la luy rebaila, à l'occasion dequoy il fut depuis fort aimé d'Alcibiades. Mais encore que la noblesse de sa maison, sa richesse, sa prouesse, & le grand nombre de ses parents & amis, luy donnassent grande ouuerture pour se poulsier en auant au gouvernement des affaires, si n'y auoit il rien dequoy il desirast plus se faire ualoir enuers le peuple, que de la grace de son eloquence: car qu'il soit uray qu'il ait esté tres-eloquent, les poëtes Comiques le tesmoignēt: & oultre ceulx la, le prince des orateurs De-

mosthenes, en l'oraison qu'il a faite à l'encontre de Midias, ou il dit qu'Alcibiades entre autres qualitez auoit esté treseloquent. Et si nous adioustons foy à Theophrastus, plus curieux de rechercher telles choses, & plus uersé en histoires que nul autre philosophe, il a escrit que Alcibiades estoit autant ou plus aigu & ingenieux pour inuenter & imaginer ce qui estoit bon à dire, que nul autre de son temps : ce neâtmoins quelquefois en cherchant, non seulement ce qu'il falloit dire, mais aussi cōment & en quelz termes il estoit meilleur de le dire, & ne le pouuant pas rencontrer assez promptement, il restiuoit, & demouroit tout court sans mot dire au milieu de son propos, ne trouuāt pas à main les paroles telles cōme il les demādoit, iusques à ce qu'il y eust un peu pensé, & qu'il fust retourné en sa memoire. La despense aussi qu'il faisoit à nourrir cheuaux pour courir es ieux de pris, estoit fort renommee, non seulement pour ce qu'il en auoit tousiours des plus uistes, mais aussi pour le nombre des chariots qu'il entretenoit : car il n'y eut onques homme priué, ne Roy mesme, qui enuoyast aux ieux Olympiques sept chariots equippez pour courir, comme il feit, ne qui en une mesme course ait emporté le premier pris, le secōd, & le quatrieme, comme dit Thucydides, ou, comme le met Euripides, le troisieme : car cela surmonte en splendeur & en gloire la magnificence de tous ceulx qui

qui s'en font onques meslez . Le lieu ou Euripides l'escriit est un cantique qu'il composa à sa louange disant ,

20 Je ueux pour ton nom exalter ,
 20 Tes louanges en uers chanter ,
 20 Filz de Clinias . La uictoire
 20 Est belle chose, & grande gloire ,
 20 Mais sur toutes la tiene est telle ,
 20 Qu'onques Grec n'en eut de si belle :
 20 Car tes chariots magnifiques
 20 Ont gagné es ieux Olympiques
 20 Le premier, second & tiers pris
 20 De la course . Et sans trauail pris
 20 En a ton chef de gloire orné
 20 Par deux fois esté couronné
 20 D'oliuier , & roy clair & hault
 20 Proclamé par uoix de herault,
 20 Vainqueur de tous les concurrens
 20 Qui estoient uenus sur les renga .

Mais encore luy fut cest honneur plus illustre & plus reluisant par l'affection de luy gratifier, que les uilles monstrerent enuers luy à l'enuy les unes des autres : car les Ephesiens luy dresserent une tente fort richement & magnifiquement accoustree : ceulx de Chio luy fournirent uiures pour ses cheuaux , avec force moutons & autres animaux propres à faire sacrifices : ceulx de Lesbos luy enuoyèrent du uin & d'autres prouisions de uiures , pour luy aider à soustenir la grande despense qu'il faisoit

à tenir maison ouuerte, & festoyer grand nombre de gens ordinairement. Toutefois la calumnie, qu'on luy meit sus, ou bien la male foy, dont il usa en ceste magnificence, donna matiere de parler de luy encore plus que iamais. Car on dit qu'il y auoit à Athenes un personnage nommé Diomedes, lequel au demourant n'estoit point mauuais homme, & estoit amy d'Alcibiades, & desiroit une fois en sa uie pouuoir emporter le pris de ces ieux Olympiques: il fut aduertiy que les Argiens auoyent un chariot bien equippé, qui appartenoit à leur chose publique: parquoy sachant qu'Alcibiades pouuoit beaucoup en la uille d'Argos, à cause qu'il y auoit plusieurs amis, il le pria de uouloir acheter ce chariot pour luy. Alcibiades l'acheta, mais il se l'attribua à soy mesme, sans auoir esgard à Diomedes, qui s'en desesperoit, & appelloit les Dieux & les hommes à tesmoings du tort qu'Alcibiades luy faisoit: & semble qu'il y eut proces intenté sur cela, car Isocrates a escript un plaidoyer & oraison en la defense de Alcibiades estant encore enfant, touchant une couple de cheuaux: toutefois en ce plaidoyer la, la partie aduerse est nommee Tifias, & non pas Diomedes. Au reste, si tost qu'il se fut ietté aux affaires de la chose publique, estant encore fort ieune, il effacea incontinent tous les autres orateurs & entremetteurs du gouvernement, excepté deux seulement qui luy feirent teste,

L'un fut Phæax filz d'Erasistratus, & l'autre Nicias filz de Niceratus, desquelz Nicias estoit ia homme d'aage, & auoit ia acquis reputation de tresbon Capitaine, & Phæax commenceoit encore à uenir en auant, comme luy, estant bien de bonne & noble maison, mais ayant au demourant faulte de plusieurs choses, & notamment entre autres, d'eloquence, par ce qu'il estoit plus propre à deuiser & disputer en priué, qu'à plaider & harenguer en matiere contentieuse publiquement deuant le peuple, ayant, comme dit Eupolis,

39 Parole assez, mais d'eloquence point.

Lon treuue encore une harengue escripte à l'encontre d'Alcibiades & de ce Phæax, en laquelle entre autres charges, il y a que Alcibiades se faisoit ordinairement seruir en sa maison des utensiles d'or & d'argent qui appartenoyent à la chose publique, & que lon auoit accoustumé de porter par une magnificence es processions publiques, & qu'il en usoit ne plus ne moins que filz eussent esté siens. Or y auoit il lors à Athenes un nommé Hyperbolus natif du bourg de Perithoide, duquel Thucydides mesme fait mention comme d'un meschant homme, seruât de subiect à toutes les piqueures & les moqueries des poëtes Comiques de ce temps la: mais il estoit si deshonté, & se soucioit si peu de bruit qu'on luy donnast, qu'il ne luy chaloit d'estre uituperé, ny ne se mouuoit aucunement

pour chose que lon dist de luy, ce qu'aucuns appellent hardiesse & fermeté de courage, là ou ce n'est que uraye impudence, mauuaistié effrontee, & desesperee meschanceté. Il ne plaisoit à persōne, mais le menu peuple s'en seruoit bien souuent, quand il uouloit piquer, iniurier, ou calumnier les personnages de qualité. Si estoit le peuple à la suscitation & suasion de cest Hyperbolus prest & appareillé de proceder par la pluralité des uoix au bannissement de l'Ostracisme, par lequel il auoit accoustumé de bannir & de chasser hors de la uille pour quelque tēps celuy des citoyens, qui sembloit estre plus apparēt que les autres en credit, authorité & puissance, plus pour contenter leur enuie, que pour remedier à leur crainte. Et pource qu'il estoit tout euident que l'un d'eulx trois ne faudroit pas d'estre banny, Alcibiades trouua moyen d'assembler en un toutes leurs trois ligues: & en ayant conferé & communiqué avec Nicias, fait tourner le sort du bannissement sur Hyperbolus mesme qui l'auoit mis en auant. Les autres disent, que ce ne fut pas avec Nicias qu'il en communiqua, ains avec Phæax, & que ioignant sa bande avec celle de Phæax, il feit chasser Hyperbolus, qui ne se doubtoit de rien moins, pource que iamais homme de petite qualité ny de peu d'authorité ne tumboit en la peine de ce bannissement, ainsi que Platon le poëte Comique le tesmoigne en un passage, ou

il parle de cest Hyperbolus disant :

- » Quoy que ses meurs ayent en uerité
 » Cela & pis iustement merité,
 » Tant est que luy, personne de si uile
 » Condition, & de race seruile,
 » N'en estoit pas digne : car inuenté
 » Pour telles gens n'a l'Ostracisme esté.

Mais quant à ce propos, nous en auons parlé plus amplement ailleurs : & pour retourner à Alcibiades, il n'estoit moins fasché de la bonne reputation que Nicias auoit enuers les estrangers & les ennemis, que de l'honneur que luy faisoient ses citoyens. Car il estoit hôte public des Lacedæmoniens, qui logeoient tous chez luy quand ilz uenoient à Athenes, & auoit fait tout le meilleur traitement qu'il auoit peu à leurs prisonniers, qui auoyent esté pris deuant le fort de Pyle : & depuis ayant esté la paix, moyenant laquelle ilz recouurerent leurs prisonniers, traitte par l'entremise & sollicitation de Nicias principalement, ilz l'en aimerent encore plus que iamais : & couroit le bruit par toute la Grece, que Pericles auoit allumé la guerre entre eulx, & Nicias l'auoit esteincte, de sorte qu'il y en auoit qui appelloient ceste paix Nicium, comme qui diroit, le chef d'œuvre de Nicias. Dequoy Alcibiades estant marry, & luy en portant enuie, proposa de rompre l'appointement comment que ce fust, & pour ce faire tout premierement estant bien

asseuré que les Argiens, pour la haine & enuie qu'ilz portoyent à ceulx de Spartè, ne cherchoyent que moyen & occasion de soy departir d'avec eulx, il leur donna secrettement esperance de l'alliance & ligue des Atheniens, & les enhorta de ce faire tant par lettres, que de bouche, en parlant avec ceulx qui auoyent & autorité & credit enuers le peuple, leur remonstrant qu'ilz ne deuoient point craindre les Lacedemoniens ny leur ceder aucunement, ains se tourner du costé des Atheniens, lesquels se repentiroient bien tost de l'accord qu'ilz auoyent fait, & le romproyent avec eulx. Et depuis, ayans ceulx de Lacedæmone fait alliance avec les Bæotiens, & rendu aux Atheniens la uille de Panacte, non en son entier comme ilz deuoient par le traitté, ains toute demolie & destruite, luy uoyant que le peuple en estoit fort indigné, l'aigrit & irrita encore dauantage, & quand & quand embrouilla Nicias, le mettant en la malegrace du peuple, & le chargeant de choses ou il y auoit quelque apparence, Qu'il n'auoit iamais uoulu, estant Capitaine, aller prendre & forcer les Lacedæmoniens qui estoient enfermez en l'isle de Sphæterie, & que encore depuis quand ilz auoyent esté pris à force par d'autres, il auoit trouué moyen de les faire deliurer, & les renuoyer chez eulx, pour gratifier à ceulx de Lacedæmone. Dauantage qu'estant leur amy, il ne se-

estoit pas mis en deuoir de leur dissuader qu'ilz
 ne feissent iigue offensive & defensiue avec les
 Bœotiens & les Corinthiens : & au contraire ,
 que sil y auoit aucun peuple de la Grece qui
 eust enuie de deuenir amy & allié des Athe-
 niens, il sefforceoit de l'empescher, sil ne plai-
 soit aux Lacedæmoniens . Ainsi estant Nicias
 en la malegrace du peuple, pour les causes &
 raisons susdittes, il arriua par cas d'adventure
 sur ces entrefaittes, des ambassadeurs de Lace-
 dæmone, lesquelz à leur arriuee teindrent les
 plus honestes paroles du monde, disans auoir
 plein pouuoir & entiere puissance d'accorder
 & appointer tous differents avec toutes raison-
 nables & equitables conditions . Le Senat les
 ouit & receut fort uoluntiers, & se deuoit le
 peuple assembler en conseil le lendemain, pour
 leur donner audience : ce que Alcibiades crai-
 gnant, fit tant qu'il parla à ces ambassadeurs à
 33 part, & leur dit : Que faiçtes uous, seigneurs
 33 Spartiates ? ne sçauiez uous pas que le Senat a
 33 tousiours accoustumé de se porter moderee-
 33 ment & gracieusement enuers ceulx qui ont à
 33 besongner & traiter avec luy, & que au cõtrai-
 33 re le peuple de sa nature est haultain, & conuoit-
 33 teux de toutes grâdes choses ? Si donques uous
 33 luy allez de prime face donner à entendre que
 33 uous soyez icy uenus ayans plein pouuoir de
 33 traiter librement avec luy de toutes choses, ne
 33 pensez uous pas qu'il uous uoudra forcer &

33 contraindre d'autorité, à luy ottroyer tout ce
 33 qu'il uous demandera? Pourtāt, Seigneurs am-
 33 bassadeurs, si uous uoulez auoir raison des Athe-
 33 niens, & qu'ilz ne uous cōtraignent à leur con-
 33 ceder iniquement aucune chose contre uostre
 33 uoulunté, ie uous conseille que laissans un peu
 33 arriere ceste simplicité, uous proposiez seule-
 33 ment, comme par maniere d'ouuerture, quel-
 33 ques conditions & articles equitables de paix,
 33 sans autrement dire que uous ayez entier pou-
 33 uoir de riē acorder: & de ma part, ie uous y aide
 33 ray en faueur des Lacedæmoniens. Et en leur
 disant cela, il leur iura & donna sa foy qu'il le fe-
 roit ainsi: tellemēt qu'il les destourna de la con-
 fiance qu'ilz auoyēt en Nicias, & les gaigna, de
 maniere qu'ilz ne croyoyent en autre homme
 qu'en luy, s'esmerueillans grandement de son
 bon sens & de la uiuacité de son entendement,
 comme d'un personnage de grāde & singuliere
 excellence. Le lendemain au matin fut le peu-
 ple assemblé en conseil pour les ouir, & les am-
 bassadeurs introduicts en l'assemblee: là ou Al-
 cibiades leur demanda tout doucement, qu'ilz
 estoient uenus faire: ilz respondirent qu'ilz
 estoient uenus pour faire quelque ouuerture
 de paix, mais qu'ils n'auoyent point de pouuoir
 de rien arrester. Adonc commença Alcibia-
 des à crier apres eulx en cholere, comme si
 c'eussent esté eulx qui luy eussent fait grād tort,
 & non pas luy à eulx, en les appellant hommes

desloyaux, inconstans & variables, & qui n'estoyent uenus pour faire ny pour dire chose quelconque qui ualust. Le Senat mesme s'en courroucea à eulx, & le peuple les rabroua bien rudement : dequoy Nicias se trouua si honteux & si confus, qu'il ne sceut que dire d'un si soudain changement, ne sçachant rien de la tromperie & malice dont auoit usé Alcibiades. Ainsi furent renuoyez les ambassadeurs Lacedæmoniens sans rien faire, & Alcibiades eleu Capitaine, lequel attira incontinent à l'alliance d'Athenes les Argiens, Eliens & Mantiniens. Et combien que personne n'approuue le moyé qu'il teint pour aduenir à ces fins, si fut-ce un grand exploit fait à luy, que de diuiser & esbrâler ainsi tout le Peloponese, & de mettre en bataille si grand nombre de combatans contre les Lacedæmoniens, comme il feit deuant la uille de Mantinee, & esloigner si loing d'Athenes les malheurs de la guerre, & le hazard de la bataille, en laquelle les Lacedæmoniens ne pouoyent gueres profiter s'ilz la gaignoyét, & s'ilz la perdoyent, il estoit bien difficile qu'ilz peussent sauuer leur uille mesme de Sparte. Or apres ceste bataille de Mantinee, les mille hommes d'ordonnance, qui estoient soudoyez aux despens du public, tant en paix qu'en guerre, dedans la uille d'Argos, estimans leur occasion estre uenue, essayerét d'oster l'authorité souueraine à la commune, & se faire Seigneurs de la

uille. A quoy faire les Lacedæmoniens qui y
 furuindrent leur aiderent, & abolirent le gou-
 uernement populaire: toutefois le peuple tan-
 tost apres reprit les armes, & fut le plus fort. Et
 Alcibiades qui y arriua tout à point, assura
 leur uictoire, & remeit sus l'autorité souuerai-
 ne du peuple, puis leur persuada de tirer de lon-
 gues murailles pour conioindre leur uille à la
 marine, à fin que plus facilement ilz peussent e-
 stre secourus par mer de la puissance des Athe-
 niens: si leur amena de Athenes mesme, force
 charpétiers, maçons, tailleurs de pierres, & au-
 tres ouuriers, & brief monstroit par tous les
 moyens qu'il pouuoit, auoir affection tresgrá-
 de au bien de leurs affaires, en quoy il ne s'ac-
 queroit pas moins à soy particulierement de
 grace & de credit enuers eulx, qu'il faisoit à sa
 chose publique & à son pais. Il persuada sem-
 blablement à ceulx de Patras de ioindre aussi
 leur uille à la marine par le moyen des longues
 murailles qu'ilz tirerent iusques au bord de la
 mer: & côme quelcun leur dist, O pauures gens
 de Patras, que faiçtes uous? les Atheniens uous
 mangeront: Alcibiades luy respondit, Il pour-
 roit bien estre, mais ce sera petit à petit, & en
 cōmenceant par les pieds: mais les Lacedæmo-
 niens uous deuoreront tout à un coup, & en
 commenceant par la teste. Or cōbien qu'Al-
 cibiades allast ainsi fortifiant la uille d'Athenes
 en puissance maritime, si ne laissoit il pas pour-

tant de conseiller aux Atheniens & les enhorter qu'ilz entendissent à s'agrandir aussi du costé de la terre, ains ramenoit souuét en memoire aux ieunes homes le serment qu'on leur faisoit prester au bourg de Agraulos, & les sommoit de l'accomplir par effect: car ilz iuroyent qu'ilz reputedoyét les bornes & cōfins de l'Attique estre les bleds, les orges, les uignes & les oliuiers: par lequel serment on leur enseignoit à s'attribuer & reputed siene toute terre labourable cultiuee & qui porte fruit. Mais parmy ces beaux faicts & dicts d'Alcibiades, & avec ceste siene grâdeur de courage & uiuacité d'entendement, il y auoit de l'autre costé beaucoup de faultes & d'imperfections: car il estoit trop delicat en son uiure ordinaire, dissolu en amours de folles femmes, & desordonné en bâquets, trop superflu & effeminé en habirs, parce qu'il alloit tousiours uestu de grandes robes de pourpre qu'il trainnoit en se promenant à trauers la place, avec une despense trop excessiue & trop superbe. Suyuât lesquelles delices, quâd il estoit en galere, il faisoit ouurir & fendre le planché de la poupe, à fin qu'il couchast plus mollement, par ce que son lict estoit estendu, non sur les ais durs, mais suspendu en l'air avec des sangles, & portoit à la guerre un escu doré, sur lequel il n'y auoit aucune enseigne ne deuise ordinaire aux Atheniens, ains y auoit l'image de Cupido, tenant la foudre en sa main.

Ce que uoyans les gens de bien & d'honneur de la uille d'Athenes, oultre ce qu'ilz haïssoyēt toutes ces façons de faire & s'en courrouceoyēt, encore redoubtroient ilz son audace effreneē & son insolence de contemner ainsi les loix & coustumes de son païs, comme estans indices d'homme, qui aspiroit à la tyrannie, & qui uouloit tout renuerser sans dessus dessous : mais quant à l'affection du commun peuple enuers luy, le poëte Aristophanes donne bien à entendre quelle elle estoit quand il dit :

22 Il le desire auoir deuant ses yeux ,

23 Et si luy est neantmoins odieux.

Et en un autre passage aggrauant encore plus la suspicion, que lon auoit de luy, il dit :

24 Le mieulx seroit pour la chose publique ,

25 Ne nourrir point de lion tyrannique :

26 Mais puis qu'on ueult le nourrir, necessaire

27 Il est qu'on serue à ses façons de faire.

Car à la uerité les dons gratuits, les liberalitez, & despenses magnifiques qu'il faisoit pour donner passetemps au peuple, si grandes qu'il n'estoit possible de plus, la glorieuse memoire de ses ancestres, la grace de son eloquēce, la beauté de sa personne, la force de corps & hardiesse conioincte avec bon sens & experiēce au faict de la guerre, estoient causes que lon luy permettoit toutes choses, & que les Atheniens enduroyent patiemment toutes ses insolences, en desguisant & addoulcissant des plus gracieux

noms qu'ilz pouuoient, les faultes qu'il faisoit, les appellans ieux de ieunesse & gentillesse: cōme quād il reteint prisonnier à force en sa maison le peintre Agatharchus, iusques à ce qu'il luy eust peint tout son logis, puis quand il eut acheué, il le laissa aller avec de beaux presens qu'il luy fait, & qu'il donna un soufflet à Tauréas, qui fournissoit à la despense d'une bende de ioueurs de Comedies à l'éui de luy pour emporter l'honneur des ieux, & qu'il enleua d'autorité une ieune femme Meliene qui estoit entre les prisonniers de guerre, & la teint pour sa concubine, dont il eut un enfant qu'il fait nourrir: car ilz appelloient cela œuure de charité, combien que lon le chargeast d'auoir esté cause principale de faire passer au fil de l'espee tous les pauures Meliens, exceptez les petits enfans, pource qu'il auoit fauorisé & suadé le decret de ceste inhumanité qu'un autre auoit proposé. Et ayant le peintre Aristophon peint une courtisane nommee Nemea, qui tenoit entre ses bras Alcibiades assis en son giron, tout le peuple y accouroit, & prenoit grand plaisir à ueoir ce tableau: mais les gens uieux & sages se courrouceoyent de tous ces actes la, comme de choses tyranniques & faites contre la moderatiō requise en bourgeoisie ciuile. Au moyen dequoy il semble que Archestratus ne rencontra pas mal à propos quand il dit, que la Grece n'eust sceu endurer deux Alcibiades. Et un

iour, ainsi comme il retournoit de l'assemblée
 du peuple en conseil, ou il auoit fort bien ha-
 rengué au gré de l'assistance, & à ceste cause
 ayant obtenu ce qu'il pretendoit, s'en retour-
 noit en sa maison accompagné d'une grande suite
 de gens qui le reconduisoient par hōneur,
 Timon, celuy qui fut surnommé Misanthrope,
 comme qui diroit, Loupgarou ou haïssant les
 hommes, le rencontrant en son chemin, ne
 passa point oultre, ny ne se destourna point de
 luy, comme il auoit accoustumé de faire à tous
 les autres, ains luy alla au deuant, & luy tou-
 chant en la main luy dit : O tu fais bien, mon
 enfant, & ie t'en sçay bon gré, de ce que tu uas
 ainsi croissant en credit : car si tu as iamais au-
 thorité, ce sera au grand mal & à la ruine de
 tous ceulx icy. Ces paroles ouyes, aucuns des
 assistens ne s'en feirent que rire : les autres en
 dirēt iniure à Timon : & les autres les noterent
 bien & y penserent plus d'une fois depuis : tant
 estoit diuerse & differente l'opinion que lon
 auoit de luy, pour la uarieté de sa uie & ine-
 galité de ses meurs & de sa nature. Or quant à
 l'entreprise de la Sicile, il est bien uray que les
 Atheniens auoyent ia commencé de la con-
 uoiter des le uiuant de Pericles, mais toutefois
 ilz n'y meirent la main qu'apres sa mort, sous
 l'ombre de faire alliances, & d'enuoyer ordi-
 nairement du secours aux uilles qui estoient
 guerroyees & trauaillees par les Syracusains

ce qui estoit comme bastir un pont pour y faire puis apres passer une plus grosse & plus puissante armee: mais celuy qui de tout poinct leur en enflamma le desir, & qui leur suada de n'y enuoyer plus ainsi peu à peu & par le menu, ains y aller avec une bonne & grosse armee tout à un coup, pour la subiuguer & conquerir toute entierement, fut Alcibiades, lequel sceut si bien dire que le peuple à sa persuasion se meit en teste de grandes imaginations, & de luy mesme s'en promettoit encore dauantage: car la conqueste de la Sicile, là ou les autres terminoyent leur desir, & ficheoyent le but de leurs esperances, ne luy estoit à luy sinon un commencement:& au lieu que Nicias par ces ordinaires remonstrances, diuertissoit les Atheniens d'entreprendre la guerre contre les Syracusains, comme estant entreprise trop difficile de prendre la uille de Syracuse, Alcibiades au contraire se forgeoit desia en son entendement les conquestes de Libye & de Cartage, & cela conquis passoit de là en Italie & au Peloponese: de maniere que la Sicile ne seruoit plus que de fournir uiures & soude aux autres conquestes qu'il imaginoit. Si furent incontinent les ieunes hommes d'eulx mesmes eleuez en grande esperance, & escoutoyent de grande affection les plus anciens qui leur comptoyent merueilles de ce uoyage, tel-

lement que lon ne uoyoit autre chose es lieux publics ordonnez pour l'exercice des ieunes gens, & par les portiques publiques, que troupes d'hommes assis en rond à ueoir traſſer en terre & deſcrire la forme de la Sicile, la ſituation de la Libye & de Cartage. Tourefois lon dit que ny le philoſophe Socrates, ny l'aſtologue Meton, n'eſpererent iamais rien de bon de route ceſte expedition: l'un par la reuelation de ſon eſprit familier qui luy prediſoit ce qui en eſtoit à aduenir, cōme il eſt uray-ſemblable: & Meton, ſoit ou pour la crainte qu'il en euſt en iugeant l'entrepriſe par diſcours de raiſon, ou qu'il euſt cogneu par la diuination de ſon art qu'il en deuoit mal aduenir, contrefeit le furieux, & tenant une torche ardente en ſa main, fait ſemblāt de uouloir mettre le feu en ſa maiſon. Les autres diſent qu'il ne contrefeit point le furieux, mais que realemēt & de faiēt il brula ſa maiſon une nuit, & que le lendemain au plus matin il ſ'en alla ſur la place prier & ſupplier le peuple, qu'en conſideration d'une ſi grāde perte & ſi griefue calamité qui luy eſtoit aduenue, il leur pleuſt luy diſpēſer ſon filz d'aller en ce uoyage: & quāt à luy il obteint ce qu'il demanda par ceſte fourbe, dont il abuſa le peuple: mais Nicias fut en deſpit qu'il en euſt eleu Capitaine pour la conduitte de ceſte guerre, n'ayant pas moins ceſte charge à contrecueur pour le compagnon qu'on luy bailloit à la cōduitte

duitte d'icelle, que pour les inconueniens qu'il preueoit en l'entreprise. Mais les Atheniens estimerent que les affaires de ceste guerre se porteroient mieulx, s'ilz ne les commettoyent point totalement à la hardiesse d'Alcibiades, ains y conioignoient avec luy la prudence de Nicias, pourautant mesmemét que le tiers Capitaine qu'ilz y enuoyoyent aussi, Lamachus, encore qu'il fust ia homme d'aage, ne s'estoit pas montré moins bouillant, hazardeux & auantureux en quelques combats, qu'Alcibiades. Quand se vint dōques à deliberer du nombre des combatans, de la maniere, & de tout l'equippage qu'il falloit dresser pour ceste guerre, Nicias tascha encore obliquement à empescher & faire rompre l'entreprise, mais Alcibiades luy contredit & le gaigna: & y eut un orateur nommé Demostratus qui mit en auant, que les Capitaines eleus pour la conduite de l'entreprise deuoient auoir plein pouuoir & entiere puissance de leuer à leur discretion tant de gens, & faire telz preparatifz que bon leur sembleroit: ce que le peuple accorda & autorisa. Mais quād tout fut prest & appareillé pour partir, il se rencontra plusieurs signes de mauuais presage: & entre les autres, il se trouua que l'embarquement fut commandé au iour propre que lon celebre la feste qui s'appelle Adonia, en laquelle la coustume est, que les femmes mettent en plusieurs endroits de la

uille, par les rues, des figures semblables aux corps morts que lon porte en terre, & representent le dueil & les lamentations que lon fait es funerailles des trespassez en plorant & se battant pour commemoration du dueil que demena la Deesse Venus à la mort de son amy Adonis. Dauantage les Hermes, qui sont images & figures de Mercure, que lon souloit anciennement mettre par tous les carrefours, se trouuerent une nuit presque toutes tronçonnees & gastees, mesmement aux uisages: ce qui meit en effroy & troubla beaucoup de gens, uoire iusques à ceulx qui ne faisoient pas grand compte de telles choses. Si fut allegué que ce pouuoient auoir esté les Corinthiës, qui en faueur des Syracusains qui estoÿent leurs parents, & auoyent esté fondez par culx, auroyent procuré de faire faire ceste insolence, estimans que pour le mauuais presage, cela pourroit estre cause de rompre toute l'entreprise, & que le peuple se repentist d'auoir entrepris ceste guerre: toutefois ce propos ne fut point receu par le peuple, ny aussi les paroles de ceulx qui alloient disans qu'il ne se falloir point arrester à relz signes & presages, & que ce deuoyent auoir esté quelques ieunes gens desbauchez, qui apres bien boire auroyent commis & fait un tel scandale, en se cuidant iouer. Mais nonobstant toutes ces raisons le peuple prit ce faict fort à cueur, & en eut peur,

estimant que personne n'eust iamais pris la hardiesse de commettre un tel cas, si ce n'eust esté une coniuration de quelque grande chose: à l'occasion dequoy, lon recherchoit toute suspicion, pour petite & legere qu'elle fust, fort asprement, & s'assembla le Senat & le peuple aussi en conseil là dessus par plusieurs fois en peu de iours. Sur ces entrefaittes Androcles, l'un des orateurs qui s'entremettoyent du gouvernement de la chose publique, produisit au conseil quelques esclaves & quelques estrangers habituez en Athenes, lesquelz deposerent qu'Alcibiades & autres siens familiers auoyét ainsi tronçonné & mutilé quelques autres images, & contrefait par maniere de moquerie, en un banquet priué, les ceremonies des saincts mysteres, disans notamment ces particularitez, que un certain Theodorus contrefaisoit le herault qui a accoustumé de faire les proclamations, Polytion le porte-torche, & Alcibiades le presbtre qui monstre les choses sainctes & mystiques, & que ses autres compagnons estoient les assistens, comme ceulx qui pretendent & demandent à estre receus en la religion & confrairie des saincts mysteres, lesquelz pour ceste cause on appelle Mystes. Ces propres termes sont escripts en l'accusation que Theffalus filz de Cimon proposa à l'encontre d'Alcibiades, le chargeant de festre meschamment moqué des deux Deesses, Ce-

res & Proserpine , dequoy le peuple estant fort irrité & indigné à l'encontre d'Alcibiades, avec ce que l'orateur Androcles, qui estoit l'un des plus aspres ennemis qu'il eust , l'aigrissoit & irritoit encore dauantage , il sen trouua un peu estonné du commencement : mais puis apres sentant que tous les mariniers qui deuoient aller à ce uoyage de la Sicile , & les soudards mesmes estoient fort affectionnez enuers luy , & notamment que ceulx du secours d'Argos & de Mantinee , lesquelz estoient mille hommes de pied bien armez, disoyent publiquement que c'estoit pour l'amour d'Alcibiades, qu'ilz entreprenoyent un si loingtain uoyage oultre mer, & que si on luy uouloit faire quelque tort & mauuais traitement , ilz se retireroient incontinent en leurs maisons, il reprit adonc courage, & delibera sur la faueur du temps de soy presenter & ester à iugement pour respondre à qui le uouldroit accuser : à l'occasion dequoy ses ennemis s'attiedirent un peu , craignans que le peuple ne se monstrest en ce iugement plus mol enuers luy, d'autant qu'il en auoit à faire. Au moyen dequoy , pour obuier à ce danger , ilz attirerent quelques autres orateurs, qui faisoient semblant de n'estre point ennemis d'Alcibiades, & neantmoins ne luy uouloyent pas moins de mal, que ceulx qui estoient ses ennemis declarez: ceulx la se leue-

rent en pleine assemblée de conseil, & dirent qu'il n'y auoit point de propos, que luy qui estoit eleu l'un des Capitaines generaux d'une si belle & si puissante armee, laquelle estoit ia toute preste à faire uoile, & le secours de leurs allicz aussi, s'arrestast, en perdât temps & occasion de bien faire, ce pendant que lon luy choisiroit des iuges, & que lon luy mesureroit les heures, dedans lesquelles il auroit à respondre: pourtant disoyent ilz qu'il falloit que pour le present il se meist en bonne heure à faire son uoyage: puis quand la guerre seroit acheuee cy apres, qu'il se representast pour ester à droit, & se purger des charges que lon luy mettoit sus. Mais Alcibiades ayant incontinent apperceu & descouuert la malice de ce delay, se tira en auant, & remonstra qu'il n'y auoit point de raison de le faire partir Chef d'une si grosse puissance, ayât l'entendemēt suspēdu en cōtinuelle crainte, pour les griefues imputations qu'il laissoit derriere à l'encōtre de luy, pource qu'il meritoit de mourir s'il ne s'en purgeoit & iustificoit entierement: mais quand il s'en seroit iustificié, & qu'il en seroit trouué innocent, alors il n'auroit plus rien en son entendement, sinon d'aller combattre les ennemis, sans plus penser au danger des calumniateurs: ce que toutefois il ne peut persuader, & luy fut enioinct expressement de la part du peuple, que il eust à s'embarquer. Ainsi fut il contrainct

de faire uoile avec ses autres compagnons, ayans en leur flotte enuiron cent quarante galeres, toutes à trois rames pour banc, & de gens de combat à pied bien armez cinq mille & cent, de tireurs de fondes, archers & autres armez à la legere, enuiron treze cents, & de toute autre munition & equippage pour la guerre suffisamment. Arriuez qu'ilz furent en la coste de l'Italie, ilz prirent terre en la uille de Rege, là ou au conseil qui fut tenu pour arrester comment ilz auoyent à se conduire en ceste guerre, il fut d'aduis qu'ilz deuoient aller droit en la Sicile: laquelle opinion fut suyue, encor que Nicias y contredist, pource que Lamachus en fut aussi d'aduis, & de primfault à l'arriuee, il fut cause de surprendre la uille de Catane: mais onques depuis il n'y fait exploit aucun, pource qu'il fut incontinent rappelé par les Atheniens, pour aller respondre aux crimes & imputations dont on le chargeoit. Car, comme nous auons ia dit au parauant, il y eut du commencement aucunes legeres suspicions & accusations proposees à l'encontre de luy par quelques esclauues & quelques estrangers: mais depuis, quand il fut party, ses ennemis le chargerent beaucoup plus asprement, ioignans au crime d'auoir brisé les images de Mercure, le sacrilege d'auoir contrefait par maniere de moquerie, les saintes cerimonies des mysters, & donnans à entendre au peu-

ple, que l'un & l'autre acte procedoit d'une mesme conſpiration de remuer & changer le gouvernement de la uille: dont le peuple fut ſi irrité & ſi emeu, que lon ietta en priſon tous ceulx qui furent en ſorte quelconque deferez ou ſouſpeçonnez, ſans les uouloir ouir en leurs iuſtifications: & ſe repentoit on bien fort, que lon n'auoit fait le proces à Alcibiades, ſur des charges & informations ſi grandes, lors que lon le tenoit entre mains: à raiſon dequoy ſil y auoit aucun ſien parent, amy ou familier, qui tumbast en ceſte fureur de peuple ainſi mutiné contre luy, il en eſtoit bien pirement traitté. Thucydides n'a point nommé, qui furent les delateurs: mais quelques autres nōment Diocliides & Teucer, entre leſquelz eſt le Poëte comique Phrynichus, qui le dit en ces uers, ou il introduit quelcun qui parle ainſi à une image de Mercure:

- » O cher amy, ie te prie auoir cure
 » Et te garder de trebucher, Mercure:
 » De peur que ſi en tumbant tu te caſſes,
 » Calumnier innocent ne me faces
 » Par un nouveau Diocliides faulſaire,
 » Qui ua cherchant tout moyen de mal faire.

Mercurẽ reſpond.

- » De m'en garder i'auray ſoing, ne te chaille:
 » Car ie ne ueux eſtre cauſe qu'on baille
 » A l'eſtranger Teucer maudit uoleur,
 » Le pris d'argent promis au deceleur.

A iiij

729
A L E C T I B I A D E S .
Et toute fois ces indices la ne descouvirerēt rien d'asseuré ny de certain : car mesme il y en eut un, qui interrogué comment il auoit peu recognoistre au uisage ceulx qui auoyent brisé les images, attēdu que ce auoit esté la nuit, respondit qu'il les auoit cognus à la clarté de la Lune : par ou lon cognut euidēment, que toute sa deposition estoit faulse, pource que ce auoit esté la nuit propre de la conionction de la Lune, que le cas auoit esté commis: ce qui troubla & meit en doute les personnes d'entendement, mais pour cela la cōmune ne laissa point à estre aussi aspre & aussi aigre à receuoir toutes sortes de calumnies & de delations, comme au paruant. Or estoit entre les prisonniers que lon detenoit pour leur faire leur proces, l'orateur Andocydes, lequel Hellanicus l'historien fait descendre de la race d'Vlysses, & le tenoit on pour homme qui haïssoit le gouvernement populaire, & fauorisoit au gouvernement du petit nombre & de la noblesse : mais l'une des principales occasiōs, pour lesquelles on le soupçonnoit estre de ceulx qui auoyent brisé les images, estoit pource que tout ioignant sa maison y en auoit une belle & grāde, laquelle y auoit anciēnemēt esté posce par la lignee Ægeïde, & estoit seule, mesmemēt entre les plus fameuses, demouree entiere, à raison de quoy elle s'appelle encore auiourd'hui le Mercure d'Andocydes, & est ainsi publiquemēt nommee de

tout le mōde, quoy que l'inscriptiō tesmoigne le cōtraire. Estant donques en prison, il aduint qu'il s'accointa & prit amitié avec un Timæus plus qu'avec nul des autres, qui estoient detenus prisonniers pour ce mesme cas. Ce Timæus n'estoit pas tant cogneu que luy, mais au demourant, homme de grand sens & de grande hardiesse, lequel luy persuada & meit en teste, qu'il s'accusast soy mesme, avec quelque peu d'autres, par ce qu'en aduouant & confessant le cas, il auroit sa grace, ainsi qu'il estoit porté par le decret du peuple, là ou sil attendoit la sentence des iuges, il y auroit danger en son faict: pource que l'issue des iugemens est incertaine pour toutes gens, mais sur tous grandement à craindre & à redoubter pour les riches: & pourtant qu'il ualoit mieulx, sil regardoit à son particulier seulement, sauuer sa uie en mentant, que de se laisser occire ignominieusement, avec la charge & condamnation de ce mesme crime: & sil regardoit au bien public, qu'encore seroit ce sagement fait, d'exposer à ce peril quelque peu de ceulx que lon ne sçauoit pas asseurement silz en estoient ou non, pour sauuer de la fureur du peuple, & respiter de la mort beaucoup de gens de bien, qui à la uerité estoient de ce mesfaict innocents. Ces raisons & suasions de Timæus eurent tant d'efficace enuers Andocides, qu'elles le gagnerent, & luy persuaderent de s'accuser soy mesme, & quelques autres

avec : si eut quant à sa personne l'impunité qui estoit promise par le peuple : mais tous ceulx qu'il nomma, furent condamnez & executez à mort, exceptez seulement ceulx qui se sauuerent de uistesse . Et pour rendre la chose, plus uray-semblable, Andocydes meit au nombre des accusez quelques uns de ses propres seruiteurs . Mais pour cela ne fut pas assouuie l'ire du peuple, ains comme n'ayant plus à penser de ceulx qui auoyent rompu & brisé les images, il employa adonc entierement son courroux à l'encontre d'Alcibiades, iusques à ce que finalement il y enuoya la galere que lon appelle Salaminienne, enioignant expressement à ceulx qui eurēt la commission de l'aller querir, qu'ilz n'attentassent point de le prendre par force, ne qu'ilz ne meissent aucunement la main sur luy, ains luy usassent des plus douces & plus gracieuses paroles qu'ilz pourroyent, en l'adiournant seulement à comparoir en personne deuant le peuple, pour respondre à certaines imputations que lon proposoit contre luy: pource qu'ilz auoyent peur filz faisoient autrement, que l'armee en sa faueur ne se mutinast dedans le pais des ennemis, & qu'il ne se leuast quelque sedition entre leurs gens . Ce que Alcibiades eust facilement fait, sil eust uoulu, pource que les soudards estoient fort desplaisans de le uoir en aller, s'attendans bien que la guerre prendroit long traict, & iroit en grande lon-

gueur foubz Nicias, quand Alcibiades, qui luy estoit comme un aguillon qui le pouloit, luy feroit osté, à cause que Lamachus estoit bien hardy & uailant homme de sa personne, mais il n'auoit point d'authorité ne de dignité en l'exercite, pource qu'il estoit de petit lieu & pauvre. Alcibiades donques à son departement feit en premier lieu perdre aux Atheniens la uille de Messine, pource qu'ilz auoyent intelligence avec quelques particuliers de dedans qui la leur deuoyent liurer entre leurs mains : & Alcibiades les cognoissant tresbien par leur nom, les decela à ceulx qui tenoyent le party des Syracusains: ainsi fut ceste pratique rompue. Puis arriué qu'il fut en la uille de Thuries, si tost qu'il fut descendu en terre, il se cacha, de sorte que ceulx qui le cherchoyēt ne le peurent trouuer: toutefois il y eut quelcun qui le recogneut

» & luy dit, Comment, Alcibiades, ne te fies tu
 » pas à la iustice de ton país? Ouy bien, dit il, si
 » estoit question de toute autre chose, mais de
 » ma uie, ie ne m'en fierois pas à ma propre me-
 » re, doubtant que par mesgarde elle ne meist la
 » sebue noire en cuidāt mettre la blanche. pour-
 » ce que l'une estoit sentence de condamnation,
 » & l'autre d'absolution. Et depuis, quand il en-
 » tendit que le peuple d'Athenes l'auoit par con-
 » tumace condamné à mourir: Et ie leur feray,
 » dit il, bien sentir que ie suis encore en uie. Si
 » fut l'accusation proposee à l'ençõtre de luy en

telle forme, ainsi que lon treuve par escript :

20 Theſſalus filz de Cimon du bourg de Lacrades,
 20 à deferé & defere Alcibiades filz de Clinias du
 20 bourg des Scambonides, d'auoir forfait con-
 20 tre les Deesses Ceres & Proserpine, en contre-
 20 faisant par derision leurs sacrez mysteres, & les
 20 monstrant à quelques siens familiers en sa mai-
 20 son, ayant uestu une robbe pareille à celle que
 20 porte le presbtre qui montre les choses sain-
 20 ctes & sacrees esdicts mysteres, & se nommant
 20 luy mesme le presbtre, Polition le porte-tor-
 20 che, & Theodorus du bourg de Phegee le ba-
 20 stonnier, & les autres assistens, les confreres &
 20 les regardans: le tout en derision & mespris des
 20 sainctes cerimonies & coustumes des Eumol-
 20 pides presbtres, religieux & ministres du saint
 20 temple de la uille d'Eleusine. Si fut condamné
 par contumace à faulte de comparoir, & tous
 ses biens confisquez. Oultre laquelle condam-
 nation, encore fut il ordonné par decret, que
 tous les presbtres, religieux & religieuses le
 mauldissent & detestassent. A quoy il y cut une
 feule religieuse nōmee Theano, fille de Menō,
 20 du bourg d'Agraule, qui s'oppoſa, disant qu'el-
 20 le estoit religieuse pour prier & benir, non pas
 20 pour detester & maudire. Ayans donques ces
 sentences si griefues esté prononcees à l'encon-
 tre d'Alcibiades, au partir de la uille de Thuries
 il s'en alla au Peloponese, ou il feit quelque
 temps sa residence en la uille d'Argos: mais à la

fin redoubtant ses ennemis, & n'esperant pas qu'il y eust plus de moyen de pouuoir retourner à seureté en son pais, il enuoya à Sparte demander aux Lacedæmoniens saufconduit & liberté de pouuoir aller & demourer en leur pais, promettant qu'il leur feroit plus de serui-ce & de profit estant leur amy, qu'il ne leur auoit fait de dommage estant leur ennemy. Les Lacedæmoniens le luy ottroyerent, & le receurent bien uoluntiers en leur uille: là ou si tost qu'il fut arriué, il fit d'entree trois choses: La premiere fut, qu'à son instigation les Lacedæmoniens, qui parauant dilayoyent & attédoyét, se resolurent de secourir promptement les Syracusains, & y enuoyerent pour Capitaine Gylippus, à fin de rompre les forces que les Atheniens y auoyent enuoyees: La seconde fut, qu'il leur fit, en la Grece mesme, cōmencer la guerre aux Atheniens: La troisieme, & celle qui fut de plus grande importance, fut qu'il leur conseilla de fortifier dedans le territoire mesme de Attique, la uille de Decelee: ce qui consuma & meit au bas la puissance d'Athenes autant & plus que nulle autre chose. Et sil estoit bien uenu & bien estimé en Sparte pour les seruices qu'il leur faisoit en public, il ne gaignoit pas moins la bonne grace & bienueillance des particuliers en priué par sa maniere de uiure à la Laconiene: tellement que ceulx qui luy uoyoyent le poil rasé iusques au cuir, se baigner en

eau froide, manger du pain bis, & humer du brouet noir, eussent doubté, ou pour mieux dire, n'eussent iamais peu croire qu'un tel personnage eust iamais tenu de cuisinier en sa maison, ne que iamais il eust regardé seulement un perfumier, ou touché un uestement fait de drap tissu en la uille de Milet. Car entre les autres artifices & habilitéz, dont il estoit plein, celle la, comme lon dit, en estoit une, par laquelle il prenoit plus les hommes, c'est qu'il se conformoit totalemēt à leurs meurs & à leurs façons de faire, & prenoit entierement leur maniere de uiure, se transformant en toutes sortes de figures plus legerement que ne fait le Chameleon: pource que lon dit que le Chameleon ne peut prendre la couleur blanche: là ou il n'y auoit meurs, coustumes, ny façons de faire de quelque nation que ce fust, qu'Alcibiades ne sceust imiter, exercer & contrefaire quand il uouloit, autant les mauuaises que les bonnes. Car à Sparte il estoit laborieux, en continuel exercice, uiuant de peu, austere & seuer: en Ionie au contraire, delicat, superflu, ioyeux & voluptueux: en Thrace il beuuoit tousiours, ou estoit à cheual: sil s'approchoit de Tissaphernes lieutenant du grand Roy de Perse, il surmontoit en pompe & sumptuosité la magnificence Persiene: non que realement sa nature se changeast d'une façon de faire en une autre contraire, ny que ses meurs receussent à la ue-

rité toutes sortes de mutations : mais pource que fil eust suyuy sa nature , il eust peu à l'adventure en diuers lieux offenser ceulx avec lesquels il hantoit, il se desguisoit ainsi du masque & du manteau plus conuenable aux meurs de ceulx avec lesquels il frequentoit, & prenoit la mine & la contenance plus approchâte de leur naturel : de maniere que quâd il estoit en Sparte , qui eust regardé à ce qui apparoissoit au dehors seulement, il eust dit ce que lon dit en cōmun prouerbe ,

» Ce n'est le filz d'Achilles, mais luy mesme : Aussi c'est celuy mesme que Lycurgus a nourry : mais qui au dedans eust ueu à nud ses urayes affections & actions procedentes de son naturel , il eust dit au contraire ce que lon dit en un autre commun langage,

» Ceste femme est celle qui souloit estre .

Car il entretient si bien Timæa , la femme du Roy de Sparte , Agis , pendant qu'il estoit à la guerre , qu'il l'engrossa : ce qu'elle mesme ne nioit pas, ains estant accouchee d'un filz qui fut nommé Leotychides, elle l'appelloit bien de ce nom la tout hault en public, mais quand elle estoit en son priué avec ses plus familiares amies , ou parmy ses domestiques , elle l'appelloit tout bas Alcibiades , tant elle estoit esprise de son amour : & luy en se moquant disoit qu'il ne l'auoit pas fait par mal ny par desordōné appetit de prendre son plaisir : mais seulement à

fin que sa race regnast sur les Lacedæmoniens , Ces choses estoient rapportees au Roy Agis par plusieurs, tant qu'il le creut à la fin, mesmement quand il uint à prendre garde au compte du tēps qu'il y auoit qu'il n'auoit couché avec sa femme : car ayant une nuict senty un tremblement de terre , il s'en fouit hors de sa chambre, craignant que la maison ne tumbast, & fut dix mois depuis sans coucher avec elle, à raison dequoy estant ce filz Leotichides né au bout des dix mois, il dit qu'il n'estoit point à luy : ce qui fut cause que depuis Leotichides decheut & fut priué de la royaulté . Mais apres la totale desconfiture des Atheniens en la Sicile , ceulx des isles de Chio & de Lesbos avec les Cyziceniens enuoyerent tout en un mesme temps des ambassadeurs à Sparte, pour faire entendre aux Lacedæmoniens comme ilz auoyent bonne uolunté de se rebeller contre les Atheniens ; moyenāt qu'on leur enuoyast du secours pour les defendre. Les Bœotiēs fauorifoyent à ceulx de Lesbos : & Pharnabazus lieutenant du Roy de Perse, aux Cyziceniens : mais toutefois les Lacedæmoniens aimerent encore mieux secourir ceulx de Chio premieremēt , à la persuation d'Alcibiades qui prit leur affaire en main : & luy mesme montant sur mer s'en alla en Asie , là ou il feit tourner contre les Atheniēs presque tout le pais d'Ionie, & se tenant aupres des Capitaines generaulx de Lacedæmone , feit beaucoup de dom-

de dommage à ceulx d'Athenes. Toutefois le Roy Agis luy uouloit grand mal, partie pour l'oultrage qu'il auoit receu de luy en sa femme qu'il auoit corrompue, & partie aussi pour l'enuie qu'il portoit à sa gloire, à cause que le bruit couroit par tout, que la pluspart des beaux exploits qui se faisoient en ceste guerre, succedoyent à bien par le moyen d'Alcibiades: & les autres semblablement les plus puissans & plus ambitieux d'entre les Spartiates cōmenceoyēt aussi à se fascher de luy pour l'enuie qu'ilz luy portoyent: & eurent à la fin tant de pouuoir, qu'ilz feirent escrire par leurs magistrats à leurs Capitaines estatis au camp, qu'ilz le feissent mourir. Dequoy Alcibiades ayāt senty le uent, ne laissa pas pour cela de faire & procurer toutes choses à l'auantage des Lacedaemoniens: mais au reste il se teint sur ses gardes, fuyāt toutes occasions de pouuoir tumber entre leurs mains. Si se retira à la fin pour la seureté de sa personne deuers Tissaphernes l'un des lieutenans du Roy de Perse, aupres duq̄l il acquit incontinent tant de credit, qu'il fut le premier & principal personnage qu'il eust autour de luy: car ce Barbare qui n'estoit point hōme simple, ains malicieux & cault de sa nature, & qui aimoit les personnes fines & mauuaises, auoit en admiration sa facilité de se pouuoir ainsi aiseement tourner d'une façon de uiure en une autre, & la uiuacité & subtilité de son entendē-

ment : oultre que sa compagnie & sa frequen-
tatiõ ordinaire pour s'esbatre & passer le temps
estoit fort agreable, & si pleine de tous at-
traicts de bonne grace, qu'il n'y auoit meurs si
austeres, qu'elle n'adoulist, ny nature si farou-
che, qu'elle ne prist & n'amollist : tellement
que ceulx mesmes qui le craignoyent, ou qui
luy portoyent enuie, auoyent encore non ob-
stant plaisir de le uoir, & se sentoient tous res-
iouis de parler & hanter avec luy. Au moyen
dequoy ce Tissaphernes, qui au demourant e-
stoit homme reuesche, & qui naturellement
haïssoit les Grecs, se laissa neantmoins si bien
aller aux flatteries de Alcibiades, & en fut si es-
pris, que luy mesme sestudioit à le contreflat-
ter encore dauantage, & luy rendre plus de ca-
resses : car il nomma Alcibiades, la plus belle
maison de plaissance, & le plus doux seiour
qu'il eust, pour les beaux iardins, fontaines, bo-
scages & prairies salubres & delectables qui y
estoyent, le tout accoustré royalement & ma-
gnifiquement. Alcibiades donques desesperant
de pouuoir iamais trouuer assurance avec les
Spartiates, & aussi redoubtant leur Roy Agis,
alloit mesdisant d'eulx, & calumniant tout ce
qu'ilz faisoient, enuers Tissaphernes : en quoy
faisant il empeschoit aussi qu'il ne leur aidast si
affectueusement qu'il eust peu faire, & qu'il ne
ruinast de tout poinct les Atheniens : car il luy
remonstroit qu'il deuoit fournir argent eschar-

sement aux Lacedæmoniens , pour les laisser miner & consumer petit à petit, à fin que apres qu'ilz se seroyent bien trauaillez & affoibliz les uns les autres , ilz en fussent tous deux ensemble plus aisez au Roy à dompter. A quoy le Barbare s'accorda facilement , & uoyoit on euidentement qu'il aimoit Alcibiades, & l'estimoit beaucoup, de maniere qu'il en estoit recherché & regardé par l'une & par l'autre partie des Grecs. Si se repentoyent bien adonc les Atheniens pour les grands maux & dōmages qu'ilz en auoyent receuz, de ce qu'ilz auoyent ordonné & decreté encontre luy : & luy mesme aussi de son costé estoit bien desplaisant de les uoir reduits à si mauuais termes , craignant que si la uille d'Athenes uenoit à estre de tout poinct ruinee, il ne tumbast luy mesme à la fin entre les mains des Lacedæmoniens , qui luy uouloyent mal de mort . Or estoient enuiron ce temps la presque toutes les forces des Atheniens en l'isle de Samos , de là ou avec leur armee de mer ilz raschoyent à reconquerir ceulx qui s'estoyēt rebellez contre eulx , & à garder ce qui leur estoit demouré : car ilz estoient encore aucunement forts pour resister à leurs ennemis, à tout le moins par la mer: mais ilz redoubtoyent fort la puissance de Tissaphernes , & les cent cinquante galeres que lon disoit deuoir bien tost uenir du país de la Phœnicie au secours de leurs ennemis: car si elles fussent uenues, la uille

d'Athenes n'auoit plus de reffource ny d'esperance de salut. Ce que Alcibiades entédant, enuoya fecrettement deuers les principaux hommes qui fussent en l'armee d'Athenes à Samos, leur donner esperance qu'il leur rendroit Tiffaphernes amy, non qu'il eust enuie de gratifier au peuple, ne qu'il se fiast à la commune d'Athenes, mais aux nobles & aux gens de bien & d'honneur, pourueu qu'ilz eussent le cueur & la hardiesse de refrener un peu la licencieuse insolence du menu peuple, & prendre en main l'authorité du gouuernement, pour remettre sus les affaires, & preseruer de finale ruine la uille d'Athenes. Quoy entendu, tous les autres hommes d'apparence y presterent fort uoluntiers l'oreille, excepté Phrynichus du bourg de Dirades, l'un des Capitaines, lequel se doubtrât de ce qui estoit ueritable, qu'Alcibiades ne se foucioit point, qui eust l'authorité souueraine du gouuernement à Athenes, la noblesse ou le peuple, ains essayoit tous les moyens de pouuoir retourner en quelque sorte que ce fust, & alloit prattiquât la bonne grace de la noblesse, en blasmant & calumniant le peuple, s'opposa à ce qu'il mettoit en auant : toutefois son aduis pour ce coup la, ne fut pas suyuy. Et uoyant qu'il s'estoit ouuertement declaré ennemy d'Alcibiades, il feit entendre soubs main à Astyochus, qui pour lors estoit Admiral des Lacedæmoniés, la prattique & menee d'õt il leur auoit

fait ouuerture, l'admonestât de se donner bien garde de luy, & de le faire arrester prisonnier, pource que c'estoit un homme double, qui auoit intelligence avec l'une & l'autre partie: mais il n'entendoit pas, que c'estoit un traistre qui parloit à un autre traistre. Car cestuy Astyochus faisoit la cour à Tissaphernes pour son particulier profit: & uoyant que Alcibiades auoit grand credit enuers luy, luy descouurit & decela tout ce que Phrynichus luy auoit fait entendre. Alcibiades enuoya incontinent à Samos deuers les autres Capitaines gens expres, pour charger & accuser Phrynichus de la trahison qu'il leur auoit faite, dont tous ceulx du conseil furent fort indignez & irritez à l'encontre de luy: & luy uoyant qu'il n'auoit autre meilleur moyen de se sauuer, essaya de rhabiller la faulte qu'il auoit faite par une autre encore plus grande: car il renuoya de rechef uers Astyochus, se plaignant à luy de ce qu'il l'auoit decelé, & luy promet que, si uouloit, il luy liureroit entre ses mains toute la flotte des uaisseaux, & route l'armee entiere des Atheniens. Toutefois ceste trahison de Phrynichus ne porta point de dommage aux Atheniens, à l'occasion d'une autre contretrahison d'Astyochus: car il feit aussi de rechef entendre à Alcibiades l'offre que Phrynichus luy auoit enuoyé faire. Ce que Phrynichus ayant aussi descouuert, & s'attendant bien d'en auoir une seconde rechar-

ge deuant le conseil de la part d'Alcibiades, aduertit luy mesme le premier les autres Chefz de l'armee des Atheniens, que les ennemis leur deuoyent uenir courir sus, & comment, & les admonesta qu'ilz se teinsent pres de leurs uaisseaux, de faire bon guet, & fortifier leur camp à toute diligéce: ce qu'ilz feirent. Et comme ilz estoyent apres, leur uindrent d'autres lettres d'Alcibiades, par lesquelles il les admonestoit qu'ilz se donnassent garde de Phrynichus, pource qu'il auoit intelligence & pratique avec les ennemis de leur rendre toute l'armee d'Athenes entre leurs mains. Mais on n'adiousta point de foy à ces secondes lettres, pource que lon estima, que sachant & entendant les preparatifz & les desseings des ennemis, il s'en estoit uoulu seruir pour charger & calumner Phrynichus à tort. Ce neantmoins il y eut depuis un de ceux qui faisoÿt la ronde, nommé Hermon, qui en pleine place luy donna un coup de dague, dont il le tua. Le cas fut examiné en iustice, & le tout considéré, le mort par arrest du peuple fut condamné comme traistre, & l'homicide Hermon & ses consors couronnez, en recompense de ce qu'ilz auoyent occis un traistre à la chose publique. Parquoy ceulx qui uouloyent bien à Alcibiades, estans pour lors les plus forts au cōseil de ceste armee qui estoit en Samos, enuoyerent à Athenes un Pisander pour essayer de remuer le gouuerne-

ment, & encourager les nobles de prendre le maniemment des affaires en main, & l'oster au peuple, en les asseurant que Tissaphernes leur dōneroit cōfort & aide à ce faire, par le moyen d'Alcibiades, qui le leur rendroit fauorable & amy. Voila la couleur & couuerture dont se seruirent ceulx qui changerent le gouuernement d'Athenes, & qui le meirent es mains du petit nombre de la noblesse: car ilz n'estoyent que quatre cents, & routefois se faisoient appeller, les cinq mille. Mais si tost qu'ilz se sentirent forts, & qu'ilz se trouuerent en main, sans contredit, l'authorité du gouuernement, ilz ne teindrent plus compte d'Alcibiades, & fait on la guerre plus froidement & plus laschement que lon ne la faisoit au parauāt, partie pource qu'ilz se deffioyent de leurs citoyens, qui trouuoient estrāge la mutation du gouuernemēt, & partie aussi pource qu'ilz auoyēt opiniō, que les Lacedaemoniēs, qui de tout temps fauorisoyent plus au gouuernemēt de la noblesse, en seroyēt plus enclins à faire paix avec eulx. Or le menu peuple qui estoit dedans la uille, ne bougea point, ains se teint coy malgré luy, pour la crainte du danger, à cause qu'il y en eut plusieurs tuez de ceulx qui prirent la hardiesse de resister ouuertemēt à ces quatre cents. Mais ceulx qui estoyēt au cāp en l'isle de Samos, ceste nouvelle ouie, en furent si griefuement indignez, qu'ilz resolurent de s'en retourner incontinent au port de

Pirée: si enuoyerent premierement querir Alcibiades, qu'ilz eleurent leur Capitaine, & luy commanderent de les conduire tout chaudement à l'encontre de ces tyrans, qui auoyent attenté & entrepris sur la liberté du peuple de Athenes: mais toutefois il ne feit point en cela, comme eust fait un autre, se sentant soudainement eleué & agrady par la faueur d'une commune, ny n'estima point qu'il deust incontinct gratifier & complaire en toutes choses, à ceulx qui d'un banny, uagabond & fuitif, qu'il estoit nagueres, l'auoyent fait Chef & Capitaine general de tant de bons uaisseaux, & d'une si belle & si grosse puissance: ains au contraire, ainsi qu'il estoit conuenable à Capitaine digne de telle charge, pensa qu'il falloit un peu resister à ceulx, qui par courroux s'alloyent eulx mesmes precipiter & perdre, & qu'il deuoit les garder de faire ceste faulte. Ce qui sans doubte fut cause de preseruer alors la uille d'Athenes de finale ruine, pource que si tout promptemēt ilz fussent partis de Samos, pour s'en retourner à Athenes, les ennemis ne trouuans empeschement quelcōque, se fussent emparez de tout le pais d'Ionie, de l'Hellespont, & de toutes les isles, sans coup frapper, pendant que les Atheniens se fussent amusez à combattre les uns contre les autres, en guerre ciuile, dedans l'enceinte mesme de leurs murailles: ce que Alcibiades seul, & non autre, engarda d'aduenir, non seu-

lement en preschant la commune en public, & luy remōstrant l'inconuenient, qui estoit pour arriuer de ceste soudaine departie, mais aussi en priant particulierement les uns à part, & retenant à force les autres: à quoy faire le secōdoit aussi Thrasybulus du bourg de Stira, qui estoit en ceste armee, & crioit apres ceulx qui s'en uouloyent aller: car il auoit, à ce que lon dit, la uoix plus forte & plus haultaine qu'hōme qui fust en toute la uille d'Athenes. Ce fut aussi un autre bel acte & grand seruice fait par Alcibiades, qu'ayant promis de moyener que les cent cinquāte uoiles Phœnicienes, que les Lacedæmoniens s'attendoient certainement auoir de renfort du Roy de Perse, ne uinsent du tout point, ou qu'ilz uinsent en faueur des Atheniens: car il se partit incontīnēt, & s'en alla en diligēce deuers Tissaphernes, enuers lequel il feit tant, qu'il n'amena point lesdittes uoiles qui ia estoient comparues deuant la uille d'Aspende, & faillit de parole aux Lacedæmoniens. Toutefois Alcibiades fut depuis blasmé & accusé d'une part & d'autre de l'auoir diuertey, mais plus des Lacedæmoniens, qui disoyent qu'il auoit remonstré à ce Barbare, qu'il ne deuoit aider ny aux uns ny aux autres, ains plus tost les laisser s'entre desfaire & ruiner culx mesmes, pource qu'il estoit sans doubte, que ce gros renfort de la flotte du Roy, uenant à se ioindre à l'une des parties, eust osté entierement à l'au-

tre la domination & seigneurie de la marine. Quelque tēps apres cela furēt desfaits & chafsez les quatre cents qui auoyēt usurpé l'authorité du gouuernement à Athenes, & ce, moyenant le port & l'aide que feirent fort affectueusement les amis d'Alcibiades à ceulx qui tenoyent le party du peuple. Si estoient adonc ceulx de la uille contents, & mandoyent à Alcibiades qu'il s'en retournast quand bon luy sembleroit: mais luy estimāt qu'il ne luy seroit point honorable ne biē seant de s'en retourner les mains uuides sans auoir rien meritē, ains par le benefice & la grace du peuple seulemēt, & uoulant au cōtraire que son retour fust glorieux & triumpant, il se partit de Samos premieremēt avec petit nombre de galeres, & s'en alla rodāt à l'entour des isles de Cos & de Gnidus, là ou il fut aduerty, que l'Admiral de Lacedæmone, Mindarus, s'en estoit allé avec toute sa flotte au destroit de l'Hellespont, & que les Capitaines Atheniens le suyuoient à la trace: si se meit à cingler en toute diligēce celle part, pour secourir les Atheniens, & de bonne fortune y arriua avec dixhuit galeres, à l'instāt mesme que les uns & les autres s'estoyent attachez au combat avec tous leurs uaisseaux deuant la uille d'Abydos, & auoyent ia combattu fort asprement depuis le matin iusques au soir ayans les uns & les autres eu du meilleur en un endroit de la bataille, & du pire en l'au-

tre. Si donna imagination contraire à la uerité à toutes les deux parties, aussi tost qu'on le descouurit de loing, tellement que les ennemis en prirent courage, & les Atheniens s'en estonnerent, iusques à ce que de sa galere Capitaine il feit haulser en l'air une enseigne d'amis, & aussi tost se rua sur les Peloponesiens qui auoyent du meilleur, & donnoyent la chafse à quelques galeres d'Athenes: si les tourna incontinent eulx mesmes en fuite, & les poursuivuit si uiuement, qu'il leur feit donner en terre, ou il brisa les uaisseaux, & occit grand nombre des hommes qui se ietterent en l'eau pour cuider sy sauuer à nage en terre: quoy que Pharnabazus y fust uenu au secours des Lacedemoniens, & qu'il feist tout le deuoir & l'effort qui luy estoit possible le long du riuage de la mer pour sauuer les corps des galeres: mais nonobstant, à la fin les Atheniens en gaignerent trente sur leurs ennemis, & sauuerent toutes les leurs, puis dresserent un trophée en signe de uictoire. Ayant donques Alcibiades eu ceste glorieuse & heureuse rencontre, il se uoulut aller monstrier en triumphe à Tissaphernes. Parquoy ayant fait prouision de beaux & riches presens pour luy donner, & mis sus une suite & un train digne d'un Capitaine general, il se meit à la uoile pour aller deuers luy: mais il n'y trouua pas le recueil qu'il auoit esperé, par ce que Tissaphernes, qui

ia de long temps estoit diffamé par les Lacedemoniens, se plaignans qu'il ne faisoit pas ce que le Roy auoit ordonné, & craignant en estre un iour attainct & puny par le Roy, estima qu'Alcibiades estoit arriué tout à point & le reteint prisonnier en la uille de Sardis, estimant que ceste iniustice luy seruiroit de descharge & de iustification enuers le Roy: toutefois au bout de trente iours, Alcibiades trouua, ne sçay comment, moyen d'auoir un cheual, & se desrobant de ses gardes s'en fuit en la uille de Clazomenes: ce qui augmenta encore dauantage la suspicion que lon auoit de Tissaphernes, pource que lon estima que sous main il luy eust fait passage: mais luy remonta incontinent sur mer, & s'en alla trouuer l'armee des Atheniens, là ou il eut nouvelles que Mindarus & Pharnabazus estoient ensemble en la uille de Cyzique: si fit une harengue aux souldards, par laquelle il leur remonstra qu'il estoit totalement necessaire qu'ilz combattissent leurs ennemis par mer & par terre, uoire qu'ilz les allassent assaillir iusques dedans leurs forts & leurs uilles mesmes, pource qu'autrement ilz n'auoyēt pas moyen de recouurer argent pour leur entretenement. La harengue acheuee, il les fit incontinent tous embarquer, & s'en alla poser l'ancre en l'isle de Proconnese, là ou il ordonna que lon enfermast au dedans des uaisseaux de guer-

ze toutes les fregates & autres telz petis ba-
 teaux, à fin que les ennemis ne peussent auoir
 de part quelconque nouvelle aucune de son ar-
 riuée, à quoy luy seruit encore ce que soudai-
 nement il tumba un grand rauage de pluyes,
 avec tonnerres, & temps obscur qui luy aida
 bien à cacher & celer son entreprise: de sorte
 que non seulement les ennemis, mais aussi les
 Atheniens mesmes n'en apperceurent rien: car
 ilz auoyent desia fait leur compte, que pour ce
 iour la on ne feroit autre chose, & toutefois il
 les feit soudain rembarquer, & se partir. Ilz ne
 furent pas plus tost au large en mer que le tēps
 commença à s'esclaircir: & lors ilz ueirent de
 tout loing les galeres des ennemis qui estoÿēt
 à la rade deuant le port de Cyzique, & crai-
 gnant que le grand nombre de sa flotte ne fust
 cause de les faire fouir en terre auant qu'il les
 peust attacher, il commanda aux autres parti-
 culiers Capitaines qu'ilz demourassent derrie-
 re, en uogant tout bellement apres luy, & luy
 avec quarante galeres seulement se tira en auāt
 & fallā monstrier aux ennemis pour les attirer
 à la bataille. Les ennemis pensans qu'il n'y eust
 de uaisseaux que ce qu'ilz uoyoyent, leur uo-
 guerent à l'encontre, & s'attacherent incontī-
 nent à les inuestir & combattre: mais ilz ne fu-
 rēt pas plus tost attachez, que ceulx qui estoÿēt
 demourez derriere arriuerēt, dont les ennemis
 s'effroyerent de sorte, qu'ilz se tournerēt incon

tinent en fuite, & Alcibiades se iettant hors de
 route la flotte, avec uingt des meilleures gale-
 res qu'il eust, poursuyuit les fuyans iusques à la
 coste, ou il descédit encore en terre, & chassa si
 uiuement & de si pres ceulx qui estoient sortis
 des galeres pour se cuider sauuer de uistesse,
 qu'il en tua sur le cháp un grand nōbre. Et, qui
 plus est, Mindarus & Pharnabazus estans for-
 tis de la uille pour secourir leurs gens, il les rō-
 pit encore tous deux, & y fut Mindarus occis
 sur le champ en cōbatant fort uertueusement,
 mais Pharnabazus s'en fouit. Ainsi eurent les
 Atheniēs en leur puissance les corps des morts
 qui estoient en grand nōbre, avec grāde quan-
 tité d'armes & de despouilles, & prirent tous
 les uaisseaux de leurs ennemis: & ayans dauan-
 tage pris la uille de Cyzique, par ce que Pharna-
 bazus l'abandonna, & que les Peloponesiens
 estoÿēt morts, non seulement ilz s'asseurèrent
 la possession du pais de l'Hellespont qu'ilz te-
 noyent encore, mais aussi chasserent à uiue for-
 ce les ennemis hors de tout le reste de la mer,
 & y eut quelques lettres surprises, par lesquel-
 les un secretaire faisoit entendre à Sparte aux
 Ephores ceste desconfiture en peu de paroles,
 ainsi que porte la coustume du parler Laconi-
 que, & disoyent lesdites lettres en ces termes:

» Tout est perdu, Mindarus est mort, noz gens
 » meurēt de faim, nous ne sçauons ce que nous
 » deuōs faire. Au demourant, les soudards Athe-

niés qui furēt à ceste desfaite, en deuindrent si glorieux qu'ilz ne uouloyent point & desdaignoyent qu'on les meslast avec les autres soudards qui festoyent laissez battre par plusieurs fois, là ou eulx n'auoyent iamais esté uaincus, pource que peu de tēps auparauāt il estoit aduenu que le Capitaine Thrasyllus auoit esté rōpu pres la uille d'Ephese: & pour celle desfaite les Ephesiens auoyēt dressé un trophée de bronze à la hōte & ignominie des Atheniēs: ce que les soudards d'Alcibiades reprochoyent à ceulx de Thrasyllus, & se magnifioyēt, & haultlouoyent eulx & leur Capitaine, ne uoulans ny loger en mesme quartier, ny se iouer & exercer avec les autres, iusques à ce que Pharnabazus leur estant uenu à l'encontre avec grosse puissance, tāt à pied qu'à cheual, ainsi cōme ilz couroyent & fourrageoyēt les terres des Abydeniens, Alcibiades les alla secourir, & luy donnant la bataille le rompit une autre fois, & le chassa iusques à la nuict toute noire avec Thrasyllus: car alors les soudards de l'un & de l'autre Capitaine se meslerent les uns parmy les autres, & se faisans grandes caresses les uns aux autres s'en retournerēt tous ensemble à grāde ioye au cāp. Le lēdemain Alcibiades, apres auoir dressé un trophée pour la uictoire du iour precedēt, alla courir & piller les païs du gouuernement de Pharnabazus, sans que personne luy osast sortir à l'ēcontre. En ceste course furēt pris prisōniers

quelques prestres & quelques religieuses du
païs, mais Alcibiades les deliura depuis sās leur
faire payer aucune rēçon: & ainsi qu'il se prepa
roit pour aller faire la guerre aux Chalcedo
niens qui festoyent rebellez contre les Athe
niens, & auoyent receu en leur uille garnison
& gouuerneur des Lacedæmoniens, il fut ad
uertey comme ilz auoyent ferré tous leurs biens
des champs, & les auoyent deposez entre les
mains des Bithyniens, qui estoyent leurs uoi
sins & amis, pour les leur garder: si mena son ar
mee sur leurs confins, & enuoya deuant un he
rault se plaindre aux Bithyniens, & demander
raison du tort qu'ilz faisoient à ceulx d'Athe
nes. Les Bithyniens craignans qu'il ne s'en atta
chast à eulx-mesmes, luy rendirent les biens
qu'ilz auoyent en depost, & qui plus est, feirēt
encore alliance avec luy. Cela fait, il alla mettre
le siege deuant la uille de Chalcedoine, laquel
le il emmura tout à l'entour, depuis un bout du
riuage de la mer iusques à l'autre. Pharnabazus
y uint pour luy cuider faire leuer le siege: &
Hippocrates Capitaine Lacedæmonien gou
uerneur de la uille, assemblant tout ce qu'il a
uoit de forces dedans, au mesme temps feit une
faillie sur les Atheniens: parquoy Alcibiades or
donnant ses gens en bataille, de maniere qu'ilz
peussent faire teste à ces deux assaillans tout à
un coup, feit si uailāmēt qu'il cōtraignit Phar
nabazus de prédre la fuite honteusemēt, & oc
cit Hip-

cit Hippocrates sur le champ avec bõ nombre de ses gës: puis monta luy mesme sur mer pour s'en aller au pais de l'Hellepont amasser de l'argët, & là surprit la uille de Selybree pour auoir hardiement hazardé sa personne auant le tēps qui luy estoit prefix: pource que quelques particuliers de dedans, avec lesquelz il auoit intelligence, luy auoyent donné assignation à quād ilz leueroient en l'air un flambeau allumé enuiron la minuiët, mais ilz furent contrainçts de leuer leur signe auant heure pour la crainte de l'un des confors de leur coniuration, lequel soudainement se repentit: ainsi fut le flambeau leué auāt que toute sa troupe fust presté. Ce que luy uoyant, prit enuiron trente hommes en sa cõpagnie, & avec eulx s'en courut uers les murailles de la uille, ayant commandé au demourāt de sa troupe, qu'on le suyuiſt à la plus grāde diligence qu'il leur seroit possible. La porte luy fut ouuerte à luy & aux trente hõmes qu'il auoit amenez quand & luy, oultre lesquelz encore en suruint il uingt autres armez à la legere seulement, mais ilz ne furent pas plus tost entrez qu'ilz entendirent ceulx de la uille, qui leur uenoyent en armes au deuant, de maniere qu'il n'y auoit aucun moyen qu'il en peust eschaper sil les attendoit: & neantmoins s'estant tousiours maintenu inuincible iusques à ce iour la en toutes les rencontres ou il auoit esté Capitaine, il luy faisoit fort grand mal de fouir:

parquoy il se ua soudainement aduifer, de faire faire silence par une trompette, & le bruit apaisé, il feit crier à haulte uoix par un de ceulx qui estoÿét autour de luy, que les Selybrianiës ne prissent point les armes cõtre les Atheniës. Ce cry refroidit un peu la chaleur de ceulx qui auoyent bonne enuie de combatre, par ce que ilz cuiderent que toute l'armee des Atheniens fust ia dedans la uille: les autres furent bien aises d'auoir moyen de traitter appointemēt, sans uenir au hazard des armes. Et ainsi cõme ilz parlementoyent de faire composition, le reste de l'armee arriua, & se doubtât bien que les Selybrianiens ne demandoÿent que paix, comme il estoit uray, il eut peur qu'une troupe de Thraciens, qui estoÿent uenus fort uoluntiers à ceste expedition, pour l'amour & en faueur de luy, en bon nombre, ne pillassent & saccoageassent la uille, pourtant les feit il sortir tous dehors: & faisant accord avec les principaux des Selybrianiens à leur requeste, ne leur feit autre mal, sinon qu'ilz payerent une somme d'argēt, & receurēt garnison des Atheniens. & cela fait, il s'en alla. Mais pendant cest exploit, les autres Capitaines Atheniens, qui tenoyent la uille de Chalcedoine assiegee, feirent aussi appointement avec Pharnabazus, qu'il leur bailleroit quelque somme d'argent, & remettrait la uille en l'obeissance de ceulx d'Athenes, comme elle estoit auparauāt: & que moyenant ce les Athe-

niens aussi ne pourroyent faire aucunes cour-
ses, ne porter dommage aux pais de son gou-
uernement: & que luy aussi seroit tenu de dō-
ner bonne guide & sauuegarde aux ambassa-
deurs d'Athenes, à ce qu'ilz peussent aller, &
estre seuremēt deuers le Roy de Perse. Ce trait-
té ayant esté iuré par les autres Capitaines,
Pharnabazus uolul qu'Alcibiades à son re-
tour le iurast aussi: mais il dit qu'il n'en feroit
rien, que luy mesme premier ne l'eust iuré de
son costé: puis quand les sermens eurent esté
prestés d'une part & d'autre, adonc il alla aussi
contre ceulx de Byzance, qui festoyent sembla-
blement rebellez, & d'arriuee enuironna la
uille d'une closture tout à l'entour: mais depuis
il eut secrette intelligence avec deux particu-
liers, Anaxilaus & Lycurgus & quelques autres
qui luy promirent de luy liurer la uille entre
ses mains, pourueu que lon n'y feroit point de
dommage. Et pour donner execution à ceste
pratique, il feit courir un bruit, qu'il estoit con-
trainct de se partir hastiuemēt de ce siege, pour
l'occasion de quelques nouuelletez, qui fe-
stoyent soubleuees au pais d'Ionie: & de fait,
il se partit de plein iour avec tous ses uaisseaux,
mais il retourna tout court la nuict mesme: &
descendant en terre avec les mieulx armez de
ses gēs, s'approcha des murailles de la uille, sans
faire bruit quelconque, ayant ordonné aux au-
tres, qui estoient demourez sur les uaisseaux,

que ce pendant ilz uoguaissent à toute puissance dedas le port, en faisant le plus de bruit, d'effroy & de tumulte qu'ilz pourroyent, partie à fin que la soudaineté de ceste surprise estonnast de tant plus les Byzantins, & partie aussi à fin que ce pendant ceulx avec qui il auoit intelligence, eussent plus de commodité de le receuoir & mettre seurement avec sa troupe dedans, pendant que tout le monde s'en courroit sur le port, pour faire teste à ceulx qui estoÿt sur les galeres. Toutefois la chose ne passa pas sans combattre, pource que ceulx qui estoient en garnison dedans la uille, les uns Peloponesiës, les autres Bœotiens & Megariens, rébarrerent ceulx qui estoient sortis des galeres, si ferme, qu'ilz les contraignirent de se rembarquer: puis qu'ad ilz entendirent, que de l'autre costé les Atheniens estoient entrez dedans la uille, ilz se ferrent en bataille, & les allerent rencontrer. Si y fut le combat fort aspre: mais à la fin Alcibiades en demoura uainqueur, menant la pointe droite de sa bataille, & Theramenes la gauche. Et la uictoire gaignee, prit prisonniers ceulx des ennemis, qui estoient eschappez de la desconfiture, qui se trouuerent enuiron trois cents hommes: mais hors ceste rencontre, il n'y eut pas un Byzantin mis à mort par iustice, ny confisqué ou banny: pource que ceulx qui auoyent conduit la pratique, auoyent capitulé avec ceste condition, que lon ne leur feroit aucun dō-

mage ny desplaisir en leurs personnes, ny en leurs biés, & qu'on ne leur osteroit chose quelconque qui fust à eulx . Tellement que Anaxilaus estant depuis accusé de trahison en Lacedæmone, à raison de ceste pratique, respondit, & se iustifia de sorte, que lon ne trouua point qu'il eust fait chose dont on le peust reprêdre: car il dit, qu'il n'estoit point Lacedæmonien, mais Byzantin, & qu'il ne uoyoit point Lacedæmone en danger, mais Byzance, laquelle estoit tout à l'entour enfermee & emmuree d'une closture, que les ennemis auoyent bastie à l'enuirõ: qu'il estoit impossible que rien y peust entrer, & que si peu de bledz qu'il y auoit dedans, les Peloponesiens & les Bœotiens, qui y estoyêt en garnison, le mangeoyêt, pendât que les pauures Byzantins mouroyêt de male faim, eulx, leurs femmes & leurs enfans: & pour ceste raison, qu'il ne se pouuoit dire qu'il eust trahy son païs, ains plus tost l'auoit deliuré des miseres & calamitez que la guerre apporte quand & soy: en quoy il auoit suyuy l'exêple des plus gens de bien de Lacedæmone, lesquelz ne recognoissent autre honesteté ny autre iustice, que ce qui est utile & profitable à leur païs. Les Lacedæmoniens, ces defenses ouyes, eurent honte de les condamner, & pource les laisserent aller. Mais Alcibiades desirant à la fin reueoir sa maison, ou pour mieulx dire, estre luy mesme ueu par ses citoyens, apres auoir tant de fois

rompu, desfait & batu leurs ennemis, se meit à la uoile pour retourner à Athenes, remenant toutes les galeres Athenienes richemēt parées, & ornees tout à l'entour des pauois, armes & autres despouilles des ennemis, & en faisant remorquer apres luy plusieurs autres captiues qu'il auoit gaignees, & portāt encore plus grād nombre des enseignes & ornements des autres qu'il auoit brisees & gastees, toutes lesquelles, en comptant les unes & les autres, n'estoyent pas moins de deux cents. Au demourant, quant à ce que Duris le Samien, qui se dit estre descen du de sa race, escrit, qu'à ce retour Chryfognus, un si excellent ioueur de flustes, qu'il en auoit gaigné le pris es ieux Pythiques, sonnoit la note, à la cadence de laquelle les galiots mouoyent leurs rames par mesure, & que Callipides un autre excellent ioueur de Tragedies, y faisoit l'office de comite, les incitant à uoguer, & estant accoustré & reuestu tout ne plus ne moins & des mesmes accoustemés que le sont telz ouuriers, quand ilz uienent en plein Theatre deuant le peuple faire preuue de leur art, & que la galere Capitainesse, sur laquelle il estoit, entra dedans le port avec une uoile de pourpre, comme si c'eust esté quelque mommerie qu'ilz eussent uoulu faire apres la bonne chere d'un festin, il n'y a ny Ephorus, ny Theopompus, ny Xenophon, qui en facent mētion. Et si ne me semble pas croyable, que luy re-

tournant d'exil apres un si long bannissement, & tant de maux & de calamitez qui en estoÿt ensuyuies, se fust uoulu si insolentement & si superbemēt mōstrer aux Atheniens: ains au cōtraire, il est tout certain, qu'il retourna en double & en crainte: car arriué qu'il fut dedans le port de Piræe, il ne uolut point descendre de sa galere en terre, que premierement il n'eust ueu de dessus le tillac sur la greue du port Euryptolernus son nepueu, & plusieurs autres siés parents & amis, qui là estoient uenus pour le receuoir, & qui luy disoyēt qu'il descendist hardiment sans auoir crainte de rien. Si ne fut pas plus tost descendu en terre, que tout le peuple luy courut de tous costez au deuant, avec affectiō si grāde, qu'ilz ne regardoyēt pas seulement les autres Capitaines, ains s'amassoyent tous à l'entour de luy seul, & s'escrियोÿt de ioye qu'ilz auoyēt de le uoir. Ceulx qui en pouuoient approcher, le saluoyent & l'embrassoyent, mais tous l'accōpagnoyent, & y en auoit aucuns qui s'approchās de luy, luy mettoÿt des chapeaux de fleurs sur la teste, & ceulx qui n'en pouuoÿt approcher, le regardoyēt de loing, & les uieux le monstroyēt aux ieunes. Mais ceste publique resiouissance estoit neātmoins entremeslee de larmes, de pleurs & de regrets, quād ilz uenoyēt à rememorer leurs malheurs passez, & les cōferer avec la prosperité presente, cōsiderās qu'ilz n'eussēt poit perdu la Sicile, ny ne se fussēt point

trouuez frustrez de tout ce qu'ilz auoyét au sur plus esperé, filz eussent laissé la cōduitte de leur armee, & le gouuernemét de leurs affaires être les mais d'Alcibiades, quand ilz l'enuoyerét ad-iourner à comparoir en personne deuant eulx, ueu que lors ayant trouué la uille d'Athenes presque entierement priuee de la possession de la mer, & du costé de la terre ses forces reduites à telle extremité, qu'à peine pouuoit elle defendre ses faulxbourgs, & au dedans estant encore diuisee & embrouillee de seditiōs ciuiles, neât-moins en remettant sus & ramassant ce peu de forces foibles & petites qui luy estoyét demourees, il luy auoit desia restitué non seulement la seigneurie & domination de la marine, mais aussi l'auoit rendue par tout uictorieuse sur la terre. Or auoit le decret de son rappel ia auparauant esté passé & accordé par le peuple, à l'instāce de Callias filz de Callæschrus, qui le meit en auant, ainsi comme luy mesme le tesmoigne en ses Elegies, ramenteuāt à Alcibiades le plaisir qu'il luy auoit fait en cela, disant:

- » De ton rappel premier ie proposay
- » En plein conseil le decret, & l'ozay
- » Mettre en auant, dont ie puis maintenir,
- » Estre celuy qui t'ay fait reuenir,
- » Estant l'arrest qui t'a cy rappellé
- » Du seau uerbal de ma langue scellé.

Mais nonobstāt, le peuple s'estāt lors assemblé en cōseil, Alcibiades se tira en auant, & fit une

harangue, en laquelle il deplora premierement
 ses malheurs, & se plaignit un peu des torts que
 lon luy auoit faits, en reiettant neantmoins le
 tout à la fin sur sa mauuaise fortune, & sur quel-
 que Dieu enuieux de sa prosperité: puis discou-
 rut bien au long sur l'esperance, qu'auoyent les
 ennemis: & au demourant, admonesta le peu-
 ple d'auoir bon courage, & de s'asseurer pour
 l'aduenir. Finablement luy furent par le peu-
 ple donnees des couronnes d'or, & fut eleu Ca-
 pitaine general d'Athenes, avec souueraine
 puissance tant par terre que par mer: & sur
 l'heure mesme fut ordonné par arrest du peu-
 ple, que tous ses biens luy seroyent rendus, &
 que les presbtres Eumolpides l'absouldroyent
 des maledictions, & les heraults & huissiers à
 haulte uoix semblablement reuoqueroyent les
 execrations, qu'ilz auoyent fulminees & pu-
 blicees encontre luy par cōmandement du peu-
 ple: ce que tous les autres feirēt, excepté Theo-
 20 dorus le Pontife, lequel dit, Je ne l'ay point ex-
 20 communié ny maudit, s'il n'a rien forfait con-
 20 tre la chose publique. Ainsi estans les affaires
 d'Alcibiades en si glorieuse prosperité, il y eut
 neantmoins aucuns, qui prirent à mauuais pre-
 sage le temps auquel il estoit arriué, pource que
 le iour de son retour, par cas d'adventure es-
 cheut au propre iour que lon celebre, en l'hon-
 neur de la Deesse Minerue, la feste que lon ap-
 pelle Plynteria, qui uault autant à dire comme,

la feste des lauemens, en laquelle les prestres, que lon nomme Praxiergides, font quelques secrets sacrifices, & occultes ceremonies, le uingt & cinquieme iour du mois de Septembre, ostans à l'image de la Deesse tous ses ioyaux & paremens, & la tenans toute cachee & couverte: à raison dequoy les Atheniens mettent celle iournee entre les plus malencontreuses, & se gardent bien de faire ou commencer aucune chose de consequence en icelle: & alloit on interpretant, qu'il sembloit que la Deesse ne fust point contente ny ioyeuse du retour d'Alcibiades, & qu'elle se cachoit pour ne le point uoir & pour le reculer arriere d'elle. Ce neantmoins luy estans à ce retour toutes choses succedees selon son desir, il arma cent galeres pour retourner incontinent à la guerre: mais il luy prit une enuie honeste & gentille, qui l'arresta iusques au temps que lon celebre la solennité des mysteres: car depuis que la uille de Deccee auoit esté occupee & fortifiée par les Lacedæmoniés dedans le territoire de l'Attique, & que les ennemis, estés les plus forts en campagne, auoyét tenu les chemins par ou lon ua d'Athenes à Eleusine, il n'y eut ordre de faire la procession solennelle par terre avec telle dignité & telle deuotion que lon auoit accoustumé au parauant, ains y falloit aller par la mer: de maniere que les sacrifices, les danses & plusieurs autres sainctes & deuotes ceremonies, que lon souloit

faire par le chemin, en chantant le saint cantique de Iacchus, par necessité uenoyent à estre delaissees & omises. Si sembla lors à Alcibiades que ce seroit à luy œuure meritoire enuers les Dieux, & glorieuse enuers les hommes, de rendre à ceste feste & solennité sa forme & dignité accoustumee, en accompagnant la procession, & la defendant contre les courses & inuasions des ennemis: car il estima qu'il aduendroit l'un des deux, ou que Agis Roy des Lacedæmoniens ne se bougeroit, & par ce moyen il luy diminueroit d'autant sa reputation & rabaisseroit sa gloire: ou s'il sortoit en campagne, qu'il luy donneroit la bataille deuote & religieuse enuers les Dieux, attendu que ce seroit pour defendre leurs plus saintes & sacrees ceremonies en la ueuë de son pais, là ou il auroit tous ses citoyens spectateurs & tesmoins de sa prouesse & uaillance. Ayant pris ceste resolution, il la fait entendre aux presbtres Eumolpides, aux huissiers, & autres supposts & ministres des mysteres: puis disposa tout le long du chemin des gens au guet sur les plus haults costaux d'alenuiron, & enuoya deuant au plus matin, des auantcoureurs pour descourir le pais: & apres cela fait marcher les presbtres, religieux & confraires, & ceulx qui les conduisoient, en procession, lesquelz il couurit & enuironna tout à l'entour de son armee qui marchoit coste à coste en bonne ordonnance, & en

grand silence : qui fut une conduite d'armée fort uenerable , pleine de grande saincteté , & en laquelle, si les enuieux uouloyent confesser uerité, ilz diroyent qu'Alcibiades feit autant office de grand presbtre & de souuerain pontife, que de Capitaine . Si mena ceste procession en seureté iusques dedans la uille, sans que personne des ennemis eust iamais la hardiessé de sortir aux champs pour luy courir sus . Ce qui luy eleua le cueur encore dauantage, & augmenta la bonne opinion que lon auoit de sa suffisance & sage conduite en la guerre , de sorte que l'õ iugeoit qu'il estoit inuincible, lors qu'il auoit entiere puissance de commander souuerainement à une armée . Au demourant quant au menu populaire & gens de basse condition, il les attira & gagna si bien à soy, qu'ilz desiroyent tous singulierement, qu'il usurpast l'authorité & domination souueraine , uoie iusques à s'en adresser à luy , & luy dire & admonester qu'il se deuoit mettre au dessus de toute enuie, & abolir toutes ces ordonnances & coutumes de faire authoriser ces choses par les uoix du peuple , & toutes telles folies qui ruinoient les affaires de la chose publique, & qu'il falloit qu'il prist en main souueraine l'authorité du gouvernement , pour disposer entierement de toutes choses à sa uolunté, sans plus craindre les calumniateurs . Or quant à luy, sil eut onques uouloir d'usurper la tyrannie, ou

non, on n'en ſçauroit que dire : mais il eſt bien certain, que les plus gros de la uille craignans qu'il ne le feiſt, haſterent ſon partement le plus qu'ilz peurent, faiſans toutes autres choſes à ſa uolunté, & meſmement luy donnans pour compagnons en la charge de Capitaine, ceulx que luy meſme uoulut. Ainſi ſe partit il à la fin avec une flotte de cent galeres, & ſ'en alla premierement deſcendre en l'isle d'Andros, là ou il deſfeit en bataille les habitâs de l'isle, & quelques Lacedæmoniens qui y eſtoyent auſſi, mais il ne prit pas la uille, qui fut l'une des premieres charges & imputations que ſes malueilleux luy meirét ſus depuis. Car ſ'il y eut iamais hōme ruiné par la ppre reputatiō que lō auoit de ſa ſuffiſance & ualeur, certainement ce a eſté Alcibiades: pource que les belles & grâdes choſes qu'il auoit faittes, l'auoyét mis en telle eſtime de bō ſens & de hardieſſe, q̄ là ou il failloit à faire quelque choſe, il en eſtoit ſouſpeçonné, & iugeoit on que ce n'eſtoit pas pour n'auoir peu mais pour n'auoir uoulu le faire, & que là ou il ſe uouloit eſuertuer, rien ne luy pouuoit eſchapper. Au moyen de quoy le peuple ſ'eſtoit p̄mis, qu'incōtinent apres ſon partemēt il entendroit dire, que l'isle de Chio ſeroit priſe avec tout le païs d'Ionie, & ſe courrouceoyét pource qu'ilz n'en entendoient point de nouuelles auſſi ſoudainement comme l'imaginoit leur deſir, ſans mettre en conſideration la faulte d'argent qu'il

souffroit, mesmement ayant la guerre contre des ennemis, qui auoyent le grand Roy de Perse qui leur en fournissoit, & que pour ceste necessité il estoit bien souuent contraint d'abandonner son camp pour s'en aller ça & là chercher de l'argent, dont il peust nourrir, soudoyer & entretenir ses gens : car qu'il soit ainsi, la dernière charge que lon luy meit sus, fut pour une telle cause : Lyfander enuoyé par les Lacedæmoniens pour Admiral & Capitaine general de leur armee de mer, feit tant enuers Cyrus frere du Roy de Perse, qu'il en tira une bonne & grosse somme de deniers : moyenant lesquels, il donna aux mariniers quatre oboles^a de soude ordinaire par iour, au lieu qu'ilz n'en souloyent auoir que trois, encore auoit Alcibiades beaucoup d'affaire à leur en fournir trois seulement. A raison dequoy, pour recouurer argët, il s'en alla faire une course iusques en la Carie. Mais ce pendant, celuy qu'il auoit laissé son lieutenant, & à qui il auoit baillé la superintendance sur les uaisseaux en son absence, nommé Antiochus; qui estoit bien bon pilote, mais au demourant homme eceruellé, de peu de sens & de mauuais iugement, ayant expres commandement d'Alcibiades de ne combattre point en façon quelconque, encore que les ennemis luy uinsent presenter la bataille, fut si temeraire, & feit si peu de compte de ce qui luy auoit esté tant & si expressement ordonné, qu'il arma sa

L'obole
de Athe-
nes ualoit
environ
sept de-
niers.

galère dont il estoit Capitaine, & encore une autre, & s'en alla uers la uille d'Ephefe passer tout le lóg des proues des galeres ennemies, en faisant & disant plusieurs uillanies & plusieurs oultrages à ceulx qui estoient dessus. Dequoy Lyfander estant irrité, luy sortit à l'encontre avec peu de uaisseaux du commencement. Les autres particuliers Capitaines des galeres d'Athenes, uoyans Antiochus en danger, y allerent au secours à la file : & adonc Lyfander aussi de son costé se ietta en pleine mer cõtre eulx avec toute sa flotte entierement, & feit en sorte qu'il les rompit. Antiochus mesme y mourut, & y eut plusieurs galeres & plusieurs personnes prises, dont Lyfander dressa un trophée, pour marque de sa uictoire. Alcibiades ceste nouvelle ouye, s'en retourna incontinent tout court en toute diligence à Samos, & arriué qu'il y fut alla avec le demourant de sa flotte presenter la bataille à Lyfander, lequel se contentant de sa premiere uictoire, ne luy sortit point à l'encontre, & tout aussi tost y eut un Thrasylulus filz de Thrason ennemy d'Alcibiades, qui se partit du camp de Samos, & s'en alla droit à Athenes pour l'accuser enuers le peuple, donnant à entendre qu'il gastoit tout, & qu'il auoit ia perdu plusieurs uaisseaux, pour desdaigner sa charge, & en faire trop peu de compte, en commettant en son lieu des gens, qui auoyent credit autour de luy, pource qu'ilz estoient bons compa-

gnons, & qu'ilz luy faisoient passer le temps à yurongner, & à dire mots de gaudifferie, que les gens de marine disent entre eulx, pendant qu'il alloit à son plaisir ça & là amasser de l'argent, & se donner du bon temps à faire banquets avec les courtisanes Abydenienes & Ionienes, mesmement en temps que l'armee des ennemis estoit si pres de la leur. On le chargea aussi, qu'il faisoit fortifier quelque chasteau au pais de Thrace, pres la uille de Bisanthe pour s'y retirer, comme ne pouuant, ou plus tost, ne uoulant plus uiure en son pais. Ausquelles imputations les Atheniens adioustans foy, eleurent incontinent d'autres Capitaines, pour mōstrer le courroux & le malcontentement qu'ilz auoyent encontre luy. Ce qu'entendant Alcibiades, & craignant qu'on ne luy feist pis, se retira de tout poinct hors du camp des Atheniēs, & assemblant quelque nombre de soudards estrangers, alla en son nom faire la guerre à quelques peuples Thraciens, qui n'estoyent point sous la puissance d'aucun seigneur, là ou il assembla bonne somme d'argent, de ce qu'il y gagna, & par mesme moyen asscura les Grecs, habitans en celle marche, des courses & inuasions des Barbares. Depuis estans les Capitaines Atheniens Tydeus, Menander & Adimantus, avec toutes les galeres, que la uille d'Athenes auoit pour lors, en la coste que lon appelle communement la Riuiere de la cheure, là ou

tous

tous les matins par plusieurs iours de reng, ilz se iettoyent en haulte mer, & alloient presenter la bataille à Lyfander, qui estoit à l'ancre deuant la uille de Lampsaque, avec toute l'armee de mer des Lacedæmoniens, puis s'en retournoyent au lieu dont ilz estoient partis, en bien mauuais ordre, sans faire guet, ny soy tenir autrement sur leurs gardes, comme gens qui mesprisoyent leurs ennemis. Alcibiades estant en terre ferme, non gueres loing de là, ne meit point à nonchaloir ceste faulte qu'ilz faisoient, ains s'en alla deuers eulx à cheual, & leur remōstra qu'ilz s'estoyēt mal posez en une coste, ou ilz n'auoyēt nulz abriz, & point de uilles, & ou il leur falloit aller querir leurs uiures biē loing, iusques en la uille de Sestos, & qu'ilz souffroyēt leurs gens de marine sortir hors des uaisseaux, quand ilz estoient à la coste, & s'escarter ça & là en terre, comme chascun uouloit, là ou ilz auoyent tout deuant eulx une grosse armee d'enemis accoustumez d'obeir promptement aux commandemens d'un seul Chef: & pourtant leur disoit & conseilloit qu'ilz s'ostassent de là, & s'en allassent poser l'ancre deuant la uille de Sestos. A quoy les Capitaines ne uoulurent point entendre: ains, qui pis est, l'un d'eux, Tydeus, luy commanda superbement qu'il eust à se retirer incontinent, & que ce n'estoit point luy, mais d'autres, qui auoyent charge de l'armee. Parquoy Alcibiades se doubtant qu'il y

eust encore quelque trahison là deffoubs, se retira : & en s'en allant, dit à quelques uns de sa cognoissance, qui luy feirent compagnie à s'en retourner du camp, que si les Capitaines Atheniens ne l'eussent ainsi fierement rabroué, dedans peu de iours il eust contraint les Lacedæmoniens de uenir à la bataille contre eulx en despit qu'ilz en eussent, ou bien de quitter & abandonner leurs uaisseaux : ce que aucuns estimerent estre une uaine uanterie : les autres iugerent qu'il y auoit apparence en ce qu'il disoit, par ce qu'il eust peu amener du costé de la terre grand nombre de Thraciens, gens de traict & de cheual, avec lesquelz il eust couru sus aux Lacedæmoniens, & mis leur camp en grand trouble : mais au demourant qu'il eust sagemét preueu les faultes que faisoient ces Capitaines Atheniens, l'euuenement qui en ensuyuit incontinent apres, le tesmoigna euidentement, par ce que Lyfander les alla un iour charger au desprouueu si roidement, que de tous les uaisseaux qui estoient en leur flotte, il ne se sauua que huit galeres seulement, avec lesquelles Conon s'enfouit : & les autres qui n'estoyent pas guerres moins de deux cents, furent toutes prises & emmenees captiues, avec trois mille prisonniers que Lyfander feit tous mourir. Et peu de temps apres, prit aussi la uille mesme d'Athenes, ou il brussa tout le reste de leurs uaisseaux, & feit demolir & abbatre leurs longues mu-

railles. Apres lequel grãd exploit, Alcibiades redoubtant les Lacedæmoniens, qui lors, sans credit, estoÿt demourez seigneurs de la mer & de la terre, passa au païs de la Bithynie, faisant conduire apres luy grande quantité de biens, & portant bonne somme d'argent quand & luy, sans d'autres encore dauantage qu'il laissoit es chasteaux de la Thrace, ou il se tenoit : mais il en perdit beaucoup en la Bithynie, que luy osterent & desroberent quelques Thraciens habitans au païs. Si delibera de se retirer deuers le Roy Artaxerxes, esperant que quand ce Roy l'auroit une fois essayé, il ne le trouueroit point homme de moindre seruice, que parauãt Themistocles auoit esté trouué ; oultre ce que l'occasion de son aller seroit encore trouuee plus iuste, à cause qu'il n'y alloit pas pour faire la guerre à ses citoyens ny à son païs, comme faisoit Themistocles ; ains au contraire en intention de requerir le Roy, qu'il luy pleust les secourir : & pensant que Pharnabazus, plus tost que nul autre, luy donneroit moyen de pouoir aller seurement iusques à la cour du Roy, il dressa son chemin deuers luy au païs de la Phrygie, ou il demoura quelque temps à luy faire la cour, estant aussi reciproquement honoré & caressé par luy. Ce pendant les Atheniens se trouuoient bien desolez de uoir leur empire perdu : mais quand encore Lyfander, apres leur auoir osté la liberté, meit leur uille

entre les mains de trente gouverneurs, alors voyans que tout estoit entierement perdu, là ou ilz eussent encore peu se ressourdre, silz eussent esté sages, ilz se meirent à regretter & deplorer ensemble leurs miseres & malheurs, en rememorant les erreurs & les faulces qu'ilz auoyent faittes, entre lesquelles ilz comptoyent pour la plus grande, la seconde fois qu'ilz festoyent courroucez contre Alcibiades: car ilz le chasserent & reietterent sans qu'il eust, quant à luy, rien offensé ne forfait, ayans despit seulement de ce, que l'un de ses ministres leur auoit, en son absence, perdu honteusement quelque petit nombre de uaisseaux, & eulx mesmes plus honteusement osterent à leur uille le plus uailant & le mieulx entendu Capitaine qu'ilz eussent. Et neantmoins encore auoyent ilz quelque debile esperance que leurs affaires n'estoyent pas de tout poinct deplorez, tant comme Alcibiades seroit uiuant, pource que parauant estant fugitif & banny, il ne festoit point contenté de uiure en repos sans rien faire: & maintenant, disoyent ilz, sil a aucun moyen, encore ne supportera il iamais l'orgueil & l'insolence des Lacedæmoniés, ny les cruaultez & oultrages de ces trente tyrans. Si n'estoit point hors de raison, que le commun peuple eust de telles imaginations en son entendement, attendu que les trente gouverneurs mesmes feirent tout deuoir de rechercher & diligemment en-

querir ce qu'il faisoit, & ce qu'il pretendoit de faire, iusques à ce que finablement Critias remonstra à Lyfander, que n'estant plus la uille d'Athenes sous l'authorité & le gouuernement du peuple, les Lacedæmoniens se pouuoient bien tenir & dire assurez seigneurs de toute la Grece : mais encore que le peuple d'Athenes de soymesme s'accommodast à souffrir patiemment la subiection d'estre sous un petit nombre de gouuerneurs, iamais Alcibiades tant qu'il auroit uie, ne les laisseroit uiure en paix, ains essayeroit tousiours d'y susciter & emouuoir quelques nouuelletez. Toutefois Lyfander ne se laissa point du tout aller à ses suasions, que premieremēt ne luy eust esté enuoyé un mandement special par les magistrats de Lacedæmone, auquel il luy estoit expressement commandé qu'il ostast, par quelque moyen que ce fust, Alcibiades hors de ce monde, soit, ou que ueritablement ilz redoubtassent la subtilité de son esprit, & la grandeur de son courage à entreprendre toutes choses haultes & hazardeuses, ou qu'ilz uoulussent en cela gratifier au Roy Agis. Ayant donques Lyfander receu ce commandement, il enuoya, pour auoir moyen de l'executer, deuers Pharnabazus, lequel en bailla la commission à son frere nommé Maggeus & à Sufamithres son oncle. Or estoit pour lors Alcibiades en un certain bourg de la Phrygie, ayant avec luy une siene concubine qui

fappelloit Timandra. Si luy fut aduis une nuit en dormant, qu'il auoit uestu la robbe de ceste fiene concubine, & qu'elle le tenant entre ses bras luy accoustroit la teste, le pignoit, & luy fardoit le uisage, comme sil eust esté femme. Les autres disent qu'il luy fut aduis, que Magæus luy coupoit la teste & faisoit brusler son corps: & dit on que ce fut bien peu de temps auant sa mort qu'il eut ceste uision. Ceulx qui y furent enuoyez pour le tuer, n'eurent pas la hardiesse d'entrer dedans la maison ou il estoit, ains meirent le feu tout à l'entour, & luy soudain qu'il en ouit le bruit, assemblea ce qu'il peut de uestemés, de tapisseries & autres draps, qu'il ietta dessus le feu pour le cuider estouffer: & entortillant son manteau à l'entour de son bras gauche, prit son espee nue en la main droite, & se ietta hors la maison sans que le feu luy feist aucun mal, sinon qu'il luy brusla un peu ses habillemens. Les Barbares si tost qu'ilz l'apperceurent se tirerent arriere & se scarterent, & n'y en eut pas un qui l'osast attendre ny le ioindre de pres pour le combattre: mais de loing luy tirerent tât de coups de dard & de trait, qu'ilz le tuerent en la place. Puis quand ilz se furent retirez, Timandra alla prendre le corps, qu'elle enueloppa & ensepuelit des meilleurs draps qu'elle eust, & luy donna sepulture le plus honorablemēt qu'il luy fut possible de ce qu'elle peut faire & recouurer. Lon

dit que Laïs, celle tant renommee courtisane que lon appelle Corinthiene, encore qu'elle fust natifue d'une petite uille de la Sicile, qui se nomme Hyccare, ou elle fut prise, estoit sa fille. Toutefois quant à la mort d'Alcibiades, il y en a aucuns qui accordent bien tout le demourant de ce que i'en ay escrit, excepté qu'ilz disent, que ce ne furent ny Pharnabazus, ny Lysander, ny les Lacedæmoniens qui le feirent tuer : mais que tenant auec luy une ieune femme de noble maison qu'il auoit desbauchee & seduitte, les freres d'elle ne pouuans supporter ceste iniure, allerent mettre le feu dedans la maison ou il se tenoit, & qu'ilz le tuerent comme nous auons dit, ainsi qu'il cuidoit faulter & se ietter hors du feu .

D iij



GAIUS MARTIVS

CORIOLANVS.



A maison des Martiens, à Rome, estoit du nombre des Patricienes, & en sont sortis plusieurs grâds personnages, entre lesquels fut Ancus Martius, filz de la fille du Roy Numa, qui fut Roy de Rome, apres Tullus Hostilius: aussi en furent Publius & Quintus, qui ont fait conduire dedans Rome la plus grosse & la meilleure eau qui y soit: & Censorinus, ainsi surnommé, pource que le peuple Romain l'eleut Censeur par deux fois, & puis à sa persuasion fait l'ordonnance & la loy, que de là en auant nul ne pourroit plus demander ne tenir ce magistrat la, deux fois. Mais Gaius Martius, celuy duquel nous entendons escrire presentement, estant demouré orphelin de son pere, fut nourry sous sa mere ueufue, & fait uoir par experience, que l'orphelinage apporte bien d'autres in-

commoditez à un enfant, mais qu'il ne l'empesche point d'estre homme de bien & de uertu excellente par dessus le commun, & que ce est à tort que quelques uns de lasche nature le blasment & l'accusent, comme estant cause de leur corruptiõ, à faulte que lon n'a pas eu soing d'eulx & de leurs meurs en leur ieunesse. Aussi a ce mesme personnage tesmoigné ce qu'aucuns estiment, qu'une nature forte & uigoureuse, quand elle est destituee de bonne nourriture, produit beaucoup de maux & de biens tout ensemble, ne plus ne moins qu'une bonne terre grasse produit beaucoup de bonnes & de mauuaises herbes, si elle n'est bien cultiuee: pource que la naturelle force, constance & perseuerance de sa uoulunté, en ce qu'il auoit une fois entrepris, le pouloit bien à attenter & executer plusieurs belles & grandes choses: mais aussi de l'autre costé, sa cholere qui estoit impatiente, & son obstination inflexible de ne uouloir iamais ceder à personne, le rendoyent mal açoitable, & mal propre pour uiure & conuerser entre les hommes, lesquelz auoyent bien en admiration sa fermeté impassible de ne se laisser iamais uaincre ny au labour, ny à la uolupté, ny à l'auarice, & la nommoient bien force, temperance & iustice: mais au demourant, ilz ne s'en pouuoient approcher ny le frequenter familierement, comme il se fait entre citoyens d'une mesme chose publique, tant les

façons de faire leur estoient mal agreables & odieuses, pour une certaine grauité qui leur sembloit trop seigneuriale. Aussi à dire la uerité, le plus grand fruiçt que les hommes rapportent de la douceur & benignité des Muses, ce est à dire, de la cognoissance des bonnes lettres, c'est qu'ilz en domptent & addoucissent leur nature, qui estoit au parauant sauuage & farouche, trouuans avec le compas de la raison, le moyen, & reietans le trop. Or estoit en ce tēps la la prouesse honoree & prisee à Rome uniuersellement par dessus toutes les autres uertus: dequoy fait foy ce que lon la nommoit *VIRTVS*, du nom mesme de la uertu, en attribuāt le nom du commun genre à une espee particuliere: tellement que Vertu en Latin estoit autant à dire comme, uaillance. Mais Martius estant encore plus enclin aux armes que nul autre de son temps, commença incontinent des son enfance à les prendre en main, & à les manier. Et dauantage estimant que les armures de dehors & les artificielles ne seruent de gueres à ceulx qui ne sont bien mūniz & bien prouueuz des naturelles qui naisēt avec nous, il exercita tellement sa personne à toute sorte de trauail & de combat, qu'il en deuint uiste à courir, roide à lucter, & si ferme à la prise, qu'il ne se trouuoit homme qui le peust forcer: au moyen dequoy, ceulx qui contendoient à l'encontre de luy en prouesse & bonté de coura-

ge, quand ilz se trouuoient surmontez, alleguoyent que cela ne procedoit que de sa force corporelle & de la dureté de sa personne, qui ne se rendoit iamais pour labeur ny pour traual quelconque. La premiere guerre ou il se trouua, estant encore fort ieune, fut quád Tarquin surnommé le Superbe, qui auoit esté Roy de Rome, & depuis en auoit esté chassé pour son arrogance, apres auoir essayé d'y rentrer par plusieurs batailles, ou il auoit tousiours esté desfait, finalement fait tout son dernier effort, estant secouru des Latins, & de plusieurs autres peuples de l'Italie, qui avec une grosse & puissante armee auoyent entrepris de le remettre en son estat, non tant pour luy faire plaisir, comme pour diminuer & raualler les forces des Romains, lesquelz ilz craignoyent, & portoyent enuie à leur accroissement. En ceste bataille donques, laquelle eut plusieurs esbranlemens en l'une & en l'autre partie, Martius combatant uaillamment à la ueuë du Dictateur mesme, ueit un Romain qui fut porté par terre assez pres de luy: il ne l'abandonna point, ains se ietta au deuant pour le couvrir, & occit de sa main l'ennemy qui luy couroit sus: à l'occasion dequoy, apres que la bataille fut gaignee, le Dictateur ne meit pas un si bel acte en oubly, ains le couronna tout le premier d'un chapeau de branche de chesne, pource que c'est la coustume des Romains que celuy qui sauue la uie à

un sien citoyen, est honoré d'une telle couronne, soit ou que la loy feist cest hōneur au chefne en faueur des Arcadiens, lesquelz furent iadis appelez mangeurs de gland par l'oracle d'Apollo, ou pource que facilemēt & par tout les gens de guerre peuuent recouurer des branches de chefne, ou pource que lon estima estre conuenable de dōner par honneur à celuy, qui auroit sauué la uie à un citoyen, la couronne de l'arbre proprement dedié & consacré à Iupiter faueur & protecteur des citez: outre ce, que le chefne entre les arbres sauuages, est celuy qui porte le plus beau fruit: & entre les cultiuez & domestiques, est le plus fort. Dauantage les hommes au commencement en prenoyent le gland pour leur pain, & le miel pour leur breuage: &, qui plus est, il leur donnoit pour pitance une bonne partie des bestes & des oiseaux, en portant le guy de chefne, dont on fait la glus pour les prendre. On dit qu'en ceste bataille apparurent Castor & Pollux, & que soudainement apres le combat on les ueit à Rome sur la place, avec leurs cheuaux tous trempéz de sueur, qui les premiers dirent les nouvelles de la uictoire, à l'endroit ou il y a maintenant un temple edifié en leur honneur, aupres de la fontaine: & de là uient que le iour de ceste uictoire, qui fut le quinzieme de Iuillet, est encore auiourdhuy consacré à Castor & Pollux. Au reste lon uoit

coustumierement aduenir, que quand l'honneur & la reputation uienent auant le temps à ieunes gens qui n'ont pas la nature trop eleuee, cela esteint & rassasie incontinent leur soif & conuoitise de gloire trop facile à assouuir: là ou au contraire, les premiers honneurs ne font qu'aguiser l'appetit à ceulx qui ont les cueurs fermes & ueritablement grands, & sont comme des uents qui les poulsent à entreprendre & à uouloir faire toutes choses haultes & louables: pource qu'ilz n'estiment pas receuoir loyer de ce qu'ilz ont bien fait par le passé, ains plus tost leur semble qu'ilz donnent gage & arre de faire encore mieux à l'aduenir, & ont honte d'abandonner leur gloire, & de ne l'aller pas tousiours augmentant de plus en plus par mesmes exploits de uertu. Ceste affection estant en Martius, il s'efforceoit de se uaincre soy mesme en bien faisant: & uoulât faire uoir tous les iours quelque nouvelle preuue de sa ualeur, alloit adioustât prouesses sur prouesses, & amassant des pouilles sur des pouilles. Au moyen dequoy les Capitaines suyans faisoÿt aussi à l'enuy des precedens à qui plus l'honoreroit, & à qui porteroit plus honorable témoignage de sa uertu: de maniere que les Romains ayâs eu en ce temps la plusieurs guerres & plusieurs batailles, il se trouua à toutes, & n'y en eut pas une, dont il retourna sans quelque pris d'honneur. Et comme aux autres la

fin qui leur faisoit aimer la uertu estoit la gloire : aussi à luy , la fin qui luy faisoit aimer la gloire estoit la ioye qu'il uoyoit que sa mere en receuoit : car il estimoit n'y auoir rien qui le rendist plus heureux ne plus honoré , que de faire que sa mere l'ouist priser & louer de tout le monde , & le ueist retourner tousiours couronné , & qu'elle l'embrassast à son retour , ayant les larmes aux yeux espraintes de ioye : laquelle affection lon dit que Epaminondas aduoua & confessa semblablement estre en luy , reputant son principal & plus grand heur estre , que son pere & sa mere uiuans auoyent ueu la uictoire qu'il gaigna en la plaine de Leuctres . Or quant à Epaminondas , il eut ce bien la d'auoir ses pere & mere uiuans participans à sa ioye & à sa prosperité : mais Martius estimant deuoir à sa mere ce qu'il eust encore deu à son pere s'il eust esté uiuant , ne se contenta pas de la resiouir & honorer seulement , ains à son instance & priere il prit femme , de laquelle il eut des enfans , sans toutefois se departir iamais d'avec sa mere . Estant donques ia parueniu à grande authorité & grande reputation à Rome par sa uertu , il aduint que le Senat soustenant les riches entra en grande dissension avec le menu peuple , lequel se sentoit trop durement traité & oppressé par les usuriers , qui leur auoyent presté quelque argent , pource que ceux qui auoyent quelque peu de quoy , en estoient

priuez par les creanciers, qui leur faisoient faire ce peu de biens qu'ilz auoyent, à faulte de payer les usures, & puis consequemment decreter & uédre au plus offrât pour estre payez: & ceulx qui n'auoyét du tout rien, estoýét eulx mesmes saisis au corps, & leurs personnes detenués en seruitude, encore qu'ilz móstrassent les cicatrices des bleceures qu'ilz auoyent receues en plusieurs batailles, ou ilz festoyét trouuez pour le seruice & pour la defense de leur chose publique, desquelles la derniere auoit esté contre les Sabins, qu'ilz auoyent combatus sous la promesse que les riches leur auoyent faite de les traiter à l'aduenir plus doucemét, & aussi que par autorité du conseil le prince du Senat, Marcus Valerius, leur en auoit respõdu. Mais apres qu'ilz eurent si bien fait leur deuoir encore ceste derniere fois, qu'ilz desfeirét leurs ennemis, & qu'ilz ueirent que lon ne les en traittoit de rien, mieulx ny plus humainement, & que le Senat faisoit l'oreille sourde, monstrant ne se point souuenir des promesses qu'il leur auoit faites, ains les laissoit emmener cõme esclaués en seruitude par leurs creâciers, & souffroit qu'ilz fussent despouillez de tous leurs biés, adonc cõmencerent ilz à se mutiner ouuertemét, & à emouuoir de mauuaises & dangereuses seditions dedans la uille. Dequoy les ennemis estãs aduertis, entrerent à main armee dedans le territoire de Rome, bruslans & pil-

sans tout par ou ilz passoyent: pour à quoy reme-
 dier, les magistrats feirent incontinent crier
 à son de trompe, que tous ceulx qui se trouue-
 royent en aage de porter armes, se uinsent fai-
 re enroller pour aller à la guerre: mais person-
 ne n'obeit à leur commâdement. A l'occasion
 dequoy les opinions des principaux hommes,
 & qui auoyent authorité au gouuernement
 des affaires, se diuiserent aussi, pource que les
 uns furent d'aduis qu'il estoit raisonnable que
 lon chalaist & cedast un petit, à ce que les pau-
 ures requeroyent, & que lon relaschaft un peu
 la trop roide seuerité des loix: les autres main-
 teindrent le contraire, entre lesquelz fut Mar-
 tius, alleguât que le pis qui fust en cela n'estoit
 pas la perte d'argent, que uiendroyent à souf-
 frir ceulx qui en auoyent presté: mais que c'e-
 stoit un commencement de desobeissance, &
 un essay de l'insolence & audace d'une commu-
 ne, qui uouloit abolir les loix, & mettre tout en
 confusion: pourtant que le Senat, sil estoit sa-
 ge, deuoit prouueoir à l'esteindre de bõne heu-
 re, & amortir des son commencement. Le Se-
 nat fut en peu de iours assemblé par plusieurs
 fois là dessus, sans que toutefois il y eust reso-
 lution quelconque: ce que uoyans les pau-
 ures & menues gens, se banderent un iour en-
 semble, & s'entredonnans courage les uns aux
 autres, abandonnerent la uille, & s'allerent
 planter dessus une motte, qui s'appelle aujour-
 dhuy

dhuy le Mont sacré, le long de la riuiere du Teueron, sans faire uiolence quelconque, ny autre demonstration de mutinement, sinon que ilz alloient crians que de longue main aussi bien les riches les auoyent chassiez de la uille, & que par toute l'Italie ilz trouueroyent de l'air & de l'eau, & lieu pour se faire enterrer : & qu'aussi bien demourans à Rome ilz n'auoyent rien dauantage, sinon qu'ilz estoient blecez & tuez en cōtinuelles guerres & batailles, que ilz soustenoyent pour defendre l'opulence des riches. Le Senat eut peur de ce departement, & enuoya deuers eulx les plus gracieux & les plus populaires uieillards qui fussent en toute leur compagnie, entre lesquelz Menenius Agrippa fut celuy qui porta la parole, & apres plusieurs raisons franchement remonstrees, & plusieurs prieres doucement exposees à ce peuple de la part du Senat, finablement il termina sa harengue par une fable assez notoire,

» leur disant, Que tous les membres du corps
 » humain se mutinerent un iour contre le uentre,
 » en l'accusant & se plaignant de ce que luy
 » seul demouroit assis au milieu du corps sans
 » rien faire, ny contribuer de son labeur à l'en-
 » tretenement commun, là ou toutes les autres
 » parties soustenoyent de grans traux, & fai-
 » soyent de laborieux seruices pour fournir à ses
 » appetits : mais que le uentre se moqua de leur
 » folie, pource qu'il est bien uray, disoit il, que

» ie reçoÿ le premier toutes les uiandes & toute
 » la nourriture qui fait beſoing au corps de l'hō-
 » me, mais ie la leur renuoye, & distribue puis
 » apres entre eulx. Auffi, dit il, Seigneurs citoy-
 » ens Romains, pareille raiſon y a il du Senat
 » enuers uous : car les affaires qui y ſont bien di-
 » gerez, & les conſeilz bien examinez ſur ce qui
 » eſt utile & expedient pour la choſe publique,
 » ſont cauſe des profits & des biens qui en uie-
 » nent à un chaſcun de uous. Ces remonſtrances
 les addoulcirent, moyenant que le Senat leur
 ottroya que par chaſcun an ꝑeſſiroyent cinq
 magiſtrats, que lon appelle maintenant les Tri-
 buns du peuple, leſquelz auroyent charge de
 ſouſtenir & defendre les pauures que lon uou-
 droit fouler & opprimer. Si furent eleus les
 premiers Tribuns ceulx qui auoyent eſté au-
 theurs & conducteurs de ceſte ſedition, Iunius
 Brutus, & Sicinius Vellutus : & auffi toſt que
 la uille fut ainſi retournee en union & concor-
 de, le peuple incontinent reprit les armes, mō-
 ſtrant auoir bonne enuie de mieulx faire que
 iamais, & d'obeïr aux magiſtrats affectueuſe-
 ment en ce qu'ilz leur commanderoyent pour
 la guerre. Et Martius encore qu'il ne fuſt pas
 gueres content de uoir la puiffance du peuple
 augmentee, attendu que c'eſtoit au preiudice
 & à la diminution de la nobleſſe, & qu'il en-
 ueiſt les autres nobles & Patriciens paſſion-
 nez de meſme luy, toutefois il les admoneſta

de ne se monstres pas moins affectionnez à
prendre les armes, & à combatre pour la chose
publique, que faisoit le menu populaire, ains
leur faire cognoistre par effect, qu'ilz ne les sur
montoient pas tant en richesse & puissance,
comme ilz faisoient en prouesse & uailance.
Or y auoit il au pais des Volsques, contre les-
quelz les Romains auoyēt la guerre pour lors,
une uille capitale & de principale auctorité qui
s'appelloit Corioles, deuant laquelle le Consul
Cominius alla mettre le siege. Parquoy tous les
autres Volsques craignans qu'elle ne uinst à
estre prise d'assault, s'assemblerent de tous co-
stez pour l'aller secourir, en intention de don-
ner la bataille aux Romains deuant la uille mes-
me, à fin de les assaillir par deux endroits. Ce
qu'entendāt le Consul Cominius, diuisa pareil-
lement son armee en deux, & avec une partie
s'en alla en personne au deuant de ceulx qui ue-
noient de dehors, & laissa en son camp l'autre
partie pour faire teste à ceulx qui uoudroyent
sortir de la uille, sous la charge de Titus Lar-
tius l'un des plus uailans hommes qui fussent
pour lors entre les Romains. Parquoy les Co-
riolains faisans peu de compte de ceulx qui e-
stoyēt demourez au siege deuant leur uille, fei-
rent une faillie sur eulx, en laquelle pour le cō-
mencement ilz eurent du meilleur, tellement
qu'ilz rembarrerēt les Romains iusques dedās
le fort de leur camp, là ou se trouua Martius, le-

quel se iettant dehors avec peu de gens, meit en pieces les premiers des ennemis, ausquelz il s'adressa, & arresta tout court les autres, en ralliât & rappelant au combat à haulte uoix les Romains qui auoyent tourné le dos, pource que il estoit tel, que Caton uouloit que fust l'homme de guerre, non seulement rude & aspre aux coups de main, mais aussi effroyable au son de la uoix, & au regard terrible à l'ennemy. Si y eut incontinent bonne troupe de Romains qui se rallierent ensemble autour de luy, dont les ennemis s'espouueterent si fort qu'ilz reculerent arriere: mais Martius non content de cela, les poursuyuit & les chassa fuyans à ual de rouverte iusques dedans leurs portes: & là uoyât que les Romains tiroient le pied arriere pour le grand nombre de traiçts & de flesches qu'on leur tiroit de dessus les murailles, & qu'il n'y en auoit un seul entre eulx, qui eust la hardiesse de penser seulement à se lancer peste peste quand & les fuyans dedans la uille, pource qu'elle estoit pleine de gens de guerre, tous bien armez, il les encouragea de faict & de parole, en leur criant que la fortune auoit ouuert les portes plus pour les poursuyuâs, que pour les fuyans: toutefois il n'y en eut gueres qui prissent pour cela cueur de le suyure: mais luy mesme à trauers la presse des ennemis se ietta & poulsa iusques sur la porte, & entra dedans la uille parmy les fuyans, sans que personne de dedans ozast

de prime face tourner uisage, ny s'arrester pour luy faire teste: mais luy regardant autour de luy qu'il estoit entré peu de ses gens avec luy pour le secourir, & se uoyant de tous costez enueloppé d'ennemis qui se rallioyent pour luy courir sus, il feit adonc, comme lon escrit, des prouesses qui ne sont pas croyables, tant de coups de main, que d'agilité & disposition de personne, & de hardiesse de courage, rompant & renuersant tous ceulx sur lesquels il se ruoit, de maniere qu'il en feit fouir les uns iusques aux plus reculez quartiers de la uille, les autres de frayeur se rendirent & ietterent leurs armes en terre deuant luy, & par ce moyen donnerét tout loisir à Lartius, qui estoit dehors, d'amener à secreté les Romains au dedans. Ainsi estant la uille prise, la pluspart des soudards se meit incontinent à piller, & à emporter & ferrer le butin qu'ilz auoyent gaigné: mais Martius s'en courroucea bien aigrement, & cria qu'il n'y auoit point de propos, qu'eulx entendissent au pillage, & allassent ça & là cherchans dequoy s'enrichir, pendant que le Consul & leurs concitoyens estoient à l'adventure attachez à combattre contre leurs ennemis, & que soubz couleur de gaigner quelque butin, ilz cherchassent moyen de se tirer loing de l'affaire & du danger: toutefois quelques raisons qu'il sceust alleguer, il y en eut bien peu qui luy prestassent l'oreille. Parquoy prenant avec luy ceulx qui

uoluntairemēt s'offrirent à le suyure , il sortit de la uille , & prit son chemin uers le quartier, ou il entendit que le surplus de l'armee estoit allé, admonestant & priant souuent par le chemin ceulx qui le suyuoyent, de n'auoir point le cueur failly, & souuēt rendât les mains au ciel, en priant les Dieux de luy faire la grace qu'il se peust trouuer à temps pour estre à la bataille, & arriuer à poinct pour hazarder sa uie en defen- se de ses citoyens. Or estoit adonc la coustume entre les Romains, quand ilz estoient rengez en bataille, & qu'ilz estoient prests à prendre leurs pauois sur leurs bras, & à se ceindre par dessus leurs robbes, de faire aussi quād & quād leur testament sans riē en mettre par escript, en nōmāt celuy qu'ilz uouloyēt faire leur heritier en presence de trois ou de quatre tesmoings. Martius arriua iustement sur le poinct que les soudards estoiyēt apres à le faire de ceste sorte, estās ia les ennemis si pres, qu'ilz s'etreuoyoyēt les uns les autres. Quand on l'apperceut ainsi qu'il estoit tout souillé de sang & trempé de sueur, avec petite suite de gēs, cela de prime face en troubla & estonna quelques uns: mais tã- tost apres, quand ilz le ueirent courir avec une chere gaye uers le Consul, & luy toucher en la main, en luy recitant comment la uille de Cori- oles auoit este prise, & que lon ueit aussi que Cominius le Consul le baïsa & l'embrassa: adonc n'y eut il celuy qui ne reprist cou-

rage, les uns pour auoir ouy de poinct en poinct compter le succes de cest heureux exploit, & les autres pour le coniecturer à uoir leurs gestes de loing. Si se prirent tous à crier au Consul qu'il feist marcher sans plus attendre, & commencer la charge. Martius luy demanda comment estoit ordonnee la bataille des ennemis, & en quel endroit estoient leurs meilleurs combatans: le Consul luy fait response qu'il pensoit que les bandes qui estoient au front de leur bataille, estoient celles des Antiates que lon tenoit pour les plus belliqueux, & qui ne cedoyent en hardiesse à nulz autres de l'ost des ennemis. Je te prie donques, luy repliqua Martius, & te requiers que tu me mettes droit à l'encontre de ceulx la. Le Consul luy ottroya, louant grandement sa bonne uoulunté: & adonc Martius, quand les deux armées furent prestes à s'entrechocquer, se ietta assez loing deuant sa troupe, & alla charger si furieusement ceulx qu'il rencontra de front, qu'ilz ne luy peurent longuement faire teste: car il fendit incontinent, & entr'ouurit l'endroit de la bataille des ennemis, ou il donna: mais ceulx des deux costez se tournerent aussi tost les uns deuers les autres pour l'enuelopper & enserrer entre eulx: ce que le Consul craignant, enuoya soudain celle part les meilleurs combatans qu'il eust autour de sa personne.

Si y eut adonc une fort aspre meſlée à l'en-
tour de Martius, & en peu d'heure y eut beau-
coup d'hommes tuez ſur la place. Mais à la
fin les Romains y feirent ſi grand effort, qu'ilz
forcerent & rompirent les ennemis, & les
ayans rompus ſe meirent à les chaffer, prians
Martius qu'il ſe uouluſt retirer au camp, pour-
ce qu'il n'en pouuoit plus, tant il eſtoit las
du trauail qu'il auoit enduré, & des bleceu-
res qu'il auoit receues: mais il leur reſpondit
33 que ce n'eſtoit point aux uictorieux à ſe ren-
33 dre ny à auoir le cueur failly, & courut luy
meſme apres les fuyans, iuſques à ce que l'ar-
mee des ennemis fut entierement toute deſ-
confite avec grand nombre de morts, & grand
nombre de priſonniers auſſi. Le lendemain
au matin Martius ſ'en alla deuers le Conſul,
& les autres Romains ſemblablement. Et là
le Conſul montrant deſſus un tribunal, preſent
tout ſon exercire, rendit graces conuenables
aux Dieux pour une ſi grande & ſi glorieuſe
proſperité, puis tourna ſa parole à Martius,
duquel premierement il loua & exalta la uer-
tu à merueilles, tant pour ce qu'il, luy meſ-
me, luy auoit ueu faire, que pour ce que Mar-
tius luy auoit racompté: & en fin luy dit, que de
tous les cheuaux priſonniers, & autres biés qui
auoyét eſté pris & gaignez en grande quantité,
il en choiſiſt dix de chaſque ſorte à ſa uolüté,
auant que rien en fuſt diſtribué ny departy aux

autres. Et oultre cela encore pour tesmoigner que ce iour la il auoit emporté le pris de prouesse sur tous les autres, luy dōna de plus un beau & bō cheual avec tout son harnois & tout son equippage: ce que tous les assistens louerent & approuuerent grandement. Mais Martius se tirant en auant, declara qu'il receuoit bien le present du cheual, & estoit tresaise que son Capitaine se cōtentaist si amplement de luy, & le louast si haultement, mais que du demourant, qui estoit plus tost comme un loyer mercenaire, que recompense d'honneur, il n'en uouloit point, ains se contentoit d'auoir seulement sa part egale aux autres: sinon, dit il, que ie te demande une grace de plus, & te prie de me la cōceder, c'est que i'ay entre les Volsques un hoste & ancien amy, homme de bien & d'honneur, qui maintenant est prisonnier, & au lieu qu'il fouloit estre riche & opulent en sa maison, se treuve maintenāt pauure captif entre les mains de ses ennemis: mais de tous les maux & malheurs qui de present l'environnent, il me suffit de le pouuoir exempter d'un seul, c'est de le garder qu'il ne soit point uendu comme esclau. Ces paroles de Martius ouyes, il se leua une clameur grande de toute l'assistance, & y en eut plus de ceulx qui admirerent son abstinence, en le uoyant si peu meu d'auarice, que de ceulx qui haultlouerent sa uaillance: car ceulx mesmes qui auoyent quelque peu d'enuie & de ia-

louzie à l'encontre de luy, pour le uoir ainsi honorer & louer extraordinairement, l'estimerent de tant plus digne, qu'on luy donnaſt encore plus grand loyer de ſa ualeur, que moins il en acceptoit: & aimerent plus en luy la uertu qui luy faiſoit meſpriſer tant de biens, que celle pour laq̃lle, cōme à perſonne digne, on les luy deferoit. Car plus fait à louer le ſçauoir bié uſer des biés, que des armés: & plus encore fait à reuerer le nō les appeter, que le bié en uſer. Mais apres q̃ le bruit & la clameur de l'assemblee fut un peu appaiſé, le Cōſul Cominius ſe prit à dire,

» Nous ne ſçauriōs, Seigneurs, contraindre Mar
 » tius d'accepter les preſens que nous luy offrōs,
 » ſil ne luy plaiſt les receuoir: mais dōnōs luy-en
 » un ſi conuenable au bel exploit qu'il a fait, qu'il
 » ne le puiſſe pas refuſer, & ordōnons que deſor-
 » mais il ſoit ſurnōmé Coriolanus, ſi ce n'eſt que
 » l'exploit meſme le luy ait donné auant nous.

Depuis ce iour la il porta touſiours ce troiſieme nō la de Coriolanus: par ou il appert que le premier des noms que portoyent les Romains, comme Caius, eſtoit leur propre: le ſecond, comme Martius, eſtoit le nom de la famille & maison: & le troiſieme eſtoit un ſurnom, qui ſe donnoit ou pour quelque acte, ou quelque aduenture notable, ou pour quelque marque de la face & forme du corps, ou pour quelque uertu: ne plus ne moins que les Grecs anciennement impoſoyent auſſi des ſurnōs aux princes,

tirez ou de quelque acte memorable, comme quand ilz en ont nōmé quelcun Soter & Callinicos, c'est à dire, sauueur & uictorieux: ou de qlque marque apparēte au uifage, ou en la personne, comme Physcon & Grypos, c'est à dire, uētru ou qui a le uentre grād, & le nez aquilin: ou de quelque uertu, cōme Euergetes & Philadelphos, c'est à dire, bienfāiteur, & aimant ses freres: ou de la felicité, cōme Eudæmon, c'est à dire, l'heureux: car ainſi fut ſurnommé le ſecōd des^aBattes. Et y a eu des Roys à qui est demouré pour ſurnō le brocard de quelque moquerie, cōme à l'un des Antigones qui fut ſurnommé Doſon, c'est à dire, qui dōnera, pource qu'il promettoit touſiours, & iamais ne dōnoit, & l'ũ des Ptolomees qui fut appellé Lamyros, c'est à dire, plaiſanteur & babillard. Et de ceſte façō d'impoſer les noms pris de quelque traiçt de moquerie, les Romains en ont plus uſé que nulz autres, comme il y eut un Metellus qui fut ſurnommé Diadematus, c'est à dire, le bandé, pource qu'il porta longuement un bandeau à l'entour de ſa teſte, à cauſe d'un ulcere qu'il auoit au front: & en eut un autre de la meſme famille qui fut appellé Celer, c'est à dire, prōpt, à cauſe qu'en bien peu de iours, apres la mort de ſon pere, il ſeit uoir au peuple des combats de Gladiateurs, c'est à dire, d'eſcricmeurs à oultrance, dont on trouua l'appareil pour la briefueté du temps admirable. Les autres ont eu des

a Ce furent
les princes
qui fonde
rēt la uille
de Cyrene

furnoms tirez de quelque accident de leur naissance, comme encore iusques auiourdhuy ilz appellent Proculeius celuy qui naist son pere estant absent en uoyage loingtain, & Posthumius celuy qui naist apres la mort de son pere: & quand de deux freres iumeaux l'un meurt & l'autre suruit, le suruiuant s'appelle Vopiscus. Aussi imposent ilz bien souuent des furnoms pris de quelque marque & accident du corps, comme Sylla, c'est à dire, couperosé^a: Niger, noir: Rufus, roux: Cæcus, aueugle: Claudius, boiteux: faisans en cela sagement, d'accoustumer les hommes à n'estimer point que la perte de la ueuë, ny autres telz accidents fortuits, qui peuuent aduenir aux personnes, soyent choses reprochables ny honteuses, ains à y respondre franchement, comme à leurs urais & propres noms, quand on les nomme par telles appellations. mais plus ample discours sur ceste matiere seroit mieulx conuenable à un autre traité qu'à cestuy-cy. Au demourant ceste guerre acheuee, les flatteurs du commun populaire fusciterent de rechef une autre sedition, sans qu'ilz en eussent aucune nouvelle occasion, ny matiere de se plaindre qui fust iuste: car ilz fonderent leur seconde mutination à l'encôtre des nobles & Patriciens, sur les maulx & malheurs qui estoyent necessairement ensuyuiz de leurs diuisions & seditiõs passees, pource que la plus part du territoire de Rome estoit demouré

^a Toute-
fois Sext.
Pompeius
escrit, que
les hõmes
bruns sap-
pelloyent
Sulla.

ſans cultiuer ny enſemencer, & ſi n'auoit on pas eu temps ny moyen de faire uenir des bledz d'ailleurs, à cauſe des guerres : au moyen de quoy la charté y eſtoit tresgrande. Ainſi uoyans ces harengueurs, qui alloient gaignans la bonne grace du menu peuple, par telles flatteries, qu'il y auoit faulte de bledz en la uille, & quād bien il y en euſt eu, que le commun peuple n'auoit point d'argent pour en achepter, ilz commencerent à ſemer des bruits faulx, & propos calumnieux à l'encontre des nobles, que pour ſe uenger du pauure peuple ilz auoyent expreſſement procuré & moyené que ceſte grande charté aduiſt. Dauantage, ſur ces entrefaittes arriuerent des ambassadeurs de la uille de Velitres, leſquelz offrirent leur uille au peuple Romain, & prierent que lon y enuoyast de nouveaux habitās pour la repeupler, pource que la peſtilence y auoit eſté ſi cruelle, & y auoit fait mourir tant de gens, qu'il n'y eſtoit pas demouré la dixieme partie du peuple qui auoit accouſtumé d'y eſtre. Si penſerent les plus ſages, que ceſte neceſſité de ceulx de Velitres uenoit bien à propos, eſtimans eſtre neceſſaire, en ſi grande faulte de uiures, de deſcharger un peu la uille de Rome du grand nombre des habitans qui y eſtoyent: & ſi penſoyent bien amortir par meſme moyen ceſte nouvelle ſedition, en nettoyāt la uille des plus ſeditieux & plus mutins, ne plus ne moins que d'une ſuperfluité de mau-

uais humeurs qui caufoient ceste maladie. Par quoy les Consulz feirēt un rolle de ceulx qu'ilz entendoient enuoyer à Velitres, pour y habiter par forme de Colonie, & feirent aussi tout ensemble une leuee des autres, qui demouroient à Rome, pour aller contre les Volsques, esperans appaiser par le moyen de la guerre au dehors, les seditions & dissensions du dedans, & cuidans que quand ilz se trouueroient en armes dedans un mesme camp, en mesmes affaires, & en mesmes dangers, les pauures parmi les riches, & les roturiers parmi les nobles, ilz en uiuroient plus paisiblement & plus amiablement les uns avec les autres. Mais Sicinius & Brutus deux populaires harengueurs s'opposerent à l'un & à l'autre, crians que les nobles, en ce faisant, couuroient la plus inhumaine cruaulté du monde soubs le doulx & gracieux nom de Colonie, pource qu'ilz enuoyoyent leurs pauures citoyens en une uille infecte de mauuais air & pestilent, pleine de corps morts non enterrez, pour demorer en la garde d'un Dieu estranger, qui si cruellement auoit persecuté les siens: ce qui estoit tout autant, que filz les alloient precipiter en un abyfme de malediction: & puis, comme fil ne leur suffisoit pas de faire mourir aucuns de leurs pauures citoyens de faim, & ietter les autres à l'abandon de la peste, encore leur suscitoyēt ilz une guerre uoluntaire, à fin qu'il n'y eust espece de mi-

tere & de mal, dont le pauvre peuple Romain ne fust affligé, pource qu'il se laissoit de seruir aux riches. Le commun peuple estant abreueué de telz langages, ne uouloit point comparoir quand on l'appelloit de la part des Cōsulz pour faire les rolles de ceulx qui auroyent à aller à la guerre, & estoit aussi fort desgousté de ceste nouvelle Colonie, tellement que le Senat ne sçauoit ou il en estoit. Mais Martius, qui auoit ia acquis reputation grande, & estoit homme de cueur, avec ce qu'il estoit estimé & honoré de tous les plus gros de la uille, se meit à faire teste & à resister ouuertement à ces flatteurs de la commune: & quant au repeuplement de la uille de Velitres, encore le feirent ilz, en contrainçant de partir soubs grosses peines à qui desobeïroit, ceulx ausquelz il estoit escheut par le sort d'y deuoir aller: mais quant à la guerre, le peuple n'y uouloit aucunement entendre. Parquoy Martius prenant avec luy ses dependans, & ceulx qu'il peut induire par bonnes paroles à le suyure, alla courir tout le territoire des Antiates, ou il trouua force bledz, & y gaigna une grande quantité de butin, tant de bestail que de personnes prisonnieres, qu'il en emmena, sans qu'il en retceinst chose quelconque pour soy: & puis remena sains & saufs à Rome ceulx qui estoient allez quand & luy, tous riches & chargez de pillage, dont les autres qui estoient demourez à Rome, se repentirēt bien

de ce qu'ilz ne l'auoyent fuyuy, & portans en-
uie à ceulx qui y auoyent si bien fait leurs be-
songnes, en uouloyent auffi mal à Martius, ayàs
grand despit de uoir sa reputation & son credit
aller ainsi tous les iours de plus en plus en a-
uant, à cause qu'ilz estimoyent que c'estoit au
preiudice de la puissance du peuple. Peu de tēps
apres, il uint à demander le Consulat, & fief-
chissoit desia la commune à sa requeste, ayant
aucunement honte de rebuter & esconduire
un personnage en noblesse de sang, & en
prouesse de sa personne, le premier de toute la
uille, & mesmement qui leur auoit fait tant &
de si grands seruices : car la coustume estoit
lors à Rome, que ceulx qui poursuyuoient au-
cun magistrat & office public, quelques iours
durans se trouuassent sur la place, ayans seule-
ment une robbe simple sur eulx, sans saye des-
fous, pour prier & requerir leurs citoyens de
les auoir pour recommandez quand ce uien-
droit au iour de l'election, soit qu'ilz le feissent,
ou pour emouuoir le peuple dauantage le priàs
en si humble habit, ou pour pouuoir monst-
rer les cicatrices des coups qu'ilz auoyent receuz
es guerres pour la chose publique, comme cer-
taines marques & tesmoignages de leur prouef-
se. Car il ne fault penser que ce fust pour crain-
te & souspeçon du menu populaire qu'il ne se
laissast corrompre aux poursuyuans par distri-
bution d'argent, que lon faisoit ainsi uenir les
pour-

poursuyuans sur la place en robbe simple, tous
 desceincts, & sans saye dessous, pour faire leur
 brigade : car ce a esté bien tard & fort long tēps
 depuis, que le uendre & l'achepter sont entre-
 uenus es elections des magistrats, & que les
 uoix & suffrages des elifans se sont acheptez à
 pris d'argent. Mais aussi depuis que ceste cor-
 ruption a une fois commencé es elections des
 offices, elle est passée de main en main iusques
 aux sentences des iuges, & iusques aux gens de
 guerre : tant qu'à la fin elle a esté cause de re-
 duire la chose publique en Monarchie, en affer-
 uant & assubiectissant les armes mesmes à l'ar-
 gent. Pourtant me semble il, que celuy ne parla
 point sans raison, qui dit que, *Qui premier feit*
 des banquets & donna de l'argent au menu
 peuple, fut celuy qui luy osta son autorité, &
 ruina la chose publique. Mais ce mal la se coula
 peu à peu, & gaigna secrètement sans estre de
 long temps cogneu à Rome : car lon ne sçait
 pas qui fut le premier qui y achepta & corrom-
 pit les uoix du peuple par argent, ny les senten-
 ces des iuges : mais à Athenes on tient, que ce-
 luy qui premier donna de l'argent aux iuges
 pour les corrompre, fut Anytus filz d'Anthe-
 mion, enuiron la fin de la guerre Peloponesia-
 que, estant accusé de trahison pour la reddition
 du fort de Pyle, lors que l'aage doré impollu &
 entier regnoit encore es iugemens à Rome.
 Martius dóques suyuant ceste coustume, mon-

stroit plusieurs cicatrices sur sa personne des bleccures receuës en plusieurs batailles par l'espace de dixsept ans qu'il auoit continuellement toujours esté le premier à la guerre : tellement qu'il n'y auoit celuy du peuple , qui n'eust en foy mesme honte de refuser un si uertueux homme , & s'entredisoient les uns aux autres , qu'il falloit , comment que ce fust , l'elire Consul . Mais quand ce uint au iour de l'election , que Martius descendit en grande magnificence sur la place , accompagné de tout le Senat , & ayant tous les plus nobles de la uille à l'entour de luy , qui poursuyuoient de le faire elire Consul , avec plus chaude instance que chose qu'ilz eussent onques attendee , adonc l'amour & la bienueillance de la commune commença à se tourner en enuie & en haine , avec ce qu'ilz craignoient de mettre ce magistrat de souueraine puissance entre les mains d'un personnage si partial pour la noblesse , & qui auoit tant de credit & d'authorité entre les Patriciens , de peur qu'il ne uoulust oster au peuple entierement toute sa liberté : pour lesquelles considerations ilz refuzerent à la fin Martius , & furent deux autres poursuyuans declarez Consulz : dequoy le Senat fut fort desplaisant , & estima la honte de ce refus luy estre plus tost faite , que non pas à Martius : lequel la prit encore plus aigrement , & la porta plus impatiemment , pource qu'il se laissoit le plus souuent aller à la

cholere & à une obstinee opiniaſtreté, comme ſi c'eult eſté grandeur de courage & magnanimité, n'ayant pas celle grauité, celle froideur & douceur temperee par le iugement de bonne doctrine & de raiſon, qui eſt neceſſairement requiſe à un gouuerneur d'eſtat politique : & n'entendant pas que la choſe de ce monde, que plus doibt euitier un homme qui ſe ueult meſſer du gouuernement d'une choſe publique, & conuerſer entre les hommes, eſt l'opiniaſtreté, laquelle, comme dit Platon, demeure avec la ſolitude, c'eſt à dire, que ceulx qui ſe aheurtenant obſtincement à leurs opinions, & ne ſe ueulent iamais accommoder à autruy, demeurent à la fin tous ſeuls: car il fault que qui ueult uiure au monde, ſe rende amateur de patience, de laquelle aucuns mal aduiſez ſe moquent. Ainſi Martius eſtant homme ouuert de ſa nature & entier, & qui ne fleſchiſſoit iamais, comme celuy qui eſtimoit que uaincre touſiours & uenir au deſſus de toutes choſes fuſt acte de magnanimité, non pas d'imbecillité & de foibleſſe, laquelle pouſſe hors de la plus debile & plus paſſionnee partie de l'ame le courroux, ne plus ne moins que la matiere d'une apoſtume, il ſe retira en ſa maiſon plein d'ire, de deſpit & d'amerume de cholere à l'encontre du peuple, là ou tous les ieunes gentilzhommes, meſmement ceulx qui eſtoyent les plus courageux, & qui auoyēt les eſprits & les cucurs plus eleuez pour

la noblesse de leurs maisons, le suyurent, ayans bien accoustumé de tout temps de l'accompagner & honorer : mais encore plus alors ilz se rengèrent autour de luy, & luy faisans compagnie mal à propos, luy aigrirent & enflammèrent sa cholere encore dauantage, en se plaignant & se doulant avec luy du tort qu'on luy auoit fait, pource que c'estoit leur Capitaine & leur maistre qui les conduisoit à la guerre, & leur enseignoit tout ce qui appartient à la discipline militaire, allumant tout doucement une contention d'honneur & ialousie de uertu entre eulx, sans enuie, en louant ceulx qui faisoyēt bien. En ces entrefaites arriua grande quantité de bledz à Rome, qui auoyent esté partie achetez en Italie, & partie enuoyez de la Sicile en don par Gelon le tyran de Syracuse, tellement que plusieurs en conceurent bonne esperance, s'attendans que quand & la charté des uiures deust aussi cesser la sedition ciuile. Si fut incontinet le Senat assemblé, & le menu peuple tout aussi tost espendu à l'entour du Palais, ou le conseil se tenoit, attendant la resolution de ce qui sy conclurroit, se promettant que ce qui auroit esté achepté, se uendroit à fort bon marché, & que ce qui auroit esté donné, se distribueroit aussi par teste sans en rien faire payer, mesmement pource qu'il y auoit aucuns des Senateurs, qui estoient à ce conseil, qui suadoyent d'ainſi le faire. Mais Martius se dressant en

20 piedz, reprit adonques aigrement ceulx qui en
 20 cela uouloyent gratifier à la commune, les ap-
 20 pellant flatteurs du peuple & traistres à la no-
 20 blesse, & disant qu'ilz nourrissoyēt & couuooyēt
 20 à l'encontre d'eulx mesmes de mauuaises semē-
 20 ces d'audace & d'insolence, qui ia auoyent esté
 20 iettees parmy le peuple, lesquelles ilz deuoyent
 20 plus tost auoir estouffees & suffoquees à leur
 20 naissance, filz eussent esté bien conseillez, non
 20 pas endurer que le peuple se fortifiast à leur pre-
 20 iudice par un magistrat de si grāde puissance &
 20 autorité, que celuy qu'on leur auoit concedé,
 20 attendu qu'il leur estoit desia redoubtable, par
 20 ce qu'il obtenoit tout ce qu'il uouloit, & ne fai-
 20 soit rien sil ne luy plaisoit, & n'obeissoit plus
 20 aux Consulz, ains uiuoit en toute licence sans
 20 recognoistre aucun superieur, qui luy comman-
 20 dast, sinō les chefz mesmes & auteurs de leurs
 20 partialitez qu'il appelloit ses magistrats. Pour-
 20 tant disoit il, que ceulx qui conseilloyent & e-
 20 stoyent d'aduis que lon feist des donnees publi-
 20 ques, & distributions gratuites de blez à la com-
 20 mune, ainsi comme lon faisoit es citez Grec-
 20 ques, ou le peuple auoit plus absoluē puissance,
 20 ne faisoient autre chose que nourrir la deso-
 20 beissance du commun populaire, laquelle en
 20 fin de compte se termineroit à la ruine totale
 20 de la chose publique: car ia ne penseront ilz pas
 20 que ce soit en recompense de leurs seruices, ueu
 20 qu'ilz sçauent bien que tant de fois ilz ont re-

» fusé d'aller à la guerre quand il leur a esté com-
 » mandé : ny de leurs mutineries , quand ilz s'en
 » sont allez d'avec nous , en quoy faisant ilz ont
 » trahy & abandonné leur país:ny des calumnies
 » que leurs flatteurs leur ont mis en auant,& que
 » eulx ont approuuees & receues à l'encontre du
 » Senat:ains ne faudront pas d'estimer que nous
 » leur donnons & concedons cela en chaland la
 » uoile , pource que nous les craignons , & que
 » nous les flattōs, de maniere que leur desobeis-
 » sance en ira tousiours augmētant de pis en pis,
 » & ne cesseront iamais de susciter nouueaux mu-
 » tinemens & nouuelles seditions. Pourtant se-
 » roit-ce à nous une trop grande folie d'ainsi le
 » faire : ains, au contraire, si nous sommes sages ,
 » nous leur deuons oster leur Tribunat , qui est
 » tout euidentement la destruction du Consulat,
 » & la diuision de ceste uille , laquelle par ce
 » moyē n'est plus une , comme elle souloit estre,
 » ains uient à estre desmembree en deux partiali-
 » tez , qui entretiendront tousiours discorde &
 » dissension entre nous, & iamais ne permettront
 » que nous retournions en union d'un mesme
 » corps. En deduisant ces raisons & plusieurs au-
 » tres semblables, Martius eschauffa merueilleu-
 » semēt en son opinion tous les ieunes hommes,
 » & presque tous les riches, de maniere qu'ilz cri-
 » oyent qu'il estoit seul en toute la uille qui ne
 » fleschissoit ny ne flattoit point le menu popu-
 » laire, Seulement y en auoit il quelques uns des

vieux qui luy contredifoyent, se doubtans bien qu'il en pourroit aduenir quelque inconuenient, comme il n'en aduint aussi rien de bon : pource que les Tribuns du peuple, qui estoient presens à ceste consultation du Senat, quand ilz ueirent que l'opinion de Martius à la pluralité des uoix l'emportoit, se ietterent hors du Senat emmy la tourbe de la commune, crians au peuple à l'aide, & que lon s'assemblast pour les secourir. Si se feit incontinent une tumultueuse assemblee de peuple, en laquelle publiquement furent recitez les propos que Martius auoit tenuz au Senat : dont la commune se mutina si fort, qu'il s'en fallut bien peu, que sur l'heure mesme elle n'allast en fureur courir sus à tout le Senat: mais les Tribuns ietterent toute la charge sur Martius seulement, & quand & quand l'enuoyerent sommer par leurs sergens, qu'il eust à comparoir tout promptement en personne deuant le peuple, pour y respondre des paroles qu'il auoit dittes au Senat. Martius rechassa fierement les officiers qui luy feirent ceste sommation : & adonc eulx mesmes y allerent en personnes, accompagnez des *Ædiles* pour l'amener par force : & de faict mirent les mains sur luy : mais les nobles Patriens se bendans à l'entour de luy, repoulsèrent les Tribuns arriere, & batirent à bon esciant les *Ædiles* : & pour lors la nuict, qui suruint là dessus, appaisa le tumulte. Mais le lendemain au

matin les Consulz uoyans le peuple mutiné accourir de toutes parts en la place, eurent peur que toute la uille n'en tumbast en combustion, & assemblans le Senat à grande haste remonstrerent qu'il falloit aduiser d'appaiser le peuple par doulces paroles, & l'addoucir par quelques gracieux decrets en sa faueur: & que filz estoient sages, ilz deuoyēt penser qu'il n'estoit pas lors saison de s'opiniastrer, ny de contester & combatre pour l'honneur à l'encontre d'une commune, pource qu'ilz estoient tumbes en un poinct de temps fort dangereux, & ou ilz auoyent besoing de se gouverner discrettemēt, en y donnant quelque prouision amiable, & promptement. La plus grande partie des Senateurs qui assisterent à ce conseil trouua ceste opinion la plus saine, & s'y accorda: au moyen dequoy les Consulz sortans hors du Senat allerent parler au peuple le plus doulcement & le plus gracieusement qu'ilz peurent, & addouciront la fureur de son courroux, en iustificiant le Senat des calumnies que lon luy mettoit sus à tort, & usant de moderation grande à leur remonstrer & les reprendre des faultes qu'ilz auoyent faites. Au demourant quant à la uente des bledz, ilz leur promirent que pour le pris ilz n'auoyent point de different avec eulx. Ainsi estant la plus part du peuple appaisée, & donnant à cognoistre par le bon silence qu'il faisoit, & la paisible audience qu'il don-

noit, qu'il se rendoit, & auoit aggreable ce que les Consulz difoyent, les Tribuns du peuple se leuerent adonc, qui dirent, que puis que le Senat se régeoit à la raison, le peuple aussi de son costé, entant que besoing seroit, reciproquemēt luy cederait: mais nonobstant qu'il falloit que Martius uinst en personne respōdre sur ces articles, S'il auoit pas suscitē & sollicitē le Senat de changer l'estat present de la chose publique, & oster au peuple l'authorité souueraine: Si ayant esté appellē en iustice de par eulx, il auoit pas par contumace desobei: Si finalement il auoit pas battu & outragē les *Ædiles* sur la place mesme deuant tout le monde: & si en ce faisant il auoit pas, tāt qu'en luy estoit, suscitē une guerre ciuile, & induit ses citoyens à prēdre les armes les uns cōtre les autres. Ce qu'ilz difoyēt à l'une de ces deux fins, ou que Martius contre son naturel fust cōtraint de s'humilier, & abaisser la haultaineté & fierté de son cueur: ou biē, si perseueroit en son naturel, qu'il irritast si asprement la fureur du peuple encontre luy, qu'il n'y eust iamais plus moyen de le reconcilier: ce qu'ilz esperoyent deuoit plus tost aduenir qu'autrement: & ne failloyent point à bien deuiner, ueu le naturel du personnage. Car il se presenta comme pour respondre à ce qu'on luy mettoit sus, & le peuple se teut & luy donna coye audiēce pour ouir ses raisons: mais au lieu qu'il s'attendoit d'ouir des paroles humbles &

suppliantes, il commença, non seulement à user d'une franchise de parler, qui de soy mesme est odieuse, & qui sentoit plus son accusation que sa libre defense, ains avec un ton de uoix forte, & un uisage rebarbatif môstra une assurance approchante de mespris & de contemnement: dont le peuple saigrit & irrita fort asprement contre luy, monstrant bien qu'il auoit grand despit de l'ouir ainsi brauement parler, & qu'il ne le pouuoit plus souffrir. Et lors Sici-nius le plus uiolêt & le plus audacieux des Tribuns du peuple, apres auoir un peu cōferé tout bas avec ses autres compagnons, prononça tout hault en public, que Martius estoit condamné par les Tribuns à mourir: & à l'instant mesme commāda aux *Ædiles* qu'ilz le faissent au corps, & le menassent tout promptement au chasteau sur la roche Tarpeïene, pour de là le precipiter du hault en bas. Quand les *Ædiles* uindrent à mettre les mains sur Martius pour executer le commādement qui leur estoit fait, il y eut plusieurs du peuple mesme à qui le faict sembla trop uiolent & cruel: mais les nobles ne se pouuans plus contenir, ains estans par chole-re transportez hors d'eulx mesmes, accoururēt celle part avec grands cris pour le recourir, & repoulsans ceulx qui le uouloyent saisir au corps, l'enfermerent au milieu d'eulx, & y en eut quelques uns d'entre eulx qui tendirent les mains ioinctes à la multitude du peuple, en les

ſuppliant de ne uouloir pas proceder ſi rigou-
 reuſement : mais les paroles ny les cris ne ſer-
 uoyent de rien , tant le tumulte & le deſordre
 eſtoit grand, iuſques à ce que les parêts & amis
 des Tribuns, ayãs aduiſé entre eulx qu'il ſeroit
 impoſſible d'emmener Martius pour le punir
 comme il auoit eſté condâné, ſans grand meur-
 tre & grande occiſion des nobles , leur remon-
 ſtrèrent & perſuaderent, qu'ilz ne procedaſſent
 point à ceſte execution ainſi extraordinaire-
 ment & uiolentement, en faiſant mourir un tel
 perſonnage, ſans luy faire preallablement ſon
 proces, & y garder forme de iuſtice, & qu'ilz en
 remeiſſent le iugement aux uoix & ſuffrages
 du peuple. Adonc Sicinius ſ'arreſtant un peu
 ſur ſoy , demanda aux Patriciens , pour quelle
 raiſon ilz oſtoyent Martius d'entre les mains
 du peuple qui en uouloit faire la punition : &
 au contraire les Patriciens luy demanderent ,
 pour quelle raiſon ilz uouloyent eulx meſmes
 faire mourir ainſi cruellement & meſchammét
 l'un des plus hommes de bien & des plus uer-
 tueux de la uille, ſans y garder forme de iuſtice,
 ne qu'il euſt eſté iudiciellement ouy & condâ-
 né. Or bien, dit adonc Sicinins, ſil ne tient qu'à
 cela, ne prenez point là deſſus occaſion ny cou-
 leur de querelle & de ſedition ciuile à l'encon-
 tre du peuple : car il uous octroye ce que uous
 demandez, que ſon proces luy ſoit fait iudiciel-
 lement . Pourtant nous te donnons assigna-

tion, dit il, en adressant sa parole à Martius, à
 comparoïr deuant le peuple au troisieme iour
 de marché prochainement uenant, pour te iu-
 stifier, & prouuer que tu n'as point forfait: sur
 quoy le peuple par ses uoix donnera la senten-
 ce. Les nobles se cõtenterent pour lors de cest
 appointment, & leur suffit de pouuoir emme-
 ner Martius à sauueté. Ce pendant en l'espace
 de tēps qu'il y auoit iusques au troisieme iour
 de marché prochain apres, pource que le mar-
 ché se tient à Rome de neuf en neuf iours, &
 l'appelle lon pour ceste cause en Latin Nundi-
 næ, suruint la guerre cõtre les Antiates, laquel-
 le leur donna esperance de faire aller en fumee
 ceste assignatiõ, pensans que ceste guerre deust
 si longuement durer, que l'ire du peuple en se-
 roit beaucoup diminuee, ou du tout amortie,
 pour les affaires & empeschemens de la guer-
 re. Mais au contraire l'appointment fut incõ-
 tinent fait avec les Antiates, & s'en retourna le
 peuple à Rome, là ou les Patriciens s'assemble-
 rent & tindrent conseil par plusieurs fois entre
 eulx, pour aduïser comment ilz feroyēt pour
 n'abandonner point Martius, & ne donner
 point aussi d'ocasiõ une autre fois aux Tribüs
 de mutiner & soubleuer le peuple. Là Appius
 Clodius, qui estoit tenu pour l'un des plus a-
 pres aduersaires de la part populaire, leur pre-
 dit & protesta qu'ilz ruineroyent l'authorité
 du Senat, & perdroyent la chose publique,

filz enduroyent que le peuple eust loy & authorité de pouuoir iuger les nobles à la pluralité de ses uoix. Au contraire, les plus uieux & plus populaires d'entre les nobles disoyēt, que le peuple lors qu'il se ueroit la puissance & l'authorité souueraine de mort & de uie en main, ne seroit point feure ny cruel, ains plus tost doulx & humain, & que ce n'estoit point pource qu'il mesprisast les nobles ny le Senat, ains pource qu'il pensoit estre luy mesme mesprisé, qu'il uouloit auoir, comme par un reconfort & une prerogatiue d'honneur, ceste puissance de iuger : de maniere qu'au mesme instant que lon leur cederait l'authorité de iuger par leurs uoix, ilz poseroient toute ire & toute enuie de condamner. Voyant donques Marius le Senat en peine de se resouldre d'un costé pour la bonne affection, que les nobles luy portoyent, & de l'autre costé pour la crainte qu'ilz auoyent du peuple, il demãda tout hault aux Tribuns dequoy ilz entendoient le charger & accuser. Les Tribuns luy respondirent qu'ilz uouloyent monstrer comme il aspirait à la tyrannie, & qu'ilz prouueroyent comme ses actions tendoyent à usurper domination tyrannique à Rome. Marius adonc se leuant en pieds, dit qu'il s'en alloit tout de ce pas presenter uoluntairement au peuple pour se iustifier de ceste imputation, & s'il estoit trouué qu'il y eust seulement pensé, qu'il ne refu-

soit aucune sorte de punition: moyenant, dit il, que uous ne me chargiez que de cela, & que uous ne deceuiez point le Senat. Ilz prometerent qu'aussi ne feroient ilz: & soubz ces conditions fut le iugement accordé, & le peuple assemblé: là ou tout premierement les Tribuns uoulurent à toute force, comment qu'il en fust, que le peuple procedast à donner ses uoix par les lignes, & non pas par les centeines, pource qu'en ceste maniere, la multitude des pauvres disetteux, & toute telle canaille qui n'a que perdre, & qui n'a regard quelconque de l'honesteté deuant les yeux, uenoient à auoir plus de force (à cause que les uoix se comptoyent par teste) que n'auoyent les gens de bien & d'honneur, qui alloient à la guerre, & qui de leurs biens soustenoyent les charges de la chose publique: & puis laissans le crime de la tyrannie affectée, qu'ilz n'eussent sceu prouuer, ilz commencerent de rechef à mettre sus les propos que Martius auoit tenus au Senat, empeschât que lon ne distribuast du bled à uil pris au menu peuple, & suadant au contraire de leur oster le Tribunat: & pour le tiers le chargerent encore d'un nouveau crime, c'est qu'il n'auoit pas rapporté en commun le butin qu'il auoit gaigné à courir les terres des Antiates, ains l'auoit de son autorité propre distribué entre ceulx qui auoyent esté quand & luy en ceste course. Ce fut, à ce que lon dit, ce

dequoy Martius se trouua le plus estonné, pour-
ce qu'il n'eust iamais estimé que lon luy eust
deu imputer cela comme crime : au moyen de-
quoy il ne trouua point sur le champ de defen-
se à propos pour s'en iustifier, ains se meit à
louer ceulx qui auoyent esté avec luy en ceste
course : mais ceulx qui n'y auoyent point esté,
se trouuans en bien plus grand nombre, crierēt
tant, & feirent tant de bruit, qu'il ne peut estre
ouy. Finablement quand ce uint à recueillir les
uoix & suffrages des lignees, il s'en trouua
trois de plus qui le condamnerent, & fut la
peine de leur condamnation, bânissement per-
petuel : de laquelle sentence, apres qu'elle fut
prononcee, le peuple eut si grande ioye, que
iamais pour bataille qu'il eust gaignee sur ses
ennemis il n'auoit esté si aise, ny n'en auoit eu
le cueur si eleué, tant il s'en alla de ceste assem-
blee satisfait & resiouy. Mais au contraire, le
Senat en demoura fort desplaisant & fort tri-
ste, se repentant infiniement, & se passiōnant
de ce que plus tost il ne s'estoit resolu de faire
& souffrir toutes choses, que d'endurer que ce
menu peuple abusast ainsi superbement & oul-
trageusmēt de son autorité. Si n'estoit point
besoing de difference de uestemens, ny d'au-
tres marques exterieures, pour discerner un
populaire d'avec un Patricié, car on le cognoif-
soit assez au uisage: pource que celuy qui auoit
chere ioyeuse, estoit de la part du peuple: & ce-

luy qui l'auoit triste & melancolique, estoit de la part de la noblesse : excepté Martius seul, lequel ny en sa contenance, ny en son marcher, ny en son uisage, ne se monstra onques estonné ny rauulé de courage, ains entre tous les autres gentilzhommes qui se tourmentoyent de sa fortune, luy seul monstroit au dehors n'en sentir passion aucune, ny auoir compassion quelconque de soy mesme: non que ce fust par discours de raison, ou par trāquillité de meurs qu'il supportast patiemment & modereement son infortune, ains par une uehemençe de despit, & d'un appetit de uengeance, qui le transportoit si fort qu'il sembloit ne sentir pas son mal: ce que le commun estime n'estre pas douleur, combien que ce le soit pourtant: car quād ceste douleur s'enflamme par maniere de dire, alors elle se tourne en despit, & perd adonc celle bassesse lasche & langoureuse qui luy est naturelle: & uoila pourquoy celuy qui est choléré semble remuant & actif, ne plus ne moins que celuy qui a la fiebure semble chaleureux, comme si l'ame quand l'homme est en telle disposition s'enflloit, se grossissoit & s'estendoit. Et qu'il soit uray que Martius fust ainsi lors affectonné, il le monstra bien tantost apres euidement par ses effects: car retourné qu'il fut en sa maison, apres auoir dit adieu à sa mere & à sa femme, qu'il trouua plorantes & lamentantes à hauls cris, & les auoir un peu reconfortees &

tees & admonestees de porter patiemment son inconuenient, il s'en alla incontinent droit à la porte de la uille accompagné d'un grand nōbre de Patriciens qui le suyirent iusque là: & de là sans prendre chose quelcōque, & sans requerer personne de rien qui soit, s'en alla avec trois ou quatre de ses adherens seulement, & fut quelques iours en ses maisons aux champs agité ça & là de diuers pensēmēs telz que sa cholere les luy pouuoit subministrer: à la fin ne se pouuant resoudre à rien qui luy fust honorable ny profitable, ains seulement à se uenger des Romains, il proposa de leur susciter quelque grosse & lourde guerre de leurs plus proches uoifins: si pensa que le meilleur seroit de tenter premierement & solliciter les Volsques, sachant qu'ilz estoyent encore puissans & d'hommes & de biens, & qu'es pertes qu'ilz auoyent nagueres receues, ilz n'auoyēt pas tant diminué de leurs forces, comme ilz auoyent augmenté leur rancune & leur enuie de se uenger des Romains. Or y auoit il en la uille d'Antium un personnage nommé Tullus Aufidius, lequel tant pour ses biens, que pour sa prouesse, & pour la noblesse de sa maison, estoit honoré comme un Roy entre les Volsques, & scauoit biē Martius qu'il luy uouloit plus de mal qu'à nul autre des Romains, pource que souuentefois es rencontres ou ilz s'estoyent trouuez, ilz s'estoyent menacez & desfiez l'un l'autre, & cōme deux ieu-

nes hōmes courageux, qui auoyēt une ialouzie & emulation d'hōneur entre eulx, auoyent fait plusieurs brauades l'un à l'autre, de maniere que oultre la querelle publique ilz auoyent encore chargé une haine particuliere l'un contre l'autre. Ce neantmoins cōsiderant que ce Tullus estoit hōme de grand cueur, & qui desiroit plus que nul autre des Volsques, trouuer quelque moyen de rendre aux Romains la pareille des maulx & dommages qu'ilz leur auoyent faits, il fait un acte qui tesmoigne bien ce que dit un poëte ancien estre ueritable,

- » Difficile est à l'ire resister,
- » Car si elle a de quelque chose enuie,
- » Elle ozerà hardiment l'achepter
- » De son sang propre au peril de sa uie.

Aussi fait il: car il se desguisa d'une robe, & prit un accoustrement, auquel il pensa que lon ne le cognoistroit iamais pour celuy qu'il estoit, quand on le uerroit en cest habit, &, comme dit Homere d'Vlysses,

- » Ainsi entra en uille d'ennemis.

Il estoit ia sur le soir quand il y arriua, & y eut plusieurs gens qui le rencōtrèrent par les rues, mais personne ne le recogneut. Ainsi s'en alla il droit à la maison de Tullus, là ou de prim-fault il entra iusques au fouyer, & illec s'asseit sans dire mot à personne, ayant le uisage couuert & la teste affublee: dequoy ceulx de la maison furēt bien esbahis, & neantmoins ne l'oze-

rent faire leuer: car encore qu'il se cachast, si re-
 cognoissoit on ne sçay quoy de dignité en sa
 cōtenance & en son silence, & s'en allerēt dire
 à Tullus, qui souppoit, ceste estrange façon de
 faire. Tullus se leua incōtinent de table, & s'en
 allant deuers luy, luy demanda qui il estoit, &
 quelle chose il demādoit. Alors Martius se des-
 boucha, & apres auoir demouré un peu de tēps
 » sans respondre, luy dit: Si tu ne me cognois
 » point encore, Tullus, & ne crois point à me
 » uoir, que ie fois celuy que ie suis, il est force
 » que ie me decelle & me descouure moymesme.
 » Ie suis Gaius Martius, qui ay fait & à toy en par-
 » ticulier, & à tous les Volsques en general, beau-
 » coup de maulx, lesquelz ie ne puis nier pour le
 » furnō de Coriolanus que i'en porte: car ie n'ay
 » recueilly autre fruiēt, ny autre recōpense de tāt
 » de trauaux que i'ay endurez, ny de tant de dan-
 » gers ausquelz ie me suis exposé, que ce furnom,
 » lequel tesmoigne la malueillāce que uous de-
 » uez auoir encontre moy: il ne m'est demouré
 » que cela seulemēt, tout le reste m'a esté osté par
 » l'enuie & l'oultrage du peuple Romain, & par
 » la lascheté de la noblesse & des magistrats qui
 » m'ont abandoné, & m'ont souffert de chasser en
 » exil, de maniere que i'ay esté cōtraint de recou-
 » rir cōme humble suppliant à ton fouyer, non ia
 » pour sauuer & asseurer ma uie: car ie ne me fus-
 » se point hazardé de uenir icy, si i'eusse eu peur
 » de mourir: mais pour le desir que i'ay de me ué-

» ger de ceulx qui m'ont ainſi chaffé, ce que ie cõ-
 » mence deſia à faire, en mettât ma perſonne en-
 » tre tes mains . Parquoy ſi tu as cueur de te ref-
 » ſentir iamais des dõmages que t'ont fait tes en-
 » nemis, ſers toy maintenât, ie te prie, de mes ca-
 » lamitez, & fais en forte que mon aduerſité ſoit
 » la cõmune proſperité de tous les Volſques, en
 » t'afſeurant que ie feray la guerre encore mieulx
 » pour uous, que ie ne l'ay iuſques icy faitte con-
 » tre uous, d'autant que mieulx la peuuent faire
 » ceulx qui cognoiſſent les affaires des ennemis,
 » que ceulx qui n'y cognoiſſent rien. Mais ſi d'a-
 » uenture tu te rends & es las de plus têter la for-
 » tune, auſſi ſuis-ie quant à moy las de plus uiure:
 » & ne ſeroit point ſagement fait à toy, de ſauuer
 » la uie à un qui iadis t'eſtoit mortel ennemy, &
 » qui maintenant ne te ſçauroit plus de rien pro-
 » firer ne ſeruir. Tullus ayant ouy ces propos, en
 » fut merueilleuſemêt aife, & luy touchant en la
 » main, luy dit: Lieue toy, Martius, & ayes bon
 » courage: car tu nous apportes un grand bien en
 » te donnant à nous: au moyen dequoy tu dois
 » eſperer de plus grâdes choſes de la cõmunaulté
 » des Volſques. Si le feſtoya pour lors, & luy
 » ſcit bõne chere, ſans autremêt parler d'affaires:
 » mais aux iours enſuyuans puis apres, ilz cõmẽ-
 » cerêt à cõſulter entre eulx des moyens de faire
 » la guerre. De l'autre coſté, la uille de Rome e-
 » ſtoit en grande cõbuſtion pour l'inimitié d'en-
 » tre les nobles & la cõmune, meſmemêt depuis

la condánatiõ de Martius, & uenoyent tous les iours les presbtres, les deuins, & iusques aux personnes priuees, denoncer au conseil des signes & prodiges celestes, qui meritoient bien que lon y pensast, & que lon y prouueust soigneusemēt, entre lesquelz il en aduint un tel: Il y auoit un citoyen Romain, nommé Titus Lartinus, personnage de petite qualité, mais au demourant, hõme de bien, uiuant doucement, sans superstition quelconque, & moins encore de uanité & de mensonge. Cestuy eut une uision en dormāt, par laquelle il luy fut aduis que Iupiter s'apparut à luy, & luy commanda d'aller signifier au Senat, que lon auoit fait marcher deuāt sa processió un tresmauuais & tresdesplaisant danseur, & disoit que pour la premiere fois que ceste uision s'estoit representee à sa fantasie, il n'en auoit pas fait compte, & luy estāt encore retournee, il ne s'en estoit pas guerres pl⁹ soucié: mais qu'à la fin, il auoit ueu mourir deuant ses yeux un sien filz bien conditioné: & que soudainement il luy estoit pris un relaschemēt de tous ses membres, de maniere qu'il en estoit demouré tout impotent & perclus: & de faict il recita toute ceste histoire en plein Senat dessus un petit grabat, sur lequel il s'estoit fait porter à bras, & ne l'eut pas plus tost acheué de compter, qu'il sentit incontinct son corps auoir recouuré son accoustumee uigueur, de maniere qu'il se leua à l'heure mesme sur les iã-

bes, & s'en retourna de son pied, sans que personne luy aidast, en sa maison. Le Senat estonné de ceste merueille, feit diligente inquisition du fait, & trouua que c'estoit une telle chose: Il y auoit eu quelcū qui auoit liuré entre les mains d'autres esclaves, un sien serf qui l'auoit offensé, & leur auoit commadé de le passer à trauers la place en le fouettant tousiours, & puis apres le faire mourir: & ainsi cōme ilz estoÿēt apres, & qu'ilz deschiroÿent le pauvre hōme à coups de fouet, il se tournoit, remuoit & demenoit estrangement pour la douleur qu'il sentoit. La procession par cas d'aduēture suruint là dessus, & y eust plusieurs des assistés qui en furent scandalizez & marris, disans que ce spectacle la n'estoit point plaisant à uoir, ny telz gestes honnestes à rencontrer: mais pour cela on n'en feit autre chose, que blasmer & maudire celuy qui faisoit ainsi cruellement punir un sien esclauē. Car les Romains usoyent alors de grāde equité enuers leurs esclaves, pour autāt que eulx mesmes trauailloyent de leurs propres mains, & uiuoyēt avec eulx, & de mesme eulx, ce qui estoit cause qu'ilz les en traittoyēt plus humainemēt & plus familiarement: car l'une des plus grādes peines qu'ilz feissent endurer à un esclauē quād il auoit failly, estoit, qu'ilz luy faisoÿent porter sur ses espaules un bois fourchu que lon met soubz le limon d'un chariot pour le soustenir, & le faisoÿent ainsi passer par deuāt tous leurs

uoisins . Celuy qui auoit une fois souffert cela , & que lon auoit ueu en cest estat, estoit descrié en tout le uoisinage & toute la contree, de maniere que lon ne se fioit plus en luy , & l'appelloit on Furcifer , à cause que les Latins appellent ce bois la qui soustient le limon d'un chariot, Furca, c'est à dire, fourche . Quand donques Latinus eut fait au Senat le recit de la uision qui luy estoit aduenue, on fut en doute qui pouuoit estre ce mauuais & mal plaisant danseur, qui auroit marché deuant la procession, & lors il souuint à quelques uns des assistens de ce pauvre esclau que lon auoit ainsi passé fouettant à trauers la place, & que puis apres on auoit fait mourir : & ce qui leur en feit souuenir, fut l'estrange & non accoustumee maniere de sa punition . Si furent là dessus les presbtres enquis : qui tous d'un accord furent d'aduis que c'estoit celuy la, & en fut le maistre de l'esclau puny, & recommença lon de nouveau la procession & tous les autres spectacles en l'honneur de Iupiter . En quoy lon peut uoir que le Roy Numa institua sagemēt toutes autres choses appartenātes au seruice des Dieux, & mesmemēt ceste coustume qu'il establit pour rendre ses citoyens attentifz aux cerimonies de la religiō: car toute fois & quātes que les magistrats, les presbtres & ministres de la religion font quelque chose appartenante au seruice diuin & à l'honneur des Dieux, il y a tousiours

un herault qui marche deuant, criant à haulte
 20 noix, Hoc age, qui uault autant à dire comme,
 fais cecy : & leur est un cōmandement de uac-
 quer attentiuement aux choses diuines, sans y
 entremesler parmy autre action quelconque,
 ny entendre ce pendant à autre occupation,
 comme sachant bien que la pluspart de ce que
 les hommes font, c'est par une maniere de for-
 ce & de contrainte. Mais les Romains ont biē
 accoustumé de recommencer de nouveau les
 sacrifices, les processions, ieux & autres spe-
 ctacles qui se font en l'honneur des Dieux, non
 seulement pour telle occasion, ains pour autres
 aussi encore beaucoup plus legeres, comme,
 pource qu'en une procession, ou lon trainnoit
 par la uille des images des Dieux, & autres tel-
 les reliques sacrees sur des brācars, qui s'appel-
 lent *Thensa* en Latin, l'un des cheuaux qui
 les tiroient, faillit à tirer, & que d'autre part
 le chartier prit les renes de la bride avec la
 main gauche, ilz ordōnerēt que toute la pro-
 cession seroit de nouveau recommencee: &
 depuis encore de plus fresche memoire ilz re-
 feirēt par trēre fois un mesme sacrifice, pource
 qu'il leur sembla qu'il y estoit tousiours surue-
 nu quelque default ou quelque erreur & emp-
 eschement, tant estoient les Romains religi-
 eux & deuots enuers les Dieux. Au demou-
 rant, Tullus & Martius parlerent l'un de-
 uāt l'autre secretement aux principaux hom-

mes de la uille d'Antium, leur remonstrans que l'occasion se presentoit de rompre la guerre contre les Romains, ce pendant qu'ilz estoient en dissension les uns contre les autres. Ilz respondirent qu'ilz auroient honte de la rompre, attendu qu'il y auoit trefues iurees entre eulx pour l'espace de deux ans : mais en ces entrefaittes les Romains feirent un acte qui leur en donna bien grande occasion : car un iour de feste, en laquelle il se faisoit à Rome des ieux publics, pour quelque suspicion ou calumnieuse imputation, ilz feirent à son de trompe commandement aux Volsques, qu'ilz eussent à uider de la uille de Rome auant que le Soleil fust couché. Aucuns disent que ce fut par une ruse & tromperie de Martius, qui enuoya à Rome deuers les Magistrats un faulx accusateur attitré, qui leur donna à entendre que les Volsques auoyent conspiré de leur courir sus pendant qu'ilz seroyent à uoir les ieux, & aussi de mettre le feu dedans la uille. Ce cry public rendit tous les Volsques uniuersellement encore plus indignez à l'encontre des Romains qu'ilz n'estoyent au parauant, & Tullus faisant la chose plus griefue, les irrita tellement, qu'à la fin ilz enuoyerent à Rome leurs ambassadeurs sommer les Romains de leur rendre toutes les terres & toutes les uilles qu'ilz leur auoyent ostées par le passé. Les Romains ceste sommatiõ ouïe sen courroucerent, & ne respondirent

autre chose, sinon, que si les Volsques prenoyēt les armes les premiers, les Romains les poseroient les derniers. Incontinent que les ambassadeurs furent de retour, & eurent fait leur rapport de ceste responce, Tullus feit tenir une assemblée generale de toute la communaulté des Volsques, en laquelle la guerre fut arrestee & conclue contre les Romains. Quoy fait Tullus leur conseilla qu'ilz appellassent Martius à leur seruice, sans auoir deffiance de luy pour la souuenance du passé, & qu'ilz se fiasent hardiment en luy, pource qu'il leur feroit plus de profit en combatant pour eulx, qu'il ne leur auoit fait de dommage en combatant contre eulx. Ainsi fut Martius appellé, qui parla si bien deuāt toute l'assistance, qu'il en fut estimé non moins eloquent que belliqueux & uaillant, & homme qui entendoit tresbien le faict de la guerre, ayant la hardiessē conioincte avec le bon sens & le bon entendement. Si furent luy & Tullus creez Capitaines generaulx de la communaulté des Volsques, avec puissance & auctorité souueraine en la conduite de ceste guerre: & craignant que la longueur du temps qu'il falloit pour mettre sus l'armee entiere, & tout l'equippage des Volsques, ne luy ostant le moyen d'executer ce qu'il auoit deliberé, il laissa commission aux autres magistrats & principaux personages de la uille, qu'ilz assemblasent le demourant des forces, & donnassent or-

dre aux prouisions necessaires pour le camp, & luy avec les plus deliberez qui s'accorderent de le suyure promptement sans faire mōstre quelconque, entra soudainement à main armee dedans les terres des Romains, auant que lon s'en doubtaſt à Rome, tellement que les Volsques trouuerent aux champs tant de butin qu'ilz ne pouuoient pas fournir, & estoient las d'en seruer, emmener & despandre tant en leur camp: toutefois le moindre effect de ceste course, fut le gain du pillage, & le degaſt & dommage fait aux terres des Romains. Car le but principal ou il uiſoit, estoit d'augmenter tousiours de plus en plus l'inimitié & la diſſenſion qui estoit entre les nobles & le peuple: au moyen dequoy, en faisant destruire, gaſter & ruiner tout le demourant, il feit ſoigneuſement contregarder les terres & poſſeſſions des nobles, ne permettant pas que lon y feiſt aucun dommage, ne que lon y priſt choſe quelconque: qui fut cauſe qu'ilz entrerent en querelles & ſeditious, les uns contre les autres, plus grandes que iamais, reprochans les nobles aux populaires qu'ilz auoyent iniuſtemēt dechassé un ſi puiffant homme, & les populaires accusans les nobles de l'auoir ſollicité à leur uenir faire la guerre pour ſe uenger d'eulx, à ſin d'auoir ce contentement de uoir piller & bruſler leurs biens deuant leurs yeux, pendant qu'eulx ſeroient otieux ſpectateurs de leurs pertes & malheurs en toute ſeu-

reté, attendu que ceste guerre ne se faisoit pas contre eulx, & qu'ilz auoyent au dehors l'ennemy mesme qui leur gardoit leurs biens. Ayant donques Martius fait ce premier exploit, qui seruoit grandement aux Volsques pour les asseurer, & leur faire moins redoubter les Romains, il les remena à sauueté sans rien perdre en leurs maisons: puis quand toute leur puissance, qui se trouua tresgrande, & en bonne deuotion de bien faire, fut assemblee en un camp, ilz aduiserēt d'en laisser une partie au pais pour la garde d'iceluy, & avec l'autre partie aller faire la guerre aux Romains. Si donna Martius le chois à Tullus, de prendre de ces deux charges celle qui luy plairoit le plus. Tullus feit response qu'il auoit cogneu par experience, que Martius n'estoit en uaillance de rien moindre que luy, mais qu'en toutes batailles & rencontres il auoit tousiours eu meilleure fortune que luy: & pource, que son aduis estoit, qu'il prist la charge de conduire ceulx qui iroyent faire la guerre hors du pais, & que ce pendant luy demoureroit à la maison, pour prouuoir à la seureté des uilles de leur pais, & aussi pour fournir au camp, ce qui leur feroit besoing. Ainsi Martius estant plus fort que deuant, tira premierement uers la uille de Circees peulee par les Romains, laquelle se rendit uoluntairement, & pource ne souffrit aucun dommage: & de là entra sur les terres des Latins, esperant que ce

feroit là ou les Romains le uierendroyent combattre pour defendre les Latins, qui estoient leurs allicz, & qui par plusieurs fois leur auoyēt enuoyé demander du secours. Mais d'un costé le peuple estoit mal affectiōné à y aller: & d'autre costé les Consulz n'ayans plus gueres à estre en leur office, ne se uouloyent pas hazarder pour si peu de temps: de maniere que les ambassadeurs des Latins s'en retournerēt sans rien faire. Parquoy Martius adonc s'adressa aux uilles, & ayant pris à force celles des Toleriniens, Vicianiens, Pedaniens & Bolaniens, qui se uolurent defendre, il pilla les biens, & prit les personnes prisonnieres: & au cōtraire, ceulx qui uoluntairement se renegerent de son costé, il employa toute la diligence qui luy fut possible, à prouuoir qu'ilz ne peussent estre aucunemēt endommagez, non pas à son desceu mesme, en esloignant son camp le plus qu'il pouuoit de leurs terres. Mais ayant pris d'assault la uille de Boles, qui n'est qu'à six lieuës de Rome, il y gaigna une infinie quantité de butin, & feit mettre à l'espee tous les hommes qui estoient en aage de porter armes: quoy entendans les autres Volsques, qui auoyent esté ordonnez pour demourer à la defense du païs, ne se peurēt plus contenir, ains s'en coururent avec leurs armes au camp de Martius, disans qu'ilz ne recognoissoient autre superieur ny autre Capitaine que luy: au moyen dequoy sa renommee falloit.

espendant par toute l'Italie, & luy donnoit on par tout la louange & la gloire de tres excellent Capitaine, attendu que sa uertu par la transposition d'une seule personne des uns aux autres auoit apporté un si estrange & si soudain changement aux affaires. Ce pendant les choses à Rome alloient en grande confusion: car de sortir pour combattre l'ennemy, ilz n'en uouloyent ouir parler, ains estoient tous les iours bendez en picque les uns contre les autres, & n'oyoit on que seditieuses paroles des nobles contre le peuple, & du peuple contre les nobles: iusques à ce que les nouvelles uindrent, que les ennemis auoyent mis le siege deuant la uille de Lauinium, en laquelle estoient les temples & images de leurs Dieux tutelaires, & de là ou ilz estoient anciennement issus, pource que ce fut la premiere uille qu'Æneas à son arriuee fonda en Italie. Si prit adonc soudainement au peuple une merueilleuse mutation de uolunté, & encore plus estrange & plus extraordinaire aux nobles, pource que le peuple uoluit que lon abolist & cassast la condamnation de Martius, & que lon le rappellast: surquoy le Senat estant assemblé, fut de contraire opinion, & empescha qu'il ne se feist, soit ou par une opiniastreeté de se uouloir formaliser contre tout ce que le peuple desiroit, ou pource qu'il ne uolust point que ce personnage retournaist par la grace & le benefice du peuple,

ou bien pource que ia ilz fussent à bon esciant indignez & courroucez contre luy, à cause que n'ayant pas esté offensé de tous, il couroit neâtmoins sus à tous, & se monstroit par effect ennemy tout oultre de son país, combien que la meilleure & plus saine partie d'iceluy fust bien desplaisante & marrie du tort qu'on luy auoit fait, & s'en teinst pour oultragee comme luy. Ceste resolution du Senat éstât publicee, le peuple se trouua lié, pource qu'il ne pouuoit rien autoriser ny confirmer par ses uoix, qui n'eust esté premierement proposé & digeré au Senat. Mais Martius en ayant entendu la nouvelle, fut encore bien plus irrité & plus indigné que parauant, tellement qu'il leua incontinent son siége de deuant la uille de Lauinium, & tirant droit à celle de Rome, en alla loger à deux lieues & demie pres, en un lieu qui s'appelle les Fosses Chlælienes. Ces approches de si pres meirent la uille de Rome en grand trouble & en grand effroy : mais toutefois elles appaiserent aussi pour lors les seditions & dissensions qui estoient entre les parties: car il n'y eut plus personne, ny des magistrats, ny du Senat, qui ozaist contredire à l'opinion du peuple, touchant le rappel de Martius, ains uoyans les femmes effroyees courir ça & là par la uille, les temples des Dieux pleins de uieilles gés qui ploroyēt à chauldes larmes en faisant leurs prieres & oraisons, & brief qu'il n'y auoit en toute la uille celuy

qui eust le sens rassis , ny la hardieffe de prou-
 uoir à chose aucune salutaire , alors ilz furent
 tous d'aduis que le peuple auoit bonne raison
 de uouloir rappeler & raccointer Martius, &
 que le Senat au contraire faisoit une grande
 faulte d'entrer en courroux & en cholere con-
 tre luy , alors qu'il estoit plus tost faison d'en
 sortir. Ainsi furent ilz tous unanimement d'ad-
 uis, que lon enuoyast ambassadeurs deuers luy,
 pour luy faire entendre, comme ses citoyens le
 rappelloyent & le restituoyent en ses biens , &
 le supplioyent de les deliurer de ceste guerre .
 Ceulx qui y furent enuoyez de la part du Senat,
 estoient familiers amis de Martius, lesquelz
 s'attendoÿēt bien d'auoir, pour le moins à leur
 arriuee, un doulx & gracieux recueil de luy ,
 comme de leur parent & familier amy: mais ilz
 n'y trouuerent rien de semblable, ains furent
 menez à trauers le camp iusques au lieu ou il e-
 stoit assis dedans sa chaire , avec une grandeur
 & une grauité insupportable , ayant les princi-
 paux hommes des Volsques autour de soy : si
 leur commanda de dire tout hault la cause de
 leur uenue: ce qu'ilz feirent es plus honestes &
 plus gracieuses paroles qu'il leur fut possible ,
 avec le geste & la contenance de mesme . Puis
 quand ilz eurent acheué de parler, il leur respō-
 dit aigrement & en cholere, quant à ce qui tou-
 choit au tort que lon luy auoit fait : & comme
 Capitaine general des Volsques, leur dit, qu'ilz
 eussent

eussent à rendre & restituer aux Volsques, toutes les uilles & les terres qui leur auoyent esté ostées es guerres precedentes, & au demourât, leur decerner pareil honneur & droit de bourgeoisie à Rome, comme ilz l'auoyent ottroyé aux Latins : pource qu'il n'y auoit autre moyen asseuré pour sortir de la guerre à faict, sinon avec conditions egales & raisonnables, & leur donna terme pour en deliberer, & s'en resouldre, l'espace de trente iours. Les ambassadeurs s'en retournerent avec ceste responce : & luy tout aussi tost retira son armee hors du territoire de Rome. Ce qui fut la premiere charge que luy meirent sus ceulx d'entre les Volsques, qui portoyent enuie à sa gloire, & ne pouuoÿt supporter son autorité : entre lesquelz Tullus mesmes en fut un, non qu'il eust particulieremēt receu aucun tort ny desplaisir de Martius, ains seulement estant picqué de ceste passion humaine, qu'il luy desplaisoit de uoir sa reputation de tout poinct obscurcie par celle de Martius, & de se uoir en moins de compte enuers les Volsques qu'il n'auoit esté au parauant, attendu qu'ilz auoyent en si grande estime Martius, qu'ilz pensoÿent en luy seul auoir tout, & uouloyent que leurs autres gouuerneurs & Capitaines se contentassent du credit & de l'autorité qu'il luy plairoit leur departir. De là donques commencerent à soudre les premieres murmuratiōs & accusations secrettes à l'en-

contre de luy: pource que les autres particuliers Capitaines se bendans ensemble contre luy, s'en courrouceoyent, & alloient disans, que ce deslogement estoit une urayc trahison, non point de uilles, de places, ny d'armees, ains du temps & de l'occasion, qui estoit perte de plus grande consequence, pource que c'estoit ordinairement ce qui faisoit ou perdre ou conseruer cela & toute autre chose. Ayant donné trente iours de surseance d'armes à l'ennemy, expressement pource que la guerre n'a point accoustumé de prendre grandes mutations en moindre espace de tēps que celuy la, toutefois Martius ne laissa pas couler ce temps la sans rien faire, ains alla ce pendant gaster & destruire les terres des allies des ennemis, ou il prit sept uilles grandes & bien peuples, sans que les Romains osassent iamais se mettre aux champs pour les aller secourir: tant estoient leurs cueurs espris de deffiance, & mal affectionnez à la guerre: de maniere qu'ilz ressembloyent proprement aux corps qui sont demourez perclus de leurs membres, & qui par quelque paralysie ont perdu tout mouuement & tout sentiment. Parquoy le temps de la trefue expiré, Martius estant retourné sur leurs terres avec toute sa puissance, ilz renuoyèrent de rechef une autre ambassade uers luy, le supplier de uouloir appaiser son courroux & emmener les Volsques hors de leurs terres, pour puis apres à loisir mettre en

auant telz partis qu'il ueroit estre expedients pour les uns & pour les autres : à cause que les Romains n'estoyent pas pour iamais ceder ny fleschir par crainte : mais sil luy sembloit que les Volsques eussent raison de leur demander quelques articles & conditions honestes, que tout ce qu'ilz demanderoient de raisonnable, leur seroit concedé par les Romains, qui d'eulx mesmes se soubmettoient à la raison, moyennant que premier ilz posassent les armes. A cela respondit Martius, que comme Capitaine general des Volsques il ne leur repliqueroit riē, mais que comme encore citoyen Romain il leur conseilloit de rabaisser leur orgueil, & se soubmettre à la raison silz estoyent sages, & que dedans trois iours ilz retournassent avec les articles accordez qu'il leur auoit la premiere fois proposez, autrement qu'il ne leur donnoit plus faufconduit ny seuretē de retourner une autre fois en son camp avec paroles inutiles & uaines. Quand les ambassadeurs furent de retour à Rome, le Senat ayant ouy leur rapport ietta l'ancre sacree, ainsi que lon dit en commun prouerbe, comme estant la chose publique en extreme peril de tourmente: car il ordonna que tout tant qu'il y auoit de presbtres, religieux, ministres des Dieux & gardes des choses sacrees, & tous les deuins, qui par l'observation du uol des oiseaux predisent les choses à aduenir, qui est une sorte de prophetie & de diuina-

tion propre de toute ancienneté aux Romains, allassent deuers Martius estans reueſtus tout en la sorte qu'ilz ſouloyent eſtre quand ilz faiſoyent leurs ſacrifices, pour le prier qu'il feiſt premieremēt ceſſer la guerre, & puis apres qu'il parlaſt à ſes citoyens de faire appointemēt avec les Volſques. Martius les laiſſa bien entrer dedans ſon camp, mais pour cela ne leur conceda il rien dauantage, & ne leur feit ny ne leur dit rien plus gracieuſement qu'il auoit fait aux premiers, ains ſeulement qu'ilz aduiſaſſent l'un des deux, ou qu'ilz acceptaſſent la paix ſoubs les conditions qu'il auoit premieremēt propoſees, ou qu'ilz receuſſent la guerre. Quand ces gens de religion furent de retour, il fut arreſté au conſeil, que lon ne ſortiroit point de la uille, & que lon entendroit ſeulement à defendre les murailles & repouſer les ennemis, filz les uenoyent aſſaillir, en remettant toute leur eſperance au temps & aux accidens inopinez de la fortune, pource que d'eulx meſmes ilz ne ſçauoyent par quel bout commencer pour faire choſe qui leur fuſt ſalutaire, ains eſtoit toute la uille pleine de confuſion, de frayeur & de mauuiſe opinion de l'aduenir, iuſques à ce qu'il ſe feit un cas ſemblable à ce que dit Homere en pluſieurs lieux, que peu de gens neantmoins ueulent croire: car en choſes grandes, eſtranges & hors de l'uſage commun, il dit & exclame ſouuent de telz propos :

» Pallas Deesse aux beaux yeux immortelle
 » Luy meit au cueur une pensee telle .

Et en un autre passage ,

» Mais quelque Dieu de ce les retira ,
 » Qui d'un tel bruit la commune inspira .

» Et en un autre lieu ,

» Il s'en estoit de luy mesme aduisé ,

» Ou quelque Dieu luy auoit deuisé .

Plusieurs y en a qui mesprisent ces passages de Homere, comme si son intention fust d'attribuer au discours de la raison humaine, & à l'election de l'arbitre d'un chacun des choses impossibles, & des fables ou il n'y a point de uerisimilitude : ce qu'il ne fait pas : ains fait dependre de nostre liberal arbitre les choses uraysemblables, & qui ordinairement aduiennent par discours de raison : car il dit bien souuent de telles parolés,

» Je l'ay pensé en mon cueur magnanime .

Et en un autre lieu ,

» L'ayant ouy Achilles ainsi dire ,

» En eut le cueur d'aspre douleur & d'ire

» En son uelu estomac tout bruslant ,

» Et entre deux diuers uouloirs branlant .

Et de rechef en un autre endroit ,

» Elle ne sceut mouuoir par son langage

» Bellerophon, tant fut honeste & sage .

Mais es choses estranges & extraordinaires, ou il y a besoing de quelque inspiration & instigation diuine, encore ne fait il pas que Dieu oste

le franc arbitre à l'homme, ains plus tost qu'il l'incite, non pas qu'il engendre en nous la uolunté, mais bien quelque imagination qui tire & poulse la uolunté: ainsi ne rend il pas par ceste imagination, qu'il offre à la uolunté, l'operation non uoluntaire ny forcee, ains plus tost donne commencement à la uolunté, & luy adiouste l'assurance & la bonne esperance. Car ou il fault dire totalemēt que les Dieux n'ont part quelconque aux causes mouuantes & aux principes des operations humaines, ou confesser qu'il n'y a autre moyen, par lequel ilz puissent aider aux hommes, ny cooperer avec eulx: car il est bien certain qu'ilz ne manient pas noz corps, ny ne remuent pas noz mains & noz pieds, ainsi que le besoing le requiert à chaque fois qu'il fault besongner, ains excitent la partie actiue de nostre ame & nostre liberal arbitre, ou au contraire le destournent & le retiennent par quelques imaginations & apprehensions qu'ilz nous inspirent. Or alloÿēt lors les Dames Romaines par tous les temples des Dieux faire leurs prieres & oraisons: mais la plus grande partie & les plus notables estoÿent continuellement à l'entour de l'autel de Iupiter Capitolin, entre lesquelles nommement se trouua Valeria sœur de Publicola, celuy qui feirant de seruices aux Romains, & en paix, & en guerre: il estoit desia mort, quant à luy, quelque temps au parauant, ainsi comme nous auons

escrit en sa uie: mais Valeria sa sœur estoit grandement honoree & estimee dedans Rome, se gouuernant si sagement qu'elle ne faisoit point de honte à la maison dont elle estoit issue: si luy prit soudainement une emotion de uolunté pareille à celle dont nous parlions nagueres, & s'aduisa, non sans quelque inspiration diuine, comme ie croy, d'un bon expedient: car elle se leua, & feit aussi leuer les autres Dames, & s'en alla avec elles droit à la maison de Volumnia mere de Martius, ou elle entra dedans, & la trouua avec la femme de son filz assise, & tenant en son giron les petits enfans de Martius. S'estans donques toutes ces Dames arrangees en rond à l'entour d'elles, Valeria commença la premiere à parler en ceste maniere:

22 Nous uenons deuers uous, ô Volumnia & Vergilia, Dames uers autres Dames,

23 sans ordonnance du Senat, ny commandement d'aucun magistrat, ains par inspiration,

24 à mon aduis, de quelque Dieu, lequel ayant regardé en pitié noz prieres, nous a incitees à

25 nous en uenir deuers uous, pour uous requerer de faire une chose qui sera salutaire à

26 nous & à tous les autres citoyens de ceste uille, mais à uous, si uous me uoulez croire,

27 apportera une gloire plus grande & plus illustre que celle que les filles des Sabins acquirent iadis,

28 quand au lieu de guerre mortelle elles meurent la paix entre leurs peres & leurs maris.

» Venez uous-en donques avec nous toutes en-
» semble deuers Martius, pour le supplier qu'il ait
» pitié de nous, & aussi pour luy porter tesmoi-
» gnage de uerité, comme uous deuez en faueur
» de uoz citoyés, que combien qu'ilz ayent souf-
» fert beaucoup de maux & de dommages par
» luy, iamais toutefois ne uous en ont fait, ne pé-
» sé de uous en faire par uengeance pire traite-
» ment, ains uous rendent saines & sauues entre
» ses mains, encore qu'ilz n'en deussent auoir en
» recompése, de rien plus gracieuse composition
» de luy. Ces paroles de Valeria furent approu-
» uées & accompagnées par une commune cla-
» meur de toutes les autres Dames: & adonc Vo-
» lumnia luy respondit: Dames, nous auons part
» comme uous aux publiques miseres & calami-
» tez de nostre país, & oultre cela sommes enco-
» re surchargees de ce malheur propre, que nous
» auons perdu la gloire & la uertu de Martius,
» uoyant maintenant sa personne enuirónnée des
» armes de noz ennemis, plus tost pour s'asseurer
» de luy que pour le garder: mais encore le plus
» grief de noz malheurs nous est de uoir nostre
» país reduit à telz termes, que toute son esperá-
» ce gise & consiste en nous: pour autát que ie ne
» scay quel compte il fera de nous, puis qu'il n'en
» fait aucun de sa chose publique & de son país,
» qu'il a par cy deuant tousiours eu plus cher que
» sa mere, sa femme, ny ses enfans. Ce neátmoins
» seruez uous de nous en tout ce q' uous uoudrez,

22 & nous menez à luy: car si nous ne pouuõs fai-
 23 re autre chose, à tout le moins pouuons nous
 24 bien mourir & rendre l'esprit en le suppliant
 25 pour le bien de nostre país. Cela dit, elle prit sa
 belle fille & ses enfans quand & elle, & avec
 toutes les autres Dames Romaines s'en alla
 droit au cãp des Volsques, lesquelz eurent eulx
 mesmes une compassion meslee de reuerence
 quãd ilz la ueirent, de maniere qu'il n'y eut per-
 sonne d'eulx qui luy ozaft rien dire. Or estoit
 lors Martius assis en son tribunal avec les mar-
 ques de souuerain Capitaine, & de tout loing
 qu'il apperceut uenir des femmes, s'esmerueilla
 que ce pouuoit estre: mais peu apres recognois-
 sant sa femme^a qui marchoit la premiere, il
 uoulut du cõmencement perseuerer en son ob-
 stinee & inflexible rigueur: mais à la fin uaincu
 de l'affection naturelle, & estant tout eueu de
 les uoir, il ne peut auoir le cueur si dur que de
 les attendre en son siege, ains en descẽdant plus
 uiste que le pas leur alla au deuant, & baïsa sa
 mere la premiere & la teint assez longuement
 embrassee, puis sa femme & ses petits enfans, ne
 se pouuãt plus tenir que les chauldes larmes ne
 luy uinssent aux yeux, ny se garder de leur fai-
 re caresses, ains se laissant aller à l'affection du
 sang, ne plus ne moins qu'à la force d'un impe-
 tueux torrèt. Mais apres qu'il leur eut assez fait
 d'amiable recueil, & qu'il apperceut que sa me-
 re Volumnia uouloit cõmencer à luy parler, il

a Aucuns
 uieux ex-
 plaires li-
 sèt, uiréga
 sa mere.

appella les principaux du conseil des Volsques,
 pour ouir ce qu'elle proposeroit, puis elle parla
 » en ceste maniere : Tu peux assez cognoistre de
 » toy mesme, mon filz, encore que nous ne t'en
 » distions rien, à uoir noz accoustremens, & l'e-
 » stat auquel sont noz pauures corps, quelle a
 » esté nostre uie en la maison depuis que tu en
 » es dehors: mais considere encore maintenant,
 » combié plus malheureuses & plus infortunes
 » nous sommes icy uenues que toutes les fem-
 » mes du monde, attendu que ce qui est à toutes
 » les autres le plus doux à uoir, la fortune nous
 » l'a rendu le plus effroyable, faisant uoir à moy
 » mon filz, & à celle cy son mary, assiegeant les
 » murailles de son propre país, tellement que ce
 » qui est à toutes autres le souuerain recófort en
 » leurs aduersitez, de prier & inuoquer les Dieux
 » à leurs secours: c'est ce qui nous met en plus
 » grãde perplexité, pource que nous ne leur sçau-
 » rions demãder en noz prieres uictoire à nostre
 » país & preservation de ta uie tout ensemble,
 » ains toutes les plus griefues maledictions que
 » sçauroit imaginer cõtre nous un ennemy, sont
 » necessairement encloses en noz oraisons, pour-
 » ce qu'il est force à ta femme & à tes enfans
 » qu'ilz soyét priuez de l'un des deux, ou de toy,
 » ou de leur país: car quant à moy, ie ne suis pas
 » deliberee d'attendre que la fortune, moy uiuã-
 » te, decide l'issue de ceste guerre: car si ie ne te
 » puis persuader que tu uueilles plus tost biẽ fai-

» re à toutes les deux parties , que d'en ruiner &
» destruire l'une, en preferant amitié & cōcorde
» aux miseres & calamitez de la guerre , ie ueux
» bien que tu saches, & le tienes pour tout assu-
» ré, que tu n'iras iamais assaillir ny combatre tō
» païs , que premierement tu ne passes par dessus
» le corps de celle qui t'a mis en ce monde , & ne
» doy point differer iusques à uoir le iour, ou
» que mō filz prisonnier soit mené en triumphe
» par ses citoyens , ou que luy mesme triumphe
» de son païs. Or si ainsi estoit que ie te requisse
» de sauuer ton païs en destruisant les Volsques,
» ce te seroit certainement une deliberatiō trop
» malaisée à resoudre: car comme il n'est point li-
» cite de ruiner son païs , aussi n'est il point iuste
» de trahir ceulx qui se sont fiez en toy . Mais ce
» que ie te demande est une deliurâce de maulx ,
» laquelle est egalement profitable & salutaire à
» l'un & à l'autre peuple , mais plus honorable
» aux Volsques, pourcé qu'il semblera , qu'ayans
» la uictoire en la main, ilz nous auront de grace
» donné deux souuerains biens , la paix & l'ami-
» tié , encore qu'ilz n'en prennent pas moins pour
» eulx, duquel bien tu seras principal autheur fil
» se fait, & fil ne se fait , tu en auras seul le repro-
» che & le blasme total enuers l'une & l'autre
» des parties: ainsi estât l'issue de la guerre incer-
» taine , cela neantmoins est bien tout certain ,
» que si tu en demoures uainqueur, il t'en restera
» ce profit que tu en seras estimé la peste & la

» ruine de ton païs:& si tu es uaincu, on dira que
 » pour un appetit de uenger tes propres iniures,
 » tu auras esté cause de tresgriefues calamitez à
 » ceulx qui t'auoyent humainement & amiable-
 » ment recueilly. Martius escouta ces paroles de
 » Volumnia sa mere sans l'interrompre: & apres
 » qu'elle eut acheué de dire demoura lon temps
 » tout picqué, sans luy rien respondre. Parquoy
 » elle reprit la parole, & recommécea à luy dire:
 » Que ne me respôs tu, mon filz?estimes tu qu'il
 » soit licite de conceder tout à son ire & à son ap-
 » petit de uengeance, & non honeste de conde-
 » scendre & incliner aux prieres de sa mere, en si
 » grandes choses?& cuides tu qu'il soit conuen-
 » ble à un grád personnage, se souuenir des torts
 » qu'on luy a faits, & des iniures passees, & que
 » ce ne soit point acte d'hôme de bien & de grád
 » cueur, recognoistre les bienfaicts que reçouyêt
 » les enfans de leurs peres & meres, en leur por-
 » tant honneur & reuerence? Si n'y a il homme
 » en ce monde qui deust mieux obseruer tous les
 » poincts de gratitude que toy, ueu que tu pour-
 » suis si asprement une ingratitude:& si y a dauã-
 » tage, que tu as ia fait payer à ton païs de gran-
 » des amendes pour les torts que lon t'y à faits,
 » & n'as encore fait aucune recognoissance à ta
 » mere: pourtant seroit il plus que honeste, que
 » sans autre contrainte i'impetrasse de toy une
 » requeste si iuste & si raisonnable:mais puis que
 » par raison ie ne le te puis persuader, à quel be-

» soing espargne-ie plus & differe-ie la derniere
 » esperance. En disant ces paroles elle se ietta el-
 . le mesme, avec sa femme & ses enfans, à ses
 pieds. Ce que Martius ne pouuant supporter,
 » la releua tout aussi tost en s'escriant, O Mere,
 » que m'as tu fait? & en luy serrât estroittement
 » la main droite: Ha, dit il, mere, tu as uaincu une
 » uictoire heureuse pour ton pais, mais bien ma-
 » lheureuse & mortelle pour ton filz: car ie m'en
 » reuois uaincu par toy seule. Ces paroles dites
 en public, il parla un peu à part à sa mere, & à sa
 femme, & puis les laissa retourner en la uille:
 car ainsi l'en prierēt elles: & si tost que la nuict
 fut passée, le lendemain au matin remena les
 Volsques en leurs maisons, n'estans pas tous
 d'une mesme opiniō, ny d'une mesme affectiō.
 Car les uns le blasmoient & luy & ce qu'il a-
 uoit fait: les autres, qui estoient bien contens
 que lon feist appointemēt, disoyēt que ny l'un
 ny l'autre ne meritoit d'estre blasme ny repris:
 les autres, encore qu'ilz fussent mal contens de
 ce qu'il auoit fait, ne l'en estimoyent pas neant-
 moins meschāt pour cela, ains alloient disans,
 qu'il meritoit qu'on luy pardonlast, fil auoit
 fleschy à une si uiolente cōtrainte: tant y a que
 personne ne contredit au departement, ains
 suyurent tous son commandement, plus pour
 la reuerence de sa uertu, que pour la crainte de
 son autorité. Mais le peuple de Rome donna
 bien incontinent à cognoistre en quelle crain-

te & en quel dāger de ceste guerre il auoit esté, quand il en fut deliuré: car si tost que ceulx qui estoient sur les murailles de la uille apperceurent les Volsques desloger, il n'y eut temple en toute la uille qui ne fust soudainement ouuert & plein d'hommes portans des chapeaux de fleurs sur leurs testes & sacrifians aux Dieux, ne plus ne moins que lon faisoit à la nouvelle de quelque grande uictoire gaignee: & se demonstra encore plus clairement ceste resiouissance publique, par les caresses & l'honneur que le Senat & tout le peuple ensemble fait aux Dames: car il n'y auoit celuy qui ne dist hault & clair, & qui ne creust fermement qu'elles seules estoient cause du salut & deliurance de la uille: à l'occasion dequoy, le Senat ordōna aux magistrats, qu'ilz eussent à leur ottroyer & cōceder tout ce qu'elles leur requerroient, pour leur gratifier & les honorer: & elles ne demanderent autre chose sinon que lon feist edifier un temple de Fortune feminine, pour l'edification duquel encore offrirent elles de cōtribuer l'argent qu'il cousteroit, pourueu que la chose publique prist sur soy la charge des sacrifices, cerimonies & autres seruices qui appartiennent à l'honneur des Dieux: toutefois le Senat louāt leur bonne uolūtē, ordonna que le temple & l'image fussent faits aux despens du public. Ce nonobstant, encore contribuerent elles de l'argent, duquel fut faite une seconde image de la

Fortune, laquelle les Romains disent auoir parlé, ainsi comme lon la dedioit au temple, & que lon la posoit en sa place, & si afferment qu'elle
30 prononça de semblables paroles: Dames, uous
30 m'auiez deuotemēt dōnee: &, qui plus est, qu'elle les prononça deux fois: nous uoulans faire croire des choses qui ne furent iamais, ou pour le moins, qui sont bien difficiles à croire: car de uoir des images qui semblent s'uer, ou plorer, ou rendre quelque humeur teinte cōme sang, ce n'est pas chose impossible, pour ce que le bois & la pierre ordinairement reçoient une certaine moiteur, dont il s'engendre de l'humeur, & si rēdent d'eulx mesmes, ou bien prennent de l'air plusieurs sortes de teintures & de couleurs, par lesquelz signes il n'est pas inconuenient que les Dieux n'aduertissent aucunes fois les hommes de ce qui est à aduenir: & si est bien possible que ces images & statues iettent aucunes fois quelque son semblable à un soupir ou à un gémissement, quād au profond du dedās il se fait quelque rupture ou séparatiō uiolente des parties continues: mais que ce soit une uoix articulée ny une parole exprimée & exquisement formée en un corps qui n'a point d'ame, il est du tout impossible, attēdu q̄ l'ame ny Dieu mesme ne sçauoyēt distinctemēt parler ny deuiser sans un corps accomodé des outils & organes, & des parties necessaires à former & exprimer la parole. Mais là ou l'histoire

nous force d'en croire quelque chose par le recit de plusieurs graues tesmoins dignes de foy, il faut dire que c'est quelque passion differente des cinq sens de nature, laquelle engédree en la partie imaginatiue de l'entendement tire à foy l'opiniõ, ne pl⁹ ne moins qu'en dormât, bié souuēt il nous semble que nous oyons ce que nous n'oyons pas, & que nous uoyons ce que nous ne uoyons pas. Toutefois ceulx qui par une uehemençe d'amour & de deuotion enuers les Dieux sont oultre mesure affectiõnez & aheurtez à cela, de sorte qu'ilz ne peuuent rien refuser ne reietter de ce qui se dit touchant telles choses, ilz ont un grand argument pour se confirmer en ceste creance, c'est la puissance de Dieu, qui est admirable, & n'a aucune semblance ny proportion à la nostre, ains est en tout differente, & quant à la nature, quant au mouuement, quant à l'artifice, & quant à la force: & pourtant fil fait aucune chose qui nous soit impossible, ou qu'il en produise & inuēte qui trāscēdent l'entendement des hõmes, il ne le fault pourtāt trouuer estrāge: car fil est es autres choses different de nous, il est encore plus esloigné & plus diuers en ses œuures qu'en tout le demourant: mais la plus part des faiçts de Dieu, comme dit Heraclitus, à faulte de foy demeurent incogneuz. Au demourant, Martius estant retourné de son uoyage en la uille d'Antium, Tullus qui le haïssoit, & ne le pouuoit plus en-

durer

durer pour la crainte qu'il auoit de son authorité, chercha les moyens de le faire mourir, pensant que fil y failloit à celle fois, il ne recouureroit iamais une pareille occasiō. Parquoy ayāt attiré & suscitē plusieurs autres cōiurez avec luy, il requit que Martius eust à se deposer de son estat pour rendre compte à la cōmunaulté des Volsques de son gouuernement & administration. Martius craignant de soy trouuer hōme priuē soubz Tullus estant Capitaine general, oultre ce que sans cela, il auoit plus grande authorité que nul autre entre les siens, il respōdit qu'il se demettrait uoluntiers de la charge, & la remettrait entre les mains des seigneurs Volsques, si tous le luy commādoient, comme par le cōmandemēt de tous il l'auoit acceptee: & au reste, qu'il ne refusoit point de rendre cōpte & raison de son gouuernement des l'heure mesme, à ceulx de la uille qui y uoudroyent assister & l'ouir. Le peuple fut assemblé là dessus en conseil, en laquelle assemblee il y eut quelques orateurs appostez qui irriterent & mutinerent la commune à l'encōtre de luy, & quād ilz eurent acheuē de parler, Martius se leua pour leur respondre: & combien que la cōmune mutinee menast un fort grand bruit, toutefois quand elle le ueit, pour la reuerēce qu'elle portoit à sa uertu, elle l'appaisa, & luy donna paisible audience pour à loisir deduire ses iustifications, & les plus gens de bien des Antiates, &

qui plus s'esioiſſoyent de la paix, monſtroyent à leur contenance qu'ilz l'eſcouteroyent uou-
luntiers, & iugeroyent ſelon leur conſcience: à
l'occafion dequoy, Tullus eut peur ſ'il le laiſſoit
parler, qu'il ne prouuaſt au peuple ſon innocē-
ce, pource qu'il eſtoit entre autres choſes hom-
me trefeloquent, avec ce que les premiers bons
ſeruices qu'il auoit faits à la communaulté des
Volfques, luy apportoyent plus de faueur, que
les dernieres imputations ne luy cauſoyent de
défaueur: & qui plus eſt, cela meſme que lō luy
tournoit à crime, eſtoit teſmoignage de la gra-
ce qu'ilz luy deuoyent, pource qu'ilz n'euffent
point eſtimé qu'il leur euſt fait tort en ce qu'ilz
n'auoyent pas pris la uille de Rome, ſilz n'euf-
ſent eſté bien pres de la prédre par le moyen de
ſa cōduite. Pour ces raiſons eſtima Tullus qu'il
ne falloit plus dilayer ſō entrepriſe, ny ſ'amuſer
à mutiner & ſuſciter la cōmune contre luy, ains
ſe prirent les plus mutins des coniuerez à crier,
qu'il ne le falloit point ouir, ny permettre que
un traiftre uſurpaſt ainſi dominatiō tyrānique
ſur la ligue des Volfques, ne ſe uoulant pas de-
mettre de ſon eſtat & autorité: & en diſant tel-
les paroles ſe ruerent tous à un coup ſur luy, &
le tuerent ſur la place, ſans que perſonne des af-
ſiſtens ſ'entremeiſt de le ſecourir. Mais toute-
fois que ce meurtre n'ait point eſté fait du ſceu
& conſentement de la plus grande partie des
Volfques, il appert par ce que de toutes les uil-

Les des Volsques accoururent gens pour honorer le corps, lequel ilz inhumerēt magnifiquement, & ornerent sa sepulture de force harnois & force despouilles, comme celle d'un uailât hōme & d'un grād Capitaine. Les Romains, sa mort ouye, n'en feirēt autre demonstration ny d'honneur ny de courroux, sinō qu'ilz permirent aux Dames ce qu'elles leur requirent, de pouuoir porter le dueil de sa mort l'espace de dix mois, autant comme elles auoyēt accoustumé de le porter pour la mort de leurs peres, de leurs freres & de leurs maris, pource que c'estoit le plus long terme de porter dueil que le Roy Numa Pompilius eust determiné, ainsi comme nous auons escrit en sa uie. Au demourant, les affaires des Volsques tantost apres le deces de Martius feirent fort regretter sa presence: car premierement ilz entrerent en debat contre les Eques, qui estoient leurs allies & confederez, touchant la precedence: & proceda ce different entre eulx iusques à s'entrebattre & se tuer les uns les autres: & puis ilz futēt desfaits par les Romains en une grosse bataille, en laquelle Tullus demoura mort sur le champ, & la fleur de toute leur puissance fut aussi mise à l'espee, de maniere qu'ilz furent contraints d'accepter de treshonteuses conditions de paix, en se rendans subieçts aux uaincueurs, & promettans faire tout ce qu'ilz leur commanderoyent.

LA COMPARAISON D'ALCIBIADES AVEC M. CORIOLANVS.



RAYANS exposé les faictz de l'un & de l'autre, au moins ceulx qui nous ont semblé plus dignes d'estre mis par memoire, maintenant pouuons nous uoir que, quant aux armes, l'un n'a pas eu fort grand auantage sur l'autre : car tous deux en leurs charges ont egalelement fait preuue non seulement de hardiesse & de prouesse de leurs personnes, mais aussi de bõs sens, de ruse & de finesse: si ce n'est que lon uueille dire, qu'Alcibiades a esté plus grád & plus excellent Capitaine, d'autant qu'il a plus de fois combatu ses ennemis & par mer & par terre, & tousiours uaincu. Car au demourant, ilz ont bien cela de semblable, que là ou ilz ont esté tous deux presens, & qu'ilz ont eu loy & autorité de commander, ilz ont notoirement tousiours fait prosperer les affaires de ceulx de leur party, & plus euidement encore les ont fait empirer, quand ilz se sont tournez du party contraire. Mais quant au faict de gouvernement, les gens de bien & d'hõneur haïssoyent la maniere de proceder, dont uisoit Alcibiades au maniement des affaires de la chose publique, cõme estant pleine d'afferterie, de dissolution & de flatterie, pource qu'il ne uisoit qu'à gagner par tou-

tes uoyes la grace & la bienueillance du menu populaire : auffi de l'autre costé, le peuple Romain auoit en haine celle de Coriolanus comme trop arrogante, trop superbe & tyrannique, de sorte que ny l'une ny l'autre ne fait à louer. Toutefois encore est moins reprehensible celuy qui cherche à gratifier & complaire au peuple, que celuy qui le mesprise, l'oultrage & l'iniurie, de peur qu'il ne semble qu'il le uueille flatter, pour en acquerir plus d'autorité : car il est bien mal seant de flatter le commun peuple pour uenir en credit : mais auffi, acquerir autorité & credit par se faire craindre, par endōmager & forcer autruy, oultre ce qu'il n'est pas honeste, il est iniuste. Bien est il certain, que Martius a tousiours esté tenu pour homme rond de sa nature, simple, sans fard ny artifice quelconque : & Alcibiades, au cōtraire, fin, affecté & peu ueritable : mais ce que lon blasme le plus en luy quant à cela, fut la malice & tromperie, par laquelle il abusa les ambassadeurs des Lacedæmoniens, & empescha que la paix ne se feist, ainsi que Thucydides l'a escrit : toutefois cest acte, encore que promptement il ait reietté la uille d'Athenes en guerre, au moins la rédit il plus puissante & plus redoutable à ses ennemis par l'adionction de l'alliance des Mantiniens & des Argiens, qui par l'entremise d'Alcibiades s'allierent & entrèrent en ligue avec les Atheniens. Et quant à Martius,

l'historié Dionysius a aussi escrit, que ce fut par dol & tromperie qu'il ietta les Romains en guerre contre les Volsques, ayant malicieusement & à tort fait souspeçonner & calumnier les Volsques, qui estoient allez à Rome pour y uoir l'esbattement des ieux : mais la cause pour laquelle il le fait, rend l'acte encore plus mauuais : car ce ne fut point par une diffension ciuile, ny par une ialousie & contention en matiere de gouuernemēt, comme fait Alcibiades, ains seulement pour seruir à une passion cholérique, à laquelle, comme dit Dion, il n'y a rien qui sache gré, qu'il met en combustion & en trouble plusieurs contrees de l'Italie, & pour le courroux qu'il auoit contre son païs ruina plusieurs autres uilles qui n'en pouuoient mais. Il est bien uray, qu'Alcibiades aussi par son ire & son despit fut cause de beaucoup de mauix, de miseres & de calamitez à ceulx de son païs, mais soudain qu'il apperceut qu'ilz se repentoient du tort qu'ilz luy auoyent fait, il se reuint aussi: & depuis ayāt une autre fois esté dechassé, il ne uoulut pas neātmoins fauoriser aux erreurs que faisoient les Capitaines Atheniēs, ny ne les uoulut point laisser perdre en suyuāt le mauuais conseil qu'ilz prenoient, ny les abandonner au peril ou ilz se mettoient, ains fait tout de mesme ce, que iadis auoit fait Aristides enuers Themistocles, dont il a esté & est encore tāt loué : car il s'en alla deuers les Capitaines

qui lors auoyent la charge de l'armee des Atheniens, encore qu'ilz ne feussent pas ses amis, & leur remōstra en quoy ilz failloyēt, & ce qu'ilz auoyent à faire: là ou Martius, au contraire, faisoit premieremēt dommage à toute Rome entieremēt, encore qu'il n'eust pas esté offensé par tous ceulx de dedans uniuersellemēt, & que la meilleure & plus saine partie de la uille eust esté offensee quand & luy, & en eust regret & desplaisir comme luy. Dauantage les Romains essayerēt d'appaiser un seul desplaisir & un seul despit qu'ilz luy auoyent fait par plusieurs ambassades, & plusieurs supplications & prieres, ausquelles il ne uoluit onques fleschir ny amollir son dur cuer: & par ce monstra qu'il auoit entrepris ceste guerre si aspre, & ou il ne uouloit point ouir parler d'appointement, en intention de destruire & ruiner entierement son païs, non pas pour le recouurer, ne pour y retourner. Il est uray qu'il y a ceste difference, qu'Alcibiades estāt espié & aguetté par les Lacedæmoniés pour la haine qu'ilz luy portoyēt, & la crainte qu'ilz auoyent de luy, fut cōtraint de se retourner deuers les Atheniés: là ou Martius ayant esté si bien recueilly, & si bien traité par les Volsques, ne pouuoit honestemēt les abandonner, attendu qu'ilz luy auoyent fait tāt d'hōneur que de l'elire leur Capitaine general, & festoyent tant fiez en luy, qu'ilz auoyēt mis toutes leurs forces & toute leur puissance en sa

main, nō pas cōme l'autre, duquel les Lacedæmoniens abuserēt plus tost qu'ilz n'en userēt, en le laissant aller & uenir parmy leur uille, & depuis parmy leur camp, sans honneur quelconque, tellement qu'il fut à la fin contraint de soy ietter entre les bras de Tissaphernes : si lon ne ueult dire, qu'il alla uoluntairement luy faire la cour, en intention de preseruer la cité d'Athenes, qu'elle ne fust entierement destruite, pour le desir qu'il auoit d'y retourner. Au reste lon trouue par escript, qu'Alcibiades prenoit souuent des presens peu honestement, & se laissoit corrompre par argent, lequel il despendoit puis apres encore plus uillainemēt, en uoluptez desordonnees & en toute dissolution : là ou, au contraire, Martius ne uolur pas seulement accepter les presens que ses Capitaines luy faisoient legitimement pour honorer sa uertu, & estoit pourquoy le menu populaire luy uouloit encore plus de mal, au different que le peuple eut contre les nobles touchant l'abolition des debtes, à cause que les pauures & menues gens cognoissoyent bien, que ce n'estoit point pour gaing ne profit qu'il y eust, qu'il leur estoit si fort contraire en cela, & sembloit qu'il le feist par despit d'eulx tant seulement, & pour leur desplaire expressement. Ainsi n'est-ce pas sans occasion qu'Antipater en une siene epistre parlant de la mort du philosophe Aristote, entre les autres bon-


nes parties qu'il dit auoir esté en luy, fait grand cas de celle la, qu'il sçauoit bien gagner & attirer les cueuts des hommes. Car les bonnes œures & les uertus de Martius, pour n'auoir pas esté accompagnées de ceste grace la, deuenoyent odieuses à ceulx mesmes qui en receuoient du profit, lesquels ne pouuoient supporter sa grauité & son opiniastrété, laquelle, comme dit Platon, demeure avec solitude, c'est à dire, qui fait que les hommes sont peu suyuis, ou du tout abandonnez. Et au contraire, pour autant qu'Alcibiades sçauoit bien s'entretenir de bonne grace, & se comporter comme il falloit avec toutes gens, il ne se fault pas esmerueiller, si quand il faisoit bien, sa gloire en estoit haultement exaltée, & luy honoré, aimé & bien uoulu du commun, ueu que mesme quelques unes de ses fautes estoient souuent prises en ieu, & en parloit on comme de gentilleses faites de bonne grace & à plaisir: dont procedoit, qu'encore qu'il feist & souuent & de grands dommages à la chose publique, il estoit neantmoins souuent eleu Capitaine, & luy commettoit on souuent les principales charges de la uille: là ou Martius, pour suyuant un magistrat qui luy estoit deu, à cause de plusieurs grands seruices qu'il auoit faits à la chose publique, en fut neantmoins debouté. Par ainsi uoit on, que ceulx mesmes à qui l'un faisoit mal, ne le pouuoient haïr: & l'au-


tre ne pouuoit tant faire, qu'il fust aimé de ceulx dont il estoit bien estimé. Aussi ne feit iamais Martius aucun grand exploit estant Capitaine des siens, ains les feit estant Capitaine des ennemis contre son propre pais : là ou Alcibiades estant homme priué, & estant Capitaine, feit plusieurs bons seruices aux Atheniens. Au moyen dequoy, tant qu'il fust present, il uint tousiours au dessus de ses calumniateurs autant qu'il uoulut, & n'eurent leurs calumnies aucun effect encontre luy, sinon pendant qu'il fut absent : là ou Martius en sa presence fut condamné par les Romains, & en sa personne meurtry & occis par les Volsques : non que ie uueille dire qu'ilz ayent en cela bien fait ny iustement, mais au moins leur donna il luy mesme quelque couleur de ce faire, quand il refusa publiquement la paix aux ambassadeurs Romains, qu'il accorda tantost apres particulièrement, à l'instance & priere des femmes. En quoy faisant il n'ostoit pas l'inimitié qui estoit entre les deux peuples, ains laissant la guerre en son entier, il faisoit perdre à ceulx de qui il auoit charge, l'occasion de bien exploitter : là ou il falloit que du consentement & par le conseil de ceulx qui festoyent tant fiez en luy, que de le faire leur Capitaine general, il retirast son armee, sil eust uolu faire tel compte comme il deuoit de l'obligation dont il leur estoit tenu : ou sil ne se sou-


estoit point des Volsques en l'entreprise de ceste guerre, ains l'auoit suscitée seulement en intention de soy uenger, pour puis apres s'en deporter quand il auroit assouuy son courroux, il ne falloit pas que pour l'amour de sa mere il pardonnast à son pais, ains falloit qu'en pardonnant à son pais il espargnast aussi sa mere, pource que sa mere & sa femme faisoient partie du corps de son pais & de la uille qu'il tenoit assiegée. Car d'auoir inhumainement reietté toutes publiques supplications, prieres d'ambassadeurs, & oraisons des presbtres & gens de religion, pour gratifier de sa retraite aux prieres de sa mere, cela n'estoit pas tant honorer sa mere, que deshonorer son pais, lequel fut preserué par pitié, & moyenant l'intercession d'une femme, & non pas pour l'amour de soy mesme, comme s'il n'en eust pas esté digne. Ainsi fut ceste retraite une grace à la uerité fort odieuse, cruelle, & de laquelle ny les uns ny les autres ne sceurent gré à celuy qui la fait : pource qu'il se retira, non point à la requeste de ceulx à qui il faisoit la guerre, ny du consentement de ceulx aux despens desquelz il la faisoit : de tous lesquels accidents fut causée la seule austerité de sa nature, & sa trop presumptueuse, haultaine & fiere opiniastrété, laquelle estant de soy mesme odieuse à tout le monde, quand elle est iointe à l'ambition, alors deuiet encore plus sauuage, plus farouche &

plus intolerable : car les hommes qui ont ce uice la de nature, ne ueulent point faire la cour au peuple , comme uoulans monstrier qu'ilz n'ont que faire d'honneur populaire : & puis quand on ne leur en fait , ilz s'en courroucent, & en sont marris . Car un Metellus , un Aristides & un Epaminondas auoyent bien ceste maniere de faire , de ne uouloir point flatter la commune , ny rechercher la bonne grace du menu populaire par caresses & paroles flatteuses , mais c'estoit pource que ueritablement ilz mesprisoyent ce que le peuple pouuoit ou donner ou oster : pourtant ne se courrouceoyēt ilz point à leurs citoyens quand ilz les condamnoyent à quelques amendes , ou qu'ilz les bannissoyent , ou qu'ilz leur faisoient endurer quelque rebut , ains les aimoyent comme deuant tout aussi tost qu'ilz monstroyent se repentir du tort qu'ilz leur auoyent fait , & se reconcilioyent facilement avec eulx incontinent qu'ilz estoyent rappellez : car celuy qui desdaigne de caresser le peuple pour en auoir faueur , doibt aussi moins que tout autre chercher à s'en uenger s'il en est rebuté : pource que prendre ainsi aigrement à cueur un rebut & un refus de quelque honneur , ne procede d'autre chose que de l'auoir trop ardemment desiré . Pourtant Alcibiades ne dissimuloit point , qu'il ne fust bien aise de se uoir honoré , & marry de se uoir mesprisé & rebuté de quelque honneur ,

mais aussi cherchoit il les moyens de se rendre agreable & bienuoulu de ceulx avec lesquels il uiuoit : là ou la fierté & haultaineté de Martius l'empeschoit de caresser ceulx qui le pouuoient honorer & auancer, & neantmoins son ambition faisoit qu'il se despitoit, courrouçoit & douloit, quand il se sentoit mesprisé. C'est tout ce que lon pourroit avec raison reprendre en luy: car au demourant toutes autres bonnes & louables qualitez estoient en luy fort apparentes : car en temperance & netteté de mains pour ne se laisser point corrompre par argent, il se peult comparer aux plus uertueux, plus nets & plus entiers des Grecs, non pas à Alcibiades, qui en cela certainement a tousiours esté trop licencieux & trop dissolu, & a eu peu de regard au deuoir de l'honesteté.









PAVLVS ÆMYLIVS.

QVAND ie me mis à escrire ces uies, ce fut au commencement pour profiter aux autres, mais depuis ie y ay perseueré & continué pour profiter à moy-même, regardant en ceste histoire comme dedans un miroir, & taschant à raccoustrer aucunement ma uie, & la former au moule des uertus de ces grands personages. Car ceste façon de rechercher leurs meurs, & escrire leurs uies, me semble proprement un hâter familièrement & frequenter avec eulx, & m'est aduis que ie les loge tous chez moy les uns apres les autres, quand ie uiens à contempler en leurs histoires, & à considerer quelles qualitez ilz auoyent, & ce qui estoit de grand en chacun d'eulx, en elisant & prenant ce qui fait principalement à noter, & qui est plus digne d'estre sceu & cogneu en leurs dictz & leurs faitz.

O Dieux! plus grand plaisir pourroit il estre
 au monde,
 ne qui eust plus de force à faire que l'homme
 ueuille corriger & emender les uices de ses
 meurs? Le philosophe Democritus escrit, que
 nous deuous prier qu'il se presente à nous des
 images heureuses en l'air, & que les bonnes qui
 sont propres & cōuenables à nostre nature s'ad-
 dressent plus tost à nous, que les mauuaises &
 malençontreuses, presupposant une opinion &
 doctrine faulse en la philosophie, & qui induit
 les hommes en superstitions infinies, qu'il y ait
 des images bonnes & mauuaises qui discourent
 par l'air, & qu'elles donnent aux hommes im-
 pression de bien ou de mal, en les inclinant à ui-
 ce ou à uertu. Mais quant à moy, par la conti-
 nuatiō de lire les ancienes histoires, & d'en ex-
 traire ces uies que ie redige par escript, en rece-
 uant tousiours en mon entendement les choses
 dignes de memoire des plus gēs de bien, & des
 plus uertueux hommes du temps passé, ie m'in-
 struis moymesme, & me prepare à reietter ar-
 riere de moy & repoulsier toute mauuaise, las-
 che, deshoneste ou maligne condition, si d'ad-
 uenture la frequentation & conuersation de
 ceulx avec qui il fault que ie hante necessaire-
 ment, m'en attache & m'en imprime, par conta-
 gion, aucune. Ce que ie fais en destournant ma
 pensee tràquille, & non agitee de passion quel-
 conque, à la cōsideratiō de tant de beaux exem-

ples:comme maintenant ie uous presente en ce traitté les uies de Timoleon Corinthien, & de Paulus Æmylius Romain, lesquelz n'ont pas seulement eu l'intention bonne & la uoulunté droite, mais aussi la fortune heureuse & prospere es affaires qu'ilz ont tous deux maniez:de maniere qu'il uous fera malaisé à iuger & décider quand uous aurez leu leurs uies, si ce a esté plus par prudence, ou par heur qu'ilz sont uenus à chef des plus beaux & plus grâds de leurs faictz. Or que la maison des Æmyliens à Rome ait tousiours esté des nobles, que lon appelle Patricienes, & des plus anciennes, les historiens, pour la plus part, en sont bié d'accord:mais que le premier de celle race, qui a donné ce nom à toute la posterité, ait esté un Marcus filz du sage Pythagoras, lequel fut surnômé Æmylius pour la douceur & bonne grace de son langage, il y en a aucuns qui l'ont escrit, mesmement ceulx qui ont dit que le Roy Numa estoit disciple de Pythagoras. Comment que ce soit, la plus part de ceulx de ceste maison, qui ont acquis honneur & reputation pour auoir suyuy la uertu, ont eu aussi la fortune fauorable, excepté Lucius Paulus, qui mourut en la bataille de Cannes:mais la deffortune de celuy la porte tesmoigne de sa prudence & de sa uaillance tout ensemble, pource que n'ayant peu destourner la temerité de celuy qui estoit son compaignon au Consulat, de l'enuie de combattre, il fut malgré

luy participant du combat, mais non pas de la fuitte comme l'autre, qui ayant esté cause d'attacher la bataille, s'enfouit: là ou luy, qui l'auoit empeschée à son pouuoir, demoura ferme, & y mourut en combatant uaillamment iusques au dernier soupir. Celuy la donques laissa une fille nommée Æmylia, laquelle fut mariée au grand Scipion: & un filz, Paulus Æmylius, qui est celuy dont nous escriuons presentement, la ieunesse duquel se rencontra en un temps florissant en gloire & en honneur, par la uertu de plusieurs grands & illustres personnages qui uiuoient alors, entre lesquelz il feit reluire son nom, & si ne fut point par les mesmes arts que suyuoient, ny par le mesme chemin que tenoyent les ieunes hommes bien estimez de ce temps là: car il ne s'exercita point à plaider les causes des particuliers en iugement, ny ne se uoulut onques adonner à saluer, embrasser & caresser les hommes pour mendier leur faueur, encore que par telle sollicitude, & par telles brigues, plusieurs uinsent à gagner la bonne grace du commun peuple: & si ne laissoit pas à le faire, pource que sa nature ne fust bien propre à l'un & à l'autre, s'il eust uoulu s'en mesler, mais il aima mieulx acquerir la reputation d'homme de bien, uaillant, entier & droitturier, comme estant ceste uoye meilleure que les deux autres, & aussi en peu de temps y surmōta il tous ceulx qui estoient de son aage. Le premier magistrat

honorable qu'il demanda, fut l'Ædilité, en laquelle pourfuitte il fut preferé à douze autres concurrents qui la demandoient auffi, & si n'estoyent pas hommes de petite qualité, car chacun d'iceulx paruint depuis au Consulat. Et ayant esté semblablement eleu du nombre des presbtres que les Romains appellent Augures, qui ont la charge & la superintendance des diuinations qui se font par le uol des oiseaux & par les signes & presages de l'air & du ciel, il meit tant d'estude à apprendre les us & coustumes Romaines en cela, & rechercha si diligemment l'obseruance de la religion, & la diligence des anciens Romains es choses diuines, que de celle presbtrise qui parauant n'estoit estimee qu'un tiltre d'honneur, & n'estoit desirée que pour en auoir le nom seulement, il en feit l'une des principales & des plus haultes sciences qui fussent en honneur à Rome: en quoy faisant il tesmoigna & confirma estre ueritable ce que tiennent aucuns philosophes, que Religion est la science de seruir Dieu. Car quand il faisoit aucune chose appartenante à l'office de celle presbtrise, il la faisoit avec grande experience, grand soing & grande diligence, sans penser à autre chose, & sans y rien omettre des anciennes cerimonies, ny aussi en adiouster de nouvelles, contestant bien souuent pour des choses qui sembloient fort legeres & petites à l'encontre de ses compagnons, en leur remonstrant qu'en-

core que lon presuppose que les Dieux soyent faciles à contenter, & qu'ilz pardonnent aisement les fautes faictes par seule negligence, toutefois quand il n'y auroit autre chose, que le regard de l'entretènement de la chose publique, on ne deuroit pas facilement dissimuler ny passer en nonchaloir les omissions & fautes faites en ces affaires la : pource, disoit il, que lon ne commence iamais à remuer & changer l'estat d'une chose publique, en commettant d'entreprendre quelque notable contrauention aux loix : mais aussi fault il estimer, que lon abandonne la garde des principaux fondemens d'un estat politique, quand on desdaigne le soing de faire obseruer diligemment les institutions d'iceluy, pour petites & menues qu'elles soyent. Aussi se monstra il pareillement seuerer obseruateur & roide exacteur de la discipline militaire, ne cherchant pas d'acquiescer l'amour des soudards par leur complaire, quand il auoit charge en un camp, comme plusieurs faisoient en ce temps la, ny ne briguant pas d'auoir une seconde charge par se monstrer doux & gracieux en la premiere, à ceulx qui estoient dessous luy, ains leur monstrant, luy mesme, de poinct en poinct, ce que portoyent les ordonnances de la guerre, ne plus ne moins que feroit un presbtre qui declareroit & nommeroit les ceremonies de quelque saint sacrifice, ou il y auroit danger de faillir d'un seul poinct : & en se decla-

rant austere & terrible à ceulx qui desobeïssoyent, & qui transgressoyent les loix militaires, il maintenoit la chose publique en son entier, estimant que uaincre les ennemis par armes n'estoit qu'un accessoire, par maniere de dire, au pris de bien dresser & aguerrir ses citoyens par bonne discipline. Comme donques les Romains eussent la guerre en Leuant contre le Roy Antiochus, qui fut surnommé le Grand, y estans employez tous les principaux Capitaines de Rome, il leur en sourdit une autre en Occident du costé des Hespagnes, ou il se leua de grands mouuemens, & y fut enuoyé Æmylius Præteur, non point avec six haches, comme auoyent les autres Præteurs que lon portoit deuant eulx, mais avec douze, de maniere que soubz le nom de Præteur, il eut authorité & dignité Consulaire: si y desfeit par deux fois les Barbares en bataille rengee, & en tua bien iusques au nombre de trente mille, & fait ce grand exploit par auoir bien & sagemēt sceu choisir l'auâtage du lieu & du temps, pour combatre ses ennemis, ainsi comme ilz passoyent une riuere: ce qui facilita grandement la uictoire à ses gens: & dauantage il y conquist deux cents cinquante uilles, qui le receurent uoluntairement. Et ainsi laissant toute la province pacifique, & ayant receu le serment de fidelité qu'elle feit de nouueau entre ses mains, il s'en retourna à Rome sans festre en tout ce

uoyage enrichy d'une seule drachme d'argent :
 car il estoit par tout ailleurs assez peu soigneux
 de son profit, & si despendoit liberalement sans
 espargner son bien, qui n'estoit pas grand, com-
 me il apparut quand il fut decedé, par ce qu'à
 peine peult il suffire à payer le douaire qui e-
 stoit deu à sa femme. En premieres nopces il
 espouza Papyria fille d'un personnage Confu-
 laire Papyrius Masso, & apres auoir long temps
 esté avec elle, il la repudia, combien qu'il en
 eust de tresbeaux enfans : car ce fut elle qui luy
 porta le tant renommé Scipion second, & Fa-
 bius Maximus. Et quant à la cause de ce diuor-
 ce, la cognoissance n'en est point uenue par e-
 script iusques à nous : mais il me semble bien
 qu'un propos que lon compte en matiere de se-
 paration de mariage, est ueritable: c'est à sçauoir
 que quelquefois un Romain ayant repudié sa
 femme, ses amis l'en tenferent, en luy deman-
 dant, *Que trouues tu à redire en elle ? n'est elle*
pas femme de bien de son corps ? n'est elle pas
belle ? ne porte elle pas de beaux enfans ? Et luy
estendant son pied, leur monstra son soulier, &
leur respondit: Ce soulier n'est il pas beau ? n'est
il pas bien fait ? n'est il pas tout neuf ? toutefois
il n'y a personne de uous qui sache ou il me
blece le pied. Car à la uerité les grandes faultes
euidemmét descouuertes sont bien cause ordi-
nairemét de faire aux maris repudier leurs fem-
mes : mais il y a quelquefois de petites hargnes

& riottes souuent repetees, procedentes de quelques facheuses conditions, ou de quelque dissimilitude ou incompatibilité de nature, que les estrangers ne cognoissent pas, lesquelles par succession de tēps engendrent de si grādes alienatiōs de uouluntez entre des personnes, qu'elles ne peuuent plus uiure ny habiter ensemble. Ainsi Æmylius ayant repudié sa premiere femme Papyria, en espousa une autre, qui luy porta deux enfans masles, qu'il reteint pour luy en sa maison, & donna ses deux premiers à adopter en deux tresnobles, tresriches & trespuissantes maisons, l'aisné en celle de Fabius Maximus, celuy qui fut par cinq fois Consul, & le puisné en celle des Corneliens, & l'adopta le filz du grand Scipion l'Afriquain, estant son cousin germain, & le nomma Scipion. Quant aux filles, le filz de Cato en espousa l'une, & l'autre Ælius Tubero, qui fut un grād homme de bien, & qui se mainteint plus magnanimement en sa pauureté que nul autre Romain: car ilz estoÿēt seize proches parents tous du nom & de la race des Æliens, qui n'auoyent qu'une petite maison en la uille, & une petite possessiō aux chāps dōt ilz s'entretenoyēt, & uiuoyent tous ensemble en une mesme maison avec leurs femmes & force petis enfans. Entre lesq̄lles femmes fut l'une des filles de Paulus Æmylius, apres qu'il eut esté par deux fois Consul, & qu'il eut triomphé par deux fois, n'ayant point de hôte de la pauureté

de son mary, mais ayant en admiratiõ sa uertu, pour laquelle il estoit pauvre: là ou les freres & parents de maintenant, filz ne sont esloignez les uns des autres par distances de climats tous entiers, & qu'il n'y ait des riuieres qui les separent les uns des autres, ou des murailles qui diuisent & bornent leurs heritages, & qu'il n'y ait de grands espaces uides entre deux, ilz ne cessent d'auoir guerres & proces les uns contre les autres. Ce sont les beaux exemples que l'histoire met deuant les yeux à ceulx qui les ueulent peser & considerer, pour en tirer instruction de bien uiure & se bien gouuerner. Au demourant, Æmylius estant eleu Consul, alla faire la guerre aux Lyguriens, qui habitent le long des Alpes, & que lon appelle autrement Lygustins. Ce sont hommes hardis, courageux & belliqueux, & qui lors estoyent bié aguerriz pour la continuation de combatre ordinairement à l'encõtre des Romains, dont ilz estoyēt uoisins: car ilz tenoyent l'extremité de l'Italie, qui ua aboutissant aux grandes Alpes, & celle reneege mesme des Alpes, dont le pied est baigné de la mer de Thoscane, & qui regarde deuers la coste de l'Afrique, & sont meslez avec les Gaulois & les Hespagnolz, uoisins de celle lisiere de marine, & pour lors escumās toute la mer mediterrane, iusques au destroit des colonnes d'Hercules, avec petits uaisseaux legers de courfaires empeschoyēt tout le trafic & en-

trécours de la marchandise. Æmylius donques les estant allé chercher iusques en leur païs, ilz l'attendirent avec une armee de quarante mille combatans, & neantmoins ne laissa de les charger, encor qu'il n'en eust pas huit mille en tout, & que eulx fussent presque cinq contre un, & les rompit & chassa iusques dedans leurs uilles, puis leur feit porter paroles d'accord & d'appointement, pource que les Romains ne uouloyent pas de tout poinct exterminer ne destruire celle natiõ des Lyguriens, à cause qu'elle leur estoit comme un rempar ou un boulevard contre les mouuemens des Gaulois, qui n'espioient autre chose que le moyen & l'occasion d'enuahir l'Italie : parquoy ces Lyguriés se rendirēt à luy, & luy meirent entre ses mains leurs places fortes & leurs uaisseaux. Æmylius leur rendit leurs places, sans y faire autre dommage que d'en abatre les murailles & fortifications: mais il leur osta tous leurs uaisseaux, sans leur en laisser pas un plus grand que des bateaus à trois rames seulement, & deliura tous ceulx qu'ilz auoyent pris prisonniers tant par mer que par terre, qui se trouuerent en grand nombre, tant Romains, qu'autres. Ce sont les choses plus dignes de memoire qu'il feit en l'an de son premier Consulat: depuis il monstra par plusieurs fois auoir enuie d'estre de rechef Cõsul, & de faict se presenta une fois à la poursuite, & en ayant esté esconduit, de là en auant ne

le demanda plus, ains uaque seulement aux choses de la religiō, & à bien faire instruire ses enfans, non seulement en la discipline Romaine comme luy auoit esté nourry, mais aussi un peu trop curieusement en la Grecque: car il ne tenoit pas seulement des maistres de Grammaire, de Rhetorique & de Dialectique, mais aussi des peintres, des imagiers, des piqueurs & dōpteurs de cheuaux, & des ueneurs Grecs à l'entour de ses enfans: & luy mesme, sil n'auoit autre affaire pour la chose publique qui l'empeschast, estoit tousiours apres tant qu'ilz apprenoyent, ou qu'ilz s'exercitoient: car il aimoit ses enfans autant ou plus que nul autre Romain. Or quāt aux affaires publiques, les Romains auoyent ia la guerre contre le Roy Perseus, & blasmoit on fort les Capitaines, qui iusques là y auoyent esté enuoyez, de ce que par faulte de suffisance & de hardiesse ilz sy estoient si laschement & si honteusement portez, qu'ilz se faisoient moquer d'eux, & receuoient plus de dommage qu'ilz n'en faisoient à ce Roy. Car peu deuant ilz auoyēt rengé le Roy Antiochus au dela du mont de Taurus, luy ayans fait quitter tout le demourant de l'Asie, & l'auoyent r'enfermé au dedans des bornes de la Syrie: encore auoit il esté bien aise d'achepter celle paix avec^a quinze mille talents, qu'il paya pour l'amende. Et peu deuant auoyent aussi uaincu le Roy de Macedoine Philippus en la Theffalie, & auoyent de-

Ce font
viron
euf mil-
s d'or.

liuré les Grecs de la seruitude des Macedoniés: & qui plus est, ayans desfaict Hannibal, auquel nul Prince ne Roy qui fust au monde, n'estoit comparable, ny quant à la puissance, ny quant à la hardiessé, ilz estimoyent que ce leur estoit une trop grande honte, que ceste guerre qu'ilz auoyent contre Perseus, durast si longuement de per à per, comme si c'eust esté un aduersaire egal au peuple de Rome, attendu mesmement qu'il ne combattoit contre eulx qu'avec les reliques de la desfaite de son pere seulement, ne sçachans pas que Philippus auoit laissé son armee beaucoup plus forte & mieulx aguerrie par la rouverte qu'il auoit receuë, qu'elle ne l'estoit auparauant. Dequoy il ne sera point impertinent que nous escriuions sommairement, en reprenant l'histoire un peu de plus hault. Antigonus celuy des Capitaines & successeurs d'Alexandre le grand, qui eut le plus de puissance, ayant acquis pour luy & pour les siens, le tiltre de Roy, eut un filz nommé Demetrius, duquel nasquit un second Antigonus, qui fut surnommé Gonatas, & eut un filz qui fut aussi nommé Demetrius, lequel ne regna pas long temps, ains mourut laissant un filz appelé Philippus en fort bas aage: à l'occasion dequoy les princes & seigneurs de la Macedoine, craignans que le royaume ne demourast sans Chef, auancerēt un Antigonus, qui estoit cousin du Roy dernier mort, & luy feirent espou-

ser la mere du petit Philippus , en luy donnant du commencement le nom de tuteur du Roy & de Capitaine general tant seulement : mais depuis l'ayans trouué bon prince & sage, & utile aux affaires du royaume , ilz luy donnerent absoluëment le nom de Roy, & fut surnommé Dofon , c'est à dire , qui donnera , pource qu'il promettoit assez, & donnoit peu. Apres luy regna Philippus , lequel en sa premiere ieunesse donna plus grâde esperance de foy que nul autre des Roys: de maniere que lon estimoit qu'il feroit pour remettre un iour la Macedoine en sa gloire ancienne , & que luy seul feroit pour reprimer la puissance des Romains qui se leuoit contre tout le monde: mais ayant esté rompu en une grosse bataille par Titus Quintius Flaminius , pres la uille de Scotuse, pour lors il plia sous le ioug, & se remit de toutes choses à la mercy des Romains : & pensa en estre eschappé à bon marché , pour quelque legere amede que les Romains luy feirent payer: mais depuis il s'en mescontenta fort , estimant que regner par la mercy des Romains estoit à faire à un esclau cherchant de uiure en delices à son aise , non pas à un prince uaillant & magnanime : au moyen de quoy il tourna tout son entendement , & employa toute son estude à la guerre, faisant ses preparatifs le plus secretemēt & le plus finement qu'il luy estoit possible. Car il laissoit les uilles qui estoÿēt le long de la ma-

rine & sur les grands chemins, sans y fortifier chose quelconque & à demy desertes & depeuplees, à fin que lon n'eust point d'occasion de se doubter & deffier de luy: & ce pendant es haulres contrees de son royaume arriere des chemins passans, il assembloit force gens de guerre, & emplissoit les uilles & places fortes, qui estoient à l'escart, d'armes, d'argent & de bons combatans, se prouoyant & preparant pour la guerre, laquelle il tenoit couuerte & cachee le plus qu'il pouuoit: car il auoit en reserue prouision de harnois pour armer trente mille combatans, & bien huit millions de mines de blé retiré & ferré dedans les fortes places, & d'argent comptant ce qu'il en falloit pour entretenir, l'espace de dix ans durant, dix mille estrangers pour defendre le plat païs: mais auant qu'il peust executer & mettre en effect ce qu'il auoit proietté de faire, il mourut de douleur & de regret, apres auoir cogneu qu'il auoit iniustement fait mourir le meilleur de ses enfans, Demetrius, par la calumnie & faulse accusation du pire, qui estoit Perseus, lequel succedant à son pere au royaume, luy succeda aussi en la haine qu'il auoit à l'encontre des Romains: mais il n'auoit pas espauls pour soustenir un si pesant fardeau, mesmement estant de si uile, si lasche & si meschante nature, comme il estoit: car entre plusieurs autres uices & mauuaises conditions qu'il auoit, il estoit extremement auari-

cieux: & si dit on qu'il n'estoit pas legitime, parce que la femme de Philippus l'auoit pris d'une cousturiere natifue d'Argos, laquelle s'appelloit Gnathainia, incontinent qu'il fut né, & se l'auoit supposé: & tient on que se fut la principale cause, pour laquelle il chercha les moyens de faire mourir Demetrius, craignant que le filz legitime ne fust occasion de faire rechercher & auerer sa bastardise: toutesfois quelque lasche qu'il fust, & de uile & basse nature, il trouua les forces de son royaume si grandes, qu'il se laissa aller à entreprendre la guerre contre les Romains, laquelle il sousteint assez longuement, & fit teste à des Capitaines Consulaires, & repoulsa de grosses armées tant par mer que par terre, & si en batit aucuns, comme entre autres Publius Licinius, lequel estant entré le premier dedans la Macedoine, il rompit en une rencontre de gens de cheual, ou il luy tua deux mille cinq cens bons hommes, & en prit six cens prisonniers, & estant l'armée de mer à l'ancre deuant la uille de Oree, il leur alla faire une charge au desproueu, ou il prit vingt grosses nauires de charge, avec tout ce qui estoit dedans, & meit les autres à fond qui estoient chargees de bledz: & si prit dauantage cinquante & quatre que fustes que galiotes de cinquante rames. Le second des Capitaines Cōsulaires ausquelz il combatit, fut Hostilius, lequel il repoulsa, ainsi comme il essayoit d'en-

trer à force ouuerte dedans la Macedoine par le pas de la uille de Elymie: & une autre foi qu'il y estoit entré à la desrobce par le costé de la Theffalie, il luy alla presenter la bataille, que l'autre n'ozà accepter. Et comme si ceste guerre luy eust donné peu d'affaire, & qu'il se fust peu soucié des Romains, encore feit il ce pendant un uoyage contre les Dardaniens, ou il desfeit & meit en pieces dix mille des Barbares, & en amena tresgrande quantité de butin. Qui plus est, il sollicitoit une nation Gauoise habitant le long de la riuier de la Danoue, que lon nomme les Basternes, hommes belliqueux & bons combatans à cheual, & semblablement aussi prattiquoit les Esclauons par le moyen de leur Roy Genthius, pour les faire entrer avec luy en ceste guerre, de sorte qu'il courut un bruit qu'il auoit tant fait par argent enuers ces Barbares, qu'ilz deuoient descendre en Italie par le hault de la Gaule, tout le long de la mer Adriatique. Parquoy les Romains entendans toutes ces nouvelles, penserent qu'il n'estoit plus temps de s'amuser à donner les charges de la guerre par grace & par faueur, à ceulx qui les briguoient, ains au contraire qu'il falloit que eulx mesmes y appellassent quelque homme d'honneur, bon Capitaine & sage, qui sceust comme il falloit gouverner & manier de grandes choses, semblable à Paulus Æmylius, lequel estoit ia fort auant en son aage: car il

auoit soixante ans : mais il estoit encore homme uigoureux & robuste, fortifié de gendres & d'enfans ieunes & dispos, & de grand nombre de parents & d'amis tous gens d'autorité, lesquelz tous ensemble d'une uoix luy conseil-lerent qu'il obeïst au peuple qui l'appelloit au Consulat. Il est uray que du commencement il fect un peu le long enuers le peuple qui l'en sollicitoit, & destournoit l'instance qu'on luy en faisoit, disant que ce n'estoit plus à luy à desirer ny accepter telles charges : mais à la fin uoyant que la commune uenoit tous les iours à sa porte, le semondre à haultes uoix qu'il s'en ueinst sur la place, & qu'ilz crioient à l'encontre de luy de ce qu'il l'alloit refusant, il se laissa persuader. Et s'estant monstré entre ceulx qui poursuyuoient le Consulat, il fut incontinent aduis au peuple qu'il ne se presentoit pas tant pour accepter ce magistrat, comme il leur apportoit la uictoire toute certaine, & assurance d'heureuse issue de ceste guerre, tant il fut uoluntiers ueu de ses citoyens, & avec bonne esperance eleu Consul pour la seconde fois. Parquoy si tost qu'il eut esté eleu, ilz ne uolurent pas que lon tirast au sort suyuant la coustume, auquel des deux Consulz escherroit la prouince de la Macedoine, ains luy decernerent incontinent par leurs suffrages la charge entiere de toute la guerre Maccdonique, & ayant ainsi esté eleu Consul & député pour al-

Ier faire la guerre au Roy Perseus , il fut hono-
 rablement accompagné & conuoyé par tout le
 peuple Romain iusques en sa maison:ou il trou-
 ua une siene petite fille nommee Tertia, estant
 encore en sa premiere enfance, qui estoit toute
 exploree : si luy demanda, en la caressant, ce
 qu'elle auoit à plorer. Elle luy respondit, en l'ac-
 30 colant & le baisant, Ne sçauiez uous pas, mon
 30 pere, que nostre Perseus est mort? ce qu'elle en-
 30 tendoit d'un petit chien ainsi appellé, qui auoit
 30 esté nourry avec elle. A la bonne heure, ma fil-
 30 le, luy repliqua adonc Æmylius, i'accepte le
 30 presage. ainsi le recite l'orateur Ciceron au li-
 ure qu'il a escrit de la diuination. Or estoit-ce
 lors la coustume de ceulx qui estoient eleus
 Consulz, apres que lon les auoit declarez telz,
 de faire une harengue au peuple, pour le re-
 mercier de la grace & de l'honneur qu'il leur
 auoit fait: suyuant laquelle usance s'estant le
 peuple Romain assemblé pour escouter Æmy-
 lius, il leur dit qu'il auoit demandé son premier
 Consulat pour l'amour & pour le regard de
 soy mesme, ayant eu lors besoing de tel hon-
 neur: mais qu'il s'estoit présenté au second pour
 l'amour d'eulx qui auoyent besoing d'un Capi-
 taine, au moyen dequoy il ne s'en sentoit point
 obligé ny tenu à eulx: & que s'ilz pensoyent
 que ceste guerre se peust mieulx conduire par
 un autre que par luy, uoluntiers il luy en
 cedoit & quittoit des lors toute la charge: &

aussi filz auoyent telle fiance de luy, qu'il fust bien pour la faire, qu'ilz ne se meslassent doncques point de parler ny d'entreprendre chose quelconque qui appartenist à l'office & au deuoir du Capitaine, ains seulement s'empeschassent de faire sans mot dire ce qui leur seroit ordonné de sa part, & qui feroit besoing pour la conduite de ceste guerre, pource que si chascun se uouloit encore mesler de commander, comme lon auoit fait au parauant, à ceulx qui doyuent & à qui il appartient de commander, ilz se feroient encore moquer d'eulx plus que iamais, en la conduite de leurs affaires. Ces paroles feirent que les Romains luy rendirent grande obeissance, & conceurent bonne esperance de l'aduenir, estans tous bien aises d'auoir esconduit ceulx qui par ambitieuses flatteuries aspiroyent à ceste charge, & d'y auoir commis un personnage qui eust cueur de leur dire franchement & librement leur uerité. Voila comment le peuple Romain par se rendre subiect à la raison & à la uertu, ueint à commander aux autres, & à se faire le plus grand & le plus puissant de tout le monde. Or que Paulus Æmylius partant pour aller à ceste guerre, ait eu le uent à gré, & qu'il ait aisement fait le uoyage, ie l'attribue bien à la faueur de fortune, laquelle luy feit ceste grace qu'il arriua si promptement & si seurement en son camp: mais au demourant des exploits qu'il feit en

toute ceste guerre, en uoyant une partie faite par la promptitude de sa hardiesse, une autre par son bon sens & bon conseil, une autre par le deuoir que feirent ses amis qui le seruirent de grande affection, & une autre par sa constance resoluë & asseuree au plus fort du peril, & par auoir sceu prendre & choisir le party qu'il falloit sur le faict, ie n'en puis attribuer aucun acte insigne ny notable à celle siene bonne fortune, de laquelle on parle tant, comme lon peut faire es faicts d'aucuns autres Capitaines: si d'aduëture lon ne ueult dire, que l'auarice de Perseus ait esté la bonne fortune de Æmylius: car pour crainte de despendre de l'argent, elle fut cause de ruiner totalement les affaires de Macedoine qui estoient en tresbons termes, & en bien grande esperance de prosperer. Car il estoit descendu à sa requeste en la Macedoine dix mille Basternes combattans à cheual, & autres dix mille qui les coustoyoyent tousiours es batailles à pied, tous gens uiuans de la soude & de la guerre, comme ceulx qui ne scauoyent ny labourer la terre, ny traffiquer sur mer, ny nourrir du bestail pour uiure, ny brief exercer autre mestier, ny marchandise, que faire la guerre, combattre & uaincre ceulx qui se presentoyent en bataille deuant eulx: qui plus est, festans uenez camper & loger en la Mædique pres des Macedoniens, qui les uoyoyent ainsi beaux &

grands hommes, & si bien exercitez & appris à manier toutes sortes d'armes, si braues & si audacieux en paroles & menaces contre les ennemis, cela leur auoit donné grand cueur: de sorte qu'ilz se tenoyēt tout assurez, q̄ les Romains ne les attendroyēt iamais, ains s'estonneroyent à les regarder aux uisages, & à uoir seulement leur demarche, tant elle estoit terrible & espouuenable: mais Perseus, apres auoir ainsi assuré les cueurs de ses gens, & les auoir emplis de telle esperance, quand ce uint que les Barbares luy demanderent mille escus comptans pour chascun Capitaine, il fut si esblouy & si troublé de son entendement quand il uint à compter la somme à quoy cela mōtoit, par son auarice & sa chicheté, qu'il renuoya ce renfort des Barbares, & refusa leur seruice, comme s'il eust uoulu mesnager & espargner pour les Romains, & nō pas leur faire la guerre à toute oultrance, & cōme s'il eust deu rendre cōpte à toute rigueur de l'argent qu'il despēdroit en ceste guerre à ceulx, à qui il la faisoit, cōbien qu'eulx mesmes luy enseignassent ce qu'il deuoit faire, attendu qu'oultre tout le reste de leur equipage & appareil de guerre, ilz n'auoyent pas moins de cent mille personnes toutes assemblees & prestes à faire ce qui seroit de besoing: & luy entreprenant de resister à une si grosse puissance, & de soustenir une guerre, pour laquelle ses ennemis faisoient une si extraordi-

naire despenſe, d'entretenir tant de gens plus qu'il n'eſtoit neceſſaire, alloit dramant ſon or & ſon argent & le tenant ſeulement enfermé, cōme fil euſt eu peur d'y toucher, & qu'il n'eũt pas eſté ſien, & le faifoit luy qui n'eſtoit point extraict de ces Roys de Lydie & de Phœnicie, qui ſe glorifioyent pour auoir de grãds treſors, ains qui par communication de ſang, ſe diſoit tenir quelque choſe de la uertu de Philippus & d'Alexãdre, leſquelz pour auoir eſtimé que les uictaires ſe deuoient achepter avec l'argent, & non pas l'argent par les uictaires, ſont uenus au deſſus de toutes leurs entrepriſes, & ont batu tout le monde. Et c'eſt pourquoy lon diſoit que ce n'eſtoit pas Philippus, mais ſon or & ſon argent qui prenoit les uilles de la Grece : & Alexandre uolant aller à la conqueſte des Indes, & uoyant que les Macedoniens trainnoyent apres eulx l'auoir & l'opulence Perſiene, qui rendoit ſon camp lourd & peſant, il fut le premier qui meit le feu au chariage royal, ou lō trainnoit ſon bagage, & ſuada aux autres d'en faire autãt, à fin qu'ilz allaſſent plus legers & plus deliures à ce uoyage. Mais au contraire, Perſeus ne uolul pas, pour ſauuer ſa propre perſonne, ſes enfans & ſon royaume, deſpendre un peu de ſa cheuãce: ains aima mieulx eſtre mené priſonnier en triumphe avec grande finãce, pour mōſtrer aux Romains combien il leur auoit eſpargné. Car non ſeulement il renuoya

les Gaulois sans les prédre à sa soude ainsi qu'il leur auoit promis : mais , qui plus est, ayant induit Genthius le Roy d'Esclauonie à entrer avec luy en ceste guerre, moyenant la somme de a trois cents taléts qu'il luy promettoit fournir: il presenta bien l'argent à compter & enfa-cher à ceulx que Genthius enuoya pour le recevoir. Au moyen dequoy Genthius cuidant ia tenir ce qu'il auoit demandé, commeit un cas meschât & malheureux: car il arresta & feit mettre en prison aux fers, des ambassadeurs que les Romains luy enuoyerét: ce qu'entendant Perseus, pensa qu'il n'estoit plus besoin de luy bail-ler argent pour le rēdre ennemy des Romains, attendu que luy mesme le premier luy auoit baillé telles arres de leur estre ennemy, qu'il ne s'en pouuoit plus retirer ne repentir, & f'estoit luy mesme ictté en guerre toute certaine par celle meschanceté: & ainsi defrauda le malheureux, & le frustra des trois cents talents qu'il luy auoit promis : & , qui pis est, peu de temps apres le laissa prendre & enleuer, luy, sa femme & ses enfans, hors de son royaume, comme de son nid, par Lucius Anicius Præteur Roman, qui y fut enuoyé avec une armee. Estant dōques Æmyli⁹ arriué en Macedoine pour faire la guerre à un tel ennemy, il le mesprisa biē quāt à sa personne, mais il feit cas de son appareil, & des forces qu'il auoit : car il auoit dedans un camp quatre mille hommes de cheual, & de

a Cēt qua-
tre uingts
mille ci-
cus.

piéd non gueres moins de quarante mille, avec toute laquelle puissance il festoit planté le long de la marine au piéd du mont Olympe, en lieu dont on ne pouuoit nullement approcher, tant il en auoit bien reparé & fortifié toutes les aduenues, avec clostures & fortifications de bois, tellement qu'il y pensoit estre en toute seureté, & y esperoit miner Æmylius, & le consumer par longueur de temps & grandeur de despense. Ce pendant Æmylius ne chommoit pas de son entendement, & ne laissoit à tenter & essayer expedient quelconque pour tascher à faire quelque chose: mais uoyant que ses soldards, pour la dissoluë licence, en laquelle on les auoit laissé uiure par le passé, se faschoyent de tant attendre, & entreprenoyent sur l'office du Capitaine general, s'ingerans de dire, que lon deuroit faire telle & telle chose que lon ne faisoit pas, il les en reprit bien aigrement, & leur defendit de ne s'entremettre plus curieusement des choses qui ne leur appartenoyent point, & qu'ilz ne se souciaissent d'autre chose, sinon de se tenir prests, & leurs armes bien en point, pour uaillamment en seruir, & user de l'espee à la Romaine, quand leur Capitaine leur en donneroit le temps & le moyen: & pour les rendre plus uigilans, il uoulut que ceulx qui seroyent du guet y allassent sans armes de long bois, à fin qu'ilz en fussent plus soigneux & plus ententifs à resister au sommeil, quand ilz

n'auroyent dequoy repoulsfer de loing l'ennemy sil les uenoit assaillir . Or ce qui plus traualloit son armee, c'estoit la faulte d'eau douce, pource qu'il en sourdoit bien peu & de bien mauuaise au long du riuage de la mer. Mais Æmylius considerant qu'ilz estoient au pied du mont Olympe, qui est grand & hault, & tout couuert de bois, il coniectura à uoir les arbres si frais & si uerds, qu'il deuoit auoir au dedans quelques sources d'eaux uifues, qui courroyent par dessoubz la terre. Si feit ouurir & cauer plusieurs trous & plusieurs puis au long de la montagne, lesquelz furent incontinent tous remplis d'eau pure & nette, qui parauant estant retenue & serree, coula si tost qu'elle eut des conduits ouuerts & lieux uuides ou s'amasser. Et toutefois il y en a qui nient qu'il y ait au dedas de la terre des amas d'eaux assemblees es endroits dont les fontaines sourdent, & disent que la saillie qu'elles font hors des ueines de la terre, n'est point par une maniere de descouuerture ny de uiolente eruption d'eau, estant ia de longue main toute assemblee, ains qu'elle s'engendre & se concree au lieu & à l'heure mesme qu'elle coule, se tournant la matiere en eau, & en est la matiere une uapeur humide, laquelle s'espeffit & se refroidit par la froideur du dedans de la terre, tant qu'elle en deuient fluide, & coule contre bas : ne plus ne moins, disent ilz, que les mamelles des femmes ne sont pas

pleines de laiçt tout prest, comme seroyent des uases ou lon en auroit mis en reserue, ains conuertissent dedans soymesmes la nourriture que prenent les femmes, en laiçt, que puis apres elles rendent par les bouts : aussi les fonteniers & lieux frais de la terre, dont sourdent les fontaines, n'ont pas des amas d'eaux cachees, ny des receptacles & concautez si capables qu'elles puissent fournir d'eaux toutes prestes, comme qui les tireroit d'une cõserue, à tant de gros ruisseaux & tant de profondes riuieres : mais par leur naturelle froideur & moiteur, ilz espessissent & espraignent la uapeur & l'air si fort, qu'ilz la conuertissent en eau. Voila pourquoy les lieux ou lon caue & ou lon ouure la terre, rendent & iettent plus d'eau par cest attouchement, ne plus ne moins que les mamelles des femmes rendent plus de laiçt quand plus elles sont tirees & tettes, par ce qu'ilz paistrissent mieulx, par maniere de dire, la uapeur qui est dedans, de sorte qu'ilz la conuertissent en humeur coulante : là ou, au contraire, les endroits de terre, ou lon ne fouille point, à faulte d'estre desbouchez & remuez, demeurēt inhabiles & non idoines à engendrer eau, n'ayans pas celle agitation & ce coulement, qui est cause de procreer la liqueur. Toutefois ceulx qui tiennent ceste opinion, donnent occasion à ceulx qui aiment les disputes, de leur opposer au contraire, qu'il faudroit donques semblablement dire,

que es corps des animaux il n'y ait point de sang fait de longue main, & qu'il s'engendre tout soudain quand ilz sont blecez, par la transmutation de quelque esprit, ou de quelque chair qui se tourne promptement en liqueur coulante: & dauantage ilz sont refutez par l'experience ordinaire de ceulx qui fouillent es mines des metaulx, ou qui minét soubs terre pour prendre des places fortes, lesquels quand ilz ont caué bien profond, rencontrent souuentefois es entrailles de la terre des riuieres courantes, l'eau desquelles ne s'engendre pas petit à petit comme il faudroit qu'elle feist, s'il estoit uray que par la presente ouuerture de la terre l'humeur se concreast, ains se desbonde tout à un coup, & uoit on bien souuent qu'en coupant une montagne ou fendant une roche, il en sort tout soudain une grãde quantité d'eau. Mais à tant est-ce assez parlé de ceste matiere: & pour retourner à nostre histoire, Æmylius fut quelques iours là sans bouger, & dit on que lon ne ueit iamais deux si grosses armées si pres l'une de l'autre en si grand repos: toutefois à la fin en recherchant & essayant toutes choses, il fut aduertý qu'il y auoit encore une entree pour penetrer au dedans de la Macedoine, par la contree de la Perrabie, à l'endroit du temple nommé Pythion, & du roc sur lequel il est fondé, ou il n'y auoit point de gardes, ayant plus d'esperance d'y pouuoir passer, par ce que le

pas n'estoit point gardé, que de deffiance pour l'aspreté & malaisance du chemin: si proposa la matiere au conseil, là ou Scipion surnommé Nasica gendre du grand Scipion l'Africain, qui depuis fut un grand personnage, & eut la premiere & principale authorité au Senat, fut le premier qui se presenta & offrit pour conduire ceulx que lon uoudroit enuoyer faire le tour & assaillir les ennemis par derriere: le second fut Fabius Maximus, le filz aîné de Æmylius, qui estoit encore bien ieune, & neantmoins se leua & se presenta fort delibereement, dont Æmylius fut bien ioyeux, & leur bailla non tant de gens comme Polybius en met, ains autant que Nasica luy mesme dit en une siene missiue qu'il escrit à un Roy, ou il recite toute l'histoire de cest exploit. Il y auoit trois mille Italiens des peuples alliez de l'Italie qui n'estoyét point des legions Romaines,* & en la poincte fenestre enuiron cinq mille combatans, oultre lesquels Nasica prit encore six uingts hommes d'armes, & enuiron deux cents Candiots & Thraciens meslez ensemble, de ceulx que Harpalus auoit enuoyez, avec lequel nombre de gens Nasica se partit du camp, & prit son chemin deuers la marine & s'en alla loger au temple de Hercules, comme s'il eust deliberé de faire le tour par la mer pour aller enuironner le camp des ennemis par derriere: mais quand les soudards eurent souppé, & qu'il fut nuict toute

noire, il descouurit aux particuliers Capitaines des bendes la uerité de son entreprise, & les mena toute la nuit au contraire du chemin de la marine, tant qu'il arriua au dessoubs du temple de Pythion, là ou il se logea pour reposer ses gens qui estoyent trauaillez du chemin. En cest endroit la le mont Olympe a de haulteur plus de dix stades, qui font demie lieuë & demy quart, ainsi qu'il appert par un escriteau qu'y a mis celuy qui l'a mesuré en ces uers,

Le mont Olympe à l'endroit ou l'eglise
De Pythius Apollo est assise,
A de haulteur à droit plomb mesuree
Iusques au bout de sa cyme aeree
Depuis le rez de la plaine d'à bas,
Mille deux cents & soixante dix pas,^a
Comme iadis Xenagoras trouua
Filz d'Eumelus, & icy l'engraua,
Prenant congé, Sire Apollo, de toy,
Et te priant le preseruer d'es moy .

Toutefois les Geometriens tienent, qu'il n'y a ny montage plus haulte, ny mer plus profonde, que la longueur de dix stades : si est-ce que cestuy Xenagoras, à mon aduis, ne prit pas ceste mesure à la uolee, ny par estime seulement, ains selon les regles de l'art, & avec les instrumens de Geometrie. Nafica donques passa la nuit en cest endroit là : & ce pendant le Roy Perseus uoyant qu'Æmylius ne se remuoit point du lieu ou il estoit, ne se doubtoit point aussi

: Dix stades & la longueur l'un arpét de terre, moins quatre arpét.

de la uenue qu'on luy brassoit, iusques à ce qu'il y eut un traistre Candiot, qui se desrobant de la troupe par le chemin, luy alla descouurer le tour & circuit que faisoient les Romains, dont il se trouua fort estonné: & toutefois ne remua point encore son camp de là ou il estoit, ains despescha seulemēt un de ses Capitaines nommé Milon avec dix mille estrangiers & deux mille Macedoniens, luy enioignant tresexpressément de faire la plus extreme diligence qu'il luy seroit possible, pour saisir le premier le hault de la montagne. Si dit Polybius que les Romains les allerent charger, qu'ilz dormoyēt encore: mais Nasica escrit qu'il y eut une fort aspre & douteuse rencontre à la cyme de la montagne, & dit notamment qu'un soudard Thracien s'adressa à luy, auquel il donna un coup de iaueline dedans l'estomac, dont il le porta mort par terre, & que finalement les ennemis estans forcez, & le Capitaine mesme Milon festant honteusement mis à fouir en fayon sans armes, il le suyuit sans plus de danger, & descendit avec toute sa troupe en la plaine à sauueté. Cela estant ainsi aduenu, Perseus se deslogea à grand haste du lieu ou il estoit, & se retira arriere tout effroyé uoyant son esperance confuse, & ne sachant ou il en estoit: toutefois si falloit il necessairement, ou qu'il s'arrestast là deuant la uille de Pydne, pour y prédre le hazard de la bataille, ou bien qu'il departist

son armee par les uilles & fortes places, en receuant la guerre dedans son païs, laquelle y estant une fois entree n'en pouuoit plus sortir sans grand meurtre & grande effusion de sang: à l'occasion dequoy ses amis luy conseilloyent, qu'il choisist plus tost le hazard de la bataille, en luy alleguant qu'il estoit plus fort de nombre d'hommes, & que les Macedoniens s'esuerturoyent de faire tout l'effort qu'ilz pourroyent, attendu qu'ilz auroyent à combattre pour sauuer leurs femmes & leurs enfans, & qu'ilz auroyent leur Roy present, & uoyant le deuoir que chacun d'eulx feroit, & combatant luy mesme en personne pour eulx. Le Roy meü de ces remonstrances, se resolut & prepara pour essayer la fortune du combat. si planta son camp, considera l'assiette des lieux à l'environ, & departit les charges entre ses Capitaines, en deliberation d'aller tout chaudement charger les ennemis ainsi qu'ilz arriueroyent. Or estoit le lieu & le païs tel, qu'il y auoit de la plaine pour y dresser un bataillon de gens de pied armez, qui demande la campagne rase & unie: & si y auoit des mottes & coustaux tenans les uns aux autres, qui estoient propres pour gens de traicts, nuds, ou armez à la legere, pour se retirer quand ilz se sentiroyent presséz, & pour aller environner à couuert les ennemis par derriere: & si y auoit deux petites riuieres, Æson & Leucus, qui couroyent à trauers: lesquelles,

quelles , encore que pour lors elles ne fussent
 pas gueres profondes, à cause que c'estoit sur la
 fin de l'Esté , estoient neantmoins pour dōner
 encore quelque empeschement aux Romains .
 Et quant à Æmylius , si tost qu'il se fut reioint
 avec Nasica , il tira droit marchant en bataille
 contre ses ennemis : mais il apperceut de loing
 la bonne ordonnance de leur bataille , & le
 grand nombre des combatans qu'il y auoit .
 Dont il s'emerveilla , & fit arrester son armee
 tout court , pensant un petit en soy mesme à ce
 qu'il auoit à faire : & adonc les ieunes hommes
 ayans charge soubs luy , desirans que lon com-
 batist uistemēt, s'en uindrent deuers luy le prier
 qu'il ne dilayast point : mesme Nasica, entre au-
 tres, se confiant en la prosperité qu'il auoit eue
 à la premiere rencontre. Æmylius luy respon-
 dit en riant : Je le feroye ainsi si i'estoye en ton
 aage : mais plusieurs uictoires que i'ay gaignees
 par le passé , m'ayans enseigné les faultes que
 commettent les uaincus , me defendent d'aller
 ainsi chaudement sans reposer mes gens, qui ne
 font qu'arriuer , assaillir une armee toute régee
 & ordonnee en bataille . Ayant fait ceste re-
 spōse , il commanda que les premieres bendes,
 qui estoient ia en ueuē des ennemis , se rengaif-
 sent en bataille , monstrans à l'ennemy conte-
 nance de uouloir combattre : & que ce pendant
 ceulx qui estoient derriere se logeassent , &
 fortifiassent le camp . Ainsi se retournans touf-

iours de main en main ceulx qui estoient les plus prochains des derniers, les uns apres les autres, on ne se donna garde qu'il eut peu à peu desfait sa bataille, & logé tous ses gens dedans son camp fortifié, sans bruit ny tumulte quelconque, & sans que les ennemis s'en apperceussent. Mais la nuict uenue, quand chacun eut souppé, ainsi que lon se uouloit mettre à dormir & reposer, la Lune qui estoit au plein, & desia haulte esleuee, se commença à obscurcir & noircir, & à changer de toutes sortes de couleurs en perdant sa lumiere, iusques à ce qu'elle disparut & eclipsa entierement. Si commencerent adonc les Romains à faire bruire des bassins & autres uaisseaux de cuyure, comme est leur façon de faire en tel accident, cuidans par ce son la rappeler & faire reuenir sa lumiere, en haulsant quand & quand uers le ciel force flambeaux ardents, & force tisons de feu. Mais les Macedoniens au contraire ne firent rien de semblable dedans leur camp, ains furent tous esprits d'une frayeur & horreur: & courut incontinent un bruit sourd parmy le peuple, que ce signe celeste signifioit l'eclipse du Roy. Quant à Æmylius, encore qu'il ne fust pas du tout ignorant des differences des eclipses, & qu'il eust bien ouy dire qu'elles se font par ce que la Lune, en faisant son cours ordinaire à l'entour du monde, apres certaines reuolutions de temps uient à entrer en l'ombre

du rond de la terre, dedans laquelle elle demeure cachee, iusques à ce qu'ayant passé la région obscurcie par ceste ombre, elle uient à recouurer sa clarté, qu'elle prend du Soleil: ce neantmoins estant homme religieux & deuot enuers les Dieux, si tost qu'il apperceut la Lune retournee en sa clarté pure & nette premiere, il luy sacrifia unze ueaux, & le lendemain au poinct du iour faisant sacrifice de bœufs à Hercules, il ne peut onques auoir en uingt bœufs qu'il immola, signes aucuns qui luy promeissent rien de bon: mais au uingt & unieme il en eut qui luy promeirēt la uictoire, en defendant. Parquoy apres auoir uoué un solennel sacrifice de cent bœufs à Hercules, avec des ieux de combats publiques, il ordonna à ses Capitaines qu'ilz teinssent leurs gens tous prests en ordre pour combattre: & alloit ainsi gaignant le temps pour attendre que le Soleil declinast apres midy, à fin que les Romains, qui estoient tournezz uers l'Orient, ne l'eussent, en combatant, au uisage. Ce pendant il se reposoit dedans sa tente, laquelle estoit toute arriere ouuerte du costé qui regardoit en la plaine, ou estoit le camp des ennemis. Quand ce uint sur le soir, pour faire que les ennemis commenceassent à assaillir, les uns disent qu'il usa d'une telle ruse: qu'il feit chasser uers eulx un cheual desbridé, & qu'il y eut quelques uns des Romains qui coururent apres, comme pour le reprendre, & que cela fut

cause d'attacher l'escarmouche : les autres disent, que les soudards Thraciens estans soubz la charge du Capitaine Alexandre, chargerent quelques fourrageurs des Romains qui portoyent du fourrage au camp, duquel il sortit environ sept cents Lyguriens qui coururent uistement à la rescouffe, & que suruenant tousiours renfort aux uns & aux autres, finalement la bataille entiere s'en ensuyuit. Parquoy Æmylius, comme sage pilote, preuoyant par l'esbranlement de ceste escarmouche, & l'emeute des deux camps, quelle seroit la tourmente de la bataille, sortit adonc hors de sa tente, & passant au long des bendes les alloit enhortant & preschant de bien faire leur deuoir. Ce pendant Nasica picquant iusques au lieu ou se faisoit l'escarmouche, apperceut l'armee des ennemis marchans en bataille tous prests à chocquer. Les premiers qui marchoyent, estoient les Thraciens, qui luy semblerent, à ce qu'il escrit luy mesme, fort effroyables à uoir : car c'estoyent de grands & puissans hommes, qui portoyent deuant eulx des escus de fer bien fourby & luisant, les iambes armees de greues, & de cuissots, uestus de hocquetons noirs, & branlans sur leurs espauls droittes des pesantes & massiues halebardes. A costé de ces Thraciens marchoyent puis apres les autres estrangers prenans soude du Roy, accoustrez & armez diuersement, pource que c'estoyent gens

ramassez de toutes pieces, & parmy eulx y auoit des Pæoniens meslez . Le troisieme Squadron estoit des naturelz Macedoniens, tous hommes choisis, tant en fleur d'aage, qu'en preuue de hardiesse, armez de beaux harnois dorez, & par dessus de beaux hocquetons de pourpre tous neufs : au dos desquelz uenoient puis apres à se monstrier hors du camp, les uieilles bendes aux escus de cuyure, qui remplirent toute la plaine d'un esclair d'acier & d'une lueur de cuyure: & toutes les montagnes & les coustaux d'alenuiron retentirent du bruit & de la clameur de tant de combatans, qui s'entre-donnoyent courage les uns aux autres: & en ceste ordonnance marcherent si fierement, de si grande ardeur, & avec telle uistesse, que les premiers qui furent tuez en la rencontre, tumberent morts à demy quart de lieuë seulement du camp des Romains . Estant donques ia la charge & meslee commencee, Æmylius, qui accourut au front de sa bataille, trouua que les Capitaines Macedoniens qui estoient aux premiers rens, auoyent ia planté les fers de leurs picques dedans les targes & pauois des Romains, de maniere que les Romains ne les pouuoient atteinre avec leurs espees: & aperceut aussi, que les autres Macedoniens ayans tiré deuant eulx leurs boucliers qu'ilz porroyent derriere sur leurs espaules, baissèrent semblablement les picques tous à un coup, &

en donnerent dedans les grandes targes des Romains: & considerant de quelle force estoit celle haye de pauois rengez de si pres qu'ilz se touchoyent les uns les autres, & l'horreur que faisoit à uoir un front de bataille dont il sortoit tant de fers de piques & si drues, il s'en trouua plus estonné & plus effroyé que de chose qu'il eust onques ueuë: ce que depuis il racompra par plusieurs fois & en plusieurs lieux, confessant la frayeur qu'il en auoit eue, & ce qu'il y auoit ueu: mais toutefois il la sceut bien dissimuler à l'heure: & passant au long des compagnies à cheual, sans corps de cuirace ny armet en teste, monstra une chere gaye & deliberee à ceulx qui combatoyent. Mais au contraire le Roy de Macedoine, ainsi qu'escrit Polybius, aussi tost que la bataille fut commencee se retira dedans la uille de Pydne, soubz couleur de s'en aller faire un sacrifice à Hercules: lequel n'a point agreables les lasches sacrifices des couards, ny n'exaulce point leurs prieres, attendu qu'elles sont desraisonnables: car il n'est point raisonnable, que celuy qui ne tire point, ataigne au blanc, ne que celuy qui ne demeure point ferme en bataille, emporte la uictoire, ny que celuy qui ne fait rien, ait du bien, ny que le meschant soit heureux & prospere. C'estoit aux prieres d'Æmylius que les Dieux fauorisoient, pource qu'il leur demandoit la uictoire en tenant les armes au poing, & en combatant les

inuoquoit à son secours . Toutefois il y a un Posidonius qui se dit auoir esté de ce temps la , & qui plus est , s'estre trouué sur le fait , & a escrit une histoire contenant plusieurs liures des faitcs & gestes du Roy Perseus , là ou il dit que ce ne fut pas par lascheté de cuer , ny soubz couleur d'aller sacrifier à Hercules , que Perseus s'en alla de la bataille , ains pource que le iour de deuant il auoit receu un coup de pied de cheual en la cuisse , & qu'encore qu'il ne se peust pas bié aider , & que tous ses amis essayassent de le destourner qu'il ne se trouuast au cōbat , il se feit neantmoins amener un cheual de ceulx qu'il cheuauchoit en allât par les champs , sur lequel il monta , & se trouua en la bataille tout desarmé , ou il luy fut tiré un nombre infiny de traiçts de toutes sortes par les deux flancs : entre lesquelz il y eut un coup de iauelot qui l'assena , mais ce fut du trauers , non pas de la poincte , & luy donna au costé gauche , en glissant par telle roideur toutefois , qu'il luy froissa tout son saye , & meurtrit la chair au des-soubz , de maniere que la marque y demoura bien longuement depuis . uoila que dit ce Posidonius à la defense & descharge de Perseus . Estans dōques les Romains arrestez tout court par la bataille Macedonique , sans qu'ilz la peussent aucunement forcer , il y eut un Capitaine des Peligniens nommé Salius , qui prit l'enseigne de sa bende , & la ietta dedans la

foule des ennemis : & adonc ces Peligniens se ruèrent tous ensemble de grande impetuosité en cest endroit , pource que tous Italiens estiment estre une trop grande honte & un grand crime à gés de guerre, de perdre ou abandonner leur enseigne : si y eut d'une part & d'autre des efforts merueilleux en ce lieu la: car les Peligniens taschoyent à couper avec leurs espees les picques des Macedoniens, ou à les repoulser arriere avec leurs grands escus, ou bien à les destourner & entreouuir , en les prenant avec les mains . Mais les Macedoniens au contraire, tenans leurs picques fermes à deux mains, en perçoient d'oultre en oultre ceulx qui s'approchoyent trop d'eulx, sans que la targe ny le halcret peussent resister à la uiolence & faulsee du coup de picque , & portoyent par terre les pieds contremont ces Peligniens & Terraciniens, qui sans raison quelconque, cōme bestes effarouchees, falloyét eulx mesmes enfermer & se jettoyent la teste baissée à la mort toute certaine , de maniere que leur premier reng y fut entierement desfait: à l'occasion de quoy ceulx de derriere reculerent un petit, nō qu'ilz fouissent les doz tourne à ual de roupte , ains se retirerent en reculant uers le mont qui se nomme Olocrus . Ce que uoyant Æmylius, ainsi comme escrit Posidonius , deschira de courroux sa cotte d'armes , à cause que de ses gens les uns reculoient , les autres n'ozoyent affronter ce

bataillon de Macedoniens, lequel estoit si bien ferré de tous costez, & si bien remparé d'une cloison de picques, qui presentoyent les fers en tout sens qu'ó l'eust sceu prédre, qu'il estoit entieremét impossible de pouuoir entrer dedans ny en approcher seulement : toutesfois pource que la campagne n'estoit pas bié par tout plaine ny unie, le bataillon, qui estoit large de frót, ne peut pas bié tousiours entretenir celle haye continuee de boucliers ioignans l'un à l'autre, ains fut force qu'elle se rompist & entreouurist en plusieurs endroits, comme il aduient en toutes grandes batailles, seló les diuers efforts des combatans, qu'en un endroit elles se poulsent en auant, & en un autre elle s'enfonceét & reculent en arriere: parquoy Æmylius saisissant soudain ceste occasion, departit ses gens par petites troupes, & leur enioignit qu'ilz se iettassent habilement es entredeux, & qu'ilz occupassent les espaces qu'ilz apperceuroyent uuides au front du bataillon des ennemis, & qu'ilz fattachassent ainsi à eulx, non point par une charge continuee d'un tenant par tout, ains ça & là par diuerses troupes & en plusieurs endroits. Æmylius donna cest aduertissement aux particuliers Capitaines & Chefs des bendes, & les Capitaines de main en main à leurs soudards, qui le sceurent bien executer : car ilz se coulerent incontinent es endroits ou ilz ueirent places uuides, & y estans une fois entrez,

affaillirēt les Macedoniēs les uns par les flancs, ou ilz estoyēt nuds & desarmez, & les autres par derriere, de sorte que la force de tout le corps du bataillon, qui consiste à se tenir biē ioinct & chocquer tout ensemble, quand il fut ainsi entreouuert se perdit incontinent. Et au demourant, quand ce uint à combatre d'hōme à hōme, ou de petite troupe contre autre petite troupe, les Macedoniens avec leurs petites espees courtes uenoyent à frapper sur les grandes targes des Romains qui estoyent fortes, & qui les couuroyent tout le corps iusques aux pieds: & au contraire, il falloit qu'ilz sousteinssent avec leurs boucliers, qui estoyent petits & foibles, les coups des espees fortes & massiuues des Romains, tellement que tant pour leur pesanteur, que pour la force dont elles estoyent rameenees, il n'y auoit bouclier ny harnois qu'elles ne faulsassent, & penetroyent iusques au uif: au moyen dequoy ilz ne peurent pas longuement resister, ains se tournerent incontinent en fuitte. Mais quand ce uint au squadron des uieux routiers Macedoniens, là fut le plus fort de la meslee, ou lon dit que Marcus Caton, filz du grand Caton & gendre d'Æmylius, en faisant toutes les preuues de sa personne qu'il est possible à un uaillant homme de faire, y perdit son espee qui luy tomba du poing: & comme ieune homme de grād cueur, qui auoit esté biē nourry en bōne discipline, & qui pour res-

sembler à son pere, si excellent personnage que chacun scait, auoit à monstrier de grâds actes & exemples de uertu, il pensa qu'il ualoit mieulx mourir que de souffrir que luy uiuant les ennemis eussent aucune despouille de luy. Si courut incontinent parmy l'armee Romaine, pour y trouuer aucuns de ses amis, ausquelz il compta le cas qui luy estoit aduenu, & les pria de luy aider à recouurer son espee. ce qu'ilz feirent: & estans bonne troupe de hardis & uail-lans hommes, se ruerent sur l'endroit des ennemis, ou il les conduisit, par tel effort & d'une telle impetuosité qu'ilz fendirent la presse, & avec grand meurtre & grande effusion de sang, feirent tant qu'ilz esclarcirent la place: puis quand elle fut toute uuide, se meirent à chercher l'espee, laquelle ilz retrouuerent à la fin, à grande peine, soubz des monceaux d'autres armes & de corps morts, dont ilz demenerent grande ioye. Et en chantant un chant de uictoire allerent de rechef plus furieusement que deuant charger sur ceux des ennemis qui faisoÿt encore teste, iusques à ce que finablement les trois mille Macedoniens d'eslite combatans uaillamment iusques au dernier soupir, sans iamais abandonner leurs rens, furent tous mis en pieces: apres la desfaitte desquelz fut aussi faite une grande boucherie des autres qui fouyoyent, tellement que toute celle plaine, & le pied des montagnes d'alenuiron, en fu-

rent tous couuerts de morts , & le lendemain de la bataille quand les Romains passerent la riuere de Leucus , ilz la trouuerēt encore toute teinte de sang: car on dit qu'il mourut en ceste bataille plus de uingt & cinq mille hōmes, & n'y en eut du costé des Romains que six uingts tuez, comme dit Posidonius, ou comme l'escrit Nasica, que quatre uingts seulement : & pour une si grande desfaitte elle fut merueilleusement tost decidee & promptement executee: car ilz commencerent à combattre enuiron les trois heures apres midy, & eurent gaigné la uictoire deuant quatre, & tout le reste du iour ne feirent que chasser les fuyans iusques à bien sept lieuës & demie loing du lieu ou auoit esté la rencontre, de maniere qu'il fut bien auant en la nuict deuant qu'ilz fussent de retour en leur camp . Si furent tous les autres recueillis & receus à grande feste & grande ioye par leurs seruiteurs, qui leur allerent au deuant avec torches & flambeaux allumez, & les menerent en leurs tentes toutes luisantes de feuz de ioye, & couronnees de festons & de chapeaux de lierre & de laurier, excepté le Capitaine general qui estoit en grand esmoy, pource que de ses deux filz qu'il auoit amenez quand & luy en ceste guerre, le plus ieune ne se trouuoit point, qui estoit celuy qu'il aimoit le mieulx, pource qu'il le uoyoit de plus excellente nature que nul autre de ses freres: car il estoit desia cou-

rageux & conuoiteux d'honneur à merueilles, encore qu'il ne feist gueres que sortir lors de son enfance. Si le tenoit Æmylius ia pour tout perdu, cuidant qu'à faulte d'experience de la guerre, & par une ardeur de ieunesse il se seroit ietté trop auant en la presse des ennemis combatans. Si fut incontinent tout le camp aduertty du dueil qu'en menoit Æmylius, & de la destresse en laquelle il en estoit. Au moyé dequoy les Romains qui festoyent mis à soupper, se leuerent tous de table, & s'en coururent à la clarté des torches, les uns uers la tête d'Æmylius, les autres hors du camp pour chercher entre les morts filz l'y recognoistroyét point : & estoit tout le camp triste & morne, & la plaine & coustaux d'alenuiró retentissoyent des cris de ceux qui appelloyent à haulte uoix Scipion: car il auoit des ce commencement un naturel doué & composé de toutes les bonnes & grandes parries qui sont requises en un Capitaine & sage gouverneur de chose publique, autant & plus que nul autre ieune homme de son temps. A la fin comme lon n'auoit desia presque plus d'esperance qu'il reuinist, il retourna de la chasse des ennemis avec deux ou trois de ses familiers seulement, souillé de sang tout frais, comme un gentil leurier acharné apres la beste, festant laissé porter au loing à l'aïse de la uictoire. C'est celuy Scipion qui depuis ruina les deux citez de Carthage & de Numance, & qui fut le plus

grand homme de guerre & le plus uailant Capitaine des Romains en son temps, & qui eut plus d'autorité & de reputation. Ainsi la fortune dilayant iusques à un autre temps l'exécution de l'enuie qu'elle porta à un si noble exploit, souffrit pour lors Æmylius iouir entiere-
mēt du plaisir de sa uictoire:& quāt à Perseus, il s'enfouit premieremēt de la uille de Pydne en celle de Pelle, avec sa cheualerie, qui festoit presque toute sauuee: à l'ocasiō dequoy les gēs de pied qui estoyēt eschappez de uistesse, les recontrans par les chemins les appelloyent traistres, lasches & meschans, &, qui pis est, en abbatoyent quelques uns de dessus leurs cheuaux en terre, & les batoyēt à bon esciāt: quoy uoyāt Perseus, & craignant que ceste mutinerie ne se tournast cōtre luy mesme, il destourna son cheual du grād chemin, & despouilla sa cotte d'armes de pourpre qu'il porta deuant luy, & prit son bandeau royal en sa main, de peur qu'il ne fust cogneu à ces enseignes: puis à fin qu'il peust plus aisement parler à ses amis par le chemin, il descendit à pied, & mena son cheual par la bride: mais de ceulx qui estoient demourez autour de luy, l'un faisoit semblant de relier la courroye de son soulier qui estoit desliee, l'autre de uouloir guayer son cheual, l'autre boire, tant qu'ilz demourerēt tous derriere les uns apres les autres, & s'en fouirēt, ne redoubtās pas tant la fureur des ennemis, que la cruaulté de

leur Roy, lequel estât troublé de ses malheurs, cherchoit à reietter la coulpe de sa desfaitte sur tous autres que sur luy. Estant donques entré la nuit dedans la uille de Pella, il y eut deux de ses tresoriers & superintendans de ses finances, Euctus & Eudæus, qui luy uindrent au deuant, & en parlant librement à luy hors de saison, prirent la hardiessé de luy dire qu'il auoit fait de grandes faultes, & à luy conseiller ce qu'il auoit à faire, dont il se courroucea si aigrement, qu'il les tua tous deux à coups de poignard, de sa propre main : ce qui fut cause que tout le reste de ses seruiteurs & amis l'abandonna, & ne demoura plus autour de luy qu'Euan-der Condiot, Archedamus Ætolien, & Neon Bœotien. Et quant aux simples souldars, il n'y eut que les Candiots qui le suyuirét, encore ne fut-ce pas pour amitié qu'ilz luy portassent, ains pour l'amour de son or & de son argét, ne plus ne moins que les abeilles demeurent en leurs ruches à cause de la cire & du miel qui y sont: car il trainnoit apres luy une grande cheuance, & leur abandonna à piller quelque uaiselle & meubles d'or & d'argent, iusques à la ualeur de bien trente mille escus. Mais arriué qu'il fut en la uille d'Amhipolis premierement, & puis en celle d'Alepse, apres que sa frayeur fut un peu rassise, il retumba de rechef en la maladie qu'il auoit de longue main enracinee & nec avec luy, c'estoit l'auarice & la chicheté: car il se

plaignit à ceulx qu'il auoit autour de luy, de ce qu'il auoit abandonné à piller sans y penser, à ses soudards Candiots quelques uases d'or qui auoyent anciennement esté à Alexandre le grand, & pria tres instamment les larmes aux yeux ceux qui les auoyent, qu'ilz les uoulassent eschanger avec de l'argent comptant. Or ceulx qui cognoissoyent bien sa nature, iugerét bien incontinent que c'estoit une ruze & menterie Candiote, dõt il cuidoit affiner des Candiots: mais ceulx qui le creurent, & qui luy rendirent ce qu'ilz auoyent de uaisselle, la perdirent: car il ne leur en paya iamais depuis rien: & ainsi gagna sur ses amis la ualeur de dix huit mille escus, q̄ ses ennemis biē tost apres luy deuoyent oster & prendre. Et avec cela passa en l'isle de Samothrace, là ou il f'alla rendre en la franchise & sauuegarde du tēple de Castor & de Pollux. Lon dit que de toute ancienneté les Macedoniens ont aimé naturellement leurs Roys: mais lors uoyās que tout leur appuy estoit brisé & rompu, le cueur leur faillit aussi tout à un coup: car ilz se rendirent tous à Æmylius, & le feirent seigneur de toute la Macedoine entierement en deux iours, ce qui semble confirmer le dire de ceulx qui attribuent les faicts & gestes d'Æmylius à la faueur de fortune. A quoy f'accorde & se conforme aussi un accident qui luy aduint en la uille d'Amphipolis, que lon ne sçauroit referer aillcurs qu'à la faueur des Dieux:

Dieux: car ainsi qu'il sacrifioit, estant tout le sacrifice commencé, la foudre tomba du ciel, qui alluma le bois estât sur l'autel, & sanctifia tout le sacrifice. Mais encore fait plus à esmerueiller le miracle de la renommee: car quatre iours apres la desfaitte de Perseus, & la prise de la uille de Pelle, ainsi cōme le peuple de Rome estoit aux lices à regarder les ieux de la course des cheuaux, il se leua soudainement un bruit à l'entree des lices ou se faisoit l'esbatemēt, qu'Æmylius auoit desfait en une grosse bataille le Roy Perseus, & auoit conquis, pris & subiugué toute la Macedoine. Ceste nouvelle fut incontinent esbandue parmy tout le peuple, dont il sensuyuit une feste & resiouissance publique, avec cris de ioye & batemens de mains, qui durerent tout ce iour la par toute la uille de Rome. Depuis on rechercha soigneusement dont estoit procedé ce bruit, & n'en trouua lō point de certain autheur, ains disoit egaleement chacun qu'il l'auoit ouy dire, tellement que pour lors ce bruit sen alla en fumee: mais peu de iours apres ilz en eurent lettres & nouuelles certaines, qui les feirēt esbahir plus que iamais, dōt pouuoit estre uenu cest auantcoureur mesfager qui auoit semé ceste nouvelle, laquelle ne pouuoit estre lors naturellement que controuuee, & neantmoins depuis estoit apparu qu'elle contenoit uerité. Il se lit aussi semblablement d'une bataille qui fut dōnee en Italie pres de la

riuiere de Sagra, que le mesme iour la nouvelle en fut sceuë au Peloponese: & que d'une autre, au cas pareil, qui fut donnee en Asie contre les Medois, deuât la uille de Mycale, la nouvelle en uint le mesme iour au cãp des Grecs estãt deuant la uille de Plataes. Et en celle grande iournee ou les Romains desfeirēt les Tarquins & l'armee des Latins, incontinent apres le faict on ueit deux beaux grands ieunes hõmes uenãs tout freschement du camp, qui apporterent la nouvelle de la uictoire à Rome, & estima lon que ce fussent Castor & Pollux. Le premier qui parla à eulx sur la place, deuât la fonteine, là ou ilz refreschissoyēt leurs cheuaux tous trempz de sueur, leur dit qu'il fesmervelloit comment ilz pouuoient auoir si tost apporté ceste nouvelle, & eulx en riant luy manierent tout doucemēt la barbe avec les deux mains, & sur le champ le poil qui deuant en estoit noir, luy deuint blond. Ce miracle fait, que lon adiousta foy au raport qu'en fait ce personnage, qui depuis en fut surnommé *Ænobarbus*, c'est à dire, ayant barbe blonde, comme cuyure. Vn autre pareil cas aduenu de nostre temps rend toutes telles nouvelles croyables: car quand Antonius se rebella contre l'Empereur Domitian, la uille de Rome en fut en grand trouble, pource que lõ y attēdoit une grosse guerre du costé de l'Allemagne: mais en cest effroy, il se leua soudainement de soy mesme un bruit de uictoire parmy

le peuple, & courut la nouvelle par toute Rome qu'Antonius luy mesme auoit esté tué, & son armee tellemēt desfaicte qu'il n'ē estoit du tout rien demouré. Si en fut le bruit si grād que plusieurs des principaux de la uille y adiousterēt foy, & en sacrifierēt aux Dieux, en leur rendant grāces de la uictoire: mais quād on uint à enquerir qui en auoit esté le premier autheur, il ne l'en trouua point, pource q' l'un l'alloit tousiours reiettāt à l'autre, tāt qu'à la fin elle falloit perdre en la multitude infinie du peuple, comme en une mer uaste ou il n'y a ne fond ne riue, & n'y trouua lon iamais commencement ny fondemēt assure: parquoy le bruit s'en escoula aussi tost hors de Rome, cōme incertainemēt il y estoit entré: mais toute fois s'estant Domitian mis en chemin pour aller à ceste guerre, il rencontra lettres & messagers qui luy apportoyent nouvelles certaines de la uictoire, & trouua lō qu'elle auoit esté gaignee le mesme iour que le bruit s'ē estoit leué à Rome, cōbiē que les lieux soyēt distās l'un de l'autre de plus de douze cēt cinquāte lieues. Il n'y a personne de nostre tēps qui ne sache cela. Mais pour retourner à nostre histoire, Cn. Octavius lieutenant d'Æmylius en l'armee de mer alla poser l'ancre en l'isle de Samothrace, là ou il ne uoulut point tirer par force Perseus hors de la franchise ou il estoit, pour la reuerence des Dieux Castor & Pollux: mais l'assiegea tellemēt, qu'il n'eust sceu eschap-

per ny s'enfouir par mer hors de l'isle: toutefois si auoit il trouué moyen de gagner secretement un Candiot nommé Oroandes, qui auoit un brigantin, & fait marché avec luy qu'il l'enleueroit une nuict avec son argët: mais le Candiot luy ioua un tour de ruze Candiote: car ayant une nuict receu dedans son uaisseau le meuble precieux & l'or & l'argent de ce Roy, il luy manda qu'il ne faillist pas de se rendre la nuict ensuyuant sur le port à l'endroit du tēple de Ceres, avec sa femme, ses enfans & les seruiteurs dōt il ne se pourroit passer seulement, mais si tost que le soir du lendemain fut uenu, il se meit à la uoile. Si fut chose pitoyable que ce qu'il conuint alors faire & souffrir à Perseus: car il se deualla la nuict avec des cordes par une petite fenestre estroite le long de la muraille, & non seulement luy, mais aussi sa femme, & ses petits enfans, qui n'auoyēt iamais essayé que c'est de fuitte ny de trauail quelconque, & ietta un soufpir encore plus pitoyable quād quelcun qui auoit ueu Oroandes le Candiot ia cinglant en haulte mer, luy dit, ainsi qu'il se promenoit le long du port, qu'il auoit fait uoile: car le iour commenceoit desia à poindre, & se uoyāt destitué de toute autre esperance d'eschapper, se print à fouir deuers la muraille, & regaigner la franchise avec sa femme, premier que les Romains qui l'apperceurent le peussent atteindre à la course. Quant à ses enfans il les auoit luy

mesme baillez en garde à un nommé Ion, dont il auoit autrefois esté amoureux, qui luy fait lors une grande trahison: car il les liura aux Romains: & en ce faisant fut l'une des principales causes qui le contraignit, ainsi comme une beste à qui lon a osté ses petits, de se rendre, & mettre aussi sa personne propre entre les mains de ceulx qui les auoyent. Or se fioit il principalement en Nasica, & pource le demāda quand il se uoulut rendre: mais on luy respondit qu'il n'estoit pas là, dont il se prit à lamenter sa miserable fortune en toute chose: & à la fin apres auoir consideré la necessité qui le contraignoit, il se rendit entre les mains de Cneus Octauius, là ou il dōna claiemēt à cognoistre qu'il auoit en luy un autre uice encore plus lasche & plus uil que l'auarice, c'estoit faute de cueur & crainte de mourir, par laquelle il se priua luy mesme de la cōpassion & de commiseration des autres, qui est le seul poinct q̄ la fortune ne peut oster aux affligez quand ilz ont le cueur bon: car il requit qu'on le menast au Capitaine general Æmylius, lequel se leua de son siege quād il le ueit uenir, & luy alla au deuant avec ses amis, ayant les larmes aux yeux, comme au deuant d'un grand personnage tumbé par fortune de guerre & par la uolūtē des Dieux, en une pitoyable calamité. Mais luy à l'opposite se porta fort honteusement & laschement: car il s'alla prosterner à ses pieds en terre le uisage con-

tre bas, & luy embrassant les genoulx se laissa
eschapper de la bouche des paroles si lasches,
& de si uiles prieres, que Æmylius mesme ne les
peut endurer, ny ouir, ains le regardant d'un
uifage malcontent & marry, luy dit : Pauure
homme que tu es, cōment uas tu ainsi deschar-
geant la fortune de ce dont tu la pouuois char-
ger & accuser à ta descharge, en faisant des cho-
ses, pour lesquelles on estimera que tu ayes biē
merité le malheur ou tu es maintenant, & in-
digne de l'honneur & du bien que tu auois par
cy deuât. Et pourquoy uas tu ainsi rauallant ma
uictoire, & diminuât la gloire de mes faictz, en
te monstrant homme de si lasche cuer que ce
ne me fera pas grand honneur de t'auoir uain-
cu, attendu que tu n'estois pas digne aduersaire
des Romains? La magnanimité en quelque en-
nemy qu'elle soit, est tousiours reuerée des Ro-
mains : mais la lascheté, quoy qu'elle prospere
& soit heureuse, est tousiours & de tous mes-
prisee. Ce neantmoins encore le releua il : & le
prenāt par la main, le bailla en garde à Tubero,
puis se retira dedans sa tente, la ou il mena quād
& luy ses enfans, ses gendres & autres person-
nes de qualité, mesmement les ieunes. Et se-
stant assis, demoura longuement pensif en luy-
mesme biē profondemēt sans mot dire, de ma-
niere q̄ tous les assistens s'en esbahissoyēt : mais
à la fin il cōmencea à entrer en propos, & à leur
discourir de la fortune & de l'incertitude des

30 choses humaines, en disant: Y a il donques
 30 homme maintenant, mes amis, qui ayant la
 30 fortune à gré, se doye enorgueillir & se glo-
 30 rifier de la prosperité de ses affaires, pour auoir
 30 conquis & subiugué une prouince, une uille
 30 ou un royaume, & non plus tost redoubter
 30 l'instabilité de la fortune? qui nous mettant o-
 30 res deuant les yeux à nous, & à tous ceulx qui
 30 manient les armes, un si notable exemple de la
 30 commune imbecillité des hommes, nous en-
 30 seigne à penser qu'il n'y a rien de ferme ny de
 30 perdurable en ce monde. Car en quel temps
 30 se doyuent les hommes asseurer, ueu que quād
 30 ilz sont uenus au dessus des autres, c'est lors
 30 qu'ilz sont contraints de plus redoubter la for-
 30 tune, & mesler de la doute & deffiance parmy
 30 la ioye de la uictoire, s'ilz ueulent sagement cō-
 30 siderer le cours ordinaire de la fatale destinee
 30 qui tourne cōtinuellement, donnāt faueur tan-
 30 tost à l'un & tātost à l'autre? Vous uoyez cōme
 30 en un momēt d'heure nous auōs abbatu & mis
 30 soubs noz pieds la maison d'Alexandre le grād,
 30 qui a esté le plus puissant & le plus redoubté
 30 prince du monde: uous uoyez un Roy, qui na-
 30 gueres estoit, suyuy & accōpagné de tāt de mil-
 30 liers de combatans à pied & à cheual, mainte-
 30 nāt reduit à telle extremité de misere, qu'il faut
 30 qu'il reçoynie iour à iour son boire & son man-
 30 ger par les mains de ses ennemis. Deuons nous
 30 donques, nous autres, auoir plus de fiāce qu'el-

» le nous doyoue non plus demourer tousiours fa-
 » uorable en noz affaires: certes nenny . Pourtāt,
 » ce bien consideré, uous deuez, uous autres ie-
 » nes gens, uous humilier, & refrener celle folle
 » fierté & superbe insolence, que uous auez prise
 » pour auoir gaigné ceste uictoire, pensans touf-
 » iours à l'aduenir, & attendans à quelle fin & à
 » quelle issue la fortune cōduira l'ēuie de la pro-
 » sperité presente . Ainsi leur parla, cōme lon dit,
 » *Æmylius*, refrenāt avec ces remōstrances & au-
 » tres semblables, la brauerie insolente de la
 » ieunesse, ne plus ne moins que avec le mors
 » & la bride de la raison . Puis cela fait il logea
 » son armee es garnisous pour la refreschir &
 » refaire : & ce pendant luy s'en alla uisiter la
 » Grece en se donnant une recreation honora-
 » ble, & semblablement humaine & liberale : car
 » en passant par les uilles, il soulageoit le peuple,
 » il reformoit le gouuernemēt de la chose publi-
 » que, & leur faisoit tousiours quelque present,
 » donnant aux uns des blez de ceulx que le Roy
 » *Perseus* auoit amassez pour la guerre, aux autres
 » des huiles: car il s'en trouua si grande prouision
 » que plus tost y eut faulte de gens à qui en don-
 » ner, & qui en uoulussent receuoir, que de quoy
 » donner, tant il y en auoit . Et en passant par la
 » uille de *Delphes*, il y ueit un grād pillier quarré
 » de pierres blanches, que lon auoit basty pour y
 » mettre dessus l'image du Roy *Perseus* d'or mas-
 » sif : il commanda que lon y meist la siene, disant

20 qu'il estoit raisonnable, que les uaincus cedas-
 21 sent & quitrassent la place aux uainqueurs : &
 en la uille de Olympe, en uisitant le temple de
 Jupiter Olympien, il dit & profera tout hault
 celle parole, qui depuis a tant esté celebree,
 22 Que ueritablement Phidias auoit formé Lupi-
 23 ter, tel comme Homere l'auoit descrit. Depuis
 quand les dix commissaires enuoyez & depu-
 tez, pour avec luy ordonner des affaires de la
 Macedoine, furent arriuez, il remeit & rendit
 aux Macedoniens leur país & leurs uilles, pour
 y demourer francs, & y uiure à leurs loix, en
 payant seulement de tribut annuel aux Ro-
 mains^a cent talents : là ou ilz en souloyent
 payer à leurs Roys plus de dix fois autant : &
 fait celebrer des ieux de toutes sortes, & des
 sumptueux sacrifices aux Dieux, ou il teint cour
 pleniére à tous uenans, & fait de magnifiques
 festins, dont la despense se faisoit bien des tre-
 sors que Perseus auoit amassez, sans que rien y
 fust espargné: mais l'ordre & l'honesteté de re-
 cueillir courtoisement un chacun, & leur don-
 ner lieu à la table selon la dignité de leur estat,
 en leur faisant honneur & careffe selon leur
 qualité, estoit par sa prouoyance si soigneuse-
 ment & si curieusement obserué, que les Grecs
 s'esbahissoyent comment es choses de plaisir &
 de ieu il employoit encore sa sollicitude, &
 comment en maniant & ordonnant de si gran-
 des choses, encore uouloit il auoir soing, &

a Ce sont
 soixante
 mille e-
 scus.

prendre luy mesme la peine que les petites allassent aussi comme elles deuoient: mais ce luy estoit une grande ioye & singulier contentement de uoir, qu'entre tant de belles choses si magnifiquement apprestees & ordonnées pour donner plaisir aux conuiez, il n'y eust rien qui leur semblast si plaisant à regarder, ne si doulx à iouir que sa compagnie & sa personne propre. Si disoit à ceulx qui monstroyent de s'esmerveiller de sa diligence & sollicitude en telles choses, qu'il falloit une mesme prudence à bien ordonner un festin, qu'à bien dresser une bataille, à fin de rendre l'une plus espouuenteable aux ennemis, & l'autre plus agreable aux amis. Mais l'une des qualitez plus estimees & plus louees qui fussent en luy, estoit la liberalité & la magnanimité: car il ne uoulut pas seulement uoir l'or & l'argent qui se trouua en extreme abondance es tresors du Roy, ains les feit seulement liurer par compte & consigner entre les mains des Questeurs & Tresoriers, pour les porter aux coffres de l'espargne à Rome: seulement permet il à ses enfans qui aimoyent l'estude & les lettres, de prendre les liures de la librairie du Roy: & en distribuant des presens & pris d'honneur à ceulx qui festoyent bien portez en la bataille, il donna à son gendre Ælius Tubero, une coupe du pois de cinq marcs d'argent: c'est celuy duquel nous auons dit auparauant, qu'il se tenoit & uiuoit avec

autres seize siens proches parents en une mesme maison, & du reuenu d'une mesme petite terre & possession qu'ilz auoyent aux champs. Et dit on que ce fut le premier meuble d'argent qui entra en la maison des Æliens, encore y entra il par la uoye d'honneur & de uertu : mais auparauant, ny eulx, ny leurs femmes, n'auoyēt onques uolu auoir ny or, ny argent. Apres donques auoir ainsi bien ordonné & disposé toutes choses, finalement il prit congé des Grecs, & admonesta les Macedoniens de se souuenir de la liberté que les Romains leur auoyent donnée, à fin qu'ilz meissent peine de la conseruer par bon gouuernement & par bõne union, paix & concorde les uns avec les autres, puis se partit pour aller au país de l'Épire, ayant receu un mandemēt du Senat de Rome, par lequel il luy estoit mandé qu'il abandonnast à piller les uilles de ce país la aux gens de guerre qui auoyent esté à la desfaitte du Roy Perseus. Parquoy uoulant les surprendre au despourueu toutes ensemble, sans que personne s'en doubtrast, il manda à toutes les uilles qu'elles eussent à enuoyer deuers luy, à un certain iour qu'il leur assigna, dix des principaulx hõmes de chaque uille, ausquelz, quand ilz furent uenus, il enioignit de luy aller querir & apporter à certain iour qu'il leur assigna, tout tant d'or & d'argent qui estoit dedans leurs uilles, tant es maisons priuees, comme es temples &

eglises, & leur bailla à chacun un Capitaine & garnison de gens de guerre, comme si c'eust esté pour chercher & receuoir l'or & l'argent qu'il demandoit: mais quand le iour assigné fut escheut, les soudards en diuers lieux tout en un mesme temps se meirent à courir sus & à piller & rençonner leurs ennemis, de maniere que par ce moyen il y eut en un mesme iour & une seule heure cent cinquâte mille personnes prises & faites esclaves, & soixante & dix uilles toutes pillées & saccagees: & toutesfois quâd ce uint puis apres à distribuer par teste le butin de ceste generale destructiõ de tout un pais, il n'en reuint pas à chaque soudard plus de unze drachmes d'argent: ce qui estonna bien tout le monde, & leur feit auoir frayeur de l'issue de la guerre, en uoyant l'auoir & le uaillant de toute une grande prouince reuenir à si peu de profit & si peu de gaing pour teste. Æmylius donques ayant executé ce seul exploit contre sa nature, qui estoit douce & humaine, descendit uers la uille d'Orique, là ou il s'embarqua sur mer luy & son armee, pour repasser en Italie, & arriué qu'il y fut, reboursa la riuere du Tybre dedans la galere Capitaineffe du Roy Perseus, laquelle estoit de seize rames pour banc, accouftee magnifiquement des armes captiues, riches draps de pourpre, & autres telles despouilles des ennemis, tellement que les Romains courans à grande foule hors de la uille au de-

uant de ceste galere, & marchans coste à coste d'elle à mesure qu'on la uoguoit tout bellement, eurent le plaisir d'une assemblee de feste publique, & par maniere de dire, d'un triumphe auant qu'il se feist à bon esciant. Mais les soudards qui festoyent promis qu'on leur distribueroit l'or & l'argent des tresors du Roy, quand ilz ueirent qu'on leur en auoit baillé beaucoup moins qu'ilz n'auoyent esperé, ilz en furent bien mal contens, & en uoulurent grand mal en eulx mesmes à Æmylius: toutefois ne l'ozans pas dire tout ouuertement, ilz l'alloyēt accusans qu'il leur auoit esté trop rude & trop austere en toute ceste guerre, & pour ceste cause ne se monstroyent pas fort eschauffez ny affectionnez à luy procurer l'honneur du triumphe. Ce que sentant Seruius Galba, qui de long temps luy estoit ennemy, encore qu'il eust eu charge de mille hommes en ceste guerre soubz luy, en prit la hardiesse de dire publiquement hault & cler, qu'il n'auoit point meritè qu'on luy ottroyast l'honneur du triumphe, en semât parmy les gens de guerre plusieurs calumnieuses paroles encontre luy, pour tousiours plus enflammer leur courroux, & irriter la maluueil lance qu'ilz luy portoyent, iusques à demander aux Tribuns du peuple une autre iournee, pour pouuoir à loisir deduire tout du long les charges, qu'il entendoit proposer à l'encontre de luy, disant que celle la ne suffiroit pas, à cause

qu'il n'y auoit plus que quatre heures de Soleil. Les Tribuns du peuple luy feirent responce qu'il parlast à l'heure mesme, s'il auoit aucune chose à alleguer contre luy, & qu'il n'auoit point d'autre audience. A l'occasion dequoy, il commença à prononcer une harengue diffamatoire pleine de toutes sortes d'iniures, si longue qu'il consuma tout le reste du iour à parler: puis quand la nuit toute noire fut uenue, les Tribuns rompirēt l'assemblée, & le lendemain au matin les soudards deuenus plus audacieux apres auoir ouy la harengue de Galba, & ayans conspiré ensemble, ne faillirent pas de se ren-ger à l'entour de Galba au mont du Capitole, là ou les Tribuns auoyent predict qu'ilz tiendroyent l'assemblée. Si tost dōques que le iour fut clair, la matiere touchant le triumphe de *Æmylius* fut mise à la decision de la pluralité des uoix du peuple, ou la premiere lignee luy refusa tout à plat le triumphe, dequoy le Senat & le reste du peuple estans incontinent aduertis, furent fort marriz de uoir que lon feist un tel tort & une telle iniure à *Æmylius*: & quant à la commune, elle ne faisoit autre chose, que dire seulement, qu'elle en estoit bien desplaisante, sans y donner autre prouision: mais les plus notables personages du Senat, crians que c'estoit une grande honte, s'entr'hortoyent l'un l'autre de refrener l'audace & l'insolence de ces gens de guerre, laquelle uiendroit à la

fin à estre si effrence, qu'il n'y auroit rien tant inique ne si uiolent, qu'ilz n'attentassent de faire, si de bonne heure on n'alloit au deuant, ueu que desia ilz s'efforceoyent de priuer leur Capitaine des honneurs deuz à sa uictoire. Ainsi montans tous en bonne trouppes au Capitole, prièrent les Tribuns du peuple, qu'ilz feissent un peu sursoir le recueil des uoix & suffrages du peuple, iusques à ce qu'ilz eussent fait entendre à l'assistance du peuple aucunes choses necessaires qu'ilz auoyent à luy remonstrer: ce qui fut fait, & leur donna lon bonne & paisible audience. Et adonc Marcus Seruilius personnage Consulaire, qui auoit combatu uingt & trois fois en camp clos, & tué autant d'ennemis qui l'auoyent desfié au combat d'homme à homme, se tira en auant, & parla en ceste maniere:

» Le cognois, dit il, maintenāt mieulx que iamais,
 » combien grand & digne Capitaine est Paulus
 » Æmylius, d'auoir fait de si belles & si glorieu-
 » ses choses avec une armee tant pleine de disso-
 » lution & de desobeissance: & m'esbahis fort,
 » comment le peuple nagueres s'esioiissoit, &
 » faisoit cas des uictoires & triumphes gaignez
 » sur les Esclauons, & sur les nations de l'Afri-
 » que, & que maintenant il porte luy mesme en-
 » uie à sa gloire, en empeschant que lon ne mei-
 » ne en triumphe un Roy de Macedoine uif, &
 » que lon ne montre publiquement la grandeur
 » & la gloire des Roys Philippus & Alexandre

22 le grand, prisonnières & captives foubz les ar-
 23 mes Romaines . Car quelle raifon y a il, atten-
 24 du que n'a pas long temps eftant uenue une
 25 nouvelle incertaine, que nous auions gagné la
 26 bataille contre Perſeus, uous en facriſtaſtes in-
 27 continent à grande ioye aux Dieux, en leur
 28 priant que bien toſt uous en peüſſiez uoir la
 29 uerité à l'œil : & maintenant que le Capitaine
 30 à qui uous en auiez commis la charge eſt uenu
 31 en perſonne, uous apportant la uictoire toute
 32 certaine & toute aſſeuree, uous fruſtriez les
 33 Dieux des remerciemens ſolennelz, & des hō-
 34 neurs qui leur en ſont deuz, & uous meſmes de
 35 la reſiouiffance publique accouſtumee en tel
 36 cas ? comme ſi uous craigniez de uoir à l'œil la
 37 grandeur de uoſtre proſperité, ou que uous
 38 uouluſſiez pardonner à ce Roy uoſtre eſclau
 39 & priſonnier : & toutefois encore uouldroit il
 40 mieulx que ce fuſt par compaſſion de luy, que
 41 par enuie de uoſtre Capitaine, que uous em-
 42 peſchiſſiez le triumphe . Mais la malignité des
 43 mauuais par uoſtre patience eſt deuenue ſi au-
 44 dacieuſe, ſi licenciouſe & ſi insolente, qu'il ſe
 45 treuue icy des hommes qui ne receurēt iamais
 46 coup ny buſſe à la guerre, ains ſont gras & re-
 47 faits, & ont le raiñt frais comme pucelles pour
 48 auoir touſiours eſté à leur aiſe à couuert : &
 49 neantmoins ſont ſi temeraires, que de uenir icy
 50 preſcher deuant uous du deuoir & de l'office
 51 d'un Chef d'armée, & du merite du triumphe,
 deuant

20 deuant uous, qui auez appris par tant de ble-
 20 ceures qu'auez receuës sur uoz personnes à la
 20 guerre, à discerner un bon & uaillant, d'auec un
 20 lasche & mauuais Capitaine. Quand & quand
 en disant ces paroles il ouurit sa robbe par de-
 uant, & monstra à descouuert à toute l'assisten-
 ce les cicatrices d'infinies playes qu'il auoit re-
 ceuës en l'estomac, puis se tournant monstra
 aussi à nud des parties qui ne sont pas fort ho-
 nestes à descouuir en presence de gens: & a-
 20 pres se retournant deuers Galba luy dit, Tu te
 20 ris & te moques de ce que ie montre, mais ie
 20 m'en glorifie deuant mes citoyens: car ce a esté
 20 pour le seruice de la chose publique, que mon-
 20 tant à cheual continuellement, autant de nuit
 20 que de iour, i'ay receu tant de coups: & pour-
 20 tant ua maintenant acheuer de recueillir les
 20 uoix de chacun, & ie iray apres regardant & re-
 20 marquant qui seront les ingrats & meschans
 20 citoyens, qui ueulent estre flattez, & non pas
 20 roidement commandez, comme il est necessai-
 20 re que face un bon Capitaine à la guerre. Ces
 paroles refrenerent & rengerent si bien à la rai-
 son les gens de guerre, que toutes les autres li-
 gnees d'un accord ottroyerent depuis à Æmy-
 lius, le triumphe, duquel l'ordre & la maniere
 fut telle: Premièrement le peuple ayant dressé
 force eschaffaux, tant es lices ou se font les ieux
 des courses de chariots & cheuaux, que les La-
 tins appellent *Circos*, comme à l'entour de la

place, & autres endroits de la uille par ou l'appareil du triumphe auoit à passer, tous se trouuerent avec leurs belles robbes, pour en uoir la magnificence. Si estoient tous les temples des Dieux ouuerts & pleins de festons & de parfums: & y auoit par tous les quartiers de la uille des sergens & autres officiers tenans des bastons en leurs mains, pour faire retirer la presse & serrer ceulx qui se ietteroyent à la foule trop en auant par les carrefours, & qui iroyēt & uiendroyent par la uille, à fin que toutes les rues fussent uuides & nettes. Au demourant, la monstre de tout le triumphe fut departie en trois iours, dont le premier à peine peut suffire à uoir passer les images, tableaux, & peintures, & statues d'excessiue grandeur, le tout pris & gagné sur les ennemis & trainné à ceste monstre sur deux cents cinquante chariots. Le second iour furent aussi portez sur grand nombre de charriage, toutes les plus belles & plus riches armes des Macedoniens, tant de cuyure que de fer & acier, toutes reluisantes pour auoir esté freschement fourbies, & arrangees par artifice, en maniere toutefois qu'il sembloit qu'elles eussent esté iettees pesse mesle à monceaux, sans autrement prendre garde à les disposer, des armets sur des boucliers, des halecrets & corps de cuirace sur des greues, des pavois Candiots & targes Thracienes, des carquois & trouffes de flesches parmy des mors &

brides de cheual, des especes nues, dont les pointes sortoyēt au dehors, entrelacees parmy des picques, estans toutes ces armes entassees & liees les unes sur les autres, si à propos, pour n'estre ne trop ne peu serrees, qu'en se froissant les unes les autres, ainsi qu'on les charroit par la uille, elles rendoyent un son, qui donnoit quelque frayeur à l'ouir, de maniere que la ueuë seulement des despouilles captiues des uaincus, donnoit encore quelque effroy à les regarder. Apres les chariots ou estoyent toutes ces armeures, suyuoient trois mille hommes, qui portoyent l'argent monnoyé en sept cents cinquante uases qui pesoyent enuiron^a trois talents chacun, & estoyent portez par quatre hommes, & y en auoit d'autres qui portoyent des coupes d'argent, des tasses & gobelets faits en forme des cors d'abondance, & autres pots à boire, tous fort beaux à uoir, tant pour leur grandeur, que pour la singularité & grosseur de l'entailleure, & des ouurages releuez en bossé qui estoyent à l'entour. Le troisieme iour au plus matin, commencerent à marcher les trôpettes sonnans un son, non point tel que lon le sonne pour marcher par les champs, ny pour faire une monstre, mais celuy propre que lon sonne à une alarme ou un assault pour donner courage aux souldards quād on est sur le poinct de cōbatre. Apres lesquelz suyuoeyēt six uingts bœufs gras & refaits, ayans toutes les cor-

a Ce sont enuiron cent quatre uingts liures.

nes dorees & les testes couronnees de festons & de chapeaux de fleurs : & y auoit de ieunes hommes ceincts à trauers le fond du corps de beaux deuantez ouurez à l'aiguille, qui les conduisoient au sacrifice : & de ieunes garçons quand & eulx , qui portoyent de beaux uases d'or & d'argent pour faire les aspergemens & effusions qui se font es sacrifices: apres lesquelz iuyuoient ceulx qui portoyent l'or monnoyé departy par uases pesans chacun trois talents , comme ceulx ou lon portoit l'argét : & y auoit de ces uases iusques au nombre de soixante & dixsept : puis marchoyent ceulx qui portoyent la grande coupee sacree que Æmylius auoit fait faire d'or massif, enrichie de pierres precieuses, pesant le pois de ^a dix talents, pour en faire une offrande aux Dieux : ioignant lesquelz marchoyent d'autres qui portoyent certains uases faits & ouurez à l'antique, & coupes magnifiques des anciens Roys de Macedoine , comme celle que lon appelloit l'Antigonide, & une autre la Selcucide, & generalement tout le buffet & toute la uaiselle d'or du Roy Perseus : auquelz ioignoit tout d'un tenant son chariot d'armes , dedans lequel estoit tout son harnois & son bandeau royal , que lon appelle Diademe, dessus ses armes. Puis bien peu d'interualle apres , les enfans du Roy que lon menoit prisonniers avec la suite de leurs gouuerneurs , leurs maistres d'eschole & officiers, tous esplo-

a Ce sont
en uiron
six cents
marcs.

rez, qui tendoyent les mains au peuple regardant, & enseignoient aux petits enfans à faire le semblable pour requerir & demander grace au peuple. Il y auoit deux filz & une fille, qui n'auoyent pas grand sentiment ny gueres de cognoissance de leur calamité, pour le bas aage auquel ilz estoient: ce qui faisoit que les regardans en auoyent tant plus de pitié, en uoyant ces pauures petits enfans qui ne cognoissoient pas le changement de leur fortune, tellement que pour la compassion que lon auoit d'eulx, on laissoit presque passer le pere sans le regarder: & y en eut plusieurs à qui de pitié les larmes en uindrent aux yeux, & fut à tous les regardans un spectacle meslé de plaisir & de douleur tout ensemble, iusques à ce qu'ilz fussent bien loing de la ueuë. Perseus le pere suyuoit apres ses enfans & leur famille, & estoit uestu d'une robbe noire, & ayant des pantoufles aux pieds à la guise de son pais, monstroit bien à sa contenance qu'il estoit tout esperdu & troublé de sens & d'entendemēt, pour la pesanteur des maux & malheurs dont il se sentoit accablé. Il estoit suyuy de ceulx de sa maison, ses amis familiers, officiers & seruiteurs domestiques, tous ayans les uisages descoulourez & desfaits, donnans assez à cognoistre, par ce qu'ilz auoyent tousiours les yeux fichez sur leur maistre, en larmoyant fort chaudement, qu'ilz lamentoient & deploroient principalemēt sa malheureuse

fortune, faisans peu de compte de la leur . Lon dit bien que Perseus enuoya deuers Æmylius le requérir & supplier qu'il ne fust point ainsi mené par la uille , en la monstre du triumphe : mais Æmylius se moquant, comme il meritoit, de sa lascheté & foiblesse de cuer , respondit ,

33 Cela parauant estoit, & encore est en sa puissance,

33 ce, sil ueult: luy donnant assez à entendre , qu'il deuoit plus tost choisir la mort , que de souffrir luy uiuât une telle ignominie: mais il n'eut oncques le cuer de ce faire, tât il estoit lasche, ains attendry par ie ne sçay quelle esperance , aime mieux estre luymesme partie de ses propres despoilles . Apres tout cela suyuoient quatre cents couronnes d'or , que les uilles & citez de la Grece auoyent enuoyees par ambassadeurs expres à Æmylius pour honorer sa uictoire : & puis tout d'une suite, luy mesme uenoit apres , monté dessus son char triumphtë , lequel estoit accoustré & orné tresmagnifiquemēt . Si estoit chose tresbelle à uoir : car oultre ce que de luymesme il estoit tresdigne d'estre regardé, quand il n'y eust eu que sa seule personne , sans toute celle grande pompe, & tant de magnificence: il estoit uestu d'une robbe de pourpre rayee d'or, & portoit en sa main droite un rameau de laurier , comme aussi faisoit toute son armee , laquelle departie par bendes & compagnies, suyuoit le chariot triumphtal de son Capitaine, ou aucuns des soudards alloient chantans quel-

ques chansons de uictoire, que les Romains ont accoustumé de chanter en tel cas, meslans parmy quelques brocards & traicts de rísee sur leur Capitaine:& les autres disoyent des chants de triumphe à l'exaltation & louange des faicts uictorieux d'Æmylius, lequel estoit publiquement loué, beneit & honoré de tout le monde, & de nul hõme de bien hai ny enuié, si ce n'est qu'il y ait quelque Dieu, duquel le propre office soit, oster tousiours & retrencher quelque chose des trop grandes & excessiues prosperitez humaines, en meslant & diuersifiant la uie de l'homme du sentiment de bien & de mal, à fin qu'il n'y en ait pas un qui la passe entiere-ment pure & nette de tout malheur, ains que, comme dit Homere, ceulx la soyent reputez bien heureux, ausquelz la fortune a contrepezé le bien avec le mal. Ce que ie dis, pour autant que Æmylius auoit quatre filz, deux qu'il auoit dõnez à adopter en autres familles & maisons, Scipion & Fabius, comme nous auons ia dit ailleurs au parauant : & deux autres qu'il auoit euz d'une seconde femme, lesquelz il retenoit pour luy en sa maison, & estoient encore tous deux fort ieunes, dont l'un mourut en l'aage de quatorze ans, cinq iours auant le triumphe de son pere, & l'autre mourut aussi trois iours apres la pompe du triumphe, en l'aage de douze ans : tellement qu'il n'y eut si dur cueur en toute la uille de Rome, à qui ce grand accident ne

feist pitié, & à qui ceste cruaulté de la fortune ne feist frayeur & horreur, ayant esté si importune, que de mettre en une maison triumphale, pleine d'honneur & de gloire, de sacrifices & de liesse, un si piteux dueil, & mesler des regrets & des lamentations de mort, parmy des cantiques de triumphes & de uictoire. Ce neantmoins Æmylius prenant les choses au droit point de la raison, estima qu'il ne falloit pas user de la constance & magnanimité contre les espees & les picques des ennemis seulement, ains aussi contre toute aduersité & hostilité de la fortune également. Si compensa & contrepeza si sagement la meslange de ses aduentures presentes avec les prosperitez passées, que trouuant le mal effacé par le bien, & le priué par le public, il ne abaiſſa point la grâdeur ny ne macula point la dignité de son triumphes & de sa uictoire: car ayant ensepuely le premier de ses enfans, il ne laissa pas pour cela de faire sa triumphale entree, comme nous auons escript: & le second estant aussi decedé apres son triumphes, il feist assembler le peuple Romain, & en pleine assemblee de toute la uille, feist une harangue, non point d'homme qui eust besoing d'estre consolé ny reconforté, mais plus tost qui reconfortoit ses citoyens passionnez & dolents pour le malheur qui luy estoit aduenu.

» Car il leur dit, Que des choses pures humaines,
 » il n'en auoit iamais craint pas une: mais des di-

uines qu'il auoit tousiours fort redoubté la
fortune, comme celle ou il y auoit bien peu
de fiance, à cause de son inconstance & de sa
muable uarieté, mesmement en ceste dernie-
re guerre, en laquelle l'ayant continuellement
euë fauorable, comme quand on a le uent en
poupe, il attendoit tousiours quelque reflux,
par maniere de parler, & quelque mutation
de la faueur. Car ie trauersey, dit il, en allant,
le gouffre de la mer Adriatique depuis Brindes
iusques à Corfou en un seul iour, & de là
en cinq iours me trouuay en la uille de Del-
phes, ou ie sacrifay à Apollo, & dedans cinq
autres iours i'arriuay en mon camp, ou ie
trouuay mon armee en la Macedoine, & a-
pres auoir fait les sacrifices & cerimonies ordi-
naires pour la purification d'icelle, ie commen-
çay incontinent à mettre la main à l'œuure, si
bien qu'en quinze autres iours suyans ie meis
fin treshonorable à toute ceste guerre. Mais
me deffiant tousiours de la fortune, uoyât une
si grande prosperité en tout le cours de mes
affaires, & considerant qu'il n'y auoit plus d'en-
nemis ny d'autres perilz par dela, que ie deusse
craindre, ie craignois fort qu'elle ne se chan-
geast à mon retour, quand ie serois sur la mer
en ramenant une si belle armee uictorieuse, a-
uec tant de despouilles & tant de princes & de
Roys prisonniers: & neantmoins estant arri-
ué à port de salut, & uoyant toute ceste uille à

23 mon retour pleine de refiouiffance, de feste &
 23 de facrifices, i'auois encoré tousiours la fortu-
 23 ne fufpecte, fachant tresbien qu'elle n'a point
 23 accouftumé de gratifier fi liberalement aux hō-
 23 mes, ny leur ottroyer choses si grandes nette-
 23 ment, fans qu'il y ait ne fçay quoy d'enuie mef-
 23 lé parmy:ny iamais mon esprit, eftant tousiours
 23 en tranfe aux escoutes de l'aduenir pour le re-
 23 gard du bié public, n'a ietté ceste crainte arriere
 23 de foy, que ie ne me foye ueu tumbé en ce
 23 malheur & calamité domestique, qu'il ma fallu
 23 es iours sacrez de mon triumphe ensepuelir
 23 coup fur coup, de mes propres mains, mes deux
 23 ieunes enfans, que i'auois seuls retenus pour la
 23 fucceffion de mon nom & de ma maison.
 23 Pourtant me femble il maintenant que ie fuis
 23 hors de tout danger, au moins quand au regard
 23 de ce qui m'est le principal, & commence à
 23 m'affeurer & me confirmer en ceste esperance,
 23 que ceste bōne fortune uous demeurera ferme
 23 deformais, fans crainte d'aucun finiftre accidēt,
 23 pource qu'elle a assez contrepezé la faueur de
 23 la uictoire qu'elle uous a donnee, par l'enuie
 23 du malheur dont elle a affligé moy & les miés,
 23 en rendant le uainqueur & triumphateur non
 23 moins notable exemple de la misere & de
 23 l'imbecillité humaine, que le uaincu qui a esté
 23 mené en triumphe, excepté que Perſeus tout
 23 uaincu qu'il est, à tout le moins a ce recōfort de
 23 uoir encore ses enfans, & le uainqueur Æmy-

lius a perdu les siens. Tel fut le sommaire de la harengue genereuse, & procedéte d'une uraye & nõ fainte magnanimité, que prononcea lors Æmylius deuant le peuple Romain. Et combien qu'il eust cõpassion en son cueur de uoir l'estrange changement de la fortune du Roy Perseus, & qu'il desirast fort luy pouuoir aider, il ne peut onques faire autre chose pour luy, que de le faire trãsporter de la prison publique, que les Romains appellét Carcer, en une maison plus nette, & plus douce & gracieuse demeure: là ou estat estroitement gardé, il se feit luy mesme mourir en s'abstenãt de mãger, ainsi cõme la plus part des historiens l'escrit. Toutefois il y en a quelques uns, qui escriuēt une biē nouvelle & estrange sorte de sa mort: car ilz disent que les soudards qui le gardoyent, ayans conceu quelque despit & quelque haine à l'encontre de luy, & uoyans qu'ilz ne luy pouuoyēt faire autre mal ny autre desplaisir, l'empeschèrent de dormir, prenans soigneusement garde quãd le sommeil luy uenoit, & le gardãs de pouoir clorre l'œil, en le contraignant par toute uoye & tout moyé de ueiller & demourer sans dormir, iusques à ce que ne pouuant plus durer en tel estat, il y mourut. Aussi moururent deux de ses enfans: mais le troisieme nõmé Alexãdre, deuint bon ouurier à besongner du tour & de menuiserie, & apprit les lettres & la lãgue Romaine, laquelle il sceut si bien escrire, que de-

puis il seruit de scribe & de greffier aux magistrats de Rome, & se porta fort sagement & dextrement en cest office. Au demourant, on adiouste à ceste belle cōqueste du royaume de la Macedoine que conquist Æmylius, une autre grace qui le rendit fort agreable au commun peuple, c'est qu'il apporta tāt d'or & d'argēt au tresor de l'espargne à Rome; qu'il ne fut onques puis besoing que le peuple cōtribuast riē iusques au tēps & à l'annee que Hirtius & Panfa furent Consuls, qui fut enuiron le commencement de la premiere guerre d'Auguste & de Antonius. Et dauantage il y a encore cela de propre & de singulier en Æmylius, que cōbien qu'il fust grandement aimé, reueré & honoré du cōmun peuple, il demoura tousiours neantmoins du party du Senat & de la noblesse, & ne dit ny ne fait onques chose populaire pour acquerir la grace de la cōmune, ains se rengea tousiours du costé des gens de bien & des nobles en tout ce qui concerna le gouuernēt de la chose publique, ce que depuis Appius reprocha à son filz Scipion l'Africain: car estās les deux premiers hommes de leur temps, & poursuyuans tous deux ensemble l'office de Censeur, Appius auoit autour de luy pour fauoriser sa poursuite tout le Senat & toute la noblesse, cōme de toute ancienneté la famille des Appiens auoit aussi tousiours tenu ce party la. Et Scipion l'Africain, encore qu'il fust grād de

soy mesme, auoit neãtmoins esté de tout temps
 fort aimé, porté & fauorisé du commun peu-
 ple: à raison dequoy, quãd Appius le ueit entrer
 en la place, suyuy & accompagné de gens de pe-
 tite qualité & basse condition, comme ceulx
 qui autrefois auoyēt esté serfs, mais qui au de-
 mourant entēdoient tresbien comment il fal-
 loit conduire telles brigues, faire amas de com-
 mune, & par importunité de crieries & de uoye
 de fait, si mestier estoit, obtenir ce qu'ilz uou-
 loyent es assemblees de uille, il se prit à escrire
 23 tout hault: O Paulus Æmylius, tu as bien main-
 23 tenant cause de soupirer & de gemir soubz la
 23 terre, ou tu es, uoyãt comme un sergent Æmy-
 23 lius, & un seditieux criant Licinius, conduisent
 23 ton filz à la dignité de Censeur. Et quant à Sci-
 pion, il fut ainsi bien uoulu du cõmun peuple,
 par ce qu'il luy fauorisa tousiours en toutes
 choses: mais Æmylius, encore qu'il teinst tous-
 iours le party de la noblesse, ne fut pas pourtãt
 moins aimé du commun populaire, que ceulx
 qui le flattoyent, & qui disoyent & faisoient
 toutes choses pour luy aggreer & cõplaire. Ce
 que le peuple tesmoigna, tãt par autres hõneurs
 & offices qu'il luy conféra, que par ceste digni-
 té de Censeur qu'il luy donna: car c'estoit lors le
 plus sainct magistrat, & qui auoit plus de puis-
 sance & d'authorité que nul autre, mesmement
 quant à l'inquisition & reformation des meurs
 d'un chascun: pource qu'il estoit loisible aux

Censeurs de degrader & oster du Senat un Senateur qui se gouuernoit indignement, & autrement qu'il ne conuenoit à la dignité de l'estat, & de nommer & declarer prince du Senat celuy qu'ilz iugeoyent le plus homme de bien. Dauantage ilz auoyent pouuoir de priuer les ieunes hommes qui uiuoyent dissoluëment, du cheual qu'ilz auoyët entretenu aux despens de la chose publique. Qui plus est ce sont ceulx qui font la prisee des biens d'un chacun citoyë, & le denombrement du peuple, tenäs registres du nōbre des personnes qui se trouuent à chaque description. Si furent nōbrez par la description & l'enrollemēt qu'Æmylius lors en feit, trois cents trente sept mille quatre cents cinquante & deux hommes, & nomma prince du Senat Marcus Æmylius Lepidus qui ia par quatre fois auoit eu cest honneur la, & osta du Senat trois personages qui n'estoyent pas de grande qualité: & garderent semblablement pareille moderation luy & son compaignon Martius Philippus à la reueuë & monstre des cheualiers Romains. Puis apres auoir ordonné & disposé des plus grandes & principales charges de son estat, il tūba en une maladie, laquelle du commencement sembla bien dangereuse, mais à la fin il n'y eut autre peril, sinon qu'elle fut longue & malaisée à guarir: & luy ayans les medecins conseillé qu'il se retirast en une uille d'Italie qui se nomme Velia, il s'embarqua sur

mër & y alla, ou il demoura longuement, fai-
 sant sa residence en des maisons de plaifance le
 long de la marine, en grand repos & hors de
 tout bruit. Mais pendât ce temps de son absen-
 ce les Romains le regretterent souuër: & estans
 assemblez es theatres pour uoir l'esbattement
 des ieux, ietterent par plusieurs fois des cris, par
 lesquelz ilz monstroyent auoir grand desir de
 le reuoir. Parquoy estant le temps escheut, au-
 quel il falloit necessairement faire un certain
 sacrifice annuel, avec ce qu'il luy sembloit qu'il
 se trouuoit ia assez bien de sa personne, il s'en
 retourna à Rome, ou il feit le sacrifice avec les
 autres presbtres, ayât le peuple Romain espan-
 du tout à l'entour de luy, faisant grande & eui-
 dente demonstration de ioye pour son retour:
 & le lendemain il feit un autre sacrifice particu-
 lier pour rēdre graces aux Dieux du recouure-
 ment de sa santé: puis le sacrifice acheué il s'en
 retourna en sa maison, ou il se meit à table, &
 sans que lon eust apperceu au parauant, ny
 qu'on se fust doubté d'aucune alteration ny
 changement en sa personne, il luy prit tout sou-
 dain une resuerie & un desuoyement d'enten-
 dement, auquel il mourut trois iours apres,
 n'ayât besoing ny default de chose quelcōque,
 qu'on estime necessaire à rēdre les hommes en
 ce monde, heureux: car il ne fut pas iusques au
 conuoy de ses funerailles, qui ne fust tres ho-
 norable, & y fut sa uertu decoree de tresbeaulx

& tresglorieux ornemens, qui n'estoyent point or, argent, ny yuoire, ny toute autre telle sumptuosité & magnificēce d'appareil, ains l'amour & bienuueillance & recognoissance de ses bienfaicts, que monstroyent auoir enuers sa memoire, non seulement ses citoyens, mais aussi les ennemis: car tous ceulx qui par cas d'adventure se r'encōtrèrent lors à Rome, uenus ou de l'Hespagne, ou du païs des Geneuois, ou de la Macedoine, les uns ieunes & forts se meirent uoluntairement d'eux mesmes soubz le liēt ou estoit le corps, pour aider à le porter, & les uieux allerent apres suyans le conuoy, en appellāt Æmylius le bienfaiteur, le sauueur & le pere de leurs païs: pource que non seulement il les auoit traittez doulcemēt & gracieusement lors qu'il les auoit subiuguez & conquis: mais aussi tout le reste de sa uie auoit tousiours continué à leur faire quelque plaisir, & à espouser leurs affaires, ne plus ne moins que si c'eussent esté ses alliez ou ses proches parents. Tout son bien apres sa mort monta à peine iusques à la

^a Ce sont
environ
trēte sept
mille e-
scus.

somme de ^a trois cents soixante & dix mille drachmes d'argent, dont furent heritiers ses deux filz: mais le plus ieune qui estoit Scipion laissa le tout à son frere aisné Fabius, pource qu'il estoit adopté en une maison trop plus riche, qui estoit celle du grād Scipiō l'Africain. Telles ont esté la uie & les meurs de Paulus Æmylius.



TIMOLEON.

Des affaires des Syracusains, avant que Timoleon fust enuoyé en la Sicile, estoient en tel estat: Apres que Dion eut chassé le tyran Dionysius, il fut incontinent luy mesme occis en trahison, & se diuiserent les uns contre les autres ceulx qui luy auoyent aidé à remettre les Syracusains en liberté: au moyen dequoy, la cité de Syracuse changeant continuellement de nouveaux tyrans, fut si fort trauaillee de toutes sortes de maulx, que peu s'en fallut qu'elle ne deuint toute despeuplee & deserte. Le demourant de la Sicile au cas pareil estoit entierement destruit, & n'y auoit presque plus de uilles en pied, pour le long temps que les guerres y auoyent duré, & si peu qu'il y en auoit de demourees, estoient pour la plus part occupees par soudards Barbares, estrangers, gens ramassez de toutes pieces, qui n'a-

uoient soude de personne, estans les seigneuries d'icelles faciles à usurper, & pareillement aussi aisees à changer de seigneur: tellement que Dionysius le tyran, dix ans apres qu'il eut esté chassé par Dion, ayant mis ensemble quelque nombre de gens de guerre, & à leur aide ayant debouté Niseus, qui pour lors dominoit à Syracuse, recouura son estat, & s'en fit de rechef seigneur: de maniere que s'il auoit esté chassé estrangement, par une bien petite puissance, hors de la plus puissante tyrannie qui fut onques au monde, il y rentra encore plus estrangement, estant banny & pauvre, & se fit de rechef seigneur de ceulx qui l'auoyent dechassé. Ainsi ceulx qui estoient demourez dedans la uille, furent contraints de seruir à ce tyran: lequel oultre ce que de sa nature il n'auoit iamais esté gueres humain, estoit encore lors deuenu plus cruel & plus farouche par les maux & malheurs qu'il auoit endurez. Mais les plus gens de bien & de plus d'apparence se retirerent deuers Icetes, qui pour lors tenoit, comme seigneur, la uille des Leontins, & l'eleurent pour leur Capitaine à la cõduitte de ceste guerre, non qu'il fust de rien meilleur que ceulx qui tout ouuertement exercent tyrannie, mais ilz n'auoyent ou recourir ailleurs, & se floyét plus en luy, d'autant qu'il estoit né comme eulx dedans la uille de Syracuse, & si auoit autour de luy assez de gens de guerre pour faire teste à ce

tyran. Mais en ces entrefaittes, les Carthaginois descendirent avec grosse puissance en la Sicile, & se meirent incontinent à prattiquer & essayer tous moyens d'y faire leurs besongnes: ce que les Syracusains craignans, delibererent d'enuoyer ambassadeurs en la Grece deuers les Corinthiens, pour leur demander aide contre les Barbares, se confians en eulx plus qu'à nuls autres Grecs, non seulement pource qu'ilz estoient extraiets & descendus d'eulx, ny pource qu'ilz auoyent ia auparauant receu plusieurs autres bienfaicts d'eulx, mais aussi pour autant qu'ilz scauoyent que c'estoit une cité qui de tout temps auoit tousiours aimé la liberté, & haï les tyrans, & qui auoit tousiours entrepris toutes ou la plus part de ses plus grandes guerres, non pour ambition de principauté, ny pour conuoitise de conquerir & de dominer, ains seulement pour defendre & maintenir la liberté des Grecs. Au contraire Iceres, qui s'estoit proposé pour le but & fin principale de sa charge de Capitaine, la tyrannie de Syracuse, & non pas la liberté des Syracusains, en auoit ia secrettement parlé avec les Carthaginois, & neantmoins en public louoit de paroles le conseil & la delibération des Syracusains, & enuoya de sa part des ambassadeurs au Peloponese quād & les leurs, non qu'il uoulust qu'il leur uinst du secours de ce quartier la, mais pource qu'il auoit esperance si les Corinthiens refu-

foient de leur en enuoyer, comme il estoit uray-semblable qu'ilz feroient, pour les troubles & tumultes de guerres qui estoient en la Grece, que plus facilement il feroit tourner les affaires du costé des Carthaginois, lesquelz pour ceste office luy seroyent amis, & l'aideroyent à l'encontre des Syracusains ou du tyran Dionysius : & que cela fust son desseing, il fut descouuert & auéré bien tost apres. Estans donques ces ambassadeurs arriuez à Corinthe, & ayans exposé leur charge, les Corinthiens qui auoyent bien accoustumé de tout temps de prendre soigneusement la protection des uilles extraittes & deriuees de la leur, mesmement de celle de Syracuse, arresterent bien uoluntiers en conseil qu'ilz leur enuoyeroient du secours, de tant plus mesmement, que pour lors ilz ne se trouuoÿt empeschez de guerre quelconque contre les Grecs, ains estoient en pleine paix & en grand repos. Si n'estoit plus question que de trouuer un Capitaine pour conduire ce secours : & comme les magistrats & officiers de la uille proposassent & nommassent quelques uns de leurs citoyens, qui auoyent enuie de se faire ualoir & se poulsen en auant, il y eut un homme de basse condition, qui se dressant en pieds nomma Timoleon filz de Timodemus, lequel ne s'entremettoit plus des affaires publiques, ny n'auoit plus d'esperance ny de uolunté de ce faire : tellement que lon

peult avec grande raison croire , que ce fut quelque Dieu qui inspira en l'entendement de ce petit personnage la pensee de le nommer , tant luy fut incontinent la fortune fauorable à son election, & tant il eut tousiours depuis en tous ses faicts d'heur & de prosperité, qui accompagnerent & ornerent sa uertu . Or estoit il né d'un pere & d'une mere tresnobles en sa cité, l'un nommé Timodemus , & l'autre Demarete : & de sa nature aimoit fort le bien public de son pais, & se portoit doucement & humainement enuers tous , sinon qu'il haïssoit extremement les tyrans & les meschans. Au demourant, il auoit un naturel si bien temperé, & si également composé de toutes les parties requises en un homme de guerre , que en sa ieunesse il môstra tousiours en tous ses faicts auoir fort bon sens, & en sa uieillesse non moins de cueur & de hardiesse. Il eut un frere aisné nommé Timophanes , qui ne luy ressembloit de qualité quelconque : car c'estoit un homme esceruelé, & furieusement espris & perdu de conuoitise de regner, que luy auoyent mise en la teste une troupe de gens de basse condition , qui se disoyent ses amis, & de soudards ramassez qu'il auoit tousiours autour de luy : & pource qu'il estoit impetueux & aduentureux à la guerre, ses citoyens l'en estimoyent Capitaine belliqueux & homme d'execution, & à ceste cause luy donnoyent souuent charge de gens: à quoy

Timoleon luy aidoit en couurant du tout les faultes qu'il y faisoit, ou les faisant apparoir moindres & plus legeres qu'elles n'estoyent, & en augmentant & embellissant ce peu de bon que sa nature produisoit. Comme en une bataille que les Corinthiens eurent contre les Argiens & les Cleoneiens, Timoleon estoit comme priué soudard entre les gens de pied, & Timophanes son frere menant les gens de cheual, tumba en un tresgrand danger, & ou il luy fut bon besoing d'estre promptement secouru: car son cheual ayant esté blecé, le ietta par terre au milieu des ennemis: dequoy une partie de ceulx qu'il auoit autour de luy s'effroya & s'escarta ça & là: & ceulx qui demourerent, estans en fort petit nombre, & ayans à combatre contre beaucoup, soustenoyent à grande peine l'effort des ennemis: mais Timoleon l'ayant apperceu de loing, y accourut uistement, & couurant de son pauois son frere qui estoit renuersé par terre, receut tant en son corps, que sur ses armes, plusieurs coups de traict & de main, & avec grand traueil & grand danger feit à la fin retirer les ennemis, & sauua la uie à son frere. Et comme les Corinthiens, craignans qu'il ne leur aduinist une autre fois ce qui ia leur estoit adueni, de perdre leur uille par la faulte de leurs alliez, eussent arresté en leur cōseil d'entretenir continuellement à leur soude quatre cents hommes de guerre estrangers, ilz

en donnerent la charge à Timophanes, lequel mettant en oubly tout deuoir & toute iustice, essaya incontinent & executa tous les moyens, par lesquelz il pensa pouuoir paruenir à se faire entierement seigneur de la uille: & ayant fait mourir plusieurs des principaux bourgeois, sans y garder aucune forme de iustice ny de proces, se declara finalement tout à descouuert tyran. Dequoy Timoleon fut fort desplaisant en son cueur, reputant la meschanceté de son frere estre malheur & infortune pour luy: si tascha premierement à le reduire par bonnes paroles, en le priant & admonestant qu'il ostant & laissast ce furieux appetit de dominer, & ceste malheureuse conuoitise de regner qu'il auoit, & qu'il cherchast les moyens de r'habiller & emender les faultes qu'il auoit faittes à l'encontre de ses citoyens. Timophanes reietta bien arriere ces remonstrances, & n'en feir aucun compte: parquoy Timoleon s'accompagna adonc de l'un de ses alliez qui auoit nom *Æschylus*, & estoit propre frere de la femme de Timophanes, & d'un deuin que l'historien *Theopompus* appelle *Satyrus*, & *Ephorus* le nomme *Orthagoras*, avec lesquelz quelques iours apres il s'en retourna une autre fois deuers son frere: & se mettans tous trois apres luy, le supplierent à grande instance de uouloir à tout le moins lors encore croire bon conseil, & se deporter de la tyrannie. Timophanes du

commencement ne fait que se rire & moquer de leurs remonstrances : mais puis apres il monta en cholere , & se courroucea à bon esciant à eulx. Quoy uoyant Timoleon, se retira un peu à l'escart , & se courrant le uisage se prit à plover, & ce pendant les deux autres desguainans leurs espees occirent Timophanes en la place . Si fut le cas incontinent diuulgué par la uille , dont les plus gens de bien louerent grandemét la magnanimité & haine des meschans qui estoit en Timoleon , attendu qu'estant homme doux & bening de sa nature, & qui aimoit cordialement les siens, il auoit neantmoins preferé le bien public de son país à l'amour de son sang , & mis le deuoir & la iustice au deuant de l'utilité , ayant sauué la uie à son frere lors qu'il combattoit pour le bien & pour la defense de son país , & l'ayant aussi fait mourir lors qu'il espioit les moyens de l'asseruir, & s'en faire absolu seigneur. Mais ceulx qui ne pouoyent uire en estat de liberté populaire, & qui auoyét de tout temps accoustumé de se renger à l'entour des seigneurs , & leur faire la cour, feirent semblant d'estre bien aises de la mort du tyran: toutefois en reprochant continuellement à Timoleon qu'il auoit commis un parricide execrable & abominable aux Dieux & aux hommes, feirent tant qu'ilz luy en imprimerent au cueur un regret de l'auoir fait : & dauantage estant aduertý que sa mere mesme le portoit fort

impatiemment, & qu'elle en iettoit contre luy des paroles effroyables à ouyr, & des maledictions horribles, il s'en alla uers elle pour la cuider recōforter: mais elle ne le uolut iamais uoir, ains luy feit fermer sa porte. Adonc estāt oultré de douleur & troublé en son entendement, il luy prit soudainement uolonté de se faire mourir en s'abstenant de manger: mais ses amis ne l'abandonnerent point en ce desespoir, ains le presserent tant & par remonstrances & par prieres, qu'ilz le contraignirent de manger. Parquoy il prit alors resolution de uire désormais aux champs en solitude, & quitter de tout poinct l'entremise du gouuernement des affaires publiques: de maniere qu'au commencement, il ne uenoit pas seulement en la uille, ains cuitant toutes compagnies, se tenoit es plus solitaires & plus esgarez endroits des champs, ou il ne faisoit autre chose que uaguer tantost cy tantost la, & se consumer de melancholie. Voila comment le sens & l'entendement de l'homme, s'il n'est bien confirmé & fortifié par la raison, & par l'estude de philosophie, en l'execution de quelque grande entreprise, uacille facilement, & est poulsé hors des discours, sur lesquels il s'estoit premierement fondé, par blasmes ou louanges fort legeres bien souuent: là ou il fault non seulement que l'acte soit bon & honeste en soy, mais aussi que la resolution, dont il part, soit

ferme & non subiette à changement, à fin que nous ne facions chose que nous n'ayons premierement bien pensee & approuuee, & qu'il ne nous aduiene, comme il fait aux frians, qui bien souuent desirēt avec trefardēt appetit une uiande, puis quand ilz s'en sont une fois bien réplis, ilz s'en faschèt incontinent: aussi nous pareillement, apres auoir acheué une chose, ne nous en repentions tout soudainement pour la debilité de l'imagination & apprehension d'honesteté qui nous auoit meuz à la faire. Car la repentance rend l'acte mauuais qui de soymesme estoit bon: mais l'election qui est fondee sur certaine sciēce & ferme discours de raison, ne se change iamais, encore que la chose entreprise ne succede pas tousiours à bōne fin. Pourtant Phocion l'Athenien, ayāt resisté tant qu'il auoit peu, à quelques choses que le Capitaine Leosthenes faisoit, lesquelles toutefois contre son opinion uindrent à bonne fin, & uoyant que les Atheniens sacrifoyent aux Dieux publiquement pour leur en rendre graces, & se glorifioyent de la uictoire qu'ilz auoyent eüe:

⁂ Je serois, dit il, bien content d'auoir fait cecy:

⁂ mais ie ne uoudrois pas n'auoir cōseillé cela. A ce mesme propos aussi, mais plus uiolentement, respondit Aristides le Locrien, qui estoit l'un des familiers & amis de Platō, à Dionysius l'aisne, tyran de Syracuse, qui luy demãdoit l'une de ses filles en mariage: Je uerrois plus uou-

20 lontiers ma fille morte, que mariee à un tyran.
 Et quelque temps apres le tyran luy feit mourir ses enfans, puis luy demanda, par une maniere de reproche, pour luy faire plus grand creue-
 25 cueur, s'il auoit encore alors la mesme fantasie qu'il auoit eüe au parauant, touchât le mariage
 30 de ses filles. Je suis, respondit il, bien desplaisant de ce que tu en as fait: mais de cé que i'ay dit, ie
 35 ne m'en repens point. Cela donques procede à l'aduenture d'une plus grande & plus parfaite uertu. Mais pour retourner à Timoleon, soit que ce fust le regret qu'il sentoit en son
 cueur de la mort de son frere, ou la honte qu'il auoit de se trouuer deuant sa mere, quoy que ce fust, cela luy rompit & abbatit tellemēt
 le cuer, que uingt ans depuis il ne se mesla d'affaire quelconque honorable ne publique. Comme dōc il eust esté lors nommé pour Cap-
 pitaine du secours que lon uouloit enuoyer en Sicile, l'ayāt le peuple accepté & eleu tresuou-
 luntiers, Teleclides qui estoit celuy qui pour
 lors auoit pl⁹ d'autorité & de credit es affaires de Corinthe, se dressant en pieds deuant tout le
 peuple, feit un preschement à Timoleon, par lequel il l'enhorta de se porter en homme de
 20 bien & uaillant Capitaine en ceste charge. Car
 25 si tu te y portes bien, dit il, nous ferons iuge-
 30 ment de toy, que tu auras occis un tyran: & si tu
 35 te y portes mal, nous iugerons que tu auras tué
 40 ton frere. Mais ainsi comme Timoleon estoit

apres à leuer gēs & à dresser son equippage , on apporta aux Corinthiens des lettres d'Icetes, par lesquelles il apparoiſſoit clairement, qu'il auoit tourné ſa robbé, & qu'il eſtoit traiftre: car il n'eut pas plus toſt deſpeſché ſes ambassadeurs qu'il ſe renga du coſté des Carthaginois, & faiſoit tout ouuertement pour eulx, en intention de chaffer Dionyſius, & ſe faire luy meſme tyran de Syracuse. Mais craignant qu'il ne uinſt un Capitaine avec ſecours de Corinthe auãt qu'il euſt executé ſon deſſeing, il eſcriuit des lettres aux Corinthiens, par lesquelles il leur mandoit, qu'il n'eſtoit ia beſoing qu'ilz ſe meiſſent en deſpenſe ny en danger pour uenir en la Sicile, meſmement pource que les Carthaginois en eſtoyent mal contents, & qu'ilz guetroyent leurs armes au paſſage avec une groſſe flotte de uaiſſeaux: & que de luy, uoyant qu'ilz demouroyent trop à uenir, il auoit fait ligue & alliance avec eulx à l'encontre du tyran Dionyſius. Ces lettres leuës, feirent que ſi parauant il y auoit eu aucun des Corinthiens froidement affectionné à l'entrepriſe de ce uoyage, ilz y furent adonc tous eſchauffez par le courroux qu'ilz conceurent à l'encontre d'Icetes, tellement qu'ilz ottroyerent treſuouluuntiers à Timoléon, tout ce qu'il uoulut, & luy aiderent à mettre ſus ſon equippage pour faire uoile. Quand les uaiſſeaux furent preſts, & que les ſoudards eurent tout ce qui leur faiſoit be-

soing pour partir, les religieuses de la Deesse Proserpine dirent auoir eu une uision la nuict en dormant, par laquelle les Deesses Ceres & Proserpine leur estoient apparues, accoustrees comme pour uoyager, & leur dirent qu'elles uouloyent aller avec Timoleon en la Sicile. A ceste cause les Corinthiens equipperent une galere, laq̃lle ilz appellerent, la galere de Ceres & de Proserpine: & Timoleon luy mesme, auãt que monter en mer, s'en alla en la uille de Delphes, ou il fit un sacrifice à Apollo: & ainsi comme il entroit dedans le santuaire ou se rendent les responses de l'oracle, il luy aduint un signe miraculeux: car d'entre les uœus & offrãdes qui sont pendues aux uoultres & parois du santuaire, il coula un bâdeau, sur lequel y auoit des couronnes & des uictoires empreintes & portraites de broderie, qui tumba droitement sur la teste de Timoleon, de maniere qu'il sembloit proprement qu' Apollo l'enuoyast à ceste expedition desia tout couronné, auant qu'il eust commencé de mettre la main à l'œuure. Si s'embarqua & fit voile avec sept galeres de Corinthe, deux de Corfou, & une dixieme que les Leucadiens fournirent. Quand il fut au large en pleine mer, ayant le uent en poupe, la nuict il luy fut aduis que le ciel soudainement se fendit, & que de celle ouuerture il s'espendit en l'air au dessus de sa nauire une grande quantité de feu fort clair & fort apparet

à uoir, duquel il se feit comme une torche ardente semblable à celles dont on use es ceremonies des mysteres. Ceste torche les accôpagna & guida tout au long du uoyage, & à la fin alla fondre & disparoir au propre endroit de la coste d'Italie, ou les pilotes auoyent deliberé d'arriuer. Les deuins enquis sur la signification de ce presage, respondirent que ceste appàrition miraculeuse tesmoignoit ce que les religieuses de Ceres auoyent songé, & que les Deesses fauorifantes à l'entreprise auoyent monstré le chemin par ceste lumiere enuoyee du ciel: pour autant que l'isle de la Sicile est sacree & dediee à la Deesse Proserpine, mesmement que lon compte, que le rauissement d'elle y fut fait, & que la seigneurie luy en fut baillee en don nuptial au iour de ses nopces. Ainsi donques les signes celestes des Dieux donnerent assèurâce & bonne esperâce à ceulx qui furèt en ce uoyage, lesquelz se hasterèt à la meilleure diligéce qu'il leur fut possible, iusques à ce qu'ayans trauerse la mer, ilz furent arriuez au long de la coste de l'Italie: mais quand ilz furent là, les nouuelles qu'ilz entendirent de la Sicile ietterent Timoleon en grande perplexité, & descouragerent fort les gēs de guerre qu'il auoit amenez quād & luy, pour autant que Icetes ayant desfait en bataille le tyran Dionysius, & occupé la plus grande partie de la uille de Syracuse, le tenoit assiegé dedans le chasteau, & dedans le quartier

de la uille qui s'appelle l'Isle, ou il l'auoit régé, & le tenoit enfermé de murailles tout à l'entour: & ce pendant auoit prié les Carthaginois qu'ilz eussent soing d'empescher que Timoleon ne peust descendre & prendre terre en la Sicile, à fin que quand ce secours la en seroit exclus, ilz peussent à leur aise departir entre eulx toute la Sicile, sans que personne leur y donnast aucun empeschement. Suyuant laquelle requeste les Carthaginois enuoyerét à Rege uingt de leurs galeres, sur lesquelles y auoit des ambassadeurs qu'Icetes enuoyoit à Timoleon avec creance respondante à ses faicts: car c'estoyét belles paroles & bien fardees pour couvrir la mauuaise intention qu'il auoit en son cueur: car ilz dirét à Timoleon qu'il s'en uinst luy tout seul, si bon luy sembloit, deuers Icetes, pour le cōseiller & l'accompagner en tous affaires, qui estoient ia si bié acheminez qu'il les tenoit pour acheuez: & au demourant, qu'il renuoyast ses uaisseaux & ses soudards à Corinthe, attendu qu'il s'en falloit bien peu que la guerre ne fust de tout poinct acheuee, & que les Carthaginois ne uouloyét en aucune maniere, que ses gens passassent en la Sicile, & qu'ilz estoient deliberez de les combatre si autrement ilz s'efforceoyent d'y entrer. Ainsi les Corinthiens à leur arriuee en la uille de Rege ayans trouué ces ambassadeurs, & uoyans aussi la flotte des uaisseaux Carthaginois qui estoit à l'ancre non gueres

loing d'eulx, furent d'un costé bien despits de se uoir en ceste sorte abusez & moquez par Ictes : & n'y auoit celuy en la troupe qui n'en fust fort indigné contre luy, & qui n'eust grande peur pour les pauures Siciliens, uoyans tout euidentement qu'ilz demouroyent en proye à Ictes pour loyer de sa trahison, & aux Carthaginois pour recompense de la tyrannie qu'ilz luy permettoient establir : mais d'autre part aussi leur sembloit il bien impossible, qu'ilz peussent forcer les uaisseaux des Carthaginois qui les guettoient au passage assez pres d'eulx, attédu qu'ilz en auoyét deux fois autât qu'eux, ny aussi l'armee qui estoit entre les mains d'Ictes en la Sicile, ueu qu'ilz n'estoyent uenus que pour la dresser & conduire en ceste guerre seulement. Ce nonobstant Timoleon parla gracieusement à ces ambassadeurs & aux Capitaines des uaisseaux Carthaginois, leur donnant à entendre qu'il feroit tout ce qu'ilz uouloyent, pource qu'aussi biē quand il uouldroit faire autrement il n'y gagneroit rien : toutefois qu'il desireroit pour sa descharge, qu'en presence du peuple de Rege qui estoit uille Grecque amie cōmune des deux parties, ilz luy proposassēt en public ce qu'ilz luy auoyēt dit à part en secret, & qu'aussi luy de sa part leur feroit la mesme response que ia il leur auoit faite, & puis s'en retourneroit tout court, alleguant q̄ cela faisoit grandement pour la seureté de sa descharge, &

aussi

aussi que eulx mesmes tiendroyent & garde-
royent plus inuiolablement ce qu'ilz luy pro-
mettoient touchant les Syracusains, quand ilz
l'auroyent accordé & promis deuant tout le
peuple de Rege, qui en demoureroit resmoing.
Or estoit-ce une ruse qu'il leur brassoit pour
courir son passage, à quoy le secondoyent &
fauorifoyent tous les Capitaines & gouver-
neurs de Rege, pour autant qu'ilz desiroyent
que les affaires de la Sicile tumbassent entre les
mains des Corinthiens, & craignoyent d'auoir
les Barbares pour uoifins : à ceste cause com-
manderent ilz une assemblee generale du peu-
ple, durant laquelle ilz feirent fermer les por-
tes de la uille, donnans à entendre que c'estoit
à fin que leurs bourgeois ne se diuertissent
point ce pendant à autres affaires. Puis quand
tout le peuple fut assemblé, ilz commencerent
à faire de longues harégues sans rien conclur-
re, laissant tousiours l'un à l'autre un mesme
subiect de parler, à fin de gagner temps, ius-
ques à ce que les galeres des Corinthiés fussent
parties, & amusans ainsi les Carthaginois en
ceste assemblee, sans qu'ilz se doubtassent de
rien, pour autant qu'ilz ueoyent Timoleon pre-
sent qui tenoit contenance de se uouloir bien
tost leuer pour parler aussi : mais ce pendant
quelcun l'alla secrettement aduertir que les
autres galeres auoyent ia fait uoile : & qu'il n'e-
stoit demouré que la siene seule qui l'attendoit

au port : & adonc il se coula secrettement parmy la presse, avec l'aide que luy feirent les Regiens qui estoient à l'entour de la tribune d'ou se faisoient les harengues : & descendant sur le port, s'embarqua incontinent & se mit aussi tost à la voile, & ayant atteint sa flotte, allerent tous ensemble de conserue prendre terre en la uille de Tauromenion qui est en la Sicile, ou ilz furent bië recueillis par Andromachus, qui pieça les y auoit appellez : car il gouernoit celle uille, comme s'il en eust esté seigneur. C'estoit le pere de Timæus l'historien, le plus homme de bien de tous ceulx qui pour lors auoyēt domination en toute la Sicile : car il regissoit ses citoyens en toute iustice & toute equité, & se monstroit tousiours ouuertement ennemy des tyrans : suyuant laquelle affection il presta lors la uille à Timoleon pour y faire son amas, & persuada à ses citoyens d'entrer en ligue avec les Corinthiens, & leur aider à deliurer de seruitude & affranchir la Sicile. Mais les Capitaines Carthaginois qui estoient à Rege, quand ilz sceurent que Timoleon auoit fait voile, apres que l'assemblee du conseil fut acheuee, en furent fort courroucez & despits de se voir ainsi affinez : & en eurent ceulx de Rege leur passe-temps, de uoir que des Phœniciens ne prissent pas plaisir que lon leur eust ioué un tour de finesse & de tromperie. Toutefois ilz se resolerent à la fin d'enuoyer sur l'une de leurs gale-

res, un ambassadeur à Tauromenion. Cest ambassadeur parla fort audacieusement & fort barbareſquement à Andromachus en cholere : & finalement luy monſtra premier le dedans, & puis apres le dehors de la main, & le menaça que ſa uille ſeroit ainſi renuerſee ſans deſſus deſſoubs, ſi promptement il n'en iettoit hors les Corinthiens. Andromachus ne ſ'en feit que rire, & luy tendant l'endroit de la main, & puis tout à coup luy monſtrât l'enuers, luy dit, qu'il euſt ſoudainement à ſe partir de la uille ſ'il ne uouloit que ſa galere luy fuſt ainſi renuerſee. Au demourant, Icetes aduertuy du paſſage de Timoleon, & en ayant peur, enuoya querir bõ nombre de galeres Carthaginoiſes : & adonc perdirent entierement les Syracuſains toute eſperance de ſalut, uoyans que leur port eſtoit faiſy par les galeres des Carthaginois, la meilleure partie de leur uille occupee par Icetes, & le chaſteau par le tyran Dionyſius, & que Timoleon n'eſtoit encore que attaché, par maniere de dire, à une petite liſiere de la Sicile, n'y tenant encore que la petite uille de Tauromeniõ avec bien peu de puissance, & encore moindre eſperâce, à cauſe qu'il n'auoit pour tout moyen de faire la guerre que mille hommes de pied, & de prouiſion de uiures & d'argent autant qu'il en falloit pour les entretenir & nourrir ſeulement : oultre ce que les autres uilles de la Sicile ne ſe fioyent point en luy, ains pour les uio-

lences & extorsions qu'elles auoyent endurees de fresche memoire, uouloyent mal de mort à tous Chefs & conducteurs de gens de guerre, mesmement pour la desloyaulté de Callippus & de Pharax, dont l'un auoit esté Athenien, & l'autre Lacedæmonien, tous deux disans estre uenus pour affranchir la Sicile, & en dechasser les tyrans, & neantmoins y auoyent fait tant de maux aux pauvres Siciliens, que les miserables & calamitez qu'ilz auoyent endurees sous les tyrans leur sembloient tout or, au pris de celles que ces Capitaines leur auoyent fait souffrir: & reputoyent plus heureux ceulx qui uoluntairement festoyent rengez & soubmis au ioug de seruitude, que ceulx qui se ueoyent remis & restituez en liberté: & pourtant ne pouuans croire que ce Corinthien deust estre meilleur que les autres, ains pensans que ce fussent les mesmes ruses, & les mesmes amorces de bonne esperance & de belles paroles, qu'on leur auoit presentees au parauant, pour les attirer à uouloir accepter de nouveaux tyrans, ilz auoyent pour suspectes, & reiettoyent toutes les semõces & sollicitations des Corinthiens, exceptez les Adranitains, lesquelz ayans leur petite uille dediee & consacree au Dieu Adranus fort honoré & reueré par toute la Sicile, estoient lors en dissension les uns contre les autres, & appelloit l'une des parties Ictes & les Carthaginois, & l'autre auoit enuoyé deuers Timoleon:

Si se rencontra par cas d'adventure, que les uns & les autres se hastans pour y arriuer les premiers, ilz y arriuerent tous deux presque en un mesme temps : mais Icetes auoit iusques au nombre de cinq mille combatāns, & Timoleon n'en auoit en tout que douze cents, avec lequelz il se partit pour s'en aller uers la uille de Adrane distante de Tauromenion enuiron de uingt lieues & demie: & pour la premiere iournee il ne fit pas grand chemin, ains se logea de bonne heure : mais le lendemain il marcha biē plus hastiuement, & par un pais aspre. Quand ce uint sur le soir, que le iour commenceoit ia à faillir, il eut nouuelles que Icetes ne faisoit gueres que arriuer à l'heure deuant Adrane, & qu'il se campoit. Quoy entendu les particuliers Capitaines & Chefs des bēdes, feirent arrester ceulx qui marchoyent les premieres pour repaistre & reposer un petit, à fin qu'ilz en fussent plus dispos & miculx deliberez pour combatre : mais Timoleon sauancea d'aller uers eulx, & les pria de ne point faire ainsi, ains de tirer outre à la plus grande diligence qu'ilz pourroyent, à fin qu'ilz peussent surprendre leurs ennemis en desfarroy, cōme il estoit uraysemblable qu'ilz les trouueroient, ne faisans que d'arriuer, & estans empeschez à faire leur logis & appareiller à soupper : mais quand & quand en leur disant ces raisons il prit son pavois dessus son bras, & se meit à marcher deuant

tout le premier, aussi guayement comme fil eust esté asseuré d'aller à une uictoire toute certaine. Quoy uoyans les autres, le suyurent en pareille asseurance. Or leur restoit il encore à faire enuiron deux petites lieues de chemin, lesquelles acheuees, ilz chargerent incontinent leurs ennemis qu'ilz trouuerent tous desarroyez, & qui se meirent à fouir aussi tost qu'ilz les sentirent approcher, de sorte qu'il ne fut pas tué plus de trois cents hommes, & deux fois autant qui furent faits prisonniers & leur camp pris. Adonc les Adranitains ouurans leurs portes se rendirent à Timoleon, luy racomprans avec grande frayeur & grande merueille, comme à l'instant mesme & sur le poinct de la charge, les portes du temple de leur Dieu festoyent ouuertes d'elles mesmes, & que la iaueline que son image tenoit en la main, auoit branlé, mesmement au bout ou estoit le fer, & toute sa face festoit ueuë trempee de sueur : ce qui ne signifioit pas, à mon aduis, la uictoire qu'il gagna lors seulement, mais aussi les beaux exploits qu'il feit depuis, ausquelz ceste premiere rencontre la donna heureux commencement, pource que incontinent apres plusieurs uilles enuoyerent deuers Timoleon pour se ioindre & entrer en ligue avec luy : & Mamercus le tyran de Catane, homme de guerre & puissant en argent, rechercha son alliance : mais, qui plus

est, Dionysius le tyran de Syracuse estant las de s'uyure plus esperance, & se trouuant bien pres d'estre forcé par longueur de siege, ne fait plus compte d'Icetes, quand il sceut comme il auoit esté rompu ainsi honteusement : & au contraire estimant beaucoup la ualeur de Timoleon, enuoya deuers luy, luy faire entendre qu'il se contenoit de rendre sa personne & son chasteau entre les mains des Corinthiens. Timoleon bien ioyeux de ceste prosperité non esperée, enuoya pour se saisir du chasteau Euclides & Telemachus, deux Capitaines Corinthiens, avec quatre cents hommes, non pas tous à la fois ny à la descouuerte (car il estoit impossible, estans les ennemis au guet dedans le port) mais par petites troupes & à la desrobée, il fit tant qu'il les y coula tous dedans. Ainsi se faisirent les soudards de la place & du palais du tyran, avec tout le meuble & toutes les provisions necessaires pour la guerre, qu'il y auoit dedans : car il auoit bon nombre de cheuaux de seruice, grande quantité de bastons & d'armes offensives de toutes sortes, & d'éging de bterie à tirer au loing, & d'autres armes de defense, qui y auoyent esté assemblees de longue main, pour armer bien soixante & dix mille hōmes, & si y auoit encore oultre tout cela bien deux mille hommes de guerre, lesquelz avec tout le demourant Dionysius liura entre les mains de Timoleon, & luy avec son argent, & quelques

uns de ses amis, sortit par la mer sans que Icetes en apperceust rien, & s'en alla rendre au camp de Timoleon. Ce fut là ou premier on le ueit homme priué, en bas & petit estat : encore fut il de là à peu de iours enuoyé dessus une nauire avec peu d'argent à Corinthe, luy qui estoit né, & auoit esté nourry en la plus grande & plus renommee tyrannie & principaulté conquise par force, qui fut onques au monde, & qui l'auoit luymesme tenue l'espace de dix ans depuis la mort de son pere, & auoit esté depuis que Dion l'en auoit chassé diuersement trauaillé en guerre l'espace de douze ans, durant lesquelz fil auoit fait beaucoup de maulx, encore en auoit il souffert dauantage : car il ueit la mort de ses enfans qui estoient ia grands & en aage de porter armes : il ueit forcer & uioler ses filles estans encore à marier, & sa propre sœur, qui estoit aussi sa femme, premierement honnie & outragee en sa personne des plus uilaines & plus infames dissolutions, dont ses ennemis se peurent aduiser, & puis apres meurtrie cruellement avec ses enfans, & leurs corps à la fin iettez dedans la mer, ainsi comme nous auons escrit plus au long en la uie de Dion. Mais arriué que fut Dionysius en la uille de Corinthe, il n'y eut homme en toute la Grece qui n'eust enuie d'y aller pour le uoir & parler à luy : & y alloient les uns bien aises de son malheur, comme filz eussent foulé aux piedz, celuy que la

fortune auoit abbatu , tant ilz le haïssoyent asprement: les autres amollis en leurs cueurs de uoir une si grande mutation , le regardoyent avec ne sçay quoy de compassion, considerans la puïssance grande qu'ont les causes occultes & diuines sur l'imbecillité des hommes , & sur les choses qui passent tous les iours deuant noz yeux : car ce siecle la ne produisit onques chef d'œuure, ny de nature, ny de main d'homme , si merueilleux comme fut celuy la de la fortune, laquelle feit uoir un homme qui peu deuant auoit esté seigneur de toute la Sicile presque, dedans la uille de Corinthe s'arrester ordinairement à entretenir une uiuadiere, ou demourer tout un iour assis en la boutique d'un parfumeur, ou boire le plus souuent en plein cabaret, ou bien tencer & debatre au beau milieu d'une rue deuant tout le monde avec des femmes faisans publiquement marchandise de leurs corps, ou enseigner des menestrieres en plein carrefour, & disputer avec elles, du meilleur sens qu'il eust, sur l'armonie de quelques chansons que lon chantoit par les Theatres . Ce que les uns disent qu'il faisoit ne sachant autrement à quoy passer son temps, pource que de sa nature il estoit homme de lasche cueur, & qui aimoit toutes uoluptez peu honestes : les autres sont d'aduis qu'il le faisoit pour en estre plus mesprisé, de peur que les Corinthiens n'entraissent en quelque sousspeçon & quelque deffiance de

luy, ayans opinion qu'il regretast le change-
 ment de sa uie, & qu'il eust encore inten-
 tion quelquefois de tascher à recouurer son
 estat, & que pour ceste cause il feist & fai-
 gnist expressement beaucoup de choses contre
 sa nature, monstrant estre un grand niais à uoir
 ce à quoy il samusoit. Ce neantmoins encore a
 lon recueilly & mis par memoire quelques sie-
 nes responſes, qui semblent tesmoigner que ce
 n'estoit point par lascheté de cueur, ny par be-
 stise, qu'il faisoit toutes ces choses, ains pour
 s'accommoder à sa fortune presente: car estant
 arriué à Leucade, qui est uille anciennement
 fondee par les Corinthiens, cōme celle de
 » Syracuse, il dit aux habitans d'icelle, qu'il se
 » trouuoit tout ainsi que les ieunes garçons quād
 » ilz ont failly: car comme ilz fouyent la pre-
 » sence de leurs peres, ayans honte de se trou-
 » uer deuant eulx, & sont plus aises de se tenir
 » avec leurs freres: Aussi, dit il, serois-ie plus
 » content de demourer icy avec uous, non
 » point aller me représenter à Corinthe, qui est
 » nostre cité metropolitaine. Vne autre fois ainsi
 qu'il estoit à Corinthe, il y eut un estranger
 qui se moqua assez importunément de luy, &
 mesmement de ce qu'estant en sa seigneurie, il
 prenoit plaisir à uoir des gens de lettres & des
 philosophes autour de luy, iusques à luy deman-
 der à la fin, dequoy luy auoit seruy le sçauoir
 » & la sagesse de Platon. Il luy respondit, Te sem-

20 ble il qu'elle ne m'ait rien profité, à uoir com-
 20 me ie suppose le changemēt de ma fortune? Et
 au musicien Aristoxenus, & à quelques autres
 qui luy demandoyent quel debat il y auoit eu
 entre Platon & luy, & dont il estoit procedé: il
 20 respondit, Que la condition des tyrans estoit
 20 ueritablement malheureuse, & leur estat plein
 20 de beaucoup de mauux: mais qu'il n'y en auoit
 20 pas un si grand comme cestuy, que nul de ceux
 20 que lon appelle leurs mignons, & qui les
 20 gouernent, n'oze franchement parler à eulx,
 20 ny leur dire libremēt leur uerité: & que ce auoit
 20 esté par leur faulte qu'il festoit priué de la com-
 20 pagnie de Platon. Vne autre fois il y eut
 quelqu'un, qui pensant faire du plaisant, & se
 moquer avec bonne grace de luy, en entrant
 dedans sa chambre secoua sa robbe, comme
 lon fait quand on entre chez les tyrans, pour
 montrer que lon n'a point d'armes cachees
 dessoubz: mais Dionysius luy rēdit son change
 20 plaisamment: car il luy dit, Fais cela quand tu
 20 sortiras de ceans, pour uoir si tu y auras riē des-
 20 robbé. Et comme Philippus Roy de Macedoi-
 ne, un iour à table fust tumbé en propos des
 chansons, poësies & tragedies que Dionysius le
 pere auoit composees, & faignist s'esmerveiller,
 quand ne comment il auoit eu loisir de ua-
 quer à faire semblables compositions: il luy re-
 20 spondit assez à propos, C'estoit, dit il, aux heures
 20 que toy & moy, & tous autres seigneurs q̄ lon

» repute grands & heureux , employons à folla-
 » strer & à yurongner. Or quand à Platon , il ne
 » ueit iamais Dionysius à Corinthe:mais Dioge-
 » nes le Sinopien la premiere fois qu'il le rencon-
 » tra en son chemin luy dit , Tu es bié maintenāt
 » en estat indigne de toy. Dionysius s'arresta tout
 » court,& luy dit : Vrayement , Diogenes , ie te
 » sçay bon gré de ce que tu as compassion de ma
 » miserable fortune. Cōment , luy repliqua Dio-
 » genes, cuides tu que i'aye cōpassion de toy?i'en
 » ay plus tost despit , de uoir un esclauē tel que
 » toy , digne de uieillir & mourir au malheureux
 » estat de tyrā,cōme a fait ton pere , se iouer ainsi
 » en seureté,& passer son tēps parmy nous. Quād
 » ie uiens à conferer ces paroles de Diogenes , a-
 » uec les propos qu'escrit l'historien Philistus, en
 » deplorant la fortune des filles de Leptines, di-
 » fant qu'elles estoient reduittes de la haultesse
 » de tous biens & tous honneurs mondains , en
 » quoy abonde l'estat de la seigneurie tyranni-
 » que, à une uie basse & priuee, il me semble pro-
 » premēt que ce sont les regrets de quelque fem-
 » melette , qui regrette la perte des boucttes ou
 » estoient ses fards, ou ses belles robbes de pour-
 » pre, ou ses bagues & ses petits affiquetz d'or. Si
 » m'a semblé que cest entremets de ce que nous
 » auons escrit du tyrā Dionysius , ne seroit point
 » trop impertinent ny hors de propos, d'estre in-
 » seré en ces uies, & qu'il ne sera point trouué fas-
 » cheux ny inutile aux auditeurs, pourueu qu'ilz

n'ayent point trop de haste, ou qu'ilz ne soyent empeschez ailleurs. Mais au demourant si la desfortune de ce tyrā Dionysius semble estrange, la prosperité de Timoleon ne fut pas moins esmerueillable : car dedans cinquante iours apres qu'il eut mis le pied en la Sicile, il eut entre ses mains le chasteau de Syracuse, & enuoya Dionysius confiné à Corinthe : ce qui donna si bon courage aux Corinthiens, qu'ilz luy enuoyerent de renfort deux mille hōmes de pied, & deux cents cheuaulx, lesquelz allerent prendre terre en Italie au païs des Thuriens : mais uoyans qu'il leur estoit impossible passer de là en Sicile, pource que les Carthaginois tenoyēt la mer avec grosse flotte de uaisseaux, & à ceste cause estans contraincts d'attendre quelque occasion, ilz employerēt ce pendant leur loisir à un tresbel & tresdigne exploit : pource que les Thuriens qui pour lors auoyent la guerre contre les Brutiens, meirent leur uille entre leurs mains, laquelle ilz garderent aussi loyaument & aussi fidelement comme si c'eust esté leur propre païs. Ce pendant Icetes tenoit tousiours le chasteau de Syracuse assiegé, épeschāt le plus qu'il luy estoit possible qu'il ne uinst par mer du bled aux Corinthiens qui estoient dedans : & auoit attiltré deux soudards estrangers qu'il enuoya en la uille d'Adrane pour occire en trahison Timoleon, lequel n'auoit point autremēt de gardes à l'étour de sa person-

ne, & estoit de seiour parmy les Adranitains, ne se deffiant de chose du monde pour l'asseurance qu'il auoit de la sauuegarde du Dieu des Adranitains. Ces soudards enuoyez pour faire cest assassinement, furent d'adventure aduertis que Timoleon deuoit un iour sacrifier à ce Dieu : si entrerent dedans le temple portans des dagues dessoubz leurs robbes, & feirēt tant que petit à petit ilz approcherēt, passans à trauers la presse, iusques au plus pres de l'autel : mais à l'instant mesme qu'ilz s'entredonnoyent courage l'un à l'autre pour executer leur entreprise, il y eut un tiers qui donna si grād coup d'espee sur la teste de l'un de ces deux, qu'il en tōba par terre. Celuy qui auoit fait le coup s'en fouit incontinet, tenant tousiours son espee nue au poing, & s'en alla gagner une haute roche, & l'autre soudard qui estoit uenu avec le bleccé, se saisit d'un coing de l'autel, & demanda pardon à Timoleon, à la charge qu'il luy descouueroit l'embusche qui estoit dressée contre luy. Timoleon le luy ottroya : & adonc il luy declara comme luy & son compagnon mort auoyent esté enuoyez pour le tuer. Ce pendant on amena aussi celuy qui s'en estoit foy sur le rocher, lequel crioit à haulte uoix qu'il n'auoit riē fait qu'il n'eust deu faire, pource qu'il auoit occis celuy qui auoit tué son pere en la uille des Leontins : à quoy uerifier luy seruirent aucuns des assistens, qui tesmoignerent qu'il disoit uerité, & s'esmerucille-

rent grandement de l'artifice dont use la fortune, comment elle conduit une menee par le moyen d'une autre, & rassemble toutes choses quelque loing qu'elles soyent l'une de l'autre, & les enclau & enchaine ensemble, encores qu'elles semblent estre si differentes les unes des autres, qu'elles n'ayent rien de commun entre elles, faisant que la fin de l'une uient à estre le commencement de l'autre. Les Corinthiens donques ceste chose entédue, donnerent à celuy qui bailla le coup d'espee, une couronne de la ualeur d'environ cent escus d'or, pour autant qu'il auoit presté la passion de son iuste courroux au bon esprit qui auoit engardé Timoleon. Et au reste, ceste bonne rencontre ne seruit pas seulement pour le present, ains fut aussi utile à l'aduenir, pource que ceulx qui la ueirent, en conceurent bonne esperance, & en eurent en plus grande reuerence & plus grand soing la personne de Timoleon, comme estant hōme sainct, aimé des Dieux, & enuoyé expressement pour deliurer la Sicile de captiuité. Mais Ictes ayant failly à ce premier essay, & uoyāt que tous les iours, plusieurs se reengeoyēt du costé de Timoleō, se blasma luy mesme, de ce qu'ayāt une si grosse puisſāce des Carthaginois toute preste sur les lieux, à son cōmandement, il ne s'en seruoit que par petites parcelles, cōme fil en cust eu hōte, & alloit usant de leur alliance, à la defrobec. Si enuoya querir leur general

Mago avec toute sa flotte. Mago à sa requeste y amena une armee effroyable à uoir de cent cinquante uoiles, dont il occupa & couurit tout le port: puis meit en terre soixâte mille cōbatans, qu'il logea dedans la uille mesme de Syracuse, de maniere que tout le monde estimoit, que le temps, dont on auoit parlé anciennement, & dont on menaçoit la Sicile de si longue main, qu'elle seroit un iour toute habitee & possedee par les Barbares, estoit adonc uenu, pource qu'en tant de guerres que les Carthaginois auoyent euës au parauant en la Sicile, iamaïs ne leur estoit aduenü de prendre la uille de Syracuse, & lors par la trahison d'Icetes qui les y auoit receus, on les y ueoit campez. De l'autre costé, les Corinthiens qui estoient dedans le chasteau, se trouuoient en grâde peine & en grand danger, pource que les uiures leur appetissoyent fort, & commenceoyent à en auoir faulte, à cause que les ports estoient bien estroittement gardez, & si falloit qu'ilz fussent continuellement en armes pour defendre leurs murailles q̄ lon baroit & assailloit en plusieurs endroicts, avec toutes sortes d'engins de batterie, & toutes sortes d'inuentions à prendre uilles: au moyen dequoy ilz estoient aussi contrains de se departir en plusieurs troupes. Toutefois Timoleõ par dehors leur faisoit tout le secours qui luy estoit possible, leur enuoyant de Catane du bled, sur de petits batteaux de pescheurs

cheurs & autres petites barques, lesquelles se couloyent dedans le chasteau le plus souuent en tourmente, passans à trauers les galeres des Barbares, qui s'escartoyent les unes des autres, à cause du uent & de l'agitation des undes de la mer: dequoy Mago & Icetes s'estās apperceuz, resolurent d'aller prendre la uille de Catane, de laquelle uenoyent ainsi uiures aux assiegez: & prenans avec eulx les meilleurs combatans de toute l'armee, & partans de Syracuse cinglerēt uers Catane. Mais ce pendant Leon Corinthien Capitaine de ceulx qui estoient à la garde du chasteau, uoyant du dedans que les ennemis faisoient mauuais guet, & ne se tenoyent point sur leurs gardes, fait soudainement une faillie sur eulx, & les surprenant en tua de prim-fault une partie, & chassa l'autre, tellement qu'il se faisit du quartier de la uille, que lon appelle l'Achradine, qui estoit la meilleure partie de la uille, & qui moins auoit esté endommagée: car la uille de Syracuse semble estre composee de plusieurs uilles iointes ensemble, & y ayant trouué quantité de bledz & d'or & d'argent, ne uoulut point abandoner ce quartier ny retourner dedans le chasteau, ains reparament en diligence l'enceinte d'iceluy, & le conioignant au chasteau avec quelques fortifications qu'il y fait à la haste, se delibera de tenir & garder l'un & l'autre. Or estoient Mago & Icetes bien pres de Catane, quand il arriua deuers eulx un che-

uauteur party de Syracuse, qui leur apporta ceste nouvelle, que l'Achradine estoit prise: dequoy tous deux furent bien estonnez, & s'en retournerent tout court à grande diligence, ayans failly à prendre ce qu'ilz pretendoyent, & à garder ce qu'ilz tenoyent. Et quant à cela, il est encore douteux s'il se doibt attribuer à prudence & à uailance, ou bien à faueur de la fortune: mais ce que ie diray maintenant se doibt, à mon aduis, attribuer totalement à la grace de fortune. C'est que les deux mille soudards Corinthiens, qui s'estoyent arrestez en la uille des Thuriens, partie pour la crainte des galeres Carthaginoises qui les guettoyent au passage sous la conduite de Hanno, & partie aussi à cause que la mer par plusieurs iours se teint fort haulte, & fut tousiours fort courroucée, à la fin prirent le hazard de passer à trauers le país des Brutiens, & moitié de gré, moitié par force, feirent tant qu'ilz gaignerent la uille de Rege, estant encore la mer fort irritée. Au moyen dequoy l'Admiral des Carthaginois Hanno, ne s'attendant plus qu'ilz deussent passer, ains se persuadant qu'ilz demoureroyent tousiours là à ne rien faire & perdre temps, se meit en la teste qu'il auoit inuenté une bonne ruze & une subtile finesse pour abuser les ennemis: si commanda à tous ses gens de mettre sur leurs testes des chappeaux de triumphe, & quād & quand fait parer & accoustrer ses galeres de

boucliers, de cottes d'armes & de harnois à la Grecque, & en cest equippage s'en retourna cinglant deuers Syracuse, & alla passer à force de rames, tout le long du chasteau avec grands ris & batemens de mains, faisant crier à ceulx de dedās qu'il auoit desfaict le secours qui leur uenoit de Corinthe, ainsi comme ilz cuidoyent passer de la coste d'Italie en la Sicile, s'estant promis que cela descourageroit grandement ceulx qui estoient assiegez. Mais pendant qu'il famuloit à ceste sottize & ceste habile tromperie, les Corinthiens estans arriuez par le trauers du país des Brutiens en la uille de Rege, uoyans que personne ne gardoit plus le passage de la mer, & que la tourmente, comme par miracle s'estoit tout expressement appaisée, & estoit demouree la mer fort calme & tranquille, ilz s'embarquerent soudainement sur des barques de passage & batteaux de pescheurs, avec lesquelz ilz passerēt en la Sicile si seurement & en bonace si grande, qu'ilz tiroyent leurs cheuaux apres eulx par les renes, nageans au long de leurs bateaux. Quand ilz furent tous passez, Timoleon les ayant recueillis, alla incontinent se saisir de Messine, & de là marchant en bataille prit son chemin droit à Syracuse, se confiant plus à la bonne fortune qui le conduisoit, qu'à la force qu'il menoit, pource qu'il n'auoit pas en tout avec luy plus de quatre mille combatans : toutefois Mago entendant sa uenue, s'en

effroya & troubla grandement, & si entra encore en plus grand soupçon pour une telle occasion : A l'entour de Syracuse y a des marets qui reçoivent grande quantité d'eau douce, tant des fontaines que des ruisseaux, lacs & rivières, qui se vont par là deschargeés en la mer, & à ceste cause s'y engendre & nourrit une quantité grãde d'anguilles, & s'y en fait en tout temps une pescherie merueilleuse, exposée à qui en ueult prendre : parquoy les Grecs qui estoient à la soude des uns & des autres, quand ilz auoyent loisir, & qu'il y auoit surseance d'armes, samusoient à en pescher : & comme gens d'une mesme langue qui n'auoyent nulle cause de particulieres inimitiez les uns contre les autres, ainsi comme quand il estoit saison de combatre, ilz en faisoient leur deuoir, aussi en temps de trefues, ilz s'entrehantoyent & parloyent familièrement les uns avec les autres, mesmement en uacquant à ceste pescherie d'anguilles, & disoyent qu'ilz s'esmeruilloyent de l'assiette des beaux lieux qu'il y auoit là au long, & comme ilz auoyent la mer bien à propos. Si y eut entre eulx quelcun de ceulx qui prenoient soude des Corinthiens, qui se prit à
 33 dire : Est il bien possible que uous autres qui
 33 estes Grecs de nation, & qui auez une si belle
 33 & si grande uille, douce de tant de bõnes com-
 33 moditez, la uouliez rendre Barbare, en y lo-
 33 geant auprès de uous, ces meschans Carthagi-

20 nois , qui font les plus cruelz meurtriers qui
 20 foyent au monde ? là ou uous deussiez plus tost
 20 desirer , qu'il y eust plusieurs Siciles entre eulx
 20 & la Grece . Seriez uous bien si peu aduisez , de
 20 croire qu'ilz ayent assemblé une armee de tou-
 20 te l'Afrique , iusques aux coulónes d'Hercules ,
 20 & iusques à l'ocean Atlantique , à fin de uenir
 20 icy combattre pour establir la tyrannie d'Icetes ?
 20 lequel , sil eust eu le sens & le iugement de bon
 20 Capitaine , n'eust pas reietté ceulx qui font ses
 20 ancestres & ses fondateurs , pour introduire &
 20 mettre en son país les anciés ennemis d'iceluy ,
 20 ains y eust eu autant d'honneur & d'authorité ,
 20 que raisonnablement il en eust peu desirer , du
 20 gré & consentement des Corinthiens & de Ti-
 20 moleon . Les soudards qui auoyent esté à ce de-
 uis , semerent ces propos en leur camp , & don-
 nerent occasion à Mago de souspeçonner quel-
 que trahison , avec ce qu'il ne demandoit que
 quelque couleur pour s'en aller : & pourtant
 quoy que Icetes le priaist de demourer , en luy
 remōstrant de combien ilz estoient plus forts
 que les ennemis , ce neantmoins estimant qu'il
 cedoit plus en uertu & faueur de fortune à Ti-
 moleon , qu'il ne le surmontoit en nombre de
 gens , il meit uoiles au uent , & s'en retourna
 honteusement en Afrique , laissant eschapper
 de ses mains , sans aucun discours de raison hu-
 maine , la conqueste de toute la Sicile . Le len-
 demain qu'il fut party , Timoleon se alla pre-

ſenter en bataille deuant la uille, & quand les Grecs & luy entendirent comme les Carthaginois ſ'en eſtoient fouis, & que de faict ilz ueirent le port tout uuide de uaiſſeaux, ilz ſe prirent à rire & à ſe moquer de la laſcheté de Mago, & par deriſion feirent crier par la uille que lon donneroit un bon preſent à celuy qui diroit nouuelles, ou feſtoit foye l'armee des Carthaginois. Ce nonobſtant Icetes encore ſopiniaſtra à uouloir combatre, ne uoulant point laſcher la priſe qu'il tenoit, ains defendre iuſques au bout les quarties de la uille qu'il auoit occupez, ſoy confiant en ce qu'ilz eſtoyēt forts d'aſſiette & malaiſez à approcher: quoy uoyant Timoleon departit ſon armee, & luy avec l'une des troupes donna à l'endroit qui eſtoit le plus difficile du coſté que paſſe la riuie-re d'Anapus, & ordonna une autre troupe pour aſſaillir auſſi au meſme temps du coſté de l'Achradine ſoubs la conduite d'Iſias Corinthien, & une troiſieme troupe du dernier renfort qui eſtoit uenu de Corinthe, que menoyēt Dinarchus & Demaratus pour aſſaillir le quartier qui ſ'appelle Epipoles. Ainſi l'aſſault eſtant donné de tous coſtez, & tout en un meſme temps, les gens d'Icetes furent incontinent rompus & ſ'enfouirent. Si eſt bien raifonnable d'attribuer à la proueſſe des combatans, & à la prudence & ſageſſe du Capitaine, ce que la uille fut ainſi emportee d'aſſault, & que ſi ſou-

dainement elle uint à estre entre les mains de Timoleon, s'en estans les ennemis fous : mais qu'il n'y ait eu en cest assault pas un Corinthien ny tué ny blecé, il m'est bien aduis que cela proprement est œuure & effect de la fortune, qui auoit pris à fauoriser Timoleon, comme uoullant estriuer & faire à l'enuy de sa uertu, à fin que ceulx qui orroyent parler de ses faicts, eussent plus d'occasion de l'admirer pour heureux, que de le louer pour uertueux : car la renommee de ce grand exploit ne courut pas seulement en peu de iours par toute l'Italie, mais aussi par toute la Grece : de maniere que les Corinthiens qui ne pouuoient encore croire, que leurs gens fussent passez à sauueté en la Sicile, entendirent tout ensemble qu'ilz estoient arriuez à port de salut, & auoyent eu la uictoire sur leurs ennemis, tant les affaires succederent heureusement, & tant la fortune adiousta de soudaineté & de uistesse à la beaulté de ses faicts. Ayant donques Timoleon le chasteau & la forteresse de Syracuse entre ses mains, ne fit pas comme Dion : car il ne l'espargna pas pour la beaulté & magnificence de la fabrique : ains euitant la suspicion qui auoit premierement fait calumnier Dion, & à la fin auoit esté cause de le faire tuer, il fit crier à son de trompe, que quiconque uoudroit des Syracusains, s'en uinst avec quelque ferrement pour aider à demolir & ruiner la forteresse des ty-

rans . Il n'y eut homme en toute la uille de Syracuse qui n'y montast incontinent , & qui ne reputast ce cry & celle iournee estre certain commencement du recouurement de leur liberté . Si ruinerent nō seulement la forteresse du chasteau, mais aussi les palais, les sepultures, & generalement tout ce qui pouuoit seruir de memoire des tyrans : & ayant la place en peu de iours esté nettooyee & aplanie, Timoleon y feit edifier des salles & auditoires à tenir la iustice , à la requeste de ceulx de la uille , & y establit par ce moyen l'estat de liberté populaire , en supprimant la domination tyrannique . Mais uoyant qu'il auoit recouré une cité ou il n'y auoit point d'habitans , pource que les uns estoient morts es guerres & dissensions ciuiles, les autres s'en estoient fouis de peur d'auoir à uiure soubs des tyrans , tellement qu'en la grande place de Syracuse l'herbe estoit creüe si haulte & si forte, que les cheuaux y paissoyent, & les palefreniers y couchoyent . Les autres uilles, bien peu exceptees , estoient pleines de cerfs & de sangliers : & bien souuent ceulx qui estoient de loisir, trouuoient à chasser dedans les faulxbourgs & fossez au plus pres des murailles , & n'y auoit personne de ceulx qui habitoient es chasteaux & places fortes des champs , qui en uoulust sortir pour retourner habiter es uilles, tant ilz estoient tous effarouchez , & tāt ilz auoyent en haine & en horreur

les assemblees de conseil, les harengues, & l'entremise du gouvernement dont leur estoient issus tant de tyrans : Voyant donques Timoleõ ceste desolation, & aussi ce peu de Syracusains naturelz qui estoient eschappez, ilz furent d'aduis d'escrire aux Corinthiens qu'ilz enuoyassent des habitans de la Grece pour repeupler la uille de Syracuse, pource qu'autrement les terres demoureroyent inutiles sans estre cultiuees, avec ce qu'ilz attendoyent une grosse guerre de l'Afrique, estans aduertis comme les Carthaginois auoyent fait pendre en croix le corps de leur Capitaine general Mago, qui estoit luy mesme tué, à cause de ses mauuais deportemés en ceste charge, & qu'ilz remettoyēt sus une autre puisante armee pour repasser & retourner l'annee ensuyuant faire la guerre en la Sicile. Ces lettres de Timoleõ estans portees à Corinthe, & quand & quand y estans arriuez les ambassadeurs de Syracuse, qui supplioyent le peuple de uouloir prendre le soing & la protectiõ de leur pauvre uille, & d'en uouloir estre de rechef fondateurs, les Corinthiens ne furent point tentez d'auarice ny de conuoitise de se faire seigneurs d'une si belle & si grosse cité, ains enuoyèrent premierement par toutes les assemblees de festes solennelles & ieux publiques de la Grece, faire sçauoir à son de trompe, que les Corinthiens ayans desfait la tyrannie qui estoit en la uille de Syracuse, & en ayans

chassé les tyrans , rappelloyent les Syracusains fuitifs de leur país, & tous autres Siciliens qui y uouldroyét retourner habiter, en toute frâchise & pleine liberté , avec promesse de leur departir les terres iustemét & egalemét, autât aux uns qu'aux autres : puis enuoyerét auffi messagers en Asie, & par toutes les Isles, là ou ilz entédoyent que plusieurs bannis de Syracuse festoyent retirez, les admonester & semondre de s'en uenir à Corinthe , & que les Corinthiens leur dōneroyent uaisseaux, Capitaines & moyé pour seurement les conduire iusques dedans Syracuse à leurs propres cousts & despens , en recompense de quoy la uille de Corinthe receuoit une tresglorieuse louange & benissement d'un chascun de deliurer ainsi la Sicile de la seruitude des tyrás, de la preseruer qu'elle ne tumbast soubz la main des Barbares, & de remettre les naturelz citoyens en leur país & leurs maisons: toutefois ceux de la Sicile, qui à la semonce de ces publiques criees s'assemblerent à Corinthe , ne se trouuans pas en nombre suffisant, prierent les Corinthiens de receuoir avec eulx encore d'autres habitás, tant de Corinthe mesme , que de tout le demourant de la Grece. ce qui fut fait: & en assembla ló iusques à dix mille , qui tous ensemble sembarquerent pour aller à Syracuse , ou il y en auoit desia un autre grand nombre qui festoit retiré deuers Timoleon, tant de la Sicile mesme, que de toute l'Ita-

lie, de sorte que tous ensemble faisoÿt iusques au nombre de soixãte mille, ainsi comme Athanis l'escrit, entre lesquelz il departit tout le territoire, & leur uendit des maisons de la uille, iusques à la ualeur de six cents mille escus, en laissant faculté aux naturelz citoyens de retirer les leurs, & faisant par ce moyen que le peuple, qui estoit extremement pauvre, eust de l'argent en commun pour suruenir tant aux affaires & necessitez publiques, qu'aux frais de la guerre. Les statues mesmes furent uendues, & donna le peuple sa sentence à la pluralité de ses uoix sur chascune d'icelles: car elles furent mises en iustice, & accusées, tout ne plus ne moins, que si ç'eussent esté hommes uiuans que lon eust examinez & syndiquez en iustice. Et dit on que les Syracusains reseruerēt alors la statue de Gelon ancien tyran de leur uille, honorans sa memoire, à cause d'une grande uictoire qu'il auoit gaignee aupres de la uille de Himere sur les Carthaginois, & condamnerent toutes les autres à estre ostees des lieux publiques, & uendues. Ainsi cōmenceoit la uille de Syracuse à se réplir & à se reuenir petit à petit, y accourans de tous costez gēs pour y habiter: au moyē dequoy Timoleō pēsa d'affranchir aussi les autres uilles, & de tout poinct exterminer & defraciner les tyrannies de la Sicile: & pour y paruenir, leur alla faire la guerre iusques chez eulx. Le premier auquel il s'adressa fut Ictes, qu'il contraignit

d'abandonner l'alliance des Carthaginois, & de promettre qu'il demoliroit les forteresses qu'il tenoit, & uiuroit en homme priué dedás la uille des Leontins. . Leptines aussi semblablement, qui estoit tyran de la uille d'Apollonie, & de plusieurs autres petites uillettes d'alentour, se uoyant en danger d'estre pris par force, se rendit: en quoy faisant Timoleõ luy sauua la uie, & l'enuoya à Corinthe, estimât que ce seroit chose honorable à son país, que les autres Grecs ueissent en la cité metropolitaine les tyrans de la Sicile uiuans petitement & bassement comme bannis. Cela fait il s'en retourna à Syracuse pour y uaquer & entendre à l'establissement de la chose publique & de la police, en assistant à Cephalus & à Dionysius deux grands personnages, que lõ auoit enuoyez de Corinthe pour reformer lesloix, & leur aider à establir les principales & plus belles ordonnances de leur chose publique. Et ce pendant, pource que les soudards uouloyent gagner quelque chose sur les ennemis, & ne demourer pas oisifs, il les enuoya sous la conduite de Dinarchus & Demaratus au país qui estoit soubz l'obeissance des Carthaginois, là ou ilz feirent rebeller contre les Barbares plusieurs petites uilles, & non seulement uescurent en affluence plantureuse de tous biés, ains encore amasserent ilz de l'argent pour l'entretènement de la guerre. Mais en ces entrefaittes les Carthaginois descendirent

à Lylibee avec une armee de soixante & dix mille combatans , deux cens galeres , & mille autres uaisseaux qui portoyent les engins de baterie , les chariots , uiures & autres prouisions & munitions necessaires pour un camp, en intention de ne faire plus ainsi la guerre par le menu, ains de chasser tout à un coup les Grecs de toute la Sicile entierement : car aussi estoit-ce une puissance suffisante pour prendre & subiuguer tous les Siciliens, encore qu'ilz n'eussent point esté diuisez, mais bien unis les uns avec les autres. Parquoy estàs aduertis que lon couroit leurs terres & pais, ilz y coururent incontinent en chaude chole soubz la cõduite de Hasdrubal & de Hamilcar les deux Chefs de leur armee. Ceste nouvelle fut tantost portee iusques à Syracuse, dont les habitàs furent si effroyez, oyans parler d'une si grosse puissance, que de si grand nombre qu'ilz estoient à peine y en eut il trois mille qui eussent la hardiesse de prendre les armes & sortir en campagne avec Timoleon. Quant aux estrangers soudoyez & entretenus, ilz n'estoyent pas plus de quatre mille en tout, desquelz encore y en eut il mille qui par lascheté de cueur s'en retournerent de my chemin tout court, disans que Timoleon estoit hors de son bon sens, & plus temeraire que son aage ne portoit, de uouloir aller avec cinq mille combatans à pied, & mille cheuaux, se presenter deuant soixante & dix mille, en es-

loignant de bien huit grandes iournees de Syracuse ce peu de forces qu'il auoit pour la pouuoir defendre, tellemēt que sil aduenoit qu'ilz fussent contrains de foudir, ilz n'auroyent lieu quelconque ou ilz se peussent retraire ne sauuer, ny personne qui prist le soing de les ensepuelir & enterrer quand ilz auroyent esté tuez. Toutefois Timoleon estima estre auātage pour luy, que ceulx la se fussent declarez telz comme il estoient, de bonne heure auant la bataille. Et au demourant, ayant presché & encouragé les autres, les fait tous marcher en diligence uers la riuere de Crimese, là ou il estoit aduertý qu'il trouueroit les Carthaginois: & ainsi comme il montoit un petit coustau, de dessus lequel on ueoit le camp des ennemis de l'autre costé, il arriua par cas d'aduēture en son ost quelques mulets chargez de l'herbe qui s'appelle ache, dont les soudards se fascherent de prime face, cuidans que ce fust un mauuais presage, pource que nous auons accoustumé de couronner les sepultures des morts avec ceste herbe: dont est uenu le prouerbe commun, que nous disons quand quelcun est biē malade & en grād danger de sa uie, qu'il ne luy fault plus que l'ache: c'est à dire, la sepulture. Mais Timoleon uolāt les retirer de ceste superstition, & leur oster ce descouragement, fait arrester l'armee, & apres leur auoir fait d'autres remonstrances selon le temps, le loisir & l'ocasiō, leur dit, que la cou-

ronne se presentoit d'elle mesme entre leurs mains auant la uictoire, pource que les Corinthiens couronnent ceulx qui emportent le pris es ieux Isthmiques, qui se celebrēt en leur terre, avec des chapeaux d'ache, & estoit encore lors le pris de la uictoire es ieux solennelz Isthmiques la couronne d'ache, comme iusques icy l'est elle es ieux de Nemeē, & n'y a pas long temps que es ieux Isthmiques on a commencé à user des branches de pin. Timoleon donques ayant ainsi parlé à ses gens, comme nous auons dit, prit luy mesme de ceste ache le premier, dont il feit un chapeau, qu'il se meit sur la teste, & apres luy les autres particuliers Capitaines, & iusques aux priuez souldards : qui plus est, à l'instant mesme, les deuins apperceurent deux aigles uolans uers eulx, dont l'une tenoit entre ses griffes un serpent, qu'elle perçoit d'oultre en oultre avec ses ongles, & l'autre en uolant iettoit un cry ferme, & donnant assurece. si les môstrerēt toutes deux aux souldards, lesquelz adonc tous d'une uoix se prirent à inuoyer les Dieux en leur aide. Or estoit-ce sur le cōmencement de l'Esté, enuirō la fin du mois de May, approchant ia le Soleil du Solstice d'Esté, & se leua de la riuere un gros brouillas, de sorte que toute la cāpagne estoit couuerte de brouee, & ne uoyoit on rien du camp des ennemis, seulement entēdoit on un grand bruit de uoix cōfuses, cōme uenāt d'une si grosse armee, & mon-

tant contremont iufques à la cyme du couftau: mais quand les Corinthiens eurent acheué de monter celle cofte, ilz meirent leurs targes & pauois en terre pour reprendre un peu d'haleine: & le Soleil ayant tiré & enlcué les uapeurs du brouillas iufques à la cyme des couftaux, l'air commença à fy eſpeſſir & fy groſſir, de maniere que les croupes des montagnes furent toutes couuertes de nuces: & au contraire la plaine au deſſoubs demourât toute nette & purifiée, on deſcouurit adonc tout clairement la riuere de Crimeſe, & ueit on les ennemis qui la paſſoyent en telle ordonnance: Premieremēt ils auoyent mis au deuant les chariots de guerre armez & equippez fort eſpouuentablement, derriere leſquelz ſuyuoyent dix mille hommes de pied armez avec boucliers blancs ſur leurs bras, & coniecturoit on a les uoir de loing ſi bié equippez, à leur graue deſmarche, & à leur bõne ordonnance, que c'eſtoient naturelz Carthaginois: apres leſquelz ſuyuoyent les autres nations peſle meſie, & paſſoyent en foule avec grand deſarroy. Et là Timoleon conſiderant que la riuere luy donnoit commodité de les prendre à demy paſſez, & en choiſir à part tel nombre qu'il uouloit, apres auoir monſtré au doigt à ſes gēs, cõme la bataille des ennemis eſtoit meſpartie en deux par la riuere, pource que les uns eſtoient ia paſſez, & les autres non, il cõmanda à Demaratus, que prenāt les gēs de
cheual,

cheual, il allaſt commencer à charger les premiers, pour engarder qu'ilz ne ſe peuſſent ren-ger en bataille, & quand & quand descendant avec les gens de pied en la plaine, donna aux autres Siciliés les deux poinctes de ſon bataillõ, y meſlant parmy eux quelque nombre des ſoudards eſtrangers, & au milieu ou il eſtoit en perſonne, reteint autour de ſoy les naturelz Syracuſains, avec la fleur des eſtrangers, & n'arresta gueres à choquer, uoyant le peu d'exploit que faiſoyent ſes gens de cheual : car il apperceuoit qu'ilz ne pouuoient aduenir à charger à bon eſciant le bataillon des naturelz Carthaginois, à cauſe qu'ilz eſtoient couverts des chariots armez qui couroyent ça & là au deuant d'eulx, à l'occaſion de quoy ilz eſtoient contraints de tournoyer cõtinuellement, ſ'ilz ne ſe uouloyët mettre en danger d'eſtre rompus tout à plat, & faire en ſe retournant des faillies & des courſes par bouttes ſur les ennemis. Parquoy prenant adonc ſon pauois ſur ſon bras, il cria à haulte uoix à ſes gens de pied, qu'ilz le ſuyiſſent hardimët, & qu'ilz ne doubraſſent de rien. Ceux qui l'ouirent trouuerent ſa uoix plus que naturelle, comme eſtant trop plus forte & plus puiſſante qu'elle n'auoit accouſtumé d'eſtre, ſoit ou que l'ardeur & uehemente affection de combatre luy enforceaſt ainſi la uoix, ou que quelque Dieu, comme ſur l'heure il fut aduis à pluſieurs, luy aidaaſt à crier. Ses gens ſoudain

luy respondirent de mesme, & le prierent de les mener sans plus differer. Si feit adonc entendre à ceulx de cheual, qu'ilz se tirassent à costé hors de deuant les chariots, & qu'ilz allassent charger les Carthaginois par les flancs, puis feit ferrer de pres escu contre escu, & pauois contre pauois, ceulx qui estoÿét aux premiers rens de son bataillon, commandant à mesme instant aux trompettes de sonner: & ainsi alla de grand roideur chocquer les ennemis, lesquelz sousteindrent ce premier choc uailamment, ayans les corps armez de bons corselets de fer, & les testes de morrions de cuyure, & si portoyét deuant eulx de grâds pauois, avec lesquelz ilz soustenoyent & reboutoyent facilement les coups de iauelines & de picques. Mais quand ce uint à cōbatre à coups d'espee, ou il n'est pas moins besoing d'adresse & d'art, que de force, incontinent il se leua des montagnes une tempeste de tonnerres effroyables & d'esclairs ardents parmy: puis les nues'espeffes & obscures, qui festoyent amassees autour des cymes des costaux & collines, se uindrent quand & quand à descharger en la plaine, sur laquelle se donnoit la bataille, avec un orage de pluye impetueuse, uents uiolents & gresle meslee parmy: toute laquelle tempeste donnoit aux Grecs par derriere, & aux Barbares par deuant, leur batât les uifages, & leur esblouissant les yeux, estans continuellement ferus d'une pluye poulsec par

le uent, & d'esclairs si souuent recoupez, que l'un n'attendoit pas l'autre. Cela leur apportoit beaucoup d'empeschemens, mesmemēt à ceulx qui n'estoyent pas aguerris, principalement le tonnerre, & le bruit que faisoit le uent impetueux & la gresle, en donnant sur leurs harnois: car cela engardoit qu'ilz ne peussent ouir les comandemens de leurs Capitaines. Dauantage la fange faisoit aussi grande nuiffance aux Carthaginois, pource qu'ilz n'estoyent pas deliures en leurs harnois, ains pesamment armez, comme nous auons dit: puis quand les plis de leurs hocquetons furent abreueuz d'eau, ilz les chargerent encore plus, & les empeschoyēt de combatre à leur aise: & au contraire, cela seruoit aux Grecs à les renuerfer plus facilement en terre, & quand ilz estoyent une fois tumbez en la fange avec leurs pesantes armes, ilz ne se pouuoient iamais plus releuer. Il y auoit dauantage, que la riuiera de Crimese estant fort enflée, tant par ce grand rauage de pluyes, que par la multitude du monde qui la trauersoit, se debordoit & regorgeoit en la plaine d'alentour, laquelle estant au dessoubs de plusieurs fontaines, ualles & cauains, fut incontinent toute noyée & remplie de force ruisseaux & torrēts, qui couroyēt à trauers la campagne, sans aucun liēt ne canal certain: entre lesquelles eaux les Carthaginois se trouuans enveloppez, malaisement s'en pouuoient despestrer, si que fina-

blement estans pressez de la tourmente qui les batoit tousiours de plus en plus, & dauantage leur ayās esté tuez d'arriuee par les Grecs, quatre cents des meilleurs hommes qu'ilz eussent, qui faisoient le premier front de leur bataille, tout le demourant de l'armee se tourna incontinent en fuitte à ual de rouverte, dont les uns estans suyuiuz de pres, furent mis à l'espee emmy la plaine mesme: les autres s'embarassans parmy ceulx qui passoyent encore la riuere, furent emportez à ual, & noyez par l'impetuosité de la riuere: mais le plus grand nombre, cuidant gagner de uistesse les coustaux d'alenuiron, fut attainct par les armez à la legere, & le tout passé au trenchât de l'espee. Lon dit que de dix mil le hōmes qui demourerent morts en ceste bataille, les trois mille estoÿēt naturelz bourgeois de Carthage, qui fut un grād dueil & une grāde perte pour celle cité: car il n'y en auoit point en toute la uille de plus nobles, de plus riches, ne de plus gentilz compagnons & plus uaillans hommes que ceulx la, & ne treuue lon point par memoire, que iamais es guerres precedētes il soit mort en un iour de bataille, tant de naturelz Carthaginois, qu'il en mourut ceste fois la, pource qu'ilz auoyent accoustumé de se seruir en leurs guerres de Lybiens, Hespagnolz & Nomades, & par ce moyen receuoient les defaittes & pertes des batailles aux despēs & dommages d'autruy: aussi cogneut on bien l'estat &

la qualité des morts à leurs despoilles, pource que ceulx qui les despoillèrent ne s'amusoÿt point à recueillir & serrer du cuyure ne du fer, à cause qu'ilz trouuoÿent assez or & argent : car la bataille gaignee, les Grecs passerent la riuie-re, & prirēt tout le cāp des Barbares avec leurs sommiers & tout leur bagage. Quāt aux prisonniers, les soudars en desroberēt & destournerēt beaucoup : mais encore de ceux qui uindrēt en euidēce au butin cōmun, y en eut il cinq mille, & y eut deux cents chariots de guerre pris. Si fut adonc une tresbelle & tresmagnifique chose à uoir, que la tente du Capitaine general Timoleon, que lon enuironna tout à l'entour de monceaux de despoilles de toutes sortes, entre lesquelles se trouuerent mille corselets de beaulté & de manufacture nōpareille, & avec cela furent apportez dix mille boucliers. Et estans les uaincueurs en petit nōbre à despoiller les morts & uaincus qui estoÿent en grand nombre, ilz trouuerent biē de quoy s'enrichir : mais aussi y furent ilz trois iours : & à la fin au troisieme iour apres la bataille, ilz dresserēt un trophée de leur uictoire : & Timoleon enuoya à Corinthe, avec la nouvelle de ceste desfaitte, les plus beaux & les meilleurs harnois qui furent trouuez au pillage, à fin de rendre son païs & la uille de sa naissance la plus louee & plus benie par tout le mōde qui fust en toute la Grece, attendu qu'elle estoit seule entre toutes les

citez Grecques, ou l'on ueoit les principaux temples ornez & decorez, non de despoilles de peuples Grecs, ny d'offrandes conquises par meurtre & effusion du sang de ceulx qui estoient de leur mesme langue & mesme nation, qui à la uerité sont de malplaisantes memoires, ains des armes ostees aux Barbares, avec inscriptions, qui tesmoignoient la uaillance & la iustice ensemble de ceulx qui les auoyent uictorieusement conquises: C'est à sçauoir, que les Corinthiens & leur Capitaine Timoleon ayans deliuré les Grecs habitans en la Sicile, de la seruitude des Carthaginois, en auoyent donné ces offrandes aux Dieux pour leur rendre graces de la uictoire. Cela fait, Timoleon laissant les estrangers qu'il auoit à sa soude sur le pais de l'obeissance des Carthaginois pour y piller, gaster & ruiner tout, s'en retourna avec le demourant de son armee à Syracuse, là ou tout premierement il bannit de la Sicile les mille soudards qui l'auoyent abandonné, avec bien expres commandement qu'ilz eussent à sortir de la uille auant que le Soleil fust couché. Ainsi passerent ces mille desloyaux mutins en Italic, là ou ilz furent soubz promesse de paix, tous malheureusement & meschamment mis en pieces par les Brutiens: telle fut la peine que les Dieux leur feirent payer de leur trahison. Depuis Mamerus tyran de Catane, & Iceres, fust ou pour enuie qu'ilz portassent à la gloire des beaux faicts de Timoleon, ou pour crainte qu'ilz

eussent de luy, uoyans que les tyrans ne pouuoient auoir fiance de paix, ny d'accord avec luy, feirent alliance avec les Carthaginois, & leur escriuirét qu'ilz enuoyassent une autre armee, & un Capitaine prôptement, filz ne uouloyent estre dechassez de toute la Sicile entierement. Les Carthaginois y enuoyerent Gisco avec soixante & dix uoiles, lequel à son arriuee retira à sa soude quelque nombre de soudards Grecs, qui furét les premiers que ceulx de Carthage eussent onques euz à leur seruice: car ilz ne s'en estoyét iamais seruis iusques alors qu'ilz les estimerent hommes inuincibles, & les meilleurs combatans de tout le monde. Dauantage les habitans du territoire de Messine, ayans fait une secrette conspiration entre eulx, occirent quatre cents hommes que Timoleon leur auoit enuoyez: & es terres de l'obeissance des Carthaginois, aupres d'un lieu qui s'appelle Hieres, y eut une autre embusche dressée à Euthymus Leucadien, en laquelle luy & tous ses soudards furent taillez en pieces. La desfaitte desquelz rendit encore la prosperité & bonne fortune de Timoleon plus renommee, pource qu'ilz estoyent encore de ceux qui auoyent occupé par force le temple d'Apollo en la uille de Delphes avec Philodemus le Phocien, & avec Onomarchus, ayans participé à leur sacrilege: & estans haïs de tout le môde, & fouis comme gens excommuniez & mauidctz, alloient errās

ça & là par le país de la Moree quãd Timoleon à son partemēt les recueillit à faulte d'autres:& estans arriuez en la Sicile,ilz auoyent tousiours uaincu en toutes les batailles & rencontres ou ilz f'estoyēt trouuez avec luy:mais à la fin apres que le principal de la guerre fut paracheuē, e-stās enuoyez par luy à quelques couruees pour secourir quelques uns,ilz y perirent tous,& encore non point ensemble, mais à diuerfes fois, tellement qu'il semble proprement que la iustice diuine en faueur de Timoleon les tria d'avec les autres, quand elle leur uolut faire payer la peine deuē à leur meschanceté,de peur que les bōs ne souffrissent aucun dommage de la punition des meschans. ainsi estoit la bienueillance des Dieux enuers Timoleon admirable,non moins es choses qui passoyent à son desauantage,qu'en celles qui succedoyent bien pour luy. Mais toutefois la commune de Syracuse supportoit mal patiēment quelques traict̃s de moquerie que leur en faisoient & disoyent les tyrans:car Mamercus entre autres estimant beaucoup de foy, pource qu'il sçauoit faire des uers, & composoit quelques Tragedies, ayant eu en quelques rencontres auantage sur les estrangers, que les Syracusains entretenoyent à leur soude,en faisoit grande gloire:& en dediāt les boucliers qu'il auoit gaignez sur eulx aux temples des Dieux, y adiousta ces uers piquans en mespris & moquerie des uaincus:

- 22 Ces beaux pauois de pourpre coulourez,
 23 D'uyoire & d'or richement labourez,
 24 Nous les auons gaignez par force, & pris
 25 Auec boucliers de bien fort petit pris.

Ces choses faittes, Timoleon mena son armee deuant la uille de Calauria, & ce pendant Ictes entrant à main armee sur les terres des Syracusains, courut tout le plat pais, ou il gaigna grande quantité de butin. Et apres y auoir fait beaucoup de gast & de dōmage s'en retourna, passant tout au long de Calauria pour faire despit à Timoleon, sachāt bien qu'il auoit lors peu de gens auec luy. Timoleon le laissa passer, & puis alla apres auec sa cheualerie & ses gens de pied armez à la legere, dequoy Ictes aduery, trauerfa la riuiere qui se nomme Damirias, puis s'arresta sur l'autre bord comme pour cōbattre, se confiant en la roideur du cours de la riuiere, & en la haulteur de ses riues tant d'un costé que d'autre : mais il se meit adonc un debat & une contention merueilleuse entre les Chefz des bendes de Timoleon, qui fut cause de retarder un peu le combat : car il n'y en eut pas un qui uoulust passer derriere son compaignon, ains uouloyent tous estre les premiers pour auoir l'honneur de commencer la charge, de maniere qu'il n'y auoit point d'ordre à ce passage, tant ilz s'entrepouffoyent & raschoyēt à gaigner chascun le deuāt de son compaignon. Parquoy Timoleon uolant tirer au fort ceulx

qui auroyent à passer les premiers, prit de chacun d'eulx un anneau, & les ietta tous ensemble dedans le reply de son manteau: & les ayât meslez ensemble, en tira par cas d'aduétude un le premier ou il y auoit la figure d'un trophée engraué: quoy uoyans ces ieunes Capitaines s'escrierent tous de ioye, & sans plus attendre d'autre sort, se meirent à passer la riuere le plus uistement que chacun peut, & aussi tost à charger les ennemis: lesquelz ne peurent soustenir leur effort, ains se meirēt à fouir, & furent tous entièrement despouillez de leurs armes: mais il y en eut mille qui demourerent morts sur le champ. Et peu de iours apres, Timoleon menant son armee deuant la uille des Leontins, y prit Icetes uif, avec son filz Eupolemus, & le general de sa cheualerie, qui luy furent liurez entre ses mains par ses soudards mesmes. Si furent Icetes & son filz puniz de mort cōme traistres & tyrans, & Euthydemus, quoy qu'il fust uaillant homme & hardy à la guerre, ne trouua nō plus de misericorde, pour quelque iniurieuse parole que lon le chargea d'auoir ditte cōtre les Corinthiens. Car lon dit que quand ilz uindrēt premieremēt de leur pais en la Sicile, pour y faire la guerre aux tyrās, en une harēgue qu'il feit deuāt les Leontins, il dit être autres choses, qu'il ne se falloit point estonner ny effroyer, si

^a Dehors estoient femmes Corinthienes.

Voila cōment la plus part des hōmes bien sou-

C'est le
cōmēce-
mēt de la
tragedie
de Medee
l'Euripi-
le.

uent s'offense plus pour de mauuaises paroles que pour de mauuais effects, & portent plus patiemment un dōmage qu'ilz ne font une iniure, & pardonne lon aux ennemis quand ilz se reuēgent de faict, cōme ne pouuās faire de moins: mais les paroles iniurieuses semblent proceder d'une haine & d'une malignité trop excessiue. Au demourāt, retourné que fut Timoleon à Syracuse, les Syracusains meirēt en iustice les femmes d'Icetes & de son filz, & leurs filles, lesquelles, leur proces fait, furent par sentence du peuple cōdamnees à la mort. C'est de tous les actes de Timoleō, celuy qui me semble le plus desaggreable: car sil eust uoulu, il eust bien peu empescher que ces pauures femmes ne fussent point mortes: mais il ne s'en soucia point, & les abandonna au courroux de leurs citoyens, qui uoulurēt uenger sur elles les tors que lon auoit faits à Dion, apres qu'il eut chassé le tyran Dionysius: car ce fut Icetes qui fait noyer dedans la mer Arete femme de Dion, sa sœur Aristomache, & son filz qui estoit encore petit enfant, comme nous auons escrit ailleurs en la uie de Dion. Cela fait il alla contre Mamercus à Catane, qui l'attendit pres la riuiera d'Abolus, ou il fut desfait en bataille, & y mourut plus de deux mille hōmes, dont la plus part estoit de Carthaginois, que Gisco auoit enuoyez à son secours: & depuis il ottroya paix aux Carthaginois à leur grāde poursuite & requeste, sous condi-

tion qu'ilz tiendroyēt ce qui est dela la riuere de Lycus, & neantmoins qu'il seroit loisible aux habitans qui en uoudroyent sortir pour aller demourer au territoire des Syracusains, de le pouuoir faire, & transporter quād eulx leurs biēs, leurs femmes & leurs enfans: & oultre cela, q̄ de lors en auant les Carthaginois renonce royēt à toute cōfederatiō & toute alliâce des tyrans. A raison dequoy, Mamercus ayant mauuaise esperance de son faict, s'en uolul aller en Italie pour tascher à emouuoir les Lucaniēs cōtre Timoleon & cōtre les Syracusains: mais ceulx qui estoyent en sa compagnie, retournerent avec leurs galeres de my chemin: & si tost qu'ilz furent de retour en Sicile, liurerent la uille de Catane entre les mains de Timoleon, tellement que Mamercus fut contraint de se sauuer & s'enfuir à Messine deuers Hippon qui en estoit tyran: mais Timoleon l'y poursuyuit, & assiegea la uille par mer & par terre: dequoy Hippon eut peur, & s'en cuida fuir sur une nauire: mais il fut pris à la sortie: & les Messeniens l'ayans entre leurs mains, feirent uenir les enfans de l'eschole au theatre, pour y uoir un des plus beaux spectacles qu'ilz eussent sceu uoir, c'est à scauoir, la punition du tyran, lequel fut fouetté publiquement, & puis executé à mort. Quant à Mamercus, il se rendit luy mesme à Timoleon pour estre iugé par les Syracusains, pourueu que Timoleō ne fust point

son accusateur. Si fut mené à Syracuse, là ou il essaya de prononcer deuant le peuple une harangue qu'il auoit de longue main propensee & composee : mais uoyant que le peuple crioit & faisoit un grand bruit pour ne le point ouir, & qu'il n'y auoit point d'apparence qu'il fust pour luy pardonner, il se prit à courir à trauers le theatre, & alla donner de la teste tant qu'il peut, contre un des degrez ou lon se siet au theatre, cuidant se froisser toute la teste pour mourir promptement : mais il n'eut pas l'heur de pouuoir ainsi mourir : car il fut pris étant encore uif, & puny de la mesme peine que lon punissoit les brigands & les larrons. Voila comment Timoleon alloit couppant & arrachant les tyrannies de la Sicile, & y abolissant toutes guerres: car au lieu qu'il auoit trouué l'isle toute effarouchee, sauuage, & haïe par les naturelz habitans mesmes, pour les maux & miseres extremes qu'ilz y enduroyent, il la rendit si douce & si desirée des estrangers, qu'ilz y uenoyent de loing pour habiter, au lieu que les naturelz habitans s'en fouyoyent au parauant: tesmoins Agrigente & Gele, deux grandes citez, qui depuis la guerre des Atheniens auoyent esté entierement desolees & destruittes par les Carthaginois, & furent alors repeuplees, l'une par Megellus & Pheristus, deux Capitaines qui uindrent de Elee, & l'autre par Gorgos, qui uint de l'isle de Ceo: & ras-

semblerent le plus qu'ilz peurent des premiers citoyens & anciens bourgeois desdittes uilles, ausquelz Timoleon donna non seulement securité, paix & tranquillité pour s'y pouuoir loger & establir à leur aise & loisir, ains leur aida affectueusement de toutes autres choses selon le pouuoir & le moyen qu'il en auoit, d'ot il estoit aimé & honoré de tous, cōme leur pere & leur fondateur. Ceste affection estoit commune à tous autres peuples Siciliens, de maniere qu'il n'y auoit en toute la Sicile ny appointment de guerres, ny establissement de loix, ny departement de terres, ou institution de police & de gouuernement, qui semblast estre bien, si Timoleon n'y auoit mis la main, comme maistre principal de l'œuure, qui luy adioustoit une grace qui la faisoit aimer des Dieux, & plaire uniuersellement à tous hommes. Car enuiron ce temps la, il y eut bien d'autres grands personnages en la Grece qui feirent de grandes choses, entre lesquelz furēt Timotheus, Agefilaus, Pelopidas & Epaminondas, auquel Timoleon tafchoit plus à se conformer & à luy ressembler qu'à nul autre: mais en tous les faicts de ces autres grāds Capitaines la, y a tousiours une splendeur meslee avec uolence, peine & labeur, tellement qu'aucuns d'iceulx ont esté suyuis de reprehension, & les autres de repentance: & au contraire es faicts de Timoleon, excepté seulement ce qu'il fut contraint de faire en la per-

bonne de son frere, il n'y a rien ou lon ne puisse avec uerité exclamer, comme dit Timæus, la sentence de ces uers icy de Sophocles :

- » Quelle Venus, quel Cupido humain
 » (O Dieux du ciel) ont icy mis la main ?

Et tout ainsi que la poësie d'Antimachus, & la peinture de Dionysius, tous deux Colophonniens, sont bien pleines de nerfs & de uigueur, mais on uoit incōtinent, que ce sont choses trauallees & faittes avec peine & labeur: & à l'opposite es tableaux de Nicomachus, & es uers d'Homere, oultre les autres graces & perfectiones qui y sont, encore y a il celle la, que lon apperceoit à la premiere rencontre qu'ilz ont esté aiseement faits, & sans grande peine: Aussi qui uouldra comparer les guerres & les batailles laborieuses & sanglantes d'Epaminondas & d'Agefilaus, avec celles de Timoleon, esquelles oultre la iustice & l'equité, y a une grande aisance & facilité, il trouuera en pesant les choses à la balance du droit & de la raison, que ce n'ont point esté actes de fortune simplement, ains de uertu heureuse & bien fortunee, combien que luy mesme attribuaist le total à la faueur de fortune: car & en ses missiues familie-res qu'il escriuoit à ses amis à Corinthe, & en quelques harengues qu'il feit deuant le peuple de Syracuse, il dit par plusieurs fois qu'il rédoit graces à Dieu de ce qu'ayāt uoulu sauuer & deliurer de seruitude la Sicile, il luy auoit pleu se

seruir de luy, & en donner le tiltre à son nom. Et ayant fait bastir dedans sa maison un temple, il le dedia à la Fortune, & luy sacrifia : & qui plus est, consacra & dedia toute sa maison à la sacree Fortune : car il habitoit en une maison que les Syracusains luy reseruerent & donnerent en recompense des bons & grands seruices qu'il leur auoit faits en leurs guerres, avec une tresbelle & tresplaisante possession aux champs, là ou il se tenoit quand il estoit de loisir la plus part du temps : car il ne retourna onques-puis à Corinthe, ains en fait uenir sa femme & ses enfans, & ne s'entremesla point des troubles qui depuis sourdirent entre les Grecs, ny ne s'exposa point à l'enuie de ses citoyens, à laquelle la plus part des gouuerneurs & Capitaines uont donner de la teste ordinairement par une trop grande & insatiable conuoitise d'honneurs & d'autorité : ains se teint le reste de ses iours en la Sicile, iouissant des biens que luy mesme auoit produits, desquelz le principal & le plus grand estoit, de uoir tant de uilles, & tant de milliers d'hommes heureux par son moyen. Mais pource qu'il est, par maniere de dire, necessaire que non seulement toutes alouettes ayent la houpe sur la teste, comme dit Simonides, ains aussi qu'en toutes uilles regies par police populaire, il y ait des calumniateurs, il s'en trouua deux à Syracuse de ceulx qui auoyent accoustumé de harenguer deuât le peuple,

peuple, qui s'attachèrent à Timoleon, dont l'un s'appelloit Laphystius, & l'autre Demænetus, desquelz comme Laphystius luy donnaست assignation à certain iour, pour uenir respondre deuant le peuple à quelques cas, dont il preten- doit le conuaincre, ses citoyens se mutinerent, & ne uoulurent point que cest adiournement eust lieu : mais luy les appaisa en leur remon- strant qu'il auoit pris tant de peines & de tra- uaux, & s'estoit exposé à tant de dangers, à fin que quicôque uouldroit des Syracusains peust librement user de la franchise & liberté des loix. Et une autre fois Demænetus en pleine assemblee du peuple ayant repris & blasmé plusieurs choses par luy faites pendant qu'il estoit Capitaine, Timoleon ne respondit rien à cela, ains seulement dit au peuple, qu'il rendoit graces aux Dieux, de ce qu'ilz luy auoyent con- cédé ce qu'il leur auoit souuentefois requis & demandé en ses prieres : c'est, qu'il peust une fois uoir les Syracusains en pleine franchise & liberté de pouuoir dire tout ce que bon leur sembleroit. Timoleon donques à l'opinion de tout le monde, ayant fait de plus belles & de plus grâdes choses q̄ nul autre Capitaine Grec de son temps, & ayant seul emporté le pris de ces glorieuses entreprises, ausquelles les Reto- riciens auoyent accoustumé d'inciter un cha- cun des Grecs par leurs belles harengues, qu'ilz prononceoyent es assemblees des festes &

ieux publiques de la Grece, hors de laquelle il fut transporté pur & net par la fortune auant les troubles des guerres ciuiles entre les Grecs, qui y suruindrent tantost apres : & ayant fait preuue de sa suffisance au mestier de la guerre, & de sa uaillance aussi contre les Barbares, & contre les tyrans : & enuers ses amis, & generalement enuers tous les Grecs, s'estant monstré homme droitturier & clement : &, qui plus est, ayant gaigné la pluspart de ses uictoires & de ses trophées, sans que les siens en iettassent larme d'œil, ny en portassent robbe de dueil : & ayant rendu la Sicile en l'espace de huit ans, encore non tous entiers, uuide & libre des miseres & calamitez qui y regnoyent de si long temps, estant ia bien auant sur son aage, la ueuë luy commença premierement à baisser, & un peu apres il la perdit du tout, non qu'il eust fait aucune chose par laquelle il eust donné occasion à ceste maladie de luy aduenir, ny que la fortune l'eust ainsi casuellement oultragé, ains fut, à mon aduis, un accident de maladie hereditaire à sa race, qui avec le temps le uint assaillir : car on dit que plusieurs de ses parents auoyent semblablement perdu la ueuë, qui peu à peu avec l'aage leur alla ainsi defaillant. Toutefois l'historien Athanis escrit, que durant encore la guerre qu'il auoit contre Mamercus & Hippon, ainsi qu'il estoit en son camp à Mylles, il luy uint une taye sur les yeux qui luy

estbloit la ueuë, de sorte que chacun apper-
ceut que bien tost il la perdrait du tout, mais
que pour cela il n'en leua point son siege, ains
continua son entreprise iusques à ce que fina-
blement il prit les deux tyrans, & que aussi tost
qu'il fut de retour à Syracuse, il se deposa luy
mesme de la charge de Capitaine general, pria
les citoyens de se cōtenter de ce qu'il auoit fait
iusques alors, attendu mesmement que les affai-
res estoient conduits à fin telle qu'ilz eussent
peu desirer. Or que luy ait supporté si patiem-
ment ceste siene affliction d'auoir entierement
perdu la ueuë, à l'adventure n'est-ce pas chose
dont lon se doye grãdemēt esmerueiller: mais
bien fait à louer grandement & à priser la de-
monstration d'honneur & de recognoissance
des bienfaits que luy feirent les Syracusains a-
pres qu'il fut ainsi deuenu aueugle, en l'allant
eux mesmes souuent uisiter, & y menans les e-
strangers passans iusques en sa maison de la uille,
& iusques à la possession qu'il auoit aux chãps,
pour leur faire uoir leur bienfaiteur, s'esioi-
sans & tenans à grãd heur ce qu'il auoit choisy
d'acheuer le demourât de ses iours avec eux, &
pour ce faire auoit mesprisé le glorieux retour
qui luy estoit preparé en la Grece pour les grã-
des & heureuses uictoires qu'il auoit gaignees
en la Sicile. Mais entre plusieurs autres choses
que les Syracusains feirēt & ordōnerent à son
hōneur, celle la me semble l'une des p̄ncipales,

qu'ilz decretterēt par edict perpetuel, que toutesfois & quantes qu'ilz auroyēt guerre contre peuples qui ne seroyēt de leur mesme natiō, ilz se seruiroyent d'un Capitaine Corinthien. C'estoit aussi une chose belle à uoir qu'ilz faisooyēt pour l'honorer en leurs assemblees de conseil. Car sil estoit questiō de quelque affaire de peu de consequence, ilz le iugeoyent & despeschoyent eulx mesmes tous seuls: mais si c'estoit quelque matiere qui requist plus grande deliberation, ilz le faisooyent appeller, & luy s'en alloit dedans sa littere à trauers la place, iusques au theatre ou se tenoit l'assemblee du peuple, & y entroit tout ainsi qu'il estoit assis dedans sa littere, & là le peuple tout d'une uoix le saluoit, & luy leur rendoit aussi leur salut: & apres auoir donné quelque espace de temps à ouir les louanges & benedictions que toute l'assemblee luy dōnoit, on luy proposoit l'affaire dont il estoit question, & luy en disoit son aduis, lequel estāt passé par les uoix & suffrages du peuple, ses seruiteurs le remenoyent de rechef en sa littere à trauers le theatre, & les citoyens le reconuoyoyent quelque temps avec acclamations de ioye & batemens de mains, puis se remettoyent comme deuant à despeschier le reste des affaires publiques par eulx mesmes. Et estāt sa uieillesse maintenue en tel honneur avec l'amour & bienueillance d'un chacun, comme d'un pere commun, à la fin il luy suruint quel-

que leger accident de maladie, dont il mourut. Si furent donnez aux Syracusains quelques iours pour faire les apprestz de ses funerailles, & aux uoifins d'à l'entour pour y pouuoir uenir : au moyen dequoy le conuoy de son enterrement en fut de tant plus magnifique en toutes choses, & mesmement en ce que par ordonnance du peuple furent choisis les plus honestes ieunes gentilz hommes de la uille, qui porteroient sur leurs espaules le liêt bien paré & richemēt accoustré, dedás lequel estoit le corps, & le passerent à trauers la place ou auoit esté le palais & le chasteau du tyran Dionysius, qui lors estoit demoly, & l'accompagnerent plusieurs milliers de personnes toutes couronnees de chapeaux de fleurs, & uestues de leurs belles robes, de maniere qu'il sembloit que ce fust la procession de quelque feste solennelle, & estoient tous leurs propos louanges & benissements du trespasé, avec chaudes larmes aux yeux, lesquelles tesmoignoient que ce n'estoit point par une maniere d'acquit qu'ilz luy faisoient cest honneur, ny pource qu'il eust esté ainsi ordonné, ains par le iuste regret qu'ilz auoyent de sa mort, & pour une liberale affection de uraye amour & bienuucillance qu'ilz luy portoyent. Finablement le liêt estant posé sur le bucher ou il deuoit estre bruslé, Demetrius l'un des heraults, qui auoit la plus forte uoix & la plus haultaine, prononcea le decret, lequel

auoit esté ordonné par le peuple , dont la sub-
 stance estoit telle : Le peuple de Syracuse a or-
 donné, que ce present corps de T I M O L E O N
 Corinthien filz de Timodemus, seroit inhumé
 aux despens de la chose publique , iusques à la
 somme de deux mille escus , & a honoré sa me-
 moire de ieu de pris de musique, de courses de
 cheuaults , & d'exercices de corps , lesquelz se
 celebreront annuellement au iour de son tres-
 pas , à tousiours & à iamais : & ce , pour auoir
 chassé les tyrans de la Sicile , desfait les Barba-
 res, repeuplé plusieurs grâdes citez, qui estoÿēt
 demourees desertes & desolees par les guerres,
 & finalement pour auoir restitué aux Siciliés
 la franchise & liberté de uiure à leurs loix. De-
 puis sa sepulture fut edifiée sur la place , à l'en-
 tour de laquelle on edifia quelque temps apres
 des cloistres & portiques à exercer la ieunesse
 aux exercices de la personne, & en fut le parc
 & pourpris appellé Timoleontium : & tant
 qu'ilz obseruerent les loix & la policè qu'il leur
 auoit establies , ilz uescurent longuement en
 grande & continuelle prosperité .

LA COMPARAISON DE PAV-
LVS ÆMYLIVS AVEC TIMOLEON.

AYANS donques ces deux per-
sonnages esté telz, selon que lon
trouue par les histoires, il est
tout euident qu'en les cōferant
l'un avec l'autre, lon n'y trouue-
ra pas beaucoup de differences
ny de dissimilitudes entre eulx : car premiere-
ment les guerres qu'ilz ont conduittes, ont esté
contre grands & renommez aduersaires, l'un
contre les Macedoniens, & l'autre contre les
Carthaginois: & leurs uictoires fort notables :
car l'un cōquit le royaume de Macedoine, qu'il
osta au septieme Roy, qui le tenoit par succes-
sion de pere en filz depuis le grand Antigonus:
& l'autre chassa tous les tyrans de la Sicile, &
remeit en liberté toutes les uilles & toute l'isle
entierement. Si d'adventure quelqu'un ne uou-
loit dire qu'il y eust entre eulx ceste differēce,
que Æmylius combatit à l'encontre de Perseus
lors qu'il auoit toutes ses forces étieres, & qu'il
auoit parauant batu les Romains en plusieurs
rencōtres: là ou Timoleō s'attacha à Dionysius,
lors qu'il estoit de tout poinct desespéré, rōpu
& ruiné. Et à l'opposite aussi pourroit on dire à
l'auantage de Timoleon, qu'il desfeit plusieurs
tyrās, & une tresgrosse puissance des Carthagi-
nois, avec une bien petite troupe de gēs, & en-

core telz quelz, non pas comme Æmylius avec une grosse armee de combatans bien aguerriz, adroictz aux armes, & exercez en la discipline militaire, ains avec gens ramassez de toutes pieces, combatans pour la soude, dissoluz, & ayans accoustumé de ne faire à la guerre sinon ce qui leur plaisoit: car là ou les exploits & beaux faitz sont pareilz, & les moyens inégaulx, il fault confesser que la louange en est deuë au Capitaine. L'un & l'autre garda ses mains pures & nettes es charges qu'ilz manierét: mais il semble qu'Æmylius y uint ainsi préparé & formé par les loix & par la bonne police & discipline de son païs: & que Timoleon se rendit & forma de soy mesme tel: ce qui se peut prouuer, par ce que tous les Romains en ce temps la estoient ainsi bien conditionnez & incorrompables, gardans tous les ordonnances de leur païs, & craignans leurs loix & leurs citoyens: là ou, au contraire, des Capitaines Grecs qui uindrent lors ou furent enuoyez en la Sicile, il n'y en eut pas un qui ne deuinist incontinent corrompu, aussi tost qu'il y eust mis le pied, excepté Dion seulement, & encore soufpeçonnoit on qu'il aspiroit & pretendoit à ne scay quelle seigneurie & principaulté, & qu'il proiettoit en son entendement d'establir à Syracuse ne scay quel royaume semblable à celuy de Lacedæmone. Et escrit l'historien Timæus, que les Syracusains réuoyerét Gylippus hôteu-

fement & ignominieusement en sa maison pour son insatiable auarice, & pour les grands larcins qu'il auoit cōmis en sa charge. Plusieurs autres semblablement ont escrit les grandes desloyautez & meschancetez, que commeirent Pharax Spartiate, & Callippus Arheniē, prehendans tous deux & raschans à se faire seigneurs de Syracuse: & toutesfois quelz personages estoyent ilz, & quelz moyens auoyent ilz pour lesquelz ilz eussent deu mettre en leurs fantasies de telles esperances & telles entreprises? attendu que l'un suyuit & seruit Dionysius apres qu'il eut esté chassé & deietté de Syracuse, & l'autre estoit Capitaine d'une compagnie de gens de pied seulement, de ceulx qui uindrent quand & Dion. Et au contraire, Timoleon fut enuoyé pour estre Capitaine general des Syracusains, à leur instance grande, & urgente poursuite: & n'ayant point besoing de prochasser & chercher, ains seulement de retenir la puissance que uoluntairement on luy mettoit entre les mains, il quitta de son bon gré franchemēt son estat, sa charge & son autorité, aussi tost qu'il eut desfait & ruiné ceulx qui uouloyent iniustemēt dominer. Biē est-ce chose qui fait grādemēt à louer & magnifier en Paulus Æmylius, que pour auoir conquis un si grand & si opulent royaume, iamais il n'en augmenta son bien de la ualeur d'une seule drachme d'argent, ny n'en ueit ne mania denier quelcōque, combien

qu'il en donnaſt & departiſt largement aux autres: non que ie ueille par cela dire, que Timoleõ merite d'eſtre repris de ce qu'il accepta une belle maiſon, que les Syracuſains luy donnerent en leur uille, & une belle poſſeſſion aux champs: car en telles choſes il n'eſt point deſhonneſte de receuoir, mais encore eſt il plus honneſte de ne point prendre: & eſt une excellence de uertu, qui monſtre qu'elle ne ueult riẽ receuoir, prẽdre ny accepter, encore là ou iuſtemẽt elle le peult faire. Et ſil eſt ainſi que cõme le corps eſt plus fort & mieulx cõpoſẽ, qui ſupporte mieulx les mutatiõs de l'ardeur du chault & de la rigueur du froit: auſſi l'ame eſt biẽ plus ferme & plus forte, qui ne ſeſleue ny ne ſ'enorgueillit point pour aucune proſperitẽ, ny auſſi ne ſ'abbaiſſe point pour quelconque aduerſitẽ: il ſemble que Æmylius en cela a eſtẽ plus parfait, qu'il ne ſe mõſtra pas de cueur moins grãd ne moins graue & conſtant en la patience qu'il eut de ſupporter uertueuſement le dur inconuenient qui luy aduint, quand il perdit coup à coup ces deux enfans, qu'il auoit fait en ſes plus heureuſes proſperitez: là ou Timoleon au contraire ayant fait un acte genereux encontre ſon propre frere, ne peut pas avec la force de la raiſon uaincre la paſſion qu'il en ſentit: ains abbatu de regret & de repentance qu'il en eut, demoura depuis l'eſpace de uingt ans durant, ſans ozer ſoy trouuer ſeulement ſur la place, ny ſen-

tremettre aucunement des affaires de la chose publique. Or fault il bien soigneusement se garder & auoir honte des choses laides, deshonestes & mal faites : mais aussi auoir crainte de toute sorte de reproche, & de toute mauuaise opinion du monde, est bien signe d'une nature simple, douce & debonnaire, mais qui a faulte de magnanimité.



PELOPIDAS.

L'ANCIEN Caton respōdit un iour à quelques uns, qui haultlouoyent un persōnage hazardeux oultre mesure, & hardy sans discretiō es perilz de la guerre, qu'il y auoit grā de difference entre estimer beaucoup la uertu, & peu sa uie: qui fut sagement dit à luy. Et à ce propos on racompte, que le Roy Antigonus auoit à son seruice un soudard, entre autres, fort auantureux, mais au demourant, mal sain de sa personne, & gasté dedans le corps. Le Roy luy demanda un iour, d'ou procedoit qu'il estoit ainsi pasle, & auoit si mauuaise couleur. Le soudard luy confessa, que c'estoit pour une maladie secrette, qu'il ne luy ozoit bonnement declarer. Quoy entendu, le Roy commanda expressement à ses medecins & chirurgiens qu'ilz aduisassent que c'estoit, & s'il y auoit aucun moyen de le guarir, qu'ilz y employassent tou-

te la diligence qui leur seroit possible à le bien
 penser: comme ilz feirent: tellement que le sou-
 dard recouura sa santé: mais guary qu'il fut, il
 ne se monstra plus si gentil compagnon, ne si a-
 uantureux aux dangers de la guerre, comme il
 faisoit au parauant: de maniere que Antigonus
 mesme, s'en estant apperceu, l'en reprit un iour,
 en luy disant, qu'il s'esmerueilloit fort de uoir
 un si grand changement en luy: dont le soudard
 ne luy cela point l'occasion, ains luy dit, Vous
 m'avez, Sire, uous mesme rendu moins hardy
 que ie n'estois, en me faisant penser & guarir
 des maulx pour lesquelz ie ne tenoye compte
 de ma uie. A quoy se rapporte aussi le dire d'un
 Sybaritain touchât la maniere de uiure des La-
 cedæmoniens, Que ce n'estoit pas de merueil-
 le, filz auoyent si grande enuie de mourir à la
 guerre, pour se rachepter de tant de trauaux, &
 se deliurer d'une si aspre & si austere façon de
 uie, qu'estoit la leur. Mais il ne se fault pas esba-
 hir, si les Sybaritains, hōmes effeminez & fon-
 dus en delices & uoluptez, estimoyent que
 ceulx qui ne craignoyent point la mort, pour le
 desir qu'ilz auoyent de bien faire, & l'affection
 qu'ilz portoyent à leur deuoir, eussent en haine
 la uie: ce qui estoit faulx des Lacedæmoniens:
 car ilz referoyent le uiure & le mourir uou-
 luntiers à l'exercice de uertu, ainsi comme le
 tesmoigne ce blason funeral,

Ces morts icy n'eurent onc ceste foy,

- » Que le mourir ny le uiure de soy
 » Fust beau ny bon , mais bien le sçauoir fairé
 » Et l'un & l'autre à droit en bon affaire.

Aussi à la uerité, fouir la mort n'est point de soy reprehensible , moyennant que ce soit sans lascheté de cuer : ny l'attendre louable, si c'est avec un nonchaloir & mespris de la uie . Voila pourquoy Homere décrit tousiours les plus uaillans & les plus hardis hommes les mieulx armez, quand il est temps de combatre. Et ceux qui ont fait & estably les loix des Grecs, punissent celuy qui iette & abandonne son bouclier, non pas son espee ny sa lance : pource que lon doit premierement penser de soy defendre que d'offenser son ennemy, mesmement ceulx qui ont en main le gouuernement de tout un estat, ou de toute une armee . Car si la cōparaison que faisoit le Capitaine Athenien Iphicrates, est uraye, quand il disoit, qu'en un exercite les auantcoureurs armez à la legere ressemblent aux mains, la gendarmerie aux piedz, le bataillon des gens de pied à l'estomach & à la poitrine, & le Capitaine à la teste du corps humain : il semble que le Capitaine qui se hazarde trop, & se iette en danger sans propos, n'est pas nonchalant de sa uie seulement, mais aussi de tous ceulx dont le salut pend de luy : & semblablement au contraire, qu'en ayant soing de la seureté de sa personne, il a soing aussi de tous ceux qui sont soubz luy.

Parquoy Callicratidas Capitaine Lacedæmonien, encore qu'au demourant il fust un grand personnage, ne respondit pas sagemēt au deuin qui luy denoncea & predict qu'il se donnast de garde, pource que les signes & presages des sacrifices le menaçoient de mort: Sparte, dit il,

ne depéd pas d'un homme seul. Car il est uray, que pour combatre de la main par mer ou par terre, Callicratidas n'estoit rien plus qu'un seul homme uoirement: mais comme Capitaine, il auoit toute la force & puissance entiere de son armee unie & assemblee en soy. ainsi n'estoit il pas un homme seul, puis que tant d'autres perissoient quand & luy. Mais au contraire, le uieil Antigonus, estant sur le poinct de donner une bataille nauale pres l'isle d'Andros, respondit bien miculx à un qui luy disoit, que les ennemis auoyent beaucoup plus de uaisseaux que luy. Et moy, dit il, pour combien de uaisseaux me comptes tu? car il faisoit tresbien de mettre en grand compte la dignité du Capitaine, mesmement quand elle est coniointe avec prouesse & experience, dont le premier chef d'œuvre est sauuer celuy qui doit sauuer tous les autres. Pourtant Timotheus, ainsi comme Chares monstroit un iour publiquement aux Atheniens les cicatrices de plusieurs bleceures qu'il auoit receuës en sa personne, & son panois aussi faulcé & percé de plusieurs coups de picque: Je suis dit il, tout

au contraire : car lors que ie tenois la uille de
 Samos assiegee, ie eus grâde honte de ce qu'un
 coup de traict tiré des murailles de la uille uint
 tumber tout aupres de moy, pource que ie m'e-
 stois trop auancé en ieune homme, & hazardé
 plus temerairement qu'il ne cōuenoit au Chef
 d'une si grosse armee . Car quād il sert de beau-
 coup pour tout le demourant, & qu'il est de
 grande importance que le Chef de l'armee s'ex-
 pose au peril, alors doibt il la teste baissée em-
 ployer sa main & sa personne sans point s'espar-
 gner, & ne s'arrester point aux paroles de ceulx
 qui uont disans, qu'un bon & sage Capitaine
 doibt mourir de uieillesse, ou pour le moins
 uieil: mais là, ou il n'en peult aduenir que peu
 dauantage, s'il luy succede bien, & au contraire
 perte uniuerselle du total, s'il luy eschet mal, ia-
 mais hōme sage ne requerra, ny ne sera d'aduis
 qu'il face acte de soudard priué, qui porte avec
 foy peril de perdre un Capitaine en chef. Si m'a
 semblé bien seant faire ceste preface deuant les
 uies de Pelopidas & de Marcellus, qui to⁹ deux
 ont esté grands personnages, & tous deux sont
 morts autrement qu'ilz ne deuoient: car ayans
 tous deux esté tresuailans hommes, les armes
 au poing, & tous deux ayans honoré leurs païs
 de tresglorieuses uictoires, &, qui plus est, con-
 tre de tresredoubtez ennemis : pource que l'un
 fut le premier, à ce que lon dit, qui rompit Han-
 nibal, lequel iusques à ce iour la festoit tous-
 iours

jours maintenu inuincible: & l'autre desfeit en bataille rengee les Lacedæmoniens, qui pour lors commandoyent en toute la Grece, tant par mer que par terre: & tous deux perdirent leurs uies sans propos, pour s'estre trop temerairement hazardez lors que leurs pais auoyét plus grand besoing de telz hommes & de telz Capitaines comme eulx. C'est la cause pour laquelle, nous suyans les similitudes qui ont esté entre eulx, auons afforty & cõparé leurs uies l'une avec l'autre. Pelopidas donques filz de Hippoclus, estoit de l'une des plus nobles maisons de la uille de Thebes cõme Epaminondas, & ayãt esté nourry en grande opulence, uint à estre heritier de sa maison, qui estoit riche & puissante des sa premiere ieunesse. Si monstra incontinent auoir uolunté de secourir du sien ceulx qui en auoyent besoing, & qui en estoyent dignes, pour donner à cognoistre qu'il estoit ueritablement maistre & seigneur, non point seruiteur de ses biens: à cause que de la plus part des hõmes riches, les uns n'usent point de leurs richesses, pource qu'ilz sont auaricieux, comme dit Aristote, & les autres en abusent, pource qu'ilz sont abandonnez à leurs plaisirs: ainsi sont ilz serfs toute leur uie les uns des uoluptez, & les autres des negoces & du gaing. Ce que cognoissans tous ses autres amis, en le remerciant userét franchemét de sa benignité & liberalité enuers eulx, excepté Epaminõdas, auquel seul il

ne peut iamais faire rien prendre de ses biens: ains au contraire, Pelopidas luy mesme receut de luy la uolunté d'imiter sa pauureté, en ce qu'il prit plaisir & fait gloire de se uestir simplement, manger sobremēt, trauailler uoluntiers, & faire la guerre ouuertement, estant tel comme le poëte Euripides descrit Capaneus, quand il dit de luy,

» Il estoit riche & en biens opulent,

» Mais pour cela de rien plus insolent.

Car il eust eu honte, si le plus pauvre homme de la uille de Thebes se fust passé à moins que luy pour sa personne. Or quant à Epaminōdas, la pauureté luy estoit toute familiere & hereditaire de pere en filz: il est bien uray qu'il se la rendit encore plus legere & plus aisee à supporter par l'estude de la philosophie, à laquelle il s'adonna, & par ce que des son ieune aage il choisit une uie simple sans superfluité quelconque: là ou Pelopidas prit femme de grande maison, de laquelle il eut des enfans, & neātmoins ne fut pour cela de rien plus attētif à conseruer ou augmenter son bien, ains se donna du tout à seruir à la chose publique tant qu'il uescut, de maniere que ses facultez s'en diminuerent, dont ses plus familiers amis le reprenoyent, en luy remonstrant qu'il auoit grand tort de ne tenir autrement compte d'une chose qui estoit si necessaire, comme d'auoir des biens: & il leur

» respōdit, Necessaire est elle uoiremēt, mais c'est

20 à un tel que cestuy Nicodemus, en leur mon-
 strât un pauvre homme boitteux & aueugle. Si
 estoient tous deux egalemēt nez à toute uertu,
 excepté que Pelopidas prenoit plus de plaisir à
 exercer le corps, & Epaminondas à exercer l'e-
 sprit & apprendre, de maniere que leurs passe-
 tēps quand ilz estoient de loisir, à l'un estoit lu-
 cter, aller à la chasse, & faire tous telz exercices
 de la personne: & à l'autre, ouir, estudier & ap-
 prédre tousiours quelque chose de lettres & de
 philosophie. Mais entre plusieurs belles & bō-
 nes parties qui leur ont apporté tāt d'hōneur &
 de gloire à tous deux, les hōmes de bō iugemēt
 ne treuuet riē de si grād ne si louable, q̄ d'auoir
 maintenu tout le long de leur uie leur amitié &
 bienuueillāce inuiolee depuis le cōmencement
 iusques à la fin, parmy tāt de cōbats, tāt de guer-
 res, tāt de charges d'armees, & tant d'affaires de
 gouuernemēt qu'ilz ōt eus à demesler ensēble.
 Car si lō regarde les deportemēs d'Aristides &
 de Themistocles, de Cimō & de Pericles, de Ni-
 cias & d'Alcibiades, en l'administratiō de la cho-
 se publique, cōment ilz ont esté pleins de dissen-
 siōs, d'ēuies & de ialousies des uns cōtre les au-
 tres: & puis à l'opposite, q̄ lon cōsidere l'amour
 & l'hōneur que se font tousiours cōtinuellemēt
 portez l'un à l'autre Pelopidas & Epaminōdas,
 on trouuera sans point de doubte, que ceulx cy
 sont bien plus dignes d'estre nommez freres
 d'armes, par maniere de dire, & cōpagnons de

charges publiques, que nuls de ces autres la, lesquels ont tousiours plus estudié & plus trauail-
lé à uaincre l'un l'autre, qu'à uaincre leurs enne-
mis : duquel effect la cause ueritable estoit la
seule uertu : pource que par leurs faicts ilz ne
alloyent point cherchans ny gloire, ny richesse
pour eux, à la conuoitise desquelles tousiours
est attachee la querelleuse & seditieuse enuie:
ains s'estās tous deux enamourez, des le cōmen-
cement, d'une amour, affection & charité diui-
ne, qui estoit de uoir leur país trespuissant &
tresflorissant par leur moyen, & en leur temps,
ilz reputoyent tous les bons exploits l'un de
l'autre seruans à cest effect comme leurs pro-
pres. Toutesfois la pluspart des historiens esti-
me, que ceste grāde & uehemēte amitié qu'ilz
se portoyent l'un à l'autre, commença & pro-
ceda d'un uoyage ou ilz furēt ensemble à Man-
tinee au secours des Lacedæmoniens, qui pour
lors estoient encore alliez & confederez des
Thebains: car estans rengez en bataille l'un au-
pres de l'autre entre les gens de pied, contre les
Arcadiens qu'ilz auoyēt en front, il aduint que
la poincte de la bataille des Lacædemoniens, en
laquelle ilz estoyēt, recula, & y en eut plusieurs
qui fouirent à ual de rouverte, mais eulx aimans
mieux mourir que fouir, se serrèrent ensemble,
& feirent teste à ceulx qui les pressoyent, ius-
ques à ce que Pelopidas estant blecé en sept en-
droits tous par deuant, tumba finalement des-

fus un monceau de morts, tant de leurs gés que des ennemis, les uns parmy les autres: & lors Epaminōdas, encore qu'il le teinst pour mort, se ietta neantmoins au deuant pour defendre le corps & les armes, & sousteint luy seul le combat contre plusieurs, aimant mieulx mourir que d'abandonner Pelopidas gisant entre les morts, iusques à ce que luy mesme estant blecé d'un coup de pique en l'estomac, & d'un coup d'espee au bras, n'en pouuoit presque plus, quand Agesipolis le Roy des Lacedæmoniens y suruint de l'autre poincte de la bataille tout à temps, qui les sauua tous deux hors de toute esperance. Or depuis ceste bataille les Lacedæmoniens de paroles & en apparence traiterent bien les Thebains comme leurs alliez, amis & confederez: mais en effect & à la uerité ilz comécerent à auoir suspecte la puissance & la grandeur de courage de celle cité, mesmement pour une bende & compagnie qu'auoyent mis sus Ismenias & Androclidas, de laquelle estoit aussi Pelopidas: pource qu'il leur sembloit que c'estoit chose trop populaire, & qui sentoit trop son desir de pleine liberté. Au moyen dequoy il y eut trois personages de la uille de Thebes, Archias, Leontidas & Philippus, hommes riches & puissans, qui ne se contentans pas d'estre egaulx aux autres citoyés, persuaderēt à Phœbidas Capitaine Lacedemoniē, qu'en allant & uenāt par le país de la Bœoce avec ar-

mee, il se faist un iour du chasteau de Thebes qui s'appelloit la Cadmee, & que chassant de la uille ceulx qui luy uoudroyent contrarier, il meist le gouuernement des affaires entre les mains d'un petit nombre des plus nobles, lesquels feroient toutes choses à la deuotiõ & au plaisir des seigneurs Lacedæmoniens. Ce que Phœbidas fait, & executa ceste entreprise sans que les Thebains se doubtassent de rien, le iour de la feste que l'õ appelle Thesmophoria: & festant saisy de la forteresse, fait aussi prendre au corps Ismenias, & le mener à Lacedæmone, là ou peu de iours apres on le fait mourir: & Pelopidas, Pherenicus & Androclidas, avec plusieurs autres festans sauuez de uistesse, furent bannis de Thebes à son de trõpe. quãt à Epaminõdas, il demoura en la uille sans qu'on luy demãdast riẽ, pource qu'õ le mesprisoit, cõme persõne de nul effect, à cause qu'il estoit rãt adõné à l'estude, & que quãd bien il eust eu uoulunté d'attenter quelque chose, il n'eust peu l'executer pour sa pauureté. Les Lacedæmoniens ceste surprise entẽdue deposerent bien Phœbidas de sa charge, & le condamnerẽt en dix mille escus d'amende, mais neantmoins ilz reteindrent tousiours avec bonne garnison la forteresse de Cadmee en leurs mains: ce que toutes les autres uilles & peuples Grecs trouuerent fort estrange, qu'ilz approuuassent le faict, & neantmoins punissent celuy qui l'auoit fait. Ainsi les

Thebains ayans perdu leur ancienne liberté, & estans afferuis par ces deux, Archias & Leonidas, de telle sorte qu'ilz n'auoyent plus d'esperance de pouuoir iamais sortir de ceste tyrannie, ny de la ruiner, uoyans qu'elle estoit maintenue & defendue par les Lacedæmoniens, si tout ensemble on ne leur ostoit la seigneurie & domination qu'ilz auoyent en toute la Grece, tant par mer que par terre : toutefois Leonidas & ses adherens, entédans cōme les bannis de Thebes estoient à Athenes bien uenus & ueuz de bõ œil par la commune, & honorez de tous les gens de bien, essaya de les faire secretement occire par aguet: & pour ce faire enuoyerent à Athenes quelques hōmes incogneus, lesquels occirent en trahison Androclidas, mais ilz faillirent à tuer aussi les autres : qui plus est, les Lacedæmoniens escriuirent à ceulx d'Athenes, qu'ilz n'eussent à receuoir les bannis de Thebes ny à les solliciter, ains plus tost à les destourner & chasser, comme ceux qui par leurs alliez estoient iuridiquement declarez ennemis communs. Ce nonobstant les Atheniens outre ce que l'humanité & bonté de tous tēps leur a esté comme naturelle, propre & nee avec eulx, uoulās encore rendre la pareille aux Thebains, qui auoyent esté principaux autheurs ou moyenēurs de faire retourner & remettre sus l'authorité du gouuernemēt populaire à Athenes, attendu qu'ilz auoyent ordonné par edict

public, que si aucun Athenien alloit & uenoit par le país de la Bœoce portant armes contre les trente gouuerneurs tyrans qui tenoyent la liberté d'Athenes oppressee, il n'y eust aucun Bœotien, qui feist semblant d'en rien uoir ne rien ouir, ne uoulurent faire aucun tort ne desplaisir aux Thebains. Et ce pendant Pelopidas, encore qu'il fust des plus ieunes, alloit tousiours sollicitant chascun banny en particulier, & en commun feit une harengue à tous en leur remonstrant, que ce ne seroit pas seulement lacheté, ains meschanceté & crime de lese maiesté diuine à eulx, filz enduroyent que leur país demourast en telle seruitude, & que des estrangers y teinsent garnison pour les faire ployer sous le ioug, pendant que eulx se contentans de sauuer leurs personnes, & mettre leurs uies en seureté, demoureroyent oisifz à Athenes, attendans ce qu'il plairoit aux Atheniens ordonner d'eulx, & faisans la cour aux orateurs & à ceulx qui par leur eloquēce sçauoyent persuader ce qu'ilz uouloyent à la commune: & pourtant qu'il falloit tout hazarder pour chose de si grande consequence, à l'exemple de la prouesse & hardiesse de Thrasylulus, à fin que comme luy partant de Thebes chassa les tyrans qui oppressoient Athenes, aussi eux partans d'Athenes deliurassent Thebes de seruitude: & apres les auoir par ces remonstrances tirez à son opiniō, ilz enuoyerent secrettemēt deuers leurs

amis, qui estoient demourez à Thebes, leur faire entendre leur deliberation, laquelle ilz trouuerent bonne, tellement que Charon, qui estoit le plus apparent de tous, promeit de bail-
 ler sa maison pour faire l'assemblee: & Philidas trouua moyen de se faire greffier & secretaire de Philippus & d'Archias, qui lors estoient gouverneurs & Capitaines de la uille. D'autre costé Epaminōdas, sans faire semblant de rien, auoit de longue main conduit la prattique de leuer le courage aux ieunes hōmes Thebains: car quand ilz pāssoyent leur temps aux exercices du corps, il trouuoit moyé de les faire tousiours coupler à la lucte aux Lacedæmoniens: puis quand il les uoyoit tous fiers de les auoir portez par terre, & d'estre les plus forts, il uenoit à les tenfer, en leur disant qu'ilz deuroyent auoir grāde honte, de souffrir à faulte de cueur, que ceulx la leur teinsent le pied sur la gorge, qui n'estoyent pas à beaucoup pres si forts, si roides, ne si robustes qu'eulx. Si y eut un iour prefix entre ceulx de l'intelligence pour executer l'entreprise, & fut aduisé que Pherenicus avec les autres bannis, demoureroit attendant au bourg de Thriasium, & que quelques uns des plus ieunes & plus dispos prendroyent le hazard d'aller deuant pour entrer dedans la uille, à la charge que si d'aduenture ilz estoient surpris par les ennemis, tous les autres coniuerez ensemble seroyent tenus de donner ordre,

que leurs peres & meres & leurs enfans n'eussent faulte de chose aucune qui leur fust necessaire. Pelopidas fut le premier qui se presenta à ceste cournee, & apres luy Melon, Democledes & Theopompus, tous hommes des premieres maisons de Thebes, qui s'entr'aimoyent bien les uns & les autres, & qui pour rien n'eussent fait l'un à l'autre un tour de desloyauté, encore que de tout tēps il y eust entre eulx une ialousie de gloire, & une contention d'honneur à qui emporteroit le pris de prouesse. Si furent douze en tout, lesquelz prenans congé des autres, enuoyerent deuant un messager à Charon pour l'aduertir de leur uenue, & se meirent en chemin ayans de petits manteaux courts sur leurs dos, & menās des chiens de chasse, & portans en leurs mains des estansons à rendre les pans de retz, à fin que ceulx qui les rencontroyent par le chemin, ne se doubtassent point de leur entreprise, & cuidassent qu'ilz s'allassent ainsi promenans par les chāps, & chassans pour leur plaisir. Quand le messager qu'ilz auoyent enuoyé deuant fut arriué en la uille, & qu'il eut dit à Charon comme ilz estoyēt par le chemin, il ne fleschit point quant à luy, quoy qu'il approchast du danger, ains en homme de bien persista en l'offre qu'il auoit faite, & dit qu'ilz seroyent les bien uenus en sa maison : mais un autre, nommé Hippothenidas, qui n'estoit pas autrement mauuais homme, ains aimoit le bien

& l'honneur de son païs, & si estoit amy des bannis, mais il auoit faulte de cueur & de hardiesse, au moins telle comme le poinct de l'occasion & de l'affaire, qui lors se presentoit, le requeroit, tellement que la teste luy tourna, par maniere de dire, & le nez luy saigna quand il uint à considerer & regarder de pres la grandeur du peril ou il luy falloit promptement entrer, n'ayant iamais au parauant discouru à par soy en son entendement, qu'ilz esbranloyent en ce faisant tout l'empire des Lacedæmoniés, & bastissoyent le fondement de la ruine de toute leur puissance, sur la confiance d'un petit nombre de bannis, qui auoyent bien peu de moyen. Parquoy retournant en sa maison, il enuoya soudainement l'un de ses familiers uers Melo & Pelopidas, leur dire, qu'ilz differassent leur entreprise iusques à une autre meilleure occasion, & que pour lors ilz s'en retournassent à Athenes. Celuy qu'il y enuoya se nommoit Chlidon, lequel s'en alla incontinent en grande haste chez soy, & tirant son cheual hors de l'estable, dit à sa femme, qu'elle luy apportast uistement la bride: sa femme ne la pouuant trouuer promptement, luy dit qu'elle l'auoit prestee à l'un de leurs uoïfins. si se prirent à tanser du commencement l'un à l'autre, & puis à s'entendre des iniures, iusques à tant que sa femme le maudissant, pria aux Dieux que malheureux uoyage peust il faire pour luy

& pour ceulx qui l'y enuoyoyent : tellement que ce Chlidon ayant consumé bonne partie de la iournee à tenses & quereller avec sa femme en cholere, & aussi pource qu'il prenoit à mauuais presage les maledictions & impreca-tions que sa femme auoit faittes contre luy, il resolut en soymesme de n'y aller du tout point, & se meit à faire quelque autre chose : tant peu s'en fallut que l'entreprise d'un si digne & si glorieux exploit ne fust rompue auant que cō-mencee. Mais ceulx qui estoient en la compa-gnie de Pelopidas prenans des robbes de pai-sans, à fin de n'estre point cogneuz, se departi-rent pour n'entrer pas tous ensemble, ains par diuerfes portes, dedans la uille, qu'il estoit en-core iour. Or faisoit il d'adventure assez grand uent, & negeoit, de maniere que pour autant que le temps commēceoit à se troubler, la plus part du monde s'estoit retiree au dedans des maisons, ce qui seruit beaucoup à ce qu'ilz ne fussent point descouverts en entrant : & ceulx qui estoient de leur intelligence les recueilli-
rent à mesure qu'ilz arriuoyent, & les men-
rent en la maison de Charon, ou ilz se trouue-
rent avec les bannis quarante & huit hommes
seulement. Au reste, quant aux tyrans, uoicy
comment il en alloit : Philidas le secretaire e-
stoit de la coniuration, comme nous auons dit,
& sçauoit toute la menee : au moyen dequoy
long temps au parauant il auoit expressement

conuié Archias & sa compagnie, à uenir ce iour la soupper & faire bonne chere en sa maison, leur ayant promis qu'il feroit prouision de femmes de plaisir, à fin que quand ilz seroyent bien yures & bien plongez en leurs uoluptez, les coniurez en feissent plus aiscemēt tout ce qu'ilz uoudroyent. Ainsi estant le banquet commencé, auant qu'ilz eussent encore trop beu on leur uint à descouuir la uerité de la coniuratiō, non pas de poinct en poinct cōme tout en alloit, ny cōme chose certaine, ains seulement qu'il estoit bruit que les bannis estoyent dedans la uille cachez en la maison de Charon. Philidas uolul destourner ce propos : mais toutesfois Archias enuoya l'un de ses archers à Charon, luy faire commandement qu'il eust à s'en uenir promptement deuers luy. Or estoit il desia soir, & se preparoyent Pelopidas & sa compagnie, pour aller executer leur entreprise, estans tous armez, & ayans ia pris leurs espees, quand tout soudain on entendit battre fort à la porte, & accourut quelcun de la maison, qui uint dire tout effroyé, que c'estoit un des satellites d'Archias, qui uenoit faire commandement à Charon de s'en aller promptemēt deuers les gouuerneurs. Si penserent incontinent que toute leur entreprise fust descouuerte, & consequemment culx perdus auant que pouuoir faire aucune preuue de leur uertu : toutefois ilz furent tous d'aduis que Charon obeïst à ce mandement, & qu'il se

representast deuant les gouuerneurs pour leur oster tout souſpeçon. Si estoit bien Charon autrement homme hardy, constant & aſſuré au peril quant à ſon regard : mais toutefois il ſe trouua lors eſtonné & faſché, craignant qu'il ne fuſt aucunement ſouſpeçonné d'auoir fait tour de trahiſon, ſil aduenoit que tant de gens de bien & de ſi grands citoyens, auſquelz il auoit preſté ſa maiſon, fuſſent perdus. Parquoy auât que ſortir de ſa maiſon, il alla prendre en la chambre de ſa femme ſon filz, qui estoit encore enfant, mais beau & fort, plus que nul autre de ſon aage, & le mit entre les mains de Pelopidas, en le priant que ſil cognoiſſoit qu'il leur euſt fait quelque trahiſon, ou aucun tour de malengin, ilz feiſſent de ceſt enfant côme d'un ennemy, ſans en auoir aucunement pitié. Les larmes uindrent aux yeux de pluſieurs des coniuerez, quand ilz ueirent ce bon zele & ceſte magnanimité de Charon, & le tenſerent tous de ce qu'il eſtimoit aucun d'eulx ſi failly de cueur, & ſi eſpouuenté pour quelque danger qui ſe preſentast, qu'ilz le ſouſpeçonnaſſent ou accusaſſent de rien : & le prièrent quand & quand de ne laiſſer point ceſt enfant parmy eulx, ains le faire retirer quelque part hors du danger des tyrans, ou il peuſt eſtre nourry, pour un iour faire la uengeance du tort qu'ilz auroyent fait à eulx & à leur pais. Charon leur reſpōdit, qu'il ne l'oſteroit point, & qu'il ne uoyoit point de uie

ny de salut plus heureux pour luy, que de mourir sans infamie avec son pere & avec tant de gens de bien ses amis. Ainsi apres auoir fait priere aux Dieux de leur uouloir estre en aide, & auoir embrassé & reconforté tous les coniuerez les uns apres les autres, il s'en alla, & par le chemin s'estudia de composer tellement son visage, sa contenance & sa parole, qu'il semblaist penser plus tost à toute autre chose qu'à celle qu'il auoit en pensee de faire. Quand il fut à la porte du logis ou se faisoit le festin, Archias & Philidas luy uindrent au deuant, qui luy dirent, Charon, qui sont ceulx que lon dit estre
 » entrez secrettement en ceste uille, & qui sont
 » cachez en quelque maison, ayans des bourgeois qui s'entendent avec eulx? Charon se troubla un peu du commencement, & leur demanda: Et quelles gens sont ce? Qui sont ceulx
 » qui les recelent en ceste uille? Mais quand il ueit que Archias ne luy en sçauoit rien declarer de certain, il pensa bien que la descouuerture luy en deuoit auoir esté faite par homme qui ne sçauoit pas bien toute la trame de l'entreprise. Si leur dit, Gardez que ce ne soit quelque
 » faulse alarme que lon uous ait donnee pour
 » uous estonner: toutefois ie m'en enquerray: car
 » à toute aduenture c'est tousiours le plus seur de
 » ne mettre rié en telles choses à nonchaloir. Philidas respondit qu'il disoit uray, & à tant remenna Archias en la salle, ou il le feit boire encorc

mieux que deuant , entretenant tousiours la compagnie de l'esperance de ces femmes qui deuoient uenir , & Charon retournant en sa maison , trouua les coniuerez tous prests & appareillez de mettre la main à l'œuure, non comme gens qui esperassent de sauuer leurs uies, ny de uenir au dessus de leurs ennemis , mais qui estoient bien resolus de mourir uaillamment , & de uendre leur mort bien cherement : si dit la uerité tout ainsi qu'elle estoit à Pelopidas seul, & donna à entendre aux autres qu'Archias l'auoit enuoyé querir pour luy dire quelque autre chose . A peine estoit le danger de ceste premiere tourmente passé , que la fortune leur en enuoya un autre : car il arriua incontinent apres un messager uenant d'Athenes , qui apporta à ce mesme Archias une lettre que luy escriuoit le grand pontife d'Athenes , qui s'appelloit Archias comme luy , & estoit son hoste & son ancien amy, dedans laquelle il luy escriuoit, non une coniecture simple, ny une suspicion imaginee seulement , ains la conspiration de poinct en poinct toute telle comme on la ueit depuis . Si fut le messager conduit à Archias, qui estoit desia yure, & en luy donnant la

» lettre luy dit , Celuy qui t'enuoye ceste missiue
 » m'a expressement commandé de te dire que tu
 » lises incontinét ce qu'il y a dedans , pource que
 » c'est chose de grande consequence . Archias en
 » se riant luy respondit , A demain matin les af-
 faires:

fares : & prenant la lettre la meit deffoubz son cheuet, puis retourna à continuer le propos qu'il auoit commencé avec Philidas : mais depuis ceste parole est demouree en usage entre les Grecs, comme un prouerbe commun, A demain matin les affaires. Quand donques il leur sembla estre temps de commencer à executer leur entreprise, ilz se departirent en deux bandes, & s'en allerent les uns avec Pelopidas & Damoclidas pour assaillir Leontidas & Hypatus, à cause qu'ilz se tenoyent l'un aupres de l'autre: & les autres avec Charon & Melon allerent contre Archias & Philippus, estans desguifez de robbes de femmes qu'ilz auoyent uestues par dessus leurs armes, & portans sur leurs testes des chapeaux de branches de Pin & de Sapin qui leur couuroyent tous les uifages. Au moyen dequoy quand ilz uindrent à se presenter à la porte de la salle ou se faisoit le banquet, ceulx de dedans pensans de prime face que ce fussent les femmes qu'ilz attédoient, s'en escrierent, & en feirent un bruit de ioye : mais apres qu'ilz eurent ietté leurs yeux par toute la salle pour recognoistre tous ceulx qui estoient à ce banquet, & que les espees desguainees ilz se ruerent à trauers les tables dessus Archias & dessus Philippus, adonc donnerent ilz bien à cognoistre qui ilz estoient. Et lors Philidas dit à ceulx qu'il auoit conuiez avec eulx, qu'ilz ne bougeassent & qu'ilz n'auoyent nul mal, ce

qu'aucuns d'eulx feirent : mais les autres en plus grand nombre, se uolurent mettre en deuoir de defendre les gouuerneurs, & se leuerēt sur leurs pieds avec eulx : toutefois, pource qu'ilz estoyent si yures qu'ilz ne sçauoyēt qu'ilz faisoient, ilz furent tous facilement tuez quād & eulx. Mais l'execution ne fut pas si facile à la bende que menoit Pelopidas : car ilz alloient contre Leontidas, qui estoit personne soigneuse & sobre, & quand & quād homme à la main, & trouuerent qu'il estoit desia couché, & la porte de sa maison fermee, à laquelle ilz bati-
rent longuement sans que personne leur ouurist : à la fin toutefois il y eut à toute peine un uallet qui les ouit ainsi frapper, & uint à la porte pour leur ouurir : si tost qu'il eut tiré le uerrou, & que la porte commēça à s'entreouuir, ilz la poulsèrent si rudement en se iettans à la foule tous ensemble dedans, qu'ilz renuerserēt le seruiteur par terre, & monterent droit à la chambre. Leontidas entēdant le bruit de ceulx qui montoient à si grande haste, se doubta incontinent que c'estoit, & se iettant hors du liēt prit une espee en sa main, mais il oublia d'esteindre les lampes qui ardoient la nuict en sa chambre, car ilz se fussent par ce moyen entrefrappez & entreheurtez les uns les autres en tenebres: mais au contraire, estant facile à uoir en une si grande clarté de lampes, il leur alla au deuant iusques à l'huis de sa chambre, & donna à

Cephisodorus, qui s'estoit ietté le premier dedans, un si grand coup d'espee, qu'il l'abbatit tout roide mort à ses pieds. Ce premier estant rumbé, il s'attacha à celuy qui uenoit apres, qui estoit Pelopidas. Si fut le combat malaisé, tant pource que l'huis de la chambre estoit estroit, comme aussi pource que le corps de Cephisodorus mort estendu en la place les empeschoit: toutefois à la fin Pelopidas en uint à bout, & l'ayant occis, Leontidas alla incōtinent avec sa compagnie au logis de Hypatus, là ou ilz entre-
rent ne plus ne moins que chez Leontidas: mais Hypatus cogneut incōtinent que c'estoit, & se cuida sauuer es maisons de ses uoifins, mais les coniuerez le poursuyuirēt de si pres, qu'il fut tué auant que de les pouuoir gaigner. Cela fait ilz se rassemblèrent avec l'autre bende de Melon, & enuoyerent incōtinēt en diligence à Athenes deuers les autres bannis, & commencerent à crier par la uille, Liberté, Liberté, armās ceulx des bourgeois qui se uenoyent rendre & allier à eulx, des armes & despouilles des ennemis, qui estoient attachees & pendues es portiques publiques & es boutiques des armeriers & fourbisseurs à l'entour de la maison de Charon, lesquelles ilz rompoient ou faisoient ouurir à force. D'autre costé uindrent aussi à leur secours Epaminondas & Gorgidas bien armez avec une troupe de ieunes hommes, & de uieillards aussi des plus gens de bien qu'ilz auoyent

assemblez. Si fut incontinent toute la uille sans dessus dessous pour l'effroy, pleine de tumulte & de bruit, & y auoit ia des lumieres par toutes les maisons, courans les uns chez les autres pour sçauoir que c'estoit : toutefois le peuple ne f'estoit point encore assemblé, ains estant tout estonné pour ne sçauoir à la uerité que c'estoit, attendoit que le iour fust uenu pour s'assembler en conseil. Au moyen dequoy il me semble que les Capitaines de la garnison des Lacedæmoniens feirent en cela une grande faute, qu'ilz ne leur coururent sus de bonne heure, & ne les chargerent incontinēt, attendu qu'ilz estoient mille cinq cents hommes de guerre, sans un grand nombre de ceulx de la uille qui s'en alloient à la file ioindre à eulx : mais ilz eurent peur du grand bruit qu'ilz oyoyent, des feuz qu'ilz uoyoyent par toutes les maisons, & du peuple qui alloit & uenoit de tous costez en grand nombre, à l'occasion dequoy ilz ne bougerent, ains garderent seulement la forteresse de la Cadmee. Le lendemain au poinct du iour arriuerent de l'Attique les autres banniz bien armez, & s'assembla tout le peuple de Thebes en conseil, auquel Epaminondas & Gorgidas amenerent deuant le peuple, Pelopidas & ses consors enuironnez des presbtres & gens de religion de la uille, qui leur tendoyent des couronnes pour mettre sur leurs testes, & prioient l'assemblee des citoyens qu'ilz uoulussent se-

courir leurs Dieux & leur païs. Toute l'assistance du peuple se leua en pieds, aussi tost qu'elle les ueit, & avec grandes clameurs & battemens de mains, les receut comme ses bienfaiteurs qui les auoyent deliurez de seruitude & remis en leur liberté : & tout sur le champ furent eleuz Capitaines & gouuerneurs de la Bœoce par les uoix du peuple Pelopidas, Melon & Charon. Si fait incontinent Pelopidas ceindre de trenchees & de cloison de bois le chasteau de la Cadmee, & luy fait donner assauts de tous costez, employant tout son effort à tascher de le prendre, & en chasser les Lacedæmoniens, premier qu'il uinst de Sparte une armee pour les secourir : ce qu'il fait, & les preuint de si peu de temps, que ceulx de la garnison estans sortis du chasteau par composition, en s'en retournant à Lacedæmone trouuerent sur les terres de Megare, Cleombrotus le Roy de Sparte, qui les alloit secourir avec une grosse & puissante armee : mais de trois Capitaines qu'il y auoit en ceste garnison de Thebes, les Spartiates en condamnerent les deux Hermipidas & Arcyffus à mourir, qui furent de faict executez : & le troisieme Dysaoridas estât aussi condamné en une grosse somme de deniers pour l'amende, s'en alla hors du Peloponese. Cest exploit ayant esté entrepris & executé avec mesme hardiesse, mesme peril & mesme travail, que celuy de Thrasybulus, quād il deliura

la uille d'Athenes des trente gouuerneurs tyrans: &, qui plus est, ayant esté conduit à mesme fin par la fortune, en a esté appellé par les Grecs son frere germain: car aussi seroit il bien mal aisé d'en alleguer d'autres que ces deux la, qui avec si peu de gens soyent uenus au dessus de leurs aduersaires qui estoient en si grand nombre plus qu'eulx, ne qui avec si peu de moyen ayent uaincu ceulx qui estoient trespuissans, ne qui estans uenus à bout de leur entreprise, par le moyen de leur hardiesse seule, & de leur sage conduite, ayent esté cause de plus grands biens à leurs pais. Ce qui a rendu l'entreprise encore plus honorable & plus glorieuse pour eulx, attendu le changement des affaires qui en suyuit puis apres: car la guerre qui abbatit la dignité de Sparte, & qui osta aux Lacedæmoniens la principaulté de la terre & de la mer, cōmencea celle nuiët que Pelopidas, sans auoir surpris ne uille, ne chasteau, ne place forte, entrant luy douzieme en une maison priuée, couppa & treucha, par maniere de dire, & pour mieulx exprimer la uerité par ceste figure de parler, les chaines qui maintenoient ferme la seigneurie & principaulté, que les Lacedæmoniës auoyent en toute la Grece, & lesquelles on auoit iusques à ce temps la estimé estre si fortes, qu'il seroit impossible de les briser, rompre, ny deslier. Estans donques, quelque temps apres, les Lacedæmoniens entrez à grosse puissance dedans le pais

de la Bœoce, les Atheniens effroyez d'une si grande force, renoncèrent tresbien à l'alliance & ligue defensiue qu'ilz auoyent avec eulx: &, qui plus est, meirent en iustice, & feirēt le proces à ceulx qui furent accusez de tenir le party des Bœotiens, dont les uns furent executez à mort, les autres bannis de l'Attique, les autres condamnez en grosses amendes. De faict la cōmune opinion estoit, que les affaires des Thebains s'en deuroyent tresmal porter, attendu qu'ilz n'estoyent secourus ny fauorisez de personne du monde. Or estoient celle annee Capitaines generaux de la Bœoce, Pelopidas & Gorgidas, lesquelz espians les moyens de mettre de rechef les Atheniens en picque & inimitié contre les Lacedæmoniens, tramerent une telle ruse: Il y auoit un Capitaine Lacedæmonien, qui se nommoit Sphodrias, bien uaillant homme de sa personne, mais au demourant estourdy & leger, & qui mettoit facilement en sa teste de uaines esperances, & une folle ambition d'auoir fait en sa uie quelque beau traict. Or auoit il esté laissé avec bon nombre de gens de guerre en la uille de Thespies, pour recueillir & fauoriser ceulx de la Bœoce, qui se uoudroyent rebeller cōtre les Thebains. Pelopidas de son autorité priuee enuoya deuers luy un marchand son familier & amy, qui luy porta de l'argent, & des paroles, qui l'emeurent encore plus que l'argent, en luy mettant en auant,

qu'il deuoit attenter de plus grandes choses, & aller surprendre le port de Piræe, comme il pourroit aiseement faire s'il l'affailloit au des-prouueu, lors que les Atheniens ne se doubtoient de rien, & ne le tenoyent point en seure garde, & qu'il se deuoit tenir pour tout assuree, que les seigneurs Lacedæmoniens n'auroyent rien si cher ny tant agreable, que de tenir la uille de Athenes en leur puissance: & que les Thebains qui leur uouloyent mal de mort, pource qu'ilz les auoyent trahis & abandonnez au besoing, ne les secourroyent en facon quelconque. Sphodrias meu de ces persuasions, prit ce qu'il auoit de gens de guerre avec luy, & se partant une nuict entra dedans le pais de l'Attique, ou il penetra iusques à la uille de Eleusine: mais quand il fut là, ses gens eurent peur, & ne uoulurent point passer oultre. Ainsi estant decouuert, il fut contrainct de s'en retourner à Thespies, ayant suscitee aux Lacedæmoniens une guerre qui ne leur fut pas de petite consequence, ny facile à desmesler: car depuis cela les Atheniens rechercherent de rechef l'alliance des Thebains, & les secoururent fort affectueusement: & qui plus est, se remettans à la marine allerent çà & là prattiquans & retirans à leur ligue ceulx qui auoyent enuie de se rebeller contre les Lacedæmoniens: & ce pendãt les Thebains s'attachoyent souuent en petites rencontres dedãs le pais de la Bœoe aux Lacedæmoniens, Il

est uray, que ce n'estoyent pas grosses batailles: mais toute fois si leur estoit ce un grád apprentissage de la guerre, & un exercice qui leur eleuoit tousiours le cueur de plus en plus, & rendoit leurs personnes plus robustes, de maniere que par telles escarmouches ilz en deuindrent plus hardis, plus aguerris & mieulx duits aux armes qu'ilz n'estoyent au parauant. Pourtant trouue lon par escrit que Antalcidas Spartiate dit un iour au Roy Agefilaus, qui retournoit de la Bœoce tout blecé: Certainement tu as receu des Thebains le salaire que tu as merité, pour leur auoir enseigné malgré eulx à faire la guerre & à combattre. Toutes fois à la uerité Agefilaus ne fut pas le maistre qui leur mōstrá à bien faire la guerre, ains furent les bons & sages Capitaines qui les sceurent bien en temps & lieu mettre deuant leurs ennemis, comme de bons leuriers laschez à propos, & puis les retirer seulement apres les auoir acharnez en leur faisant un peu gouster l'aïse & le fruiçt de la uictoire, entre lesquelz Pelopidas est celuy, qui plus en a merité d'honneur & de gloire, pource que depuis la premiere fois qu'ilz luy dōnerēt charge de gens de guerre, ilz ne faillirent iamais de l'esslire continuellement par chascun an, ou Capitaine de la bende sacree, ou gouuerneur de la Bœoce, tant comme il uescut, de sorte que ce fut luy qui fit la plus part de tout ce qui fut fait en ceste guerre. Or y eut il plusieurs des-

faittes & roughtes des Lacedæmoniens auprès des uilles de Platees & de Theſpies, là ou Phœbidas meſme, celuy qui auoit ſurpris le chaſteau de la Cadmee, fut occis entre autres: auſſi en deſfeit il une autre groſſe trouppes pres la uille de Tanagre, là ou celuy qui en eſtoit gouuerneur Panthoidas fut tué: mais toutes ces rencontres là, comme elles ſeruirent bien à aſſeurer les uainqueurs, & à leur eſleuer le cuer, auſſi ne matterent elles pas entierement les uaincus: car ce ne fut point en bataille rengee, ny en iournee assignee avec toute leur puiſſance entiere, qu'ilz y furent battus, ains furent des courſes faittes à propos, & des eſcarmouches, là ou tantost en fuyant, tantost en chassant, ilz ſattachèrent à eulx, & les battirent. Mais la bataille de Tegyre, qui fut comme un eſſay de la iournee de Leuctres, meit Pelopidas en grande reputation: pource qu'il n'y eut point de compagnon qui luy meist en diſpute, ne qui partageaſt avec luy la gloire de la uictoire, ny ne laiſſa aux ennemis excuſe aucune de laquelle ilz peuſſent couvrir leur deſfaiſte: car il eſpioit touſiours l'occafion comment il pourroit ſurprendre la uille d'Orchomene, laquelle auoit pris le party des Lacedæmoniens, & auoit receu deux enſeignes de gens de pied pour la garder. Et un iour eſtant aduertie que la garniſon d'icelle eſtoit allee faire une courſe au pais de la Locride, eſperant qu'il trouueroit la uille

d'Orchomene toute uuide, il s'y en alla avec la bende sacree, & quelque nombre de gens de cheual: mais ainsi qu'il fut pres de la uille, il entendit qu'il uenoit de Sparte une autre garnison au lieu de celle qui estoit sortie, & à ceste cause s'en retourna arriere par la uille de Tegyre, pource qu'il n'eust sceu retourner par autre chemin qu'en tournoyant au long du pied de la montagne, à cause que toute la plaine, qui est entre deux, est noyee des regorgemens du fleuue de Melas, lequel des le lieu dont il sourt s'espand & fait des marets nauigables, de sorte qu'il est impossible de le gayer. Vn peu au dessous de ces marets y a un temple d'Apollo surnomé Tegyrié, ou il souloit auoir anciennemēt un oracle qui auiourdhuy est delaissé, & ne florit iamais longuement, ains seulement iusques au temps de la guerre des Medois, en ayant pour lors Echecrates la superintédence. Et ueulent aucuns dire que c'est le lieu propre ou Apollo nasquit, pource que lon appelle la montagne prochaine Delos, au pied de laquelle se terminent les marets du fleuue de Melas, & derriere le temple sourdēt deux fontaines qui iettent de l'eau en grande quantité, bonne & fresche à merueilles, dōt l'une s'appelle encore iusques auiourdhuy la Palme, & l'autre l'Oliue. Et ueult on dire que ce ne fut pas entre deux arbres, mais entre ces deux ruisseaux, q̄ la Deesse Latone accoucha: car mesme la montagne de

Proum est là auprès, de laquelle sortit soudainement le sanglier qui l'effroya, & semblablement ce que lon compte du serpent Pytho, & du geant Tityus, se cōforment à prouuer, que c'est là proprement le lieu de la naissance d'Apollo. Je laisse plusieurs autres indices qui se rapportent à cela, pource que nous ne tenons pas en nostre país que Apollo soit du nombre de ceux qui par transmutation ayent esté faits d'hommes mortelz Dieux immortelz, comme sont Hercules & Bacchus, qui par l'excellence de leur uertu despouillerent ce qu'il y auoit de mortel & de passible en eulx: ains le croyons estre de ceulx qui eternellement ont esté sans principe de generation, au moins si nous deuõs adiouster foy à ce que les plus sçauans & les plus anciens ont laissé par escrit touchant choses si grandes & si sainctes. Les Thebains donques retournans d'Orchomene, & les Lacedæmoniens de l'autre costé retournans semblablement de la Locride en un mesme temps, se rencontrerent les uns deuant les autres auprès de la uille de Tegyre. Et si tost que lon eut descouuert les Lacedæmoniens passans le destroit, il y eut quelqu'un de la troupe des Thebains qui accourut à Pelopidas uistement, & luy uint
 » dire, Nous sommes tumbez entre les mains des
 » Lacedæmoniens. Pourquoy, luy respondit il
 » soudainemēt, plus tost q̄ eulx entre les nostres?
 Et ayant dit cela, commanda aux gens de cheual

qui estoient à la cueuë de toute la troupe, qu'ilz passassent deuant, comme pour commencer la charge les premiers: & ce pendât luy rengea en un petit bataillon bien serré ce qu'il auoit de gens de pied, qui n'estoient que trois cents, esperant bien que là ou il donneroit avec ce squadron, il forceroit & fendrait les ennemis qui estoient en plus grand nombre: car il y auoit deux compagnies de Lacedæmoniens, & chasque compagnie, ainsi comme escrit Ephorus, estoit de cinq cets hommes, & Callisthenes dit de sept cents: encore y en a il d'autres qui disent de neuf cents, entre lesquelz est Polybius. Si marcherent les Capitaines des Lacedæmoniens Theopópus & Gorgoleó de grande hardiesse cõtre les Thebains, & se rencontra d'adventure, que la premiere charge commença aux endroits, ou estoient les Chefs tant d'une part que d'autre, avec une fureur & une impetuosité tresgrande, de sorte q̄ les premiers qui y moururēt furēt tous les deux Capitaines des Lacedæmoniens, qui s'estoyent ensemble ruez sur Pelopidas: & apres eulx ceux qu'ilz auoyēt autour de leurs personnes y estans aussi fort blecez ou tuez sur le champ, le reste de l'armee s'en trouua si effroyé qu'elle se fendit en deux, & se tira ça & là à costé donnant passage aux Thebains pour pouuoir tirer oultre silz eussent uoulu: mais quand ilz ueirēt que Pelopidas ne s'amusant point à passer outre par l'ouuerture

qu'on luy faisoit , menoit ses gens contre ceulx qui estoient encore en bataille , & alloit tousiours tuant ceulx qui luy faisoient teste , alors ilz se meirent tous à fouir à ual de rouverte : toutefois les Thebains ne les chasserent pas fort loing, pource qu'ilz craignoient les Orchomeniens qui n'estoient gueres loing de là , & davantage la nouvelle garnison, qui nagueres y estoit arriuee de Lacedemone . Cela fut cause qu'ilz se contenterent de les auoir rompus à uiue force, & auoir en despit d'eulx passé à trauers toute leur armee mal menee & batue. Parquoy apres auoir dressé un trophée, & despouillé les morts, s'en retournerent en leurs maisons bien ioyeux , & ayans les cueurs fort esleuez, pource qu'en tant de guerres que les Lacedemoniens auoyent eues par le passé , tant contre les Grecs que contre les Barbares, il n'estoit point de memoire que iamais ilz eussent esté batus par un moindre nombre d'ennemis que le leur, ny encore par un nombre egal en bataille rengee : au moyen dequoy ilz estoient si courageux & si terribles , que personne ne les osoit attendre : car leur reputation seule estoit tellement les aduersaires qui auoyent à combattre contre eulx, qu'ilz ne pensoient pas avec egale puissance deuoir autât faire comme culx . Mais ceste bataille de Tegyre fait la premiere cognoistre & à eux & aux autres Grecs, que ce n'est point la riuere d'Eurotas seule , ny le

lieu qui est entre les ruisseaux de Cnacion & de Babyce, qui porte de belliqueux hommes & hardis combatāns, ains que c'est par tout ou lon apprend aux ieunes hommes à auoir honte des choses deshonestes & uilaines, & à hazarder leurs uies pour les honestes, en craignant plus le reproche & le deshonneur que le peril. Ce sont ceux la qui sont tousiours les plus redoutables & les plus terribles à leurs ennemis. Or quand à la bende sacree dont nous auons fait mention par cy deuant, on dit que ce fut un nommé Gorgidas qui la meit sus le premier: elle estoit de trois cents hommes chosis, qui estoient soudoyez & entretenus aux despens de la chose publique, & logcoyent dedans le chasteau de la Cadmee, & l'appelloit on ardinaiement la bende de la uille, à cause que lors on appelloit, mesmemēt en ce quartier la de la Grece, les chasteaux & fortresses des grosses citez, les uilles. Les autres ueulent dire que c'estoit une compagnie de gēs de pied cōposée d'hommes amoureux les uns des autres, & à ce propos racompte lon un dict notable de Pāmenes, lequel en se iouant disoit, que Nestor n'entendoit rien à ordonner une armee en bataille, attendu qu'en l'Iliade d'Homere il cōseille aux Grecs, qu'ilz se rengent en bataille par nations & par lignees,

» A fin que plus on ait d'affection

» De secourir chascun sa nation.

Car il falloit, ce disoit il, plus tost rengier un amant auprès de celuy qu'il aime, pource que les hommes se soucient ordinairement bien peu de ceulx qui sont de leur nation ny de leur lignee en un danger: mais un bataillon qui seroit composé d'hômes amoureux les uns des autres, ne se pourroit iamais ny rôpre ny forcer, à cause que les amants, pour l'affection uehementte qu'ilz porteroyent à leurs aimez, ne les abandonneroyent iamais: & les aimez ayans honte de faire chose aucune lasche ny deshonestte deuant leurs amants, tiendroyët, les uns pour l'amour des autres, iusques au bout. Ce qui n'est pas hors de propos, sil est uray que les amoureux reuerent plus leurs amours, encore qu'ilz soyët absens, qu'ilz ne font les autres presents: ainsi que lon peut cognoistre par l'exemple de celuy qui estant abbatu par terre, ainsi que son ennemy haulsoit l'espee pour le tuer, le pria qu'il luy donnast le coup de la mort par deuât, de peur que son aimé uoyant son corps mort blecé au dos, n'en rougist de honte. Aussi dit on que Iolaus estant aimé de Hercules, le secourut & accompagna en tous ses combats & labeurs: à l'occasion dequoy Aristote escrit, que iusques à son temps les amants se donnoyent la foy, & iuroyent loyaulté l'un à l'autre dessus la sepulture d'Iolaus. Parquoy il me sembleroit uraysemblable de dire, que ceste bende eust premierement esté nommee la bende sacree, pour
la mes-

la mesme raison que Platon appelle un amant amy diuin, ou inspiré de Dieu. Et treuve lon par escript, que iamais elle n'auoit esté rompue ny desfaite iusques à la bataille de Cheronee, apres laquelle Philippus regardât la descōfiture des morts, s'arresta à l'endroit ou estoÿét les quatre cents hommes de ceste compagnie gisans en terre serrez les uns pres des autres, tous percez de grands coups de picques à trauers l'estomach, dont il f'esmerueilla grandement : & entendant que c'estoit la bende des amants, il s'en prit à larmoyer de pitié, en disant, Que mal puisse il prendre à ceux qui souspeçonnent que telles gens feissent ou souffrissent rien de deshoneste. En somme l'inconuenient de Laius, qui fut occis par son propre filz Oedipus, n'a point esté la cause primitiue de ceste coustume que les Thebains auoyent d'estre amoureux les uns des autres, ainsi comme disent les poëtes : ains ont esté ceulx qui leur ont premierement estably leurs loix, lesquelz uoyans que c'estoit une nation courageuse & uiolente de sa nature, la uolurent un peu amollir & addoucir des l'aage d'enfance, & à ceste intention meslerent parmy tous leurs actes, & de plaisir, & d'affaires de consequence, le ieu de la fluste ordinairement, le mettrons en honneur & en reputation. Semblablement aussi parmy les esbattemens de la ieunesse aux exercices de la personne introduirēt l'usâce de faire l'amour,

pour temperer & addoucir les meurs & le naturel de leurs ieunes hommes . Et pour ceste cause a lon bié attribué aux Thebains avec bon iugement , & suyuant ce propos , pour tutrice & patronne de leur cité , la Deesse Harmonie , laquelle on dit auoir esté engendree de Mars & de Venus : car cela donne à entédre , que là ou la force & hardiessé militaire est unie & cōiointe avec la grace d'attirer & de persuader , toutes choses sont reduittes par ceste accordee union à un tresbeau , tresbon & tresparfaict gouuernement . Or pour retourner au propos de ceste bēde sacree des Thebains , Gorgidas la departant es premiers rens , & l'estendant le long du front de toute la bataille des gens de pied , ne fait point cognoistre ny uenir en euidence , combien elle ualoit à part , pource qu'il ne la rengea pas en un corps , de forte que lon peult uoir l'effect commun qui procedoit de toute la compagnie ensemble , attendu qu'elle uenoit à estre diuisee & meslee parmy beaucoup d'autres qui ualoyent moins . Mais Pelopidas qui auoit clairement ueu à l'œil , combien ilz ualoyent ensemble , pource qu'ilz auoyent combatu seuls à l'entour de luy à Tegyre , ne les uoulut plus de là en auant diuiser ny séparer les uns des autres , ains s'en seruit cōme d'un corps entier ayāt tous ses membres , avec lequel il cōmécea tousiours depuis à charger en toutes ses plus grandes & plus hazardeuses batailles : car

tout ainsi que nous uoyons es ieux des courses de chariots, que les cheuaults y estans attellez plusieurs ensemble, tout d'un front, courent plus roide & plus fort qu'ilz ne font quand ils sont desliez, & qu'on les picque tous seuls: nō que ce soit, pource qu'en s'eslanceant plusieurs ensemble, ilz fendent mieulx l'air, mais pource que celle contētion & enuie qu'ilz ont les uns contre les autres, à qui courra le plus uiste, & qui passera son cōpagnon, leur eschauffe le courage: ainsi estimoit il que les uaillans hommes, se dōnans les uns aux autres un zele & une ialouzie de bien faire, auroyēt plus de courage; & feroiyēt plus grand effort quand ilz combatroyent ensemble à la ueuē les uns des autres. Mais depuis les Lacedamoniēs ayās fait paix & accord avec tous les autres Grecs, denoncerēt la guerre aux Thebains seuls, & leur alla le Roy Cleombrotus courir sus avec une armee de dix mille hommes de pied & mille cheuaults. Si n'estoyent plus les Thebains en pareil danger qu'ilz auoyēt esté au parauāt, de perdre leur liberté seulement, ains les menaçoiyēt les Lacedamoniens tout publiquement, & leur denōceoyent ouuertement qu'ilz les destruiroyēt & extermineroyēt entierement, de maniere que tout le pais de la Bœoce estoit en plus grand esfroy, qu'il n'auoit onques esté: & un iour ainsi comme Pelopidas sortoit de sa maison pour aller à la guerre, sa femme qui le cōuoioit iuf-

ques hors de la porte, luy dit en plorant, qu'elle le prioit d'auoir soing de sauuer la personne: & il luy respondit, C'est aux priuez & particuliers soudards, m'amie, à qui il fault recorder cela: mais aux Capitaines, il leur fault ramener en memoire, qu'ilz ayent l'œil à sauuer la uie aux autres. Et arriué qu'il fut au camp, il trouua les Capitaines generaux & Chefs de l'armee en diuerses opinions, & fut le premier qui s'accorda à celle de Epaminondas, qui estoit d'aduis que lon deuoit donner la bataille aux ennemis. Pelopidas n'estoit pour lors ny gouverneur de la Bœoce, ny Capitaine general de l'armee, ains seulement de la bande sacree: mais toutefois on se fioit en luy, & luy donnoit on credit & autorité au conseil des affaires, telle comme il appartenoit à un personnage qui auoit donné de si grandes arres de l'affection qu'il portoit à son país. Ainsi ayant esté resolu au cōseil, que lon donneroit la bataille aux ennemis, ilz se trouuerent les uns deuant les autres en la plaine des Leuctres, là ou il eut la nuict en dormant une uision qui le troubla fort: Il y a en celle campagne des sepultures des filles d'un Scedafus, que lō appelle, à cause du lieu, les Leuctrides, pource qu'elles y furēt enterrees, apres auoir esté uiolees & forcees par des hostes Spartiates passans: cest acte estant si malheureux & si meschant, le pere neātmoins n'en peut auoir reparation ny uengeance en Lacedæmone, &

pourtant apres auoir maudit les Lacedæmoniens des plus horribles & plus execrables malediCTIONS & imprecations, dont il se peut aduifer, il se tua luy mesme dessus les tûbeaux de ses filles, & auoyét les Lacedæmoniës eu plusieurs oracles & plusieurs propheties & prediCTIONS des Dieux, qui les admonestoyét qu'ilz se donnassent bië garde du courroux Leuctrique: mais le commun n'entendoit pas que uouloit signifier cest aduertissemēt, ains s'abusoit à l'equiuocation du nom, pource qu'il y auoit dedans le païs de la Laconie, sur le bord de la mer, une petite uillette, qui s'appelloit Leuctrum, & semblablement aussi en Arcadie pres la uille de Megalipolis y auoit une autre qui s'appelloit du mesme nō. Or cest accident estoit adueni bien long temps au parauant la bataille de Leuctres: mais lors Pelopidas dormāt en sa tente, eut une uision qu'il pēsa uoir ces filles de Scedalus piorātes à l'entour de leurs sepultures, & maudifantes les Lacedæmoniens: & luy fut aduis qu'il ueit aussi leur pere, qui luy commandoit de sacrifier à ses filles une uierge rousse, silz uouloyent auoir la uictoire. Ce commādement luy sembla de prime face cruel & inique, parquoy si tost qu'il fut leuē, il l'alla communiquer aux deuins & aux Chefs de l'armee, dont les uns dirent que ce n'estoit pas chose que lon deust omettre ny passer en nonchaloir, alleguans des exemples de cas semblables, comme de

Menœceus filz de Creon au temps iadis, & de Macaria fille de Hercules : & de plus fresche memoire, le sage Pherecydes que les Lacedæmoniens occirent, & duquel leurs Roys gardét encore la peau par le commandemét d'un oracle: & Leonidas qui s'uyuât une diuine prophétie s'immola par maniere de dire luy mesme pour le salut de la Grece : & dauantage les ieunes garçons, que Themistocles auant la iournee de Salamine sacrifia à Bacchus surnommé O-mestes, c'est à dire, mangeant chair crue : tous lesquelz sacrifices furét approuuez & acceptez par les Dieux, comme tesmoignerét les uictories qui en sont ensuyuies. Au contraire, le Roy Agefilaus partant des mesmes lieux qu'estoit anciennement party le Roy Agamemnon du temps de la guerre de Troye, & allant contre mesmes ennemis, ueit pareillement une nuict en dormant la Deesse Diane en la uille de Aulide, qui luy demandoit le sacrifice & oblation de sa fille, ce qu'il ne uolut pas faire par auoir eu le cueur trop tendre : aussi fut il contraint de rompre son uoyage auant qu'auoir executé son entreprise, & en rapporta peu de gloire. Les autres à l'opposite maintenoient qu'il n'en falloit du tout riē faire, pource qu'un si cruel, si abominable & si barbare sacrifice ne pourroit estre agreable à pas un des Dieux, ny à aucune essence meilleure ne plus puissante que la nostre, attendu que ce ne sont ne

Typhons ny geans, qui ont la domination du monde, ains le tout puissant, qui est pere des Dieux & des hommes. Et de croire qu'il y ait des Dieux ou Demidieux qui se delectent de meurtre & d'effusion de sang humain, à l'adventure est-ce une folie: mais quād bié il en seroit, il n'en faudroit tenir aucun compte, comme de ceulx qui n'auroyent aucune puissance, pource que c'est signe d'une lasche & meschante ame, quād il s'y imprime de si malheureux & si estranges appetits, & qu'ilz y demeurent. Estans donques les principaux de l'armee des Thebains en ce debat d'opinions, & Pelopidas se trouuant pour leur irresolution en plus grande doubte que iamais, il y eut une ieune poultre qui s'en estât fouye du haras, & ayant pris sa course tout à trauers du camp, se uint arrester & plâter tout droit deuant eulx. Si ne feirent les autres que prendre garde seulement, qu'elle auoit le poil & les crins rouges fort luyfans, & comme elle estoit uifue & gaye à ouir son clair & fier hennissement: mais le deuin Theocritus qui estoit en la compagnie, ayant incontinent entendu

20 que c'estoit, s'escria soudainement tout hault: O
 20 gentil Pelopidas, uoicy l'hostie que tu deman-
 20 des, ne cherche plus d'autre uierge à immo-
 20 ler, ains reçoÿ & employe celle que Dieu mes-
 20 me t'enuoye. Ces paroles dittes, ilz faisi-
 rent aussi tost la poultre, & la menerent sur le
 tumbeau des filles de Scedafus, là ou ilz la

couronnerét de festôs & de chapeaux de fleurs, comme lon fait les hosties: puis apres auoir fait leurs prieres & inuocations aux Dieux, la sacrifierent à grande ioye, & allerent semer par tout le camp la nouvelle de la uision que Pelopidas auoit eue la nuit en dormant, & du sacrifice qu'ilz auoyent fait suyuant l'aduertissement d'icelle. Au demourant, quand ce uint au iour de la bataille, Epaminondas qui estoit Capitaine general, tira toute son armee en biaisant sur le costé gauche, à fin que la poincte droite de celle des ennemis ou estoient les naturelz Spartiates s'esloignast de tant plus des autres Grecs leurs adherents, qui estoynt en l'autre poincte de leur bataille, & que uenant ainsi à charger avec toutes ses forces ensemble, Cleombrotus leur Roy en un coing, il le peust enfoncer & forcer. Les ennemis ayans incontinent entendu pourquoy il le faisoit, commencerent à chager leur ordonnance, & uolurent eslargir & estredre leur poincte droite pour enuelopper Epaminondas, avec le grand nombre de gens qu'ilz estoient: mais Pelopidas ce pendant les preuint de uistesse, & courant de grande roideur avec le squadron de ses trois cents hommes, alla charger Cleombrotus auant qu'il peust desployer & eslargir la poincte droite de sa bataille, & la reioindre de rechef en un tenant, de sorte qu'il trouua les Lacedemoniens non encore plantez en leurs rens, & les choc-

qua en ce defarroy qu'ilz estoyent encore pesle
mesle les uns parmy les autres, combien que
les Lacedæmoniens estans souuerains maistres
& ouuriers de tout ce qui appartient à l'art &
discipline militaire, ne s'accoustumassent & ex-
ercitassent à rien plus qu'à ne se troubler & cō-
fondre point, quand on remuoit l'ordonnance
de leurs rens: car ilz uouloyent que leurs gens
feissent teste & flanc en tout sens, selon que
l'affaire & le besoing s'en presenteroit, & qu'ilz
se rengaissent & combatissent à tous endroits
egalement. Ainsi donques Epaminondas les al-
lant assaillir eulx seuls avec toute la force de sa
bataille ensemble, sans s'arrester aux autres, &
semblablement Pelopidas avec une uistesse
& hardiesse incroyable, se presentant soudain
en armes deuant eulx, les effroyerent tellemēt
qu'ilz leur feirent oublier toute leur escrime,
& perdre leur magnanimité accoustumee: car
ilz fouirent à ual de rouverte, & fut fait une bou-
cherie des naturelz Spartiates plus grande qu'il
n'auoit iamais esté iusques à ceste iournee la en
bataille quelconque. Pourtant Pelopidas qui
n'estoit lors ny gouuerneur de la Bœoce, ny
Capitaine general de toute l'armee, ains seule-
ment Chef de la bende sacree, emporta neant-
moins autant d'honneur & de gloire de ceste
uictoire, comme fait Epaminondas qui estoit
& gouuerneur de la Bœoce, & Capitaine gene-
ral de l'armee. Vray est, que depuis ilz furent

tous deux gouuerneurs de la Bœoce ensemble, quand ilz entrerent dedans le Peloponese, là ou ilz feirent rebeller contre les Lacedæmoniens, & tourner de leur costé la plus part des uilles & des peuples, comme les Eliens, les Argiens, toute l'Arcadie, & la plus grande partie de la Laconie mesme, combien que ce fust au cueur d'hyuer enuiron les plus courts iours de l'an, & à la fin du dernier mois de leur annee, dõt il ne leur restoit plus que bien peu de iours, & falloit qu'incontinent à l'entree du mois ensuyuant ilz quittassent leurs charges, & que d'autres y entrassent, sous peine de perdre la vie silz faisoient refus de ceder leur charge & autorité aux nouueaux officiers. A l'occasion dequoy leurs autres compagnons en l'estat de gouuerneurs de la Bœoce, tant pour crainte d'encourir la peine de la loy, comme aussi pour fouir le trauail de tenir camp en la plus aspre rigueur de l'hyuer, les pressoyent & sollicitoyent de remener l'armee à la maison : mais Pelopidas fut le premier qui s'accorda à l'opinion d'Epaminondas, & y attira aussi les autres Thebains, à uouloir aller sous leur conduite presenter l'assault à la uille mesme de Sparte. Si passerent à leur persuasion la riuere d'Eurotas, & prirent plusieurs petites uilles sur les Lacedæmoniens, pillerent & gasterent tout le plat país iusques à la mer, conduisans sous leurs enseignes une armee de soixante & dix mille

combatans tous Grecs, dont les Thebains ne faisoient pas la douzieme partie : mais la gloire & reputation grande de ces deux personnages, faisoit que sans autre resolution de conseil ou ordonnance publique, les autres alliez & confederez suyuoient sans dire mot à l'encontre, & marchoyent uoluntairement sous leur conduite. Aussi est-ce la premiere & souveraine loy de nature, à mon advis, qui ueult que celuy qui de soy mesme ne se peult garder & defendre, se soubmette à celuy qui peut & a moyen de ce faire : ne plus ne moins que sur la mer, ceulx qui sont dedans une nauire, encore qu'en beau temps, durant que la mer est calme, ou pendât qu'ilz sont à l'ancre en quelque bonne rade, ilz se portent fierement & audacieusement enuers les pilotes : incontinent toutefois que la tourmente se leue, & qu'ilz se uoyent en danger, ilz iettent les yeux sur eulx, & n'ont esperance de salut qu'en eulx. Au cas pareil aussi les Eliens & Argiens, encore que es assemblees de conseil ilz querellassent & debatissent à l'encontre des Thebains pour la superiorité & l'honneur de presider en l'armee : toutefois quand ce uenoit à donner bataille, & là ou ilz cognoissoient qu'il y auoit du peril, ilz se rengeoient & soubmettoient uoluntairement à la conduite de leurs Capitaines. En ce uoyage la ilz allierent & ioignirent en une ligue toutes les villes de la prouince d'Arcadie, & osterent aux

Lacedæmoniens toute la contree de Messenie, dont ilz iouissoient paisiblement, & rappellerent les anciens naturelz habitans, ausquelz ilz la rendirent, & repeuplerent la uille de Ithome, puis en retournant en leur pais par la uille de Cenchrees, ilz batirent les Atheniés qui les allerent harceler dedans le destroit de l'entree du Peloponese, pour les cuider engarder de passer. Si estoit la uertu de ces deux personnages aimee & honoree de tout le monde pour tant de beaux & de bons exploits, & leur prosperité grandement estimee: mais à mesure que leur gloire croissoit, l'enuie de ceulx de leur pais & de leurs citoyens s'augmentoit aussi, qui leur brassa à leur retour un recueil qui n'estoit beau ny honeste, ny conuenable aux seruices qu'ilz uenoient de faire: car tous deux à leur arriuee furent appelez en iustice, & accusez de crime capital, pource qu'il y auoit à Thebes une loy qui commandoit expressement, que ceulx qui seroyent gouuerneurs de la Bœoce, cedassent incontinent l'office à ceulx qui seroyent nouuellement eleuz, des l'entree du premier mois de l'an que lon appelle en la Bœoce Boucation, & ilz l'auoyent retenu dauantage que le terme qui leur estoit prefix, quatre mois tous entiers, durant lesquelz ilz auoyent executé tout ce que nous auons dit, tant en la province de Messenie & d'Arcadie, qu'en la Laconie. Le premier à qui on fit le proces fut Pe-

Pelopidas, qui pour ceste cause en fut en tant plus grand danger : toutefois à la fin ilz furent tous deux absouls : & quant à Epaminondas, il supporta doucement ceste calumnie & cest eslay de leurs maluueillans, par lequel ilz auoyent tasché à les ruiner, estimant que la patience à ceulx qui s'entremettent des affaires d'un gouvernement, est une grande partie de force & de magnanimité : mais Pelopidas estant de sa nature plus cholere, & dauantage estant encore poulcé & irrité par quelques uns de ses amis, prit une telle occasion pour s'en uenger : Menecles l'orateur estoit un de ceulx qui se rendirent dedans le logis de Charon avec Pelopidas & Melon : mais toutefois les Thebains ne luy firent pas autant d'honneur comme aux autres, dequoy ayant despit, & estant homme tres-eloquent, mais uicieux au demourât, & de maligne & mauuaise nature, il abusa de son eloquence à calumnier & faulusement charger & accuser ceulx qui ualoyent mieulx que luy : & ne se contentant pas de ceste premiere accusation, il feit tant par ses menees qu'il debouta une année Epaminondas de l'office de gouverneur de la Bœoce qu'il poursuyuoit, & luy contraria longuement en tout ce qu'il essaya de faire au gouvernement de la chose publique. Mais quand à Pelopidas, il ne le peut onques mettre en la male grace du peuple, & pour ceste cause tascha à le mettre en pique & en que-

relle avec Charon : car c'est le commun reconfort des enuieux, quand ilz ne peuuent faire que lon les estime aussi gens de bien que ceulx à qui ilz portent enuie, de tascher à monstrier, que ceulx la ne sont point si gens de bien que quelques autres qu'ilz mettent en auant. Si ne faisoit autre chose que haultlouer ordinairement en toutes ses harengues deuant le peuple les faicts & gestes de Charon, & magnifier ses uictoires, mesmement celle que les Thebains gaignerent deuant la iournee de Leuctres en une rencontre de gens de cheual, qui fut pres la uille de Platees sous sa conduite : de laquelle il uolul laisser une telle memoire : Androcycdes peintre Cyzicienien auoit fait marché avec ceulx de la uille de leur peindre en un tableau quelque autre bataille, & faisoit ceste besongne dedás la uille mesme de Thebes : mais ainsi qu'il estoit apres, suruint la rebellion des Thebains contre les Lacedæmoniens, & consequemment la guerre, pour laquelle le peintre se retira de Thebes, laissant son œuure à peu pres acheuee & parfaite. Les Thebains reteindrét le tableau rieres eulx, & ce Meneclides meit en auant au peuple que lon l'attachast en quelque temple ou autre lieu public, avec une inscription qui dist, que c'estoit la uictoire de Charon, cuidant par là obscurcir & effacer la gloire de Pelopidas & d'Epaminondas. C'estoit une uaine & sotte ambition, de uoloir mettre à l'encon-

tre de tant de combats & de tant de batailles une seule rencontre de Charon, en laquelle mourut Gerandas l'un des moins renommez gentilshommes de Sparte, & quarante autres avec luy seulement sans autre chose. Pelopidas accusa ce decret que Meneclides proposa, maintenant qu'il estoit directement contre les loix de Thebes, lesquelles defendoient expressement, que lon n'honorast aucun particulier du tiltre d'une uictoire publique, ains uouloyent que lon l'attribuast, & que lon en donnast la gloire à toute la communauté du peuple. Il est uray que par toutes les harengues qui se feirent en ce proces, Pelopidas loua & exalta tousiours grandement Charon: mais il prouua que Meneclides estoit un enuieux maling, & un meschant & mauuais homme, demandant souuent aux Thebains, filz n'auoyent eux rien fait de beau ny de bon: si que finablement il feit condamner Meneclides en une somme de deniers pour l'amende: laquelle luy ne pouuant payer, pource qu'elle estoit trop grosse, il attenta depuis de remuer & changer entierement tout l'estat & le gouuernement de la chose publique. I'ay bien uoulu reciter cela un peu au long, pource qu'il me semble qu'il donne aucunement à cognoistre quelles estoient les meurs & la nature de Pelopidas. Au reste enuiron ce temps la, Alexandre le tyran de Pheres faisoit ouuertement la

guerre à plusieurs peuples de la Theſſalie: & au demourant eſpioit les moyens, comment il les pourroit aſſeruir tous uniuerſellement à ſoy. A raiſon dequoy les uilles franches enuoyerēt leurs ambaffadeurs à Thebes, requerir que lon leur enuoyaſt un Capitaine avec une armee pour les ſecourir. Parquoy Pelopidas uoyant que Epaminondas eſtoit occupé à ordonner les affaires du Peloponeſe, ſe preſenta de luy meſme, & ſe donna à ceulx de la Theſſalie, ne uoullant point que ſa force & ſa ſuffiſance au meſtier de la guerre demouraſt oiſiſue ny inutile, & eſtimant que la part ou eſtoit Epaminondas il n'y auoit point beſoing d'autre Capitaine. Eſtant donques arriué avec une armee en la Theſſalie, la uille de Lariffe ſe meit incontinent entre ſes mains, là ou le tyran Alexandre le uint trouuer, & prier de moyener accord entre luy & les Theſſaliens: ce qu'il eſſaya de faire, en taſchant de le rendre au lieu de tyran, doux, iuſte & legitime gouuerneur de la Theſſalie: mais quand il ueit que quelques remōſtrances qu'on luy feiſt, il eſtoit incurable, & ſi farouche qu'il ne ſe uouloit aucunement renger à la raiſon: dauantage que lon ſe plaignoit de grandes cruaultez qu'il faiſoit, & l'accuſoit on d'eſtre homme diſſolu & deſordonné en tous ſes appetits, & extremement auaricieux, il commença adonc à luy parler rudement & à ſe courroucer à bon eſciant à luy. A l'occafion dequoy

dequoy le tyran se desroba secrettement, & s'en fouguit avec ses satellites & soudards de sa garde : & Pelopidas laissant les Theffaliens hors de toute crainte & danger du tyran, & au demourant en bonne paix, union & concorde les uns avec les autres, s'en alla en la Macedoine, là ou Ptolomeus faisoit la guerre à Alexandre, qui pour lors tenoit le royaume de Macedoine, & l'auoyent tous deux enuoyé querir pour cognoistre, composer & pacifier leurs differents, & aussi pour aider à celuy qui auroit le droit, à l'encõtre de celuy qui auroit tort. Arriué qu'il y fut, il appointa toutes leurs querelles, & remeit les bânis d'une part & d'autre en leurs maisons & en leurs biés: pour la feurereté duquel appointement, il prit en ostage le frere du Roy, qui auoit nõ Philippus, & trête autres enfans des pl⁹ nobles maisons de la Macedoine, lesq^{lz} il mena tous à Thebes, faisant uoir aux Grecs, combien festendoit loing la reputation des forces des Thebains, & la renommee de leur legalité & iustice. C'est celuy Philippus qui depuis fait la guerre aux Grecs, pour leur oster leur liberté: mais pour lors estant ieune enfant, il fut nourry à Thebes en la maison de Pammenes: c'est pourquoy aucuns ont estimé que ledit Philippus ait esté imitateur de Epaminondas, & pourroit bien estre qu'il auroit à l'adventure appris de luy à estre ainsi prompt & de soudaine execution à la guerre, comme il a esté, ce qui n'e-

stoit qu'une bien petite partie de la uertu de Epaminondas : mais de sa continence, iustice, magnanimité & clemence, qui estoient les parties qui le rendoyent ueritablement grand, Philippus ny par nature, ny par nourriture, ou estude, n'en teint onques rien. Depuis les Thesaliens, ayans une autre fois enuoyé à Thebes faire leurs plaintes contre Alexandre le tyran de Pheres, pource qu'il troubloit & trauailloit les uilles franches de la Thessalie, Pelopidas fut despesché pour y aller comme ambassadeur avec Ismenias, & y alla sãs mener aucunes forces de Thebes, ne pensant point qu'il y deust auoir de guerre : à raison dequoy il fut contraint de se seruir des gens du país mesme en l'affaire urgent qui se presenta. Au mesme temps aussi se troublèrent les affaires de la Macedoine, parce que Ptolomeus y occit le Roy, & usurpa le royaume, & les seruiteurs & amis du Roy mort appelloyent à leur secours Pelopidas, lequel desirant y arriuer sur le faict, & n'ayant point amené quand & luy de gens de guerre de son país, en leua soudainement quelques uns au lieu mesme ou il estoit, avec lesquelz il se meit incontinent en chemin pour aller trouuer ce Ptolomeus. Lequel quand ilz approcherent l'un de l'autre, trouua moyen de gaigner & corrompre par argent ces soudards, que Pelopidas auoit amenez, & les faire tourner de son costé: mais nonobstant cela, redoubtant encore le

nom seulement, & la grande reputation de Pelopidas, il luy alla au deuant comme à un personnage plus grand que luy, & usant de toutes caresses & prieres, promet & iura qu'il garderoit le royaume aux freres du Roy defunct, & qu'il tiendroic pour ses amis & pour ses ennemis ceulx mesmes que les Thebains auoyent: pour seureté de laquelle promesse, il donna en ostage son filz Philoxenus, & cinquante de ses amis: lesquelz Pelopidas enuoya tous à Thebes. Mais ce pendant se sentant griefuement oultragé par les soudards qui luy auoyent fait une telle trahison, & entendant que la plus part de leurs biens, leurs femmes & leurs enfans estoient en la uille de Pharsale, il pensa que sil s'en pouuoit saisir, ce luy seroit un bon moyen de prendre telle uengeance qu'il uoudroit du mauuais tour qu'ilz luy auoyent fait: si assembla quelque nombre de Thessaliens, & s'y en alla: mais il n'y fut pas plus tost arriué, que le tyran Alexandre y suruint aussi avec son armee. Pelopidas cuidant qu'il uinst pour se iustifier & descharger des plaintes que les Thessaliens proposoyent contre luy, s'en alla deuers luy, encore qu'il sceust tresbien que c'estoit un meschant homme, & qui facilement fouilloit ses mains de meurtre & de sang: mais il se confioit que pour l'authorité de la seigneurie de Thebes, par laquelle il estoit illec enuoyé, & aussi pour la dignité de sa personne,

& pour sa reputation, il ne luy ozeroit faire aucun desplaisir : toutefois le tyran le uoyant mal accompagné & sans armes, l'arresta prisonnier, & à mesme instant se saisit de la uille de Pharsale. Ce qui donna une grande frayeur & terreur à tous ses subiects, lesquelz penserent bien, que puis qu'il auoit pris la hardiesse de commettre une telle iniustice, il n'espargneroit plus personne, & qu'il feroit de toutes choses & de toutes personnes qui tumberoyét entre ses mains, comme un homme desesperé, & se tenant pour tout perdu. Quand ceulx de Thebes eurent ces nouvelles, ilz en furent fort griefuement marries, & promptement y enuoyerent une armee sous la conduite d'autres Capitaines, & non de Epaminondas, à cause de quelque mescontentement qu'ilz auoyent de luy. Or ce pédant le tyran ayant mené Pelopidas à Pheres, permit du commencement à qui uouloit de l'aller uoir & parler à luy, cuidant que sa calamité luy auroit abaissé le cueur & l'auroit humilié : mais quand il entendit au contraire, qu'il reconfortoit les habitans de Pheres, & les enhortoit d'auoir bon courage, en leur disant que l'heure estoit uenue que le tyran seroit à un coup puny de toutes ses meschancetez, & qu'il luy enuoya dire à luy mesme à son uisage, qu'il n'y auoit point de propos que tous les iours il gehennast & feist mourir en tourmés ses pauures citoyés, qui ne l'auoyent point offensé, & qu'il ne luy

feist rien à luy, ueu qu'il sçauoit bien que si iamais il eschappoit de ses mains, il se uengeroit bien de luy. Le tyran s'esmerueillant de ceste grandeur de courage, & de ceste constance de ne craindre rien, demanda pourquoy c'estoit qu'il auoit si grande haste & si grande enuie de mourir. Ce qu'ayant entendu Pelopidas, luy
 20 respondit: C'est, dit il, à fin que tu en perisses
 20 plus tost, en estant haï & des Dieux & des
 20 hommes, encore plus que tu n'es maintenant.

Depuis ceste parole le tyran ne uoulut plus que personne de dehors parlast à luy: mais Thebe qui estoit fille du defunct tyran Iason, & femme d'Alexandre, entendant la constance, fermeté de courage & magnanimité de Pelopidas, par le rapport de ceulx qui l'auoyent en garde, eut enuie de le uoir & de parler à luy: & l'estant allé un iour uoir, elle ne cogneut pas de prime face, comme femme, la grandeur de son courage & l'excellence cachée de sa ualeur, le uoyant en telle captiuité: ains coniecturant à ce qu'elle le uoyoit par dehors ainsi simplement uestu, les cheueulx & la barbe longue, pauurement serui & mal traité, iugea qu'il y auoit pitié en son faict, & qu'il n'estoit pas en estat conuenable à la gloire de son nom, dont elle se prit à plorer de compassion. Pelopidas qui ne sçauoit qui elle estoit, s'en esmerucilla du commencement: mais puis apres quand on luy eut dit qui elle estoit, adonc il la salua pour

l'honneur de Iason son pere, duquel en son ui-
uant il auoit esté autrefois familier & amy. Et
20 elle se prit à luy dire: I'ay grande pitié de ta
20 pauure femme, seigneur Pelopidas. Aussi ay-ie
20 moy de toy, luy respondit il, ueu que n'estant
20 point prisonniere tu puis endurer un si mes-
20 chant homme que Alexandre. Ceste parole
toucha au uif Thebe, laquelle supportoit fort
impatiemment la cruaulté, l'oultrage & uilla-
nie de ce tyran son mary, qui oultre les autres
infamies de sa uie desordonnee, abusoit char-
nellement du plus ieune des freres d'elle: par-
quoy retournant souuentefois deuers Pelopi-
das, & luy comptant librement ses doleances, &
les torts & oultrages que luy faisoit son mary,
par les propos que Pelopidas luy tenoit, elle
falloit petit à petit emplissant de hardiesse, de
haine, de rancune, & d'enuie de soy uenger de
luy. Au surplus, les Capitaines Thebains que
lon auoit enuoyez pour deliurer Pelopidas, e-
stans entrez avec leur armee dedans la Thessa-
lie, soit par leur ignorance, ou par malheur, s'en
retournerent honteusement sans rien faire. A
raison dequoy ceulx de Thebes à leur retour les
condamnerent chacun en amende de dix mille
escus, & y renuoyerent Epaminondas avec une
autre armee: à la uenue duquel toute la Thessa-
lie se soubsleua incontinent pour la reputation
d'un si grand Capitaine, & falloit bié peu pouls-
ser à la rouë pour faire trebucher le tyran en

totale ruine, tant ses amis & Capitaines se trouuerent effroyez, & ses subiects bien deliberez de se rebeller, & bien ioyeux pour l'esperance qu'ilz auoyent de uoir bien tost le tyran payer la peine tout à un coup de tant de malheuretez & meschancetez qu'il auoit commises par le passé. Tourefois Epaminondas mettant la consideration de son honneur & de sa gloire derriere la deliurance & le salut de Pelopidas, & craignant que Alexandre, quand il ueroit ses affaires en branle de ruine totale, ne tournast son desespoir, comme une beste sauuage effarouchee, encontre luy, alla entretenant ceste guerre en longueur tournoyât tout à l'entour, sans donner dedans à bon esciant, sous couleur de faire ses preparatiz, & dilayant tousiours, à fin de preparer & moderer le cueur de ce tyran par tel contrepois, que ny il ne laschaft trop la bride à son arrogance & effrenece oultre-cuidance, ny aussi il n'irritast au danger de Pelopidas l'aspreté & inhumanité de son courroux: sachant tresbien comme il estoit homme cruel, & qui ne se soucioit de raison ny de iustice en façon quelconque, attendu qu'il faisoit enterrer des hommes tous uifz, & en faisoit couvrir d'autres de peaux d'ours & de sangliers, & puis lascher des leuriers d'attache sur eulx, qui les deschiroyét en pieces, ou bié luy mesme par maniere de passetemps les tuoit à coups de dard & de traict. Et es uilles de Melibœe & de

Scotufe, qui toutes deux estoient en paix & amitié avec luy, il espia que les habitans fussent un iour assemblez en conseil de uille, & les feit soudain enclorre par ses satellites & passer tous au fil de l'espee, iusques aux enfans: & ayant consacré & couronné de festons de fleurs la lance dont il auoit occis Polyphron son propre oncle, il luy sacrifioit comme si c'eust esté un Dieu, & l'appelloit Tychon, comme qui diroit, heureuse à bien assener. Et quelquefois estant en un theatre ou lon iouoit la Tragedie des Troades d'Euripides, il sortit du theatre, & enuoya neantmoins dire aux ioueurs, qu'ilz ne laissassent pas de iouer tout aussi diligemment que fil y fust demouré, & qu'il n'estoit point forty pource qu'il sy faschast, ou qu'il ne trouuaist pas leur ieu bon, mais pource qu'il auoit honte, que ses citoyens le ueissent plorer pour ouir iouer les malheurs de Hecuba & de Andromache, ueu qu'il n'auoit iamais eu pitié de pas un de tant d'hommes qu'il auoit fait tuer. Ce tyran donques estant tel, s'effroya du nom seulement & de la reputation d'Epaminondas: &, comme lon dit en un commun prouerbe,

20 Il baissa l'aile ainsi comme le coq

20 Qui ua fuyant de la iouste le choc.

Si enuoya incontinent deuers luy pour s'excuser & se iustifier: mais Epaminondas ne uolut point que par son entremise les Thebains

traittassent paix ny alliance avec un si meschant homme, ains seulement feit une surseance d'armes pour trente iours, en retirant de ses mains Pelopidas & Ismenias, avec lesquelz il s'en retourna à Thebes. Au demourant les Thebains estans aduertis comme les Lacedæmoniens & les Atheniés enuoyoyent ambassadeurs deuers le grand Roy de Perse pour auoir son alliance, y enuoyèrent aussi de leur part Pelopidas : qui fut sagement aduisé à eulx, d'y enuoyer un tel personnage, pour la grande gloire de son nom. Car premierement il passa par les païs & provinces qui estoient en l'obeissance du Roy, ou il estoit si fort renommé, que l'on ne parloit que de luy, pource que la renommee des batailles qu'il auoit gaignees contre les Lacedæmoniens, n'auoit pas penetré peu auant, ny passé seulement es prochaines regions de l'Asie, ains depuis que la premiere nouvelle de la iournee de Leuctres y fut portee, ayant tousiours depuis adiousté prouesses sur prouesses, sa gloire en accrout tellement, qu'elle s'espandit par tout, iusques aux plus haultes & plus loingtaines provinces de l'Orient. Et puis quand il fut arriué à la cour de Perse, les seigneurs, princes & Capitaines Persiens qui le ueirent, l'eurent en tresgrande admiration, disans : Voicy celuy qui a osté aux Lacedæmoniens la domination de la terre & de la mer, & qui a rengé iusques audela de la riuere d'Eurotas & de la montagne de

» Taugete les Spartiates, lesquelz nagueres fai-
 » soyent la guerre au grand Roy de Perse, soubz
 » la conduitte de leur Roy Agefilaus, iusques au
 » milieu de l'Asie, pour les royaumes de Suse &
 » d'Ecbatane. Si estoit le Roy mesme Artaxerxes
 tresfioyeux de sa uenue, & le loua plus haulte-
 mēt, & le meit encore en plus grande estime &
 plus grāde reputation, que iamais, pour les hon-
 neurs & caresses qu'il luy fait, uoulāt que ceste
 gloire retournast sur luy, que lon pēsast que les
 plus uertueux & les plus excellēts personnages
 du mōde luy uinsent faire la cour, pource qu'ilz
 estimassent sa grādeur & sa haultesse souuerai-
 nemēt heureusc: mais oultre cela, quand il l'eut
 ueu au uisage, & qu'il eut ouy ses propos, qu'il
 trouua plus graues que ceulx des Atheniens, &
 plus ronds que ceulx des Lacedæmoniēs, il l'en
 aima encore dauātage, & prit une affectiō veri-
 tablemēt royalle enuers luy, tellement que sans
 rien dissimuler, il l'honora & le favorisa par
 dessus tous les autres ambassadeurs, lesquelz
 s'apperceurent bien qu'il faisoit plus de compte
 de luy que de nul autre. Combien qu'il sem-
 blast auoir fait plus grande faueur à Antalcidas
 Lacedæmoniē, qu'à pas un autre des Grecs, pour
 autant, qu'un iour estant à table, il fosta de des-
 sus sa teste le chapeau de fleurs qu'il y auoit, &
 le trempant luy mesme dedans une liqueur de
 parfum, le luy enuoya. Il est bien uray qu'il
 ne fait pas à Pelopidas des caresses de si grande

priuaulté, mais il luy enuoya des presens les plus beaux & les plus riches qu'il eust sceu enuoyer, & si luy ottroya toutes ses demandes entierement, qui furent, Que tous les peuples Grecs demourassent frâcs & libres, que la uille & cõtree de Messene fufsèt repeuplees, que les Thebains fussent nommez les anciens amis hereditaires des Roys de Perse. Et ayant eu ces responses, il s'en retourna sans accepter ne prendre chose qui soit de tant de presens qu'on luy auoit offerts de la part du Roy: ce qui fut cause que les autres ambassadeurs Grecs furent maluenus en leurs citez. Car entre les autres les Atheniens feirent le proces au leur qui se nommoit Timagoras, par lequel il fut condanné & executé à mort. Et filz le feirét pour auoir pris & accepté trop de presens du Roy, ilz feirét bié & iustemét: car il ne prit pas seulemét de l'or & de l'argent autant qu'on luy en uolul donner, mais aussi accepta un liçt fort riche, & des uallets de chambre Persiés, pour le luy accoustrer, comme si les seruiteurs Grecs ne l'eussent sceu faire: dauantage il receut aussi quatre uingts uaches à laiçt, & des uachers pour les gouuerner, ayant besoing de laiçt de uache à la guarison de quelque maladie qui luy suruint: & se fait porter depuis la cour du Roy iusques à la coste de la mer Mediterrane dedás une litiere à bras, & fut donné de par le Roy à ceulx qui le porterét deux mille quatre çents escus pour leur salaire.

Toutesfois il semble que ce ne furent pas les dōs qu'il auoit pris, qui plus irriterent les Athéniens, attendu que Epicrates le portefaix, non seulement confessa en public auoir pris des presents du Roy de Perse, mais dauantage dit, qu'il uouloit proposer & mettre en auant un decret, qu'au lieu que lon elisoit tous les ans neuf officiers qui auoyent tout le gouuernement de la uille, on eleust neuf ambassadeurs des plus pauvres & plus souffreteux qui fussent entre le menu peuple, pour les enuoyer ambassadeurs deuers le Roy, à fin qu'ilz s'en retournaſſēt riches des dons qu'il leur donneroit. Le peuple ne s'en feit que rire, mais ilz furent marris de ce que les Thebains auoyent obtenu tout ce qu'ilz auoyent demandé, ne mettans pas en consideration, combien l'estime & reputation de Pelopidas auoit plus d'efficace & de force, que n'auoyent toutes les harengues que les autres eussent sceu faire, mesmement enuers un prince qui cherchoit tousiours d'entretenir ceux des Grecs qui estoient les plus puissans en armes. Ceste ambassade donques augmenta grandement l'amour & bienueillance que tout le mode portoit à Pelopidas, à cause du restablissement & repeuplement de Messene, & l'affranchissement de tous les autres Grecs. Mais Alexandre le tyran de Pheres estant de rechef retourné à son naturel, & ayant destruit plusieurs uilles de la Theſſalie, & mis garnisons par tout

le pais des Phthiotes, Acheiens & Magnesiens, si tost que les uilles entendirent que Pelopidas estoit de retour, elles despescherent incontinct leurs ambassadeurs à Thebes, pour requerir que lon leur enuoyast une armee, & Pelopidas notamment Capitaine pour les deliurer de la seruitude du tyran: ce que les Thebains leur accorderent bien uoluntiers, & furent toutes choses prestes en bié peu de temps. Mais sur le poinct que Pelopidas uolul partir, le Soleil soudainement eclipsa, & en plein iour fut toute la uille de Thebes obscurcie de tenebres: parquoy Pelopidas uoyant tout le monde effroyé pour ce signe & presage celeste, ne uolul pas contraindre ses citoyens de partir en ceste frayeur, ny avec si mauuaise esperâce mettre à l'aduéture sept mille bourgeois Thebains qui estoient enrollez pour aller à ce uoyage: ains se donna luy seul aux Thessaliens avec trois cents cheuaux estrangers qui le suyirent de bonne uolunté, en la cōpagnie desquelz il se meit en chemin contre la defense des deuins, & oultre le bon gré de ses citoyés mesmes, ausquelz il sembloit que ce signe du ciel menaçoit quelque grand personnage, cōme luy. Mais avec ce qu'il estoit plus ardent & plus aspre à l'encōtre d'Alexandre, pour l'enuie qu'il auoit de se uéger de l'iniure qu'il luy auoit faite, encore esperoit il dauātage qu'il trouueroit sa maison sans dessus dessous, pour le propos qu'il auoit eu avec sa

femme Thebe: toute fois la beaulté de l'acte en soy estoit ce qui plus le sollicitoit & l'esguilloit, pource qu'il desiroit & s'efforceoit de faire uoir aux Grecs, au mesme tēps que les Lacedemoniēs enuoyoyent à Dionysius tyrā de la Sicile des gouuerneurs & Capitaines pour le seruir, & que les Atheniēs comme mercenaires prenoyent argēt & soude d'Alexandre le tyran de Pheres, en l'honneur duquel ilz auoyent fait dresser dedans leur uille une statue de cuyure, cōme à leur biéfaitteur, que les Thebains seuls prenoyent au contraire les armes pour deliurer ceulx qui estoient opprimez par les tyrans, & combatoyēt pour exterminer & oster les usurpateurs de uiolēte & inique dominatiō d'entre les Grecs. Estant donques arriué en la uille de Pharfale, si tost qu'il y eut assemblé son armee, il se meit incontinent aux champs pour aller trouuer le tyran: lequel uoyant que Pelopidas auoit biē peu de Thebains autour de soy, & que luy se trouuoit deux fois plus de gens qu'il n'auoit de Theffaliens, il luy alla au deuāt iusques au temple de Thetis, là ou il y eut quelcun qui dit à Pelopidas qu'Alexandre luy uenoit à l'encontre avec grand nombre de gens: & Pelopidas luy respondit soudain, Tant mieulx: car nous en desferons tant plus. Or y a il au milieu de celle plaine des mottes toutes rondes assez hault esleuees, que lon appelle communement les Testes de chien: & taschoyent les uns & les

autres à les saisir les premiers avec leurs gés de pied. Pelopidas qui auoit grād nombre de cheualerie & de bons hommes d'armes, les y enuoya deuant pour rompre ceulx des ennemis qui cuidoyent gagner ce logis, & les ayās rompus se meirēt à les poursuyure à trauers la plaine: mais ce pendāt Alexandre ayant ses gens de pied pres de là, marcha en auant, & occupa lesdittes mottes, pource que les Thessaliés qui en estoient plus loing y arriuerēt trop tard: toutefois arriuez qu'ilz y furent, ilz s'efforcerent de grauir contremont les pères de ces mottes, qui estoient haultes & droittes: mais Alexandre uenant à les charger d'enhault à son aduantage, en tua ceulx qui s'aduancerent les premiers, & les autres se tirerēt arriere blecez, sans y riē faire. Ce que uoyant Pelopidas feit incontinent rappeler ses gés de cheual qui chassoyent ceux qu'ilz auoyent rompus, & leur cōmanda qu'ilz allassent chocquer les gés de pied des ennemis qui estoient en bataille, & ce pendant luy mesme s'en alla courant soustenir ceux qui combatoyent pour gagner les mottes. Si prit un pavois sur son bras, & passant à trauers ceulx de derriere, feit tant qu'il penetra iusques aux premiers, ausquelz sa presence redoubla tellement la force & le courage, que les ennemis cuiderēt que ce fussent autres combatās tous frais & de cueur & de corps, qui les uinsent de nouueau recharger: & neātmoins encore sousteindrēt ilz

deux ou trois charges : mais à la fin uoyans que ceulx la pouloyent tousiours uigoureusement en auant contremont, & dauantage que leurs gens de cheual estoient retournez de la chasse, ilz leur quitterent la place, & se retirerent en reculant pas à pas en arriere. Ainsi Pelopidas ayant gagné les mottes, s'arresta sur la cyme, regardant l'armee des ennemis, laquelle n'estoit point encore tournée en fuite à ual de roupte, mais branloit desia & estoit en grand desarroy. Si ietta sa ueuë ça & là tout à l'étour pour uoir sil apperceuroit point Alexandre, & finalement il le choisit parmy les autres en la poincte droite de sa bataille, qui taschoit à rallier & asseurer ses gens: & l'ayant apperceu il ne peut avec la raison maistriser sa cholere, ains s'estant son courroux enflammé pour l'auoir ueu, il abandonna & sa personne & la cõduitte de son entreprise à son ire, se iettant bien loing deuant tous ses gens, en criant & appellant à haulte uoix le tyran au combat. Le tyrã ne l'attendit pas, ny ne se presenta pas pour le combattre, ains s'en fouit cacher en la troupe de ses gardes : & quãd à ses souldards, les premiers qui cuiderent faire testé à Pelipodas, furent par luy mis en pieces, & en demourerēt plusieurs morts sur le champ: mais les autres se ralliãs en troupe serree, & luy donnans de loing de grands coups de piques, luy faulserent son corps de cuirace, & le blecerent en l'estomac, iusques

à ce que les Theſſaliens ayans pitié de le uoir ainſi malmener, accoururent de deſſus les mortes celle part pour le ſecourir : mais il eſtoit ia tumbé par terre quand ilz y arriuerét : & adonc eulx avec les gens de cheual enſemble feirent un ſi grand effort, qu'ilz tournerét toute la bataille des ennemis en fuitte, & les pouſuyans iuſques bien loing de là couvrirét toute la plaine de morts: car ilz en tuerét plus de trois mille. Or n'eſt-ce pas grande merueille, ſi les Thebains qui ſe trouuerent à ceſte mort de Pelopidas en furent fort deſplaiſans, & en demenerent grand dueil, l'appellans leur pere, leur ſauueur & leur maïſtre, comme celuy qui leur auoit enſigné les plus belles & les plus honorables choſes que les hommes ſçauroyent apprendre. Mais les Theſſaliens & autres alliez & confederez de Thebes, outre ce qu'ilz ſurpaſſerét par leurs edicts & decrets publiques, qu'ilz feirent à la louange de ſa memoire, tout l'honneur qui pourroit eſtre deu à la plus excellente uertu humaine, demonſtrerét encore plus leur amour & affection enuers luy par les regrets qu'ilz en feirent, & le grand dueil qu'ilz en menerent : car on dit que ceux qui ſe trouuerent à ceſte bataille, ne deſpouillerent leurs armes, ne deſbriderent leurs cheuaults, ny ne feirent penſer leurs playes, quand ilz ouirét la nouvelle de ſa mort, qu'ilz ne fuſſent premierement allez aupres du corps, encore tout chauld qu'il eſtoit

du combat, amassans à l'entour à grands monceaux les despouilles des ennemis, comme s'il en eust eu quelque sentiment, & qu'ilz n'eussent en signe de dueil tōdu & eulx & leurs cheuaulx, & si y en eut encore plusieurs qui apres qu'ilz se furent retirez en leurs tentes & pavilions, ne uoulurent allumer feu, ny boire ny manger, & y eut par tout le camp un triste & morne silēce, cōme s'ilz n'eussēt pas gaigné une tresbelle & tresglorieuse uictoire, ains eussent esté desfaits & asserruis par le tyran. Puis quand la nouvelle de ceste mort fut espadue par le pais, les officiers de chasque uille par ou le corps auoit à passer avec les ieunes hommes, les enfans & les presbtres allerent au deuant pour le receuoir honorablement, en portant des representatiōs de trophées, des couronnes, & des armes de fin or. Et quand ce uint aux funerailles qu'il fallut enleuer le corps, les plus anciens & plus notables personnages d'entre les Thesaliens s'adresserent aux Thebains, & les prierent de leur permettre qu'ilz le peussent eulx mesmes inhumer, & y en eut un d'entre eulx

» qui porta la parole en ceste maniere: Seigneurs
 » Thebains noz bōs amis & alliez, nous uous re-
 » querōs unē grace, qui nous tournera à hōneur,
 » & ensemble nous reconfortera aucunement
 » en une calamité si grande: car nous ne pou-
 » uons plus iamais accōpagner Pelopidas uiuant,
 » né luy payer les honneurs qu'il a meritez de

» nous en façon qu'il les sente, mais si uous nous
 » faittes ce bien de nous permettre que nous
 » puissions manier son corps avec noz propres
 » mains, l'ensepuelir & accoustrer nous mesmes
 » à ses obseques, au moins nous sera il aduis que
 » uous croirez ce que fermemēt nous croyōs, que
 » la perte est plus griefue & plus grande pour les
 » Thessaliens, qu'elle n'est pour les Thebains: car
 » uous y auez perdu un bō Capitaine, mais nous
 » n'y auōs pas perdu un bō Capitaine seulement,
 » ains aussi l'esperance du recouurement de no-
 » stre liberté: car comment uous ozerons nous
 » plus enuoyer demander autre Capitaine, quand
 » nous ne pourrons uous rendre Pelopidas? Ces
 » prieres ouyes les Thebains leur ottroyerent ce
 » qu'ilz demandoyent: & me semble qu'il ne
 » sçauroit estre de plus honorables ny plus ma-
 » gnifiques funerailles que furent celles la, au
 » moins à ceulx qui mesurent la dignité, la splen-
 » deur & magnificence, non aux ornemens d'y-
 » uoire ny de pourpre, cōme fait Philistus, qui tāt
 » exalte & magnifie l'enterrement de Dionysius
 » le tyran de Syracuse, qui fut l'issue de sa tyran-
 » nie, comme la cōclusion pompeuse d'une gran-
 » de tragedie. Et Alexādre le grand à la mort d'E-
 » phestion feit tondre non seulement les crins des
 » cheuaulx & des mulets, mais aussi feit raser les
 » creneaux des murailles des uilles, à fin qu'il sem-
 » blast que les murailles mesmes portassent le
 » dueil de ceste mort, en prenant au lieu de leur

forme premiere comme un habit de dueil, & une rasure portant indice de douleur & de regret. Mais toutes telles choses sont commandemens de seigneurs faits par force & par contrainte, lesquelz n'engendrent qu'enuie contre la memoire de ceulx pour qui elles se font, & haine de ceulx qui sont contraints malgré eulx à les faire, & ne portent point tesmoignage d'honneur ny de bienueillance, ains plus tost font monstre d'une pompe, arrogance & uanité barbaresque, qui employe son autorité, & la superfluité de ses biés en choses friuoles, & qui ne font aucunement à desirer: là ou un simple hōme priué, mort en pais èstrāger, ou il n'auoit ny femme, ny parents, ny enfans, estant à ses funerailles conuoyé, porté & couronné par tant de peuples & de uilles, faisans à l'enuy l'un de l'autre, à qui plus honoreroit sa memoire, sans que personne les en requist, & encore moins les y contraignist, à bon droit semble auoir atteint à la cyme de l'heur & de la uraye felicité humaine: car la mort des hōmes heureux n'est point tresgriefue, comme disoit *Æsope*, ains est tresheureuse, attendu qu'elle met en seureté les prosperitez & les beaux actes des gens de bien, laissant la fortune uarier & se chāger à son plaisir. Et pourtant parla mieulx, à mon iugement, un Lacedæmonien, qui caressant un bon uieillard *Diagoras*, lequel auoit luymesme emporté autrefois le pris des ieux Olympiques, & si

auoit ueu courōner, comme uictorieux, esdicts
ieux ses enfans, & les enfans de ses enfans, tant
de ses filz que de ses filles, luy dit : Meurs toy
maintenant, Diagoras, car ia ne monteras tu pas
au ciel. Mais les uictoires de ces ieux Olympi-
ques & Pythiques, qui les mettroit toutes en-
semble, ne sont pas à comparer à l'une seule de
tant de batailles que Pelopidas a combatues &
gaignees, ayant usé la plus part de ses iours en
honneur & en dignité, & finablement les ayant
acheuez estant gouuerneur de la Bœoce pour
la trezieme fois, qui estoit l'honneur supreme
de son païs, ayant occis parmy cela les tyrans,
qui opprimoyent la liberté des Thebains, &
estant mort en combatant uaillamment pour
le recourement de celle des Thessaliens. Mais
si sa mort fut desplaisante aux alliez de Thebes,
elle leur fut encore plus profitable: car incont-
inent que les Thebains en eurent la nouuel-
le, ilz n'en dilayerent aucunement la uengean-
ce, ains despescherent incontinent une armee
de sept mille hommes de pied, & de sept cents
cheuaults sous la conduite de Malcitas & de
Diogiton, lesquels trouuans Alexandre batu, &
aiant perdu la plus part de ses forces, le contrai-
gnirent de rendre aux Thessaliens les uilles
qu'il tenoit d'eulx, & de laisser les Magnesiens,
Phthiotes & Achæiens en leur liberté, retirant
& ostât les garnisons qu'il auoit mises es fortes
places, & quand & quād de promettre & iurer

que de lors en auant il marcheroit soubs les Thebains, cōtre tel ennemy qu'ilz le uoudroyēt mener, ou contre qui ilz luy commanderoyent d'aller. Et quant aux Thebains, ilz se contenterent de ces conditions la : mais ie ueulx dauantage reciter la peine que les Dieux tātost apres luy feirent payer pour la mort de Pelopidas, lequel comme nous auōs touché cy dessus, auoit premieremēt instruiēt Thebe sa femme, qu'elle ne deuoit point craindre l'apparence exterieure, ny la puissāce de la tyrannie, encore qu'elle fust entre des satellites armez, & parmy des bannis, que le tyran entretenoit pour sa garde : d'autre costé elle craignant sa desloyauté & haïssant sa cruaulté, conspira sa mort avec ses freres, qui estoient trois, Tisiphonus, Pytholaus & Lycophon, & executa sa conspiration en ceste maniere : Tout le demourant du palais ou se tenoit le tyran estoit plein de gardes & de soudards, qui faisoient le guet toute la nuict aupres de sa personne : mais la chambre ou ilz auoyent accoustumé de coucher estoit au plus hault estage : à la porte de laquelle y auoit un chiē attaché, qui faisoit le guet & estoit terrible à tout le monde, ne cognoissant personne que eulx deux tous seuls, & un ualet qui luy donnoit à manger. Quand donc elle uolut mettre la main à l'œuure pour mettre à execution son desseing, elle teint tout un iour ses freres enfermez dedans une chambre assez

pres de la leur, & puis la nuit uenue s'en alla seule, comme elle auoit accoustumé, en la chambre de Alexandre, qui dormoit desia, & bien tost apres en sortit, commandant au ualet qu'il emmenast le chien quelque part arriere de là, pource que son mary uouloit reposer à son aise & sans bruit. Or mōtoit on en celle chābre par une eschelle seulement, laquelle elle deual-la: & de peur que ses freres en montant ne feissent bruit, elle la couurit & fourra de laine premier que de la deualer. Les ayant ainsi tirez à mont avec leurs espees, & mis deuant la porte, elle rentra en la chambre la premiere, & osta l'espee du tyran qui estoit attachee au dessus de son cheuet, qu'elle leur monstra, ayant pris ce signe avec eulx, pour leur donner à entendre quand il seroit espris de sommeil, & qu'il dormiroit. Les ieunes hommes se trouuerēt estonnez, & restiuerent un petit quand ce uint au faict & au prendre, dont elle se courroucea aigrement à eulx, en les appellant hōmes lasches, attendu que le cueur leur failloit ainsi au besoing: & quand & quand leur iura en cholere, qu'elle mesme iroit esueiller le tyrā, & luy decouueroit toute la coniuration: tellement que partie de hōte, & partie de crainte, elle les contraignit d'entrer & approcher du liēt tenāt elle mesme la lāpe pour leur esclairer: & adonc l'un d'eux le prit par les pieds, qui les luy serra estroitement: l'autre luy réuersa la teste en arriere en le

tenant par les cheueux : & le troisieme le tua à coups d'espee . Ainsi mourut il plus soudainement, à l'adventure, & plus promptement qu'il ne deuoit: mais au demourant, pour la maniere dont il fut tué, ainsi comme ses meschâcetez & malheuretez auoyent merité: car ce a esté le premier tyran occis par la conspiration de sa propre femme : & aussi pour les oultrages que lon feit à son corps apres sa mort : car les habitans de Pheres , apres l'auoir bien trainné par toute la uille, & foullé aux pieds, le ietterent à la fin, & l'abandonnerent à manger aux chiens.



M A R C E L L V S .



M A R C V S Claudius, ce-
 luy qui fut cinq fois Con-
 sul à Rome, estoit filz
 d'un autre Marcus, à ce
 que lon dit : mais il fut le
 premier de sa maison sur-
 nommé Marcellus, qui
 uault autant à dire, comme martial & belli-
 queux, ainsi comme escrit Posidonius, pource
 qu'il estoit adroit aux armes, experimenté au
 faict de la guerre, fort & dispos de sa personne,
 prompt à la main, & aimant de sa nature à com-
 battre : mais il ne monstroit ceste aspreté & ar-
 deur de combatre, qu'à la guerre contre l'enne-
 my seulement : car au demourant ses meurs es-
 toyēt fort douces & fort attrépees. Il aima les
 disciplines & lettres Grecques iusques à hono-
 rer & estimer seulement ceux qui en sçauoyent :
 car au reste les affaires l'engarderēt d'y pouuoir
 uaquer, & de s'y exercer autant comme il eust
 bien desiré : pource que fil y eut onques hom-

mes aufquelz Dieu,ainfi que dit Homere , feift

- 20 Vfer en guerre & en fanglans eftours
- 20 Leurs ieunes ans iufques à leurs uieux iours, ce furent les nobles & les principaulx hommes Romains de ce fiecle la, qui en leur ieunefse eurent à combatre contre les Carthaginois en la Sicile, en leur fleur d'age contre les Gaulois, pour empescher qu'ilz n'occupaffent toute l'Italie, & en leur uieilleffe contre Hannibal & contre les Carthaginois,encore uné autre fois: car ilz ne iouirent point du priuilege de l'age, qui les difpenfoit d'aller à la guerre, comme les autres communs citoyens, pour leur uieilleffe: ains furent contrains, tant pour leur nobleffe, que pour leur experience & uailance, d'accepter les charges & conduittes des armees que le Senat & le peuple leur commeirent. Or quât à Marcellus, il n'y auoit forte de combat à laquelle il reculaft, ny à laquelle il fust peu exercité: mais encore eftoit il plus affeuré au combat d'homme à homme en camp clos, qu'il n'estoit en nulle autre: au moyen dequoy il ne refufa iamais ennemy qui le desfiaft,ains occit fur le champ tous ceulx qui le prouoquerent. En la Sicile il sauua la uie à son frere Otacilius qui en une rencontre auoit esté porté par terre: car il le couurit de son escu,& tua ceulx qui luy couroyent fus pour l'acheuer d'occire: à raifon defquelles prouesses, eftant encore ieune, il eut des Capitaines, fous lesquelz il alloit à la guer-

re, plusieurs couronnes, & autres pris d'honneur qui se donnent aux uailans hommes. Et comme il continuast à monstrier sa ualeur tousiours de plus en plus, le peuple l'eleut *Ædile* du nombre de ceulx qui sont les plus dignes & plus honorables: & les presbtres le creerent *Augur*, qui est à Rome une sorte de presbtrise, à laquelle la loy dōne l'authorité d'obseruer & considerer le uol des oiseaux pour en deuiner & prognostiquer les choses à aduenir. Mais en l'annee de ceste siene *Ædilité*, il fut contraint d'appeller en iustice & accuser malgré luy, un sien compagnon en cest office nommé *Capitolinus*: lequel estant homme temeraire, dissolu & desordonné en sa uie, deuint amoureux du filz de *Marcellus* qui auoit nom comme son pere, & le pria de son deshonneur sur le point qu'il estoit en la fleur de son adolescence, non moins regardé, prisé & estimé de tout le monde pour estre honeste & bien appris, que pour estre beau filz. Or pour la premiere fois il reietta à par soy les prieres & poursuittes de ce *Capitolinus* sans en parler à personne: mais quand il ueit qu'il y retournoit encore une autre fois, il le dit & declara à son pere, lequel en estant griefuement indigné, comme le cas le meritoit, l'en defera & accusa deuant le Senat. *Capitolinus* du commencement allegua plusieurs exceptions & subterfuges pour ne point comparoir, & à la fin en appella deuant les Tribuns du

peuple , lesquelz declarerent qu'ilz ne receuoyent point son appel, & ne uouloyent point prendre cognoissance du faict. Ainsy estant à la fin contraint de respondre deuant le Senat, il nia le faict tout à plat, pource qu'il n'y auoit point de tesmoings qui eussent ouy les paroles: à l'occasion dequoy le Senat fut d'aduis de faire uenir en personne le ieune garson: lequel sestant representé deuant le Senat se prit à rougir & à plorer tout ensemble. Le Senat uoyant en luy une uergongne meslee avec des larmes, & un despit qui ne se pouuoit appaiser, sans plus oultre chercher d'autre preuue, teint le cas pour tout adueré, & condamna sur le champ Capitolinus en une somme d'argent pour l'amende: des deniers de laquelle Marcellus feit faire des uases d'argent, pour seruir aux sacrifices, lesquelz il dedia & consacra au seruice des Dieux. Or estant la premiere guerre que les Romains eurent contre les Carthaginois acheuee au bout de uingt & deux ans qu'elle auoit duré, incontinent apres leur recommença de nouveau une autre guerre contre les Gaulois: car les Insubriens, peuple uenu de la Gaule & habitant au pied des monts des Alpes du costé d'Italie, combien qu'ilz fussent forts & puissans d'eulx mesmes, appelloyent neantmoins encore à leur aide les autres Gaulois qui habitoient dela les monts, & en faisoient uenir de grosses armées de ceulx mesmement qui ont

accoustumé d'aller à la soude de qui plus leur donne, que lon appelle Gessates. Si me semble que ce fut chose merueilleuse, & de grand heur pour les Romains, que ceste guerre Gauloise ne uint point à se rompre du temps que celle des Carthaginois duroit encore, & que les Gaulois, comme si par maniere de dire, ilz eussent iuré de combatre à leur tour contre celuy des deux peuples, qui demoureroit uainqueur, attendirent loyaulment & de bonne foy, sans se bouger, iusques à ce qu'ilz eussent acheué, pendant que les Romains & les Carthaginois se batoyent ensemble, & puis fallerent attacher aux uainqueurs, quand ilz n'eurent plus à faire à d'autres. Ce neantmoins l'assiette de leur pais faisoit grand effroy aux Romains pour estre de si pres leurs uoifins, pource qu'ilz auoyent la guerre à leurs portes, à propos parler: aussi faisoit l'ancienne reputation des Gaulois, que les Romains ont ce semble plus redoubté & plus craint, qu'autre nation quelconque, pource que ce furent eulx qui anciennement prirent la ville de Rome: depuis laquelle prise il fut fait une ordonnance, que de lors en auant les prestres & gens de religion seroyent dispensez & exempts d'aller à la guerre, excepté quand les Gaulois s'esleueroient. Les preparatifs aussi qu'ilz feirent alors pour ceste guerre, tesmoignerent assez la crainte qu'ilz en eurent: car on tient que iamais au parauant ny onques depuis,

il n'y eut tant de milliers de Romains naturelz en armes tout à un coup, qu'il y eut ceste fois la . Dauantage la nouvelle cruaulté dont ilz userent en leurs sacrifices en fait foy aussi: car au parauant ilz n'auoyent iamais accoustumé d'y faire rien qui fust estrange, ny qui teinst du barbare, ains auoyent les opinions fort douces & humaines quant aux cerimonies de la religion, & conformes à celles des Grecs touchant le seruice des Dieux: mais lors ilz furent contrains d'obeir à quelques oracles & propheties anciennes, qu'ilz trouuerent escriptes es liures de la Sibylle, & enterrerent tous uifz dedans le marché aux bœufs deux Grecs, un homme & une femme, & semblablement aussi deux Gaulois: ausquelz iusques auiourdhuy ilz font encore au mois de Nouembre quelques secrets anniuersaires qu'il n'est pas loisible de uoir à tout le monde. Or es premieres rencontres de ceste guerre, il y eut de grandes uictoires & de grandes pertes aussi pour les Romains, mais pour cela n'en fut point la guerre assopie, ny reduitte à une fin asseuree. Et l'annee que Flaminus & Furius furent Consuls, & despeschez avec grosses & puissantes armées pour aller faire la guerre aux Insubriens, qui sont les Milanois, il uint nouvelles à Rome que lon auoit ueu une riuere de la Romagne toute rouge de sang, & que lon auoit aussi ueu tout à un coup en la uille de Rimini trois Lunes: ioint que les

presbtres & deuins qui auoyent obserué & consideré les presages des oiseaux au iour que ces deux auoyent esté eleus Consuls , affermoÿét qu'il y auoit eu erreur en leur creation, & qu'ilz auoyent esté indeuëment eleus contre les signes & prognostiques des oiseaux . Parquoy le Senat leur escriuit incontinent au cãp, & les rappella à fin qu'ilz se uinsent eulx mesmes deposer du Consulat , auant qu'ilz attentassent de faire aucune chose comme Consuls à l'encontre des ennemis . Le Consul Flaminius receut bien les lettres à temps , mais pource qu'il estoit sur le poinct de dõner une bataille , il ne les uolul point ouurir qu'il n'eust premierement desfait les ennemis , & couru leur pais, comme il feit: mais aussi quand il retourna à Rome, encore que ce fust avec quantité grande de butin , le peuple ne uolul point aller au deuãt de luy, pource qu'il n'auoit pas promptement obeï aux lettres qu'on luy auoit escriptes, ny ne s'en estoit incõtinent retourné, ainsi qu'on luy auoit mandé, ains en auoit fait audacieusement à sa fantasia sans point s'en soucier, de maniere qu'il s'en fallut bien peu que lon ne luy refusast totalement l'honneur du triumphe : car tout aussi tost que son triumphe fut acheué, on le contraignit de renoncer son Consulat , & le rendit on homme priué avec son compagnon: tant les Romains estoient en cela religieux, qu'ilz uouloyent que toutes choses se

referassent à la grace & au bon plaisir des Dieux, ne permettans point que lon mespri-
 fast les obseruations & predictions des deuins,
 ny les us & coustumes anciennes, quelque feli-
 cité & prosperité qui en deust aduenir : pource
 qu'ilz estimoyent estre plus expedient pour le
 bien de leur chose publique, que leurs officiers
 & magistrats eussent en reuerence les cerimo-
 nies du seruice des Dieux, que qu'ilz uainquis-
 sent en bataille leurs ennemis. Et pourtant Ti-
 berius Sempronius, personnage qui fut autant
 honoré & estimé des Romains, tant pour sa
 bonté que pour sa prouesse, que nul autre de
 son temps, estant une annee Consul en nomma
 & declara deux autres pour l'estre l'annee en-
 suyuant, Scipion Nasica & Caius Martius : les-
 quelz en ayans pris possession, & estans ia allez
 es prouinces qui leur estoient escheutes par le
 sort, Sempronius par cas d'adventure prit en
 main quelques petits liures, ou estoient som-
 mairement escrites les regles appartenantes
 aux cerimonies des sacrifices publiques, & en
 les lisant y trouua une obseruance dont il n'a-
 uoit iamais ouy parler. L'obseruance estoit, que
 quand un magistrat f'estoit assis hors de la uille
 en quelque tente ou maison loee, pour y con-
 templer & obseruer les presages des oiseaux,
 & que par quelque occasion suruenâte il estoit
 contraint de soy retirer dedans la uille, auant
 que les oiseaux eussent donné aucuns signes
 certains,

certains , il falloit à la seconde fois quand il retournoit pour acheuer ses obseruations , qu'il laissast la tente ou maison premierement loee, & qu'il en prist une autre pour recommencer de nouueau à y faire ses contemplations. Tiberius n'ayant pas sceu cela , s'estoit par deux fois serui d'une mesme maison , & auoit là dessus nômé & déclaré ces deux Consuls successeurs : mais depuis ayant cogneu sa faulte, il la feit entendre au Senat, lequel ne uoulut point mettre à nonchaloir une si legere omission , ains en escriuit aux nouueaux Consuls, lesquels incontînēt quitterent leurs prouinces & s'en retournerent à Rome promptement , ou ilz se deposerent de leurs estats . Cela fut quelque temps depuis : mais enuiron ce mesme temps duquel nous escriuons presentement , il y eut deux presbtres de bien nobles maisons, & bien notables personnages , l'un nommé Cornelius , & l'autre Cethegus , qui tous deux furent priuez de leur presbtrise, pour auoir failly à bailler les entrailles de l'hostie immolee par ordre , ainsi qu'ilz deuoyent. Et Quintus Sulpitius, pource qu'en sacrifiant, le chapeau sacerdotal, que portent ceulx que lon appelle Flamines , luy tomba de dessus la teste, fut deposé de sa prelatüre . Et comme Minutius Dictateur eust nommé pour maistre de la cheualerie Caius Flaminius, il en fut destitué , & mis un autre en sa place, pour autant qu'en l'instant que le Dictateur le

nomma, on ouit le bruit d'une souris . Et combien qu'ilz fussent ainsi soigneux de garder estroittement une si exquise diligence, mesmement en choses si legeres , ce n'estoit point pource qu'il y eust de la superstitiō meslee parmy, ains estoit à fin que lon ne transgressast aucun poinct de toutes les anciennes institutions & ceremonies de leur pais . Mais pour retourner à nostre histoire, quand Flaminius se fut luy mesme deposé de son Consulat, Marcellus fut substitué en son lieu par ceulx que lon appelle Entre-roys:& entré qu'il en fut en possession, il eleut pour son compagnon Cneus Cornelius, là ou lon dit que les Gaulois inclinans à uouloir faire appointment, & le Senat Romain mesme estant bien content d'entendre à la paix, Marcellus irrita le peuple, & le disposa à uouloir plus tost la guerre. Ce nonobstant la paix fut bien faite pour lors, mais incontinent apres les Gaulois Gessates renouellerent la guerre: car ilz passerent les monts des Alpes en nombre de bien trente mille combatans, & se uindrent ioindre aux Insubriens, qui estoient plusieurs fois autant : au moyen dequoy le cueur leur estant creu, ilz allerent incontinent mettre le siege deuant la uille d'Acerres, qui est assise sur la riuere du Po, durant lequel siege leur Roy Briomatus prenant dix mille Gessates, alla courir & piller le plat pais d'alentour du Po . Ce qu'entendant Marcellus laissa son

compagnon avec tous les gens de pied armez, & le tiers de la cheualerie, au camp pres d'Accherres, & luy avec le reste des gens de cheual, & six cents hommes de pied des plus legerement armez, se meit en chemin pour aller trouver les ennemis, sans reposer ne iour ne nuict, iusques à ce qu'il eut attainct ces dix mille Gessates aupres d'un bourg de la Gaule de deça les monts, qui se nomme Clastidion, qui de nagueres estoit en l'obeissance des Romains. Si n'eust pas loisir de reposer ny refaire un peu ses gens, pource que les Barbares sceurent incontinent sa uenue, & le teindrent pour ia tout desconfit, à cause qu'il auoit bien peu de gens de pied: & quant à sa cheualerie, les Gaulois ne la mettoyent en aucun compte, car outre ce qu'ilz sont fort bons hommes d'armes, & qu'ilz ualent plus en cela qu'en nulle autre sorte de combat, encore passoyent ilz de beaucoup lors en nombre ceulx de Marcellus: & pource marcherent incontinent droit à luy d'une grande fureur & avec terribles menaces, comme si d'arriuee ilz eussent deu foudroyer tout. Leur Roy marchoit le premicr deuant toutes ses troupes. Et Marcellus craignant qu'ilz ne l'enueloppassent & ne l'environnassent par derriere, pource qu'il estoit en si petit nombre, estendit le plus qu'il peut les ailes de sa gendarmerie, pour embrasser plus de país, de maniere que les deux poinctes

uenoyent à estre fort gresles , iusques à ce qu'il fut bien pres des ennemis. Et comme ia il estoit prest à se mettre au galop pour aller chocquer, il aduint que son cheual effroyé du bruit & de la brauerie des ennemis, se tourna, & emporta Marcellus en arriere en despit qu'il en eust : mais luy craignant que les Romains ne prissent superstitieusement cela à mauuais presage, & n'en entraissent en quelque frayeur, qui leur troublast l'entendement, tirant la bride à main gauche, luy fait soudainement retourner la teste deuers l'ennemy, & en mesme instant adora le Soleil, comme si ce n'eust pas esté par accident qu'il eust tournoyé, ains expressement pour cest effect, à cause que les Romains ont accoustumé de faire ainsi un tour, quand ilz saluent & adorét les Dieux: & sur le poinct que la meslee commença, il fit uœu à Iupiter Feretrien de luy offrir les plus belles armes que les ennemis eussent, s'il demouroit uainqueur. Et à l'heure mesme le Roy des Gaulois l'ayant apperceu, se doubta bien à uoir les marques & enseignes qu'il auoit, que ce deuoit estre le Chef des ennemis : si lancea son cheual bien loing deuant sa troupe droit à luy, en luy criant un cry de desfiance, que c'estoit à luy qu'il en uouloit, & branlant une grosse iaueline de barde qu'il portoit en la main. C'estoit le plus bel homme & le plus grand de tous les Gaulois, & si auoit son harnois tout doré & argenté, & tant enri-

chy de toutes sortes d'ouurages & de couleurs, qu'il en reluisoit comme l'esclair : parquoy Marcellus ayant ietté sa ueuë sur toute la batail le des ennemis, & n'y ayant point apperceu de plus belles armes que celles de ce Roy, iugea incontinent que c'estoit donques celuy, contre lequel il auoit fait sa priere & son uœu à Iupiter. Si picqua droit à luy, & luy donna un tel coup de iaueline, aidant la force & la roideur de la course du cheual, qu'il luy faulsa sa cuirace, & le porta par terre, non encore mort pourtant, mais il redoubla soudain deux ou trois coups, dont il l'acheua de tuer, puis se ietta aussi tost à bas de dessus son cheual, & en touchant les armes du mort, leua les yeux au ciel en disant: O Iupiter Feretrien, qui regardes du ciel & diriges les haults faicts d'armes & les prouesses des Capitaines, ie t'appelle à tesmoing, commè ie suis le troisieme Capitaine Romain, qui estât Chef d'armee ay desfait & occis de ma propre main le Roy & Chef de l'armee des ennemis, & te promets offrir & dedier les plus belles & les plus riches despouilles des ennemis, pour ueu qu'il te plaise nous donner pareille fortune au demourant de ceste guerre. Cela fait & dit, les hommes d'armes Romains commencerent à se mesler parmy les Gaulois gens de cheual & gens de pied pesle mesle : car ilz n'estoyent point separez à part les uns des autres, & feirent en sorte qu'ilz y gagnerent une ui-

toire singuliere, pour la façon qui en fut estrange & merueilleuse, pource qu'il ne fut iamais ueu ny au parauant ny depuis, que si peu de gens de cheual desfeissent si grand nombre d'hommes d'armes & de gens de pied meslez ensemble : & apres en auoir occis la plus grande partie, & auoir gaigné leurs despouilles & leur entiere destrouffe, il s'en retourna deuers son compagnon, qu'il trouua faisant la guerre aux Gaulois assez malheureusement, deuant la plus grande uille & la plus peuplee qu'ilz eussent, que lon nomme Milan, & que les Gaulois de deça les monts tiennent pour leur cité Metropolitaine, c'est à dire, capitale & dont toutes les autres ont esté deriuees & fondees : à l'occasion dequoy, ilz faisoient tout le deuoir à eulx possible pour la defendre, & tenoyent le Consul Cornelius autant assiegé, comme luy eulx. Mais si tost que Marcellus fut de retour, les Gessates qui entendirent comme leur Roy Briomatus auoit esté tué en bataille, s'en retournerent en leur pais, & la uille de Milan fut prise : apres laquelle toutes les autres se rendirent sans se faire battre, & les Gaulois se soubmirent entierement eulx & leurs biens à la discretion des Romains, qui leur ottroyerēt la paix sous equitables & raisonnables cōditions. Pour lesquelles conquestes, le Senat decerna l'honneur du triumphe à Marcellus seul, & fut ce triūphe en richesse, en multitude de despouilles, en

nombre de beaux & grands hommes prisonniers, & en toute autre sumptuosité & magnificence aussi admirable & aussi digne de uoir, que autre qui eust onques esté : mais ce qui y fut le plus agreable à regarder pour la nouveauté, fut Marcellus portant luy mesme à Iupiter sur ses espaulles la despouille entiere du Roy barbare, qu'il auoit occis : car il auoit fait couper un chesneau de montagne hault & droit, qu'il accoustra en forme de trophee, en y attachant & pendant à l'entour par ordre toutes les pieces du harnois qu'il auoit conquis : puis quand toute la monstre de son triumphe fut acheminee, luy mesme chargea le chesneau sur ses espaulles, & monta dessus son chariot triumphal, & alla ainsi par toute la uille portant ce trophee en triumphe, qui fut la plus belle representation, & le plus honorable spectacle, qui comparust en toute celle monstre. Son armee suyuoit apres le chariot chantant des hymnes & chants de uictoire à la louange des Dieux & de leur Capitaine : puis quand il eut trauersé toute la uille iusques au temple de Iupiter surnommé Feretrien, il y planta & dedia son trophee. C'est le troisieme & le dernier des Capitaines Romains iusques à nostre aage, à qui cest honneur soit escheut. Car le premier qui ait ainsi fait offrandre à Iupiter des armes du Chef des ennemis, fut le Roy Romulus qui gagna celles d'Acron le Roy des Cæniniés : le second fut

Cornelius Cossus, qui desfeit Tolumnius Capitaine general des Thoscans : & le troisieme, Marcellus, qui occit de sa propre main Briomarus Roy des Gaulois, & depuis luy n'est aduenu cest heur à nul autre. Le Dieu auquel se consacre & se dedie ceste sorte de despouilles s'appelle Iupiter Feretrien, ainsi surnommé, comme escriuent aucuns, pource qu'on luy porte ce trophée, suyuant la deriuation de ceste parole Grecque, FERIN, qui signifie porter, pource qu'en ces premiers temps la il y auoit encore beaucoup de dictions Grecques meslees parmy le langage Latin. Les autres ueulent dire, que c'est un des surnoms de Iupiter, qui signifie autant comme foudroyant, pource que FERIRE en langage Latin, signifie frapper : & y en a qui disent, que c'est proprement blecer à coup de main en la guerre, car encore au iourd'hui les Romains quand ilz chargent leurs ennemis en bataille, ou qu'ilz les poursuyuent fuyans, ilz crient l'un à l'autre pour s'entredonner courage, FERI FERI, qui uault autant à dire comme, Tue Tue : & les despouilles que lon oste aux ennemis s'appellent generalement Spolia : mais celles que les Capitaines ostent aux Capitaines des ennemis apres les auoir occis, s'appellent particulièrement Spolia Opima. Toutefois il y en a qui disent, que le Roy Numa Pompilius en ses commentaires, fait mention de Despouilles

Opimes, premieres, secondes & tierces, commandât que les premieres gaignees soëyt cōsacrees à Iupiter Feretrien, les secōdes à Mars, & les tierces à Quirinus : & que celuy qui auroit gaigné les premieres, eust pour sa recompense ^a trois cents Asses, le secōd, deux cets, & le troisieme, cent : mais neantmoins la commune opinion & la plus receuë est, que les Despouilles Opimes, sont les premieres gaignees, là ou il y a bataille rengee, & que c'est le Chef de l'armee qui les oste au Chef des ennemis apres l'auoir occis de sa propre main . mais à tant auõs nous suffisammēt parlé de ce propos . Au demourât, les Romains furent si ioyeux de ceste uictoire, & de l'issue de ceste guerre, qu'ilz feirēt forger du butin que lon y auoit gaigné une coupe d'or massif, du pois de cent marcs, qu'ilz enuoyerent en offrande au temple d'Apollo Pythien en la uille de Delphes, pour luy en rendre graces, & feirent aussiliberalemēt part des despouilles à leurs alliez, iusques à en enuoyer grã de quãtité à Hierõ Roy de Syracuse qui estoit leur amy & confederé . Quelque temps apres estant Hannibal entré en Italie, Marcellus fut enuoyé auec une armee de mer en la Sicile : & depuis estant aduenue la desconfiture de Canes, en laquelle il mourut tãt de milliers de Romains, & s'en sauua bien peu de uistesse, qui s'enfouirent en la uille de Cannusium, on s'atrendoit bié que Hannibal ayant desfait la fleur

a Ce sont
en uiron
trente c-
scus.

de la force des Romains , ne faudroit pas de tirer droit à Rome. Marcellus enuoya premiere-ment de dessus ses uaisseaux mille cinq cents hommes pour aider à garder la uille : & depuis ayant receu un mandement du Senat , s'en uint à Cannusium , là ou il prit ceulx qui festoyent illec sauuez & ralliez apres la bataille perdue, & les tira hors des places en la campagne pour la defendre . Or auoyent lors esté les meilleurs Capitaines qu'eussent les Romains pour la plus part tuez en diuerses batailles , & de ceulx qui leur estoient demourez , Fabius Maximus estoit celuy que lon tenoit pour le plus homme de bien , & le plus sage , mais encore se plaignoit on qu'il n'estoit pas homme d'execution , & qu'il auoit faulte de hardiesse , pource qu'il pesoit trop toutes choses pour ne rien perdre , & ne mettre rien en hazard : & disoit on qu'il estoit bien bon Capitaine pour defendre , mais non pas pour assaillir . Au moyen dequoy on eut recours à Marcellus , & iugea lon , qu'il falloit mesler sa hardiesse & sa uiuacité actiue avec la craintiue prouoyance & sagesse de l'autre : & à ceste cause les elisoit on quelques annees tous deux ensemble Consuls , ou bien les enuoyoit on l'un Consul , & l'autre Proconsul , chascun à son tour , la part ou estoient les affaires : & suyuant ce propos Posidonius escrit , que les Romains appelloyent alors Fabius Maximus leur bouclier , & Marcellus leur espee ,

Et Hannibal mesme disoit qu'il craignoit Fabius Maximus comme son gouuerneur, & Marcellus comme son aduersaire, pource que l'un le gardoit de mal faire aux autres, & l'autre luy en faisoit à luymesme. Tout premiere-ment donques apres ceste grande uictoire de Cannes, les gens de Hannibal estans deuenuz si audacieux, & si desbauchez & dissolus, que sans plus craindre rien ilz tenoyent les champs, & sescartoyent bien loing de leur camp, Marcellus courant sus à ceulx qui s'esloignoient ainsi, les mettoit tous en pieces, & alloit de tant plus diminuant tousiours les forces de son ennemy. Et puis il secourut les uilles de Naples & de Nole, là ou il confirma les Napolitains, qui estoient d'eulx mesmes bien affectionnez aux Romains, en la bonne deuotion qu'ilz auoyent: & entrant dedās Nole, il y trouua une seditiō entre le Senat & le peuple, pource que le Senat ne pouuoit uenir à bout de la commune, qui à toute force uouloit tenir le party de Hannibal, à cause qu'il y auoit en la uille un gentilhomme nommé Bandius, tresnoble entre les siens, & fort uaillant homme de sa personne, lequel ayant tresbien fait son deuoir en la bataille de Cannes, apres auoir occis plusieurs Carthaginois, fut à la fin luymesme abbaru par terre, & trouué entre les morts tout detailé de coups: à raison dequoy Hannibal estimant grandemēt sa prouesse, non seulement le

laissa aller sans payer rençon , mais dauantage
 luy donna de beaux presents, & le feit son ho-
 sté & son amy . Parquoy Bandius estant de re-
 tour en sa maison , pour luy rendre la pareille,
 ne faillit pas à estre l'un de ceulx qui plus affe-
 ctueusement fauorisoient aux affaires de Han-
 nibal, & qui plus enhortoit le peuple de Nole à
 se tourner de son costé : toutefois Marcellus e-
 stima que ce seroit peché contre les Dieux , de
 faire mourir un personnage qui auroit donné
 si notable preuue de sa uaillance , & qui auroit
 couru la fortune des Romains en leurs plus
 grands affaires & leurs plus grands dangers : a-
 uec ce qu'il estoit de douce & humaine natu-
 re, encore auoit il une grace de sçauoir attraire
 & gagner les cueurs des personnes par cour-
 toisie . Au moyen dequoy , l'estant cestuy Ban-
 dius un iour allé uoir & saluer , Marcellus luy
 demanda qui il estoit , combien que de long
 temps il le cogneust assez , pour seulemēt auoir
 occasion d'entrer en propos avec luy . L'autre
 luy respondit, qu'il estoit Lucius Bandius. Et a-
 donc Marcellus, mōstrāt d'en estre tout esiouy
 » & esbahy: Comment, dit il , & es tu donc celuy
 » Bandius duquel on parle tant à Rome , & que
 » lon dit qu'il feit si bien son deuoir en la iour-
 » nee de Cannes , & qu'il n'abandonna iamais le
 » Consul Paulus Æmylius , ains receut sur son
 » propre corps plusieurs coups qui estoient ad-
 » dressez à luy ? Bādius respondit, que c'estoit luy

uoirement: & luy monstra sur sa personne plu-
 sieurs cicatrices des coups qu'il y auoit receuz.
 25 Et Marcellus luy repliqua : Dea, ueu que tu a-
 30 uois de si euidentes & si notables marques de
 35 la bonne uoulunté & amitié que tu nous por-
 40 tes, comment ne t'en uenois tu incontinent
 45 uers nous? penfes tu que nous soyons si lasches
 50 & si ingrats, que nous ne ueillions dignement
 55 remunerer la uertu de noz amis, laquelle est
 60 honoree mesme des ennemis? Apres luy auoir
 usé de ces gracieuses paroles, & l'auoir embras-
 sé & caressé, il luy feit present d'un bon cheual
 de seruice pour la guerre, & luy donna^a cinq
 cents drachmes d'argét:& depuis ce iour la, ia-
 mais ce Bandius n'abandóna les costez de Mar-
 cellus, ains luy feit tousiours par tout tresloya-
 le & fidele compagnie, se monstrant tres aspre
 à rechercher, descourir & accuser ceulx qui en
 sa uille tenoyent party contraire, lesquels es-
 toyent en grand nombre, & auoyent conspi-
 ré entre culx, que le premier iour que les Ro-
 mains sortiroyent aux champs pour aller faire
 quelque course sur les ennemis, ilz leur clor-
 royent la porte à la cueuë, & saccageroyét tout
 leur bagage. Quoy entendu Marcellus ordon-
 na ses gens en bataille au dedans de la uille pres
 des portes, & à leur cueuë rengea aussi les som-
 miers qui portoyent leur bagage:& au demou-
 rant à son de trompe feit faire defense sur peine
 de la uie à ceulx de la uille, que nul ne fust si

a Cinq-
te escus.

ozé ne si hardy que d'approcher des murailles, Cela fut cause que Hānibal s'en tira pres, quād il ueit qu'il ne comparoissoit personne dessus les murailles en armes, & s'approcha en assez mauuais ordre, pource qu'il cuida qu'il se fust emeu quelque mutinerie au dedās entre le peuple & la noblesse: mais ce pendant Marcellus feit ouurir la porte, pres de laquelle il estoit, & sortāt soudain avec les meilleurs hōmes d'armes qu'il eust, l'alla charger de frōt: & incōtinēt apres sortirēt aussi les gēs de pied par une autre porte, courās droit à luy avec grāds cris & grād bruit: pour ausquelz faire teste, Hānibal fut contraint de departir sa troupe en deux: mais ainsi qu'il les departoit, fut soudainemēt ouuerte une troisieme porte, par laquelle sortit le demourāt des Romains, qui s'allerent ruer de tous costez sur les Carthaginois ia tous estōnez & effroyez pour ceste soudaine saillie, dont ilz ne se doubtoyēt point, de sorte que ia à male peine pouuās soustenir ceux qu'ilz auoyēt sur les bras, quand ilz ueirent ce nouveau réfort, & ceste derniere surcharge, ilz furēt cōtrains de se retirer. Ce fut la premiere fois que les gēs de Hannibal commencerēt à ceder aux Romains, qui les rébarrent avec grand nombre de morts & de blecez iusques dedans leur camp: car aucuns escriuent qu'il en demoura bien cinq mille morts sur le champ, & qu'il n'en mourut pas plus de cinq cents de la part des Romains: toutefois Titus

Liuius n'affirme pas que la desconfiture fust si grosse : mais il dit bien que celle rencontre apporta grande gloire à Marcellus, & un merueilleux courage aux Romains apres tant de pertes qu'ilz auoyent faittes les unes sur les autres : pource qu'ilz commencerent lors à croire, qu'ilz n'auoyent point affaire à un ennemy totalement inuincible & impassible, ains qu'il pouuoit bié aussi quelquefois souffrir perte & receuoir dommage. A raison dequoy estant enuiron ce temps la decedé l'un des Consuls, le peuple feit appeller Marcellus absent pour le substituer en son lieu, & malgré les autres magistrats differa la subrogation, iusques à ce qu'il fust uenu du camp : & ne fut pas plus tost arriué qu'il fut esleu au lieu du defunct par toutes les uoix & suffrages du peuple : toutefois ainsi que lon procedoit à ceste election, il tonna à bon esciant : ce que les presbtres & deuins iugerent estre sinistre presage : mais toutefois ilz n'osoyent pas l'empescher ouuertement ny s'opposer à son election, pource qu'ilz craignoient le peuple : mais luy mesme se depoula uoluntairement, & quitta le Cōsulat, & pour cela toutefois ne fut point exempt de la guerre, ains fut créé Procōsul, & cōuoyé au cāp à Nole, là ou il se meit à chastier & endommager ceux qui tenoyēt le party de Hānibal : lequel en estāt aduertý y accourut en toute diligence pour les secourir, & d'arriuee luy presenta la batail-

Ie, que Marcellus ne uoulut pas lors accepter; mais il espia son occasiõ, que Hãnibal auoit enuoyé une bõne partie de son armee fourrager, ne s'attendant plus d'auoir de bataille, & adonc luy alla courir sus ayant distribué à ses gens de pied de longues iauelines, dont on use es combats de marine, & leur ayât enseigné à en frapper de loing, sans les lascher de la main, les Carthaginois, qui ne sçauoyent point ietter ny darder les leurs, ains combatoyent de iauelots courts à coups de main seulemēt. Cela fut cause què tous ceux qu'il chargerent alors, furent contraints de monstrier le dos aux Romains, & qu'ilz fouirent à ual de rouverte, de maniere qu'il en demoura cinq mille de morts sur le champ, & y eut quatre Elephants tuez aussi, & deux pris uifs, & qui plus est, trois iours apres ceste bataille il y eut bien enuiron trois cents hommes de cheual, partie Hespagnolz, & partie Numidiens, qui se uindrent rendre aux Romains. Ce qui n'estoit point encore aduenü à Hannibal, ains auoit continuellement par si long temps entretenu en bonne uniõ & loyale con corde une armee barbaresque, composee de tant de diuerses & differentes nations: mais ces trois cents demourerent tousiours depuis fideles iusques au bout à Marcellus & aux autres Capitaines, qui apres luy eurent charge des armees Romaines. Quelque temps apres Marcellus ayant esté esleu Consul pour la troisieme fois,

fois, s'en alla en la Sicile, pource que les uictoires & prosperitez de Hannibal auoyent donné cueur aux Carthaginois de uouloir reconquerir de rechef celle isle, mesmement pource que apres la mort du tyran Hieronymus, il se-
 estoit esmeu quelque tumulte à Syracuse: à l'oc-
 casion dequoy les Romains des auparauat y auoyent aussi enuoyé une armee & un Præteur
 nommé Appius, des mains duquel Marcellus ayât receu l'exercite, il y eut un grand nombre de
 bourgeois Romains, qui le uindrent supplier de leur uouloir estre en aide en leur calamité,
 laquelle estoit telle: De ceulx qui eschapperent à la bataille de Cannes, les uns se sau-
 uerent de uistesse, les autres furent faits prisonniers en si grand nombre, qu'il sembloit
 qu'il n'en fust pas demouré assez pour garder les murailles de Rome seulement: & neant-
 moins ce peu de ceulx qui estoient demourez, eurent le cueur si bon & si grand, qu'ilz ne
 uoulurent onques rachepter les prisonniers que Hannibal leur abandonnoit à bien petite
 rençon, ains feirent un decret, qu'ilz ne seroyēt point racheptez, & souffrirent que les uns fus-
 sent tuez, les autres uendus esclauues hors de l'Italie: & qui plus est, ilz enuoyerēt ceulx qui se-
 estoient sauuez à fouir, en la Sicile, avec defense qu'ilz n'eussent à mettre le pied en Italie, durāt
 le tēps qu'ilz y auroyent la guerre contre Hannibal. Ceulx la se uindrent tous ensemble icter

aux piedz de Marcellus, si tost qu'il fut arriué,
& se prosterner en terre deuant luy, en le sup-
pliant de leur donner lieu honeste, & loy de
combatre pour la chose publique, en luy pro-
mettât avec cris, pleurs & larmes, qu'ilz feroyēt
uoir par effect, que la rouverte qu'ilz auoyent en-
duree à Cannes, estoit aduenue plus tost par
malheur que par faute de cueur. Parquoy Mar-
cellus ayant pitié d'eulx, escriuit au Senat en
leur faueur, priant qu'on luy permist de réplir
les bendes de son armee, à mesure qu'elles uien-
droyent à se desgarnir, de ces pauvres hommes
la. Il y eut plusieurs raisons allegues pour &
contre ceste requeste: mais finablement il fut
conclu & resolu par le Senat, que la chose pu-
blique n'auoit que faire du seruice d'hommes
lasches comme femmes: toutefois si d'aduentu-
re Marcellus s'en uouloit seruir, qu'il ne luy
fust loisible de donner à aucun d'eux, quelque
acte de prouesse qu'ilz feissent, des couronnes
ou autres pris d'honneur, que les Capitaines ont
accoustumé de donner aux gens de bien, & qui
font bien leur deuoir. Ce decret du Senat des-
pleut fort à Marcellus, lequel à son retour
de la Sicile en fait ses plaintes & doleances en
plein Senat, remonstrant qu'on luy auoit fait
tort de ne luy permettre pas ceste grace, que
pour tant de bons & grands seruices faits à la
chose publique, il peust restituer l'honneur à tāt
de leurs pauvres citoyens. Mais pour lors estāt

en la Sicile, il receut quelques torts & iniures de Hippocrates Capitaine general des Syracusains, lequel pour gratifier aux Carthaginois, & par leur moyen se faire seigneur absolu de Syracuse, feit mourir plusieurs citoyés Romains: à l'occasion dequoy Marcellus alla mettre le siege deuant la uille des Leontins, & l'ayant emportee d'assault, ne feit aucun desplaisir aux naturelz habitans & bourgeois de la uille: mais quand aux traistres qu'il y trouua, qui s'en estoÿt fouis de son cãp pour se rendre aux enemis, il les feit tous fouetter & pēdre puis apres. Ce neantmoins Hippocrates feit premieremēt courir le bruit à Syracuse, que Marcellus auoit fait mettre à l'espee tous les Leontins indifferemment iusques aux enfans, & puis suruenant là dessus en l'effroy & tumulte de ceste faulse alarme, il se saisit facilement de toute la uille. Quoy entendant Marcellus se partit des Leontins avec toute son armee, & alla planter son camp tout au plus pres de Syracuse, dedans laquelle il enuoya de ses ambassadeurs pour remonstrer à la uerité aux habitans, ce qui auoit esté fait en la uille des Leontins, au contraire de ce qu'on leur auoit donné à entendre: mais tout cela ne seruit de rien, pource qu'ilz ne le creurent pas, à cause que Hippocrates y estant le plus fort, les auoit gaignez. Parquoy il commença adonc à faire approcher & assaillir la uille de tous costez, tãt par terre q̃ par mer. Ap-

pius conduisoit ceulx qui assailloyent par terre: & luy avec soixante galeres à cinq rames pour banc bien armées, & pleines de toutes sortes de traicts & d'armes de geët, assailloit du costé de la mer, & uoguoit contre la muraille, ayant fait dresser sur une liaison de huit galeres iointes ensemble, une grosse machine & engin de baterie, pour rompre la muraille, se confiant en la grande multitude de ses engins de baterie, & de toute autre prouision necessaire à la guerre qu'il auoit, & aussi en sa reputation. Mais Archimedes ne se soucioit point de tout cela, comme aussi n'estoit ce rien aupres des engins qu'il auoit inuentez, non que luy en feist autrement cas ny compte, ne qu'il les eust faits cōme des chefs d'œuure pour monstrier son esprit: car c'estoyent pour la plus part ieux de la Geometrie, qu'il auoit faits en s'esbatant par maniere de passetemps, à l'instance du Roy Hieron, lequel l'auoit prié de reuoquer un petit la Geometrie de la speculation des choses intellectiues à l'action des corporelles & sensibles, & faire que la raison demonstratiue fust un peu plus euidente & plus facile à cōprendre au commun peuple, en la meslant par experience materielle à l'utilité de l'usage. Car cest art d'inuenter & dresser instrumēs & engins, qui s'appelle la Mechanique ou Organique, tant aimée & prisee de toutes sortes de gens, fut premierement mise en auāt par Architas & par Eudoxus, en par-

rie pour resiouir & embellir un peu la science de la Geometrie par ceste gétillese, & en partie aussi pour estayer & fortifier par exemples d'instrumens materielz & sensibles, aucunes propositions Geometriques, dont on ne peut trouuer les demonstratiōs intellectiues par raisons indubitables & necessaires, comme est la proposition, qui enseigne à trouuer deux lignes moyenes proportionales, laquelle ne se peut prouuer par raison demonstratiue, & neantmoins est un principe & fondement necessaire à beaucoup de choses qui se mettēt en portraiture. L'un & l'autre l'a reduitte à la manufacture de quelques instrumens qui s'appellent Mesolabes ou Mesographes, qui seruent à trouuer ces lignes moyenes proportionales, en tirant certaines lignes courbes & sections trauesantes & obliques. Mais depuis s'estant Platon courroucé à eulx, en leur maintenant qu'ils corrompoyent & gastoyent la dignité, & ce qu'il y auoit d'excellent en la Geometrie, en la faisant descendre des choses intellectiues & incorporelles aux choses sensibles & materielles, & luy faisant user de matiere corporelle, ou il faut trop uilement & trop bassement employer l'œuure de la main: depuis ce temps la, dis-ie, la Mechanique ou art des ingenieurs, uint à estre separee de la Geometrie, & estant longuement tenue en mespris par les Philosophes, deuint l'une des arts militaires. Mais Archime-

des ayant un iour proposé au Roy Hieron, duquel il estoit parent & familier amy, qu'il estoit possible de remuer avec tant & si peu de force que lon uoudroit, tel pois & tel fardeau que l'on presenteroit : & s'estant vanté, à ce que lon dit, sur la confiance de la force des raisons, dont il prouuoit ceste proposition, que sil y eust eu une autre terre, il eust peu remuer ceste cy en passant en l'autre; le Roy Hieron s'en esmerueillant, le pria de uouloir mettre en faict ceste proposition, & luy en faire uoir quelque experience, en luy monstrant quelque grosse masse & lourd fardeau remué par une debile force. Si accrocha l'une des grosses carraques du Roy, pour laquelle tirer en terre hors de l'eau, il fallut beaucoup d'hommes, encore y eurent ilz bien de l'affaire, & y fait mettre dedans grand nombre de personnes oultre sa charge ordinaire: & luy seul de loing estant assis à son aise, sans s'efforcer aucunement, en tirant tout bellement avec la main, le bout d'un engin à plusieurs roues & plusieurs poulies, la fait approcher de soy, coulant aussi doucement & aussi uniment, comme si elle eust flotté & couru sur la mer. Dequoy le Roy s'esbahissant, & cognoissant par ceste preuue la grâde force de son art, le pria de luy faire quelque quantité d'engins, tant pour assaillir que pour defendre en toutes façons de sieges & d'assaults: ce que Archimedes luy fait, toutefois le Roy Hieron ne s'en seruit

onques, pource qu'il passa la plus part de son re-
gne sans guerre en paix : mais celle prouision
& munition d'engins se trouua lors tout à pro-
pos pour les Syracusains , & non seulement la
prouision des engins tous faits , mais aussi l'in-
genieur mesme qui les auoit inuentez . Quand
donques ceulx de Syracuse ueirét les Romains
uenir de deux costez à l'assault , ilz se trouue-
rent bien estonnez , & n'y auoit celuy qui dist
un tout seul mot , tant ilz estoient espris de
frayeur, ne cuidans pas qu'il fust possible de re-
sister à l'effort d'une si grosse puissance : mais
quand Archimedes uint à desflascher ses engins,
tout à un coup infinis traiçts de toutes sortes, &
des pierres grosses à merueilles uolerét en l'air,
avec un bruit & une roideur incroyable, cõtre
les gens de pied , qui uenoyent du costé de la
terre à l'assault , renuersans & brisans tous ceux
qui se trouuoient au deuant , ou à l'endroit au-
quel elles tumboyent , sans qu'il y eust corps
d'homme qui peust resister à si grande impe-
tuosité , ny soustenir un si grand faix, de manie-
re que tous leurs rens en estoýét troublez . Et
quant aux uaisseaux qui assailloyét du costé de
la mer , les uns estoient mis à fond par de lon-
gues pieces de bois , comme sont les uerges ou
lon attache les uoiles des nauires, qui estoient
soudainement iettees en auant de dessus la mu-
raille avec des machines , & puis à force de pe-
ser enfondroyent les galeres au fond de la mer :

les autres enleuees tout debout par les prouës avec des mains de fer & des crochets faits en maniere de becs de grue, plôgeoyent des poupes en la mer: les autres saisies par dedans, avec engins tendus au contraire l'un de l'autre, qui leur faisoÿt faire la pirouette en l'air, uenoyent à se briser & froisser contre les rochers estans au pied de la muraille, non sans grande perte & meurtre des personnes qui estoÿent dessus, & bié souuent y en auoit de tout poinct enleuees hors de l'eau, qui faisoÿent horreur à les regarder seulement ainsi suspendues & tournoyantes en l'air, iusques à ce que les hōmes de dedans estans iettez & lancez ça & là par le tournoyemēt, à la fin elles uenoyēt toutes uuides à se briser contre les murailles, ou bien à retumber en la mer quand la prise des engins se laschoit. Or quand à la machine que Marcellus faisoit approcher sur une liaison de galeres ioinctes ensemble, elle s'appelloit Sambuca, pour la semblance de forme qu'elle a avec l'instrument de Musique du mesme nom, qui est une harpe: & comme elle estoit encore assez loing, il faillit de dessus la muraille une grosse pierre du pois de dix quintaux, puis une seconde apres, & puis une troisieme coup sur coup, lesquelles uenās à dōner dedans celle machine avec un tonnerre & une tempeste merueilleuse, en froisserent toute la base, & desmēbrerent & despecerēt la liaison des galeres qui

la soustenoyent , tellement que Marcellus ne sachant ou il en estoit , fut contraint de se retirer luy meisme uistement en arriere, & enuoyer aussi commander la retraite à ceulx qui assailloyent du costé de la terre . Si fut tenu conseil pour aduiser ce qui estoit à faire , & fut arresté que le lendemain matin auant qu'il fust iour , on approcheroit sil estoit possible de la muraille , pource que les engins d'Archimedes qui estoient roides & fort tendus , enuoyeroient par ce moyen les coups de leurs pierres & de leurs traicts par dessus leurs testes , & de pres luy deuiédroyent de tout poinct inutiles, pour n'auoir pas l'espace & la distance de la portee qui leur falloit : mais Archimedes s'estoit de longue main préparé à cela , ayant fait provisions d'engins , dont la portee estoit proportionnee à toutes distances, les traicts courts, les coches non gueres longues , force trous & archeres pres l'une de l'autre en la muraille , ou il y auoit force arbalestes de courte chasse pour assener de pres, assises en lieux que les ennemis ne les pouuoient uoir de dehors . Parquoy quand ilz se cuiderent approcher pensans estre à couuert , & que lon ne les ueist point , ilz furent tous esbahis qu'ilz se trouuerent de rechef accueillis d'infinis coups de traict , & accablez de pierres , qui leur tomboyent à plomb dessus les testes : car il n'y auoit endroit de la muraille d'ot on ne leur en tiraist : à raison dequoy il leur

fut force de soy retirer de rechef arriere de la muraille: mais quand encore ilz en furent esloignez, les flesches, pierres & traicts qui uoloyēt de tous costez, les alloient trouuer & assener iusques là ou ilz estoyent escartez au loing: de maniere qu'il y en eut beaucoup affolez, & beaucoup de leurs uaisseaux cōquassez & froissez, sans qu'ilz peussent en reuence aucunement endommager leurs ennemis, à cause que Archimedes auoit dressé la pluspart de ces engins à couuert, & derriere, non pas dessus la muraille: tellemēt qu'il sembloit que les Romains fussent combatus par quelques Dieux, tant ilz receuoient de dommage & de maulx, & si ne uoyoit on point d'ou ne par qui. Toutefois Marcellus en eschappa à sauueté, & se moquant de ses ouuriers & des maistres ingenieurs qu'il auoit en son camp, leur disoit, Ne uoulons nous point cesser de faire la guerre^a à ce Briareus Geometrien icy? qui en se iouant a plongé & enfondré noz nauires en la mer, a rechassé honteusement noz sambuques, & à surpassé tous les geans à cent mains, dont les fables des Poētes font mentiō, tant il nous a desflasché de traicts, de pierres & de flesches tout à un coup. Car à la uerité aussi tous les autres Syracusains estoyent comme le corps & les membres de tout l'equippage d'Archimedes, & luy seul en estoit l'ame qui mouuoit & remuoit le total, estans lors toutes autres armes à repos, & les

a Ce lieu
est corrō-
pu au tex
te Grec,
& le fault
restituer
du 8. liu.
de Poly-
be, d'ou
Plutar-
que l'a
pris.

siens seules employees tant pour assaillir que pour defendre. Finablement Marcellus uoyant ses gens si effroyez, que si seulement ilz apperceuoyent le bout d'une corde, ou de quelque piece de bois qui se monstrest sur la muraille, ilz s'en fouyoyent courans, & crians que c'estoit Archimedes qui uouloit desflascher quelque machine contre eulx, il se deporta de plus approcher, ny de faire plus donner d'assaults à la muraille, se deliberant de tascher à l'auoir par longueur de siege. Et neantmoins Archimedes a eü le cueur si hault, & l'entendement si profond, & ou il y auoit un tresor caché de tant d'inuentions Geometriques, qu'il ne daigna iamais laisser par escript aucun œuure de la maniere de dresser toutes ces machines de guerre, pour lesquelles il acquit lors gloire & renommee non de science humaine, mais plus tost de diuine sapience: ains reputant toute celle science d'inuenter & composer machines, & generalement tout art qui apporte quelque utilité à la mettre en usage, uile, basse & mercenaire, il employa son esprit & son estude à escrire seulement choses dont la beauté & subtilité ne fust aucunement meslee avec necessité. Car ce qu'il a escript sont propositions Geometriques, qui ne reçouyent point de comparaison à autres quelles qu'elles soyent, pource que le subiect qu'elles traittent combat avec la demōstration, leur

donnant le subiect la beaulté & la grandeur, & la demonstration, la preuue si exquise qu'il n'y a que redire, avec une force & facilité merueilleuse: car on ne scauroit trouuer en toute la Geometrie de plus difficiles ny plus profondes matieres escriptes en plus simples & plus clairs termes, & par plus faciles principes que sont celles qu'il a inuentees. Ce que les uns attribuent à la uiuacité & dexterité de son entendement, qui de nature estoit ainsi aisé: les autres le referent à un trauail extreme, avec lequel il facilitoit tant ces choses, qu'il sembloit qu'elles ne luy eussent rien cousté à faire: car il n'y a homme qui de soy mesme peust inuenter la demonstration de ses propositions quelque peine qu'il employast à la chercher: & neantmoins soudain que lon l'a entendue & comprise, chacun prend ceste opinion de soy mesme, qu'il l'eust bien trouuee, tant il conduit aiseement, & par une uoye plaine & unie, ce qu'il prent à demonstrier. Pourtant me semble fort uraysemblable ce que lon dit de luy, qu'il estoit si fort espris & rauy de la douceur & des attraiçts de ceste Sirene, laquelle estoit, par maniere de dire, logee chez luy, qu'il en oublioit le boire & le manger, & le reste du traitement de sa personne, de sorte que bien souuent ses seruiteurs le trainnoyent par force au baing pour le lauer, oindre & estuuer, là ou encore dedans les cendres du foyer il traçoit quelques figures

Geometriques . Et pendant que lon le oignoit d'huiles de senteurs, il tiroit avec le doigt des lignes dessus son corps nud : tant il estoit transporté hors de soy en ecitase du plaisir qu'il prenoit à l'estude de la Geometrie, & ueritablement rauy de l'amour des Muses . Mais entre plusieurs belles choses qu'il a inuentees, il semble qu'il estimoit le plus la demonstration de la proportion qu'il y a entre le Cylindre, c'est à dire, la coulonne ronde, & la sphère ou boule dedans contenue, pource qu'il pria ses parents & amis, que quand il seroit mort, ilz feissent mettre dessus sa sepulture un Cylindre contenant une sphère massifue, avec une inscription de la proportion, dont le contenant excede le contenu . Estant donques tel Archimedes, il conserua tant qu'en luy estoit, soy & sa uille inuincible . Mais pour retourner à Marcellus, durant le siege de Syracuse, il prit la uille de Megares en Sicile l'une des plus anciennes qui soit en toute l'isle : & si prit dauantage le camp d'Hippocrates aupres d'Aciles, ou il tua plus de huit mille hommes, les surprenant ainsi comme ilz estoient apres à se loger & à fortifier leur camp : puis il courut une bonne partie de tout le plat pais de la Sicile, faisant rebeller les uilles qui tenoyent le party des Carthaginois, & en toutes rencontres qu'il eut, desfeit tousiours ceulx qui fozerent presenter en bataille deuant luy. Depuis il aduint qu'il suprit un Ca-

pitaine Lacedæmonien nommé Damippus ainsi qu'il sortoit de Syracuse par mer : les Syracusains le desirans rachepter, l'enuoyerent requerir de le mettre à rençon : sur laquelle rençon il fut parlementé par plusieurs fois, & estendit on expressement ceste pratique en plusieurs assignations, tant qu'il eut bien considéré une certaine tour, laquelle n'estoit pas gueres soigneusement gardee, & dedans laquelle on pouuoit secrettement mettre quelque nombre de gens, pource que la muraille de la uille en cest endroit la n'estoit pas gueres difficile à monter. Parquoy apres qu'il eut bien coniecturé la haulteur de la ditte tour par en estre souuent approché, & auoir par plusieurs fois parlementé tout aupres, il feit prouision d'eschelles, & prit l'occasion d'une feste que les Syracusains celebroyent en l'honneur de Diane, & n'entendoyent ce iour la qu'à boire, iouer & faire grande chere : de sorte, que non seulement il se saisit de la tour, ains emplit toute l'enceinte des murailles de ses soudards armez auant qu'il fust iour, & feit abbatre le portail de la uille que lon nomme Hexapyle. Et ainsi que les Syracusains ayans senty la surprise, commenceoyent ia à fésimouuoir, il feit de tous costez sonner les trompettes : ce qui effroya si fort les Syracusains, qu'ilz se prirent tous à fouis, cuidans que toute la uille entierement fust desia prise, là ou il y auoit encore

le plus beau , le plus grand & le plus fort quartier de la uille, nommé l'Achradine , qui ne l'estoit point, pource qu'il est emmuré, & se ferme contre le reste de la uille, qui est diuisé en deux autres parties, dont l'une s'appelle la Ville neuue, l'autre s'appelle la Fortune. Lesquelles deux parties estans gaignees, Marcellus au poinct du iour y entra par le portail d'Hexapyle : & comme ses Capitaines luy dissent , qu'il estoit bienheureux d'auoir ainsi facilement pris une si belle uille , lon dit, que luy regardant & considerant la grâdeur & beaulté d'icelle, se prit à larmoyer, pour la compassion qu'il eut de ce qu'il preueoit en deuoir aduenir , pensant en soy mesme comment elle changeroit bien tost de forme , quand elle seroit toute pillée & saccagée par son armée : car il n'y auoit Capitaine qui eust osé dire de non aux soudards qui en demandoient le pillage: encore y en auoit il plusieurs, qui uouloyent à toute force que lon la bruslast & rasast entierement: mais Marcellus n'en uolul pas seulement ouy parler , car encore leur conceda il bien enuis & contre sa uolunté, qu'ilz peussent faire leur profit des biens & des esclauces, leur defendant au demourant de toucher aucunement aux personnes libres , & de n'occire, oultrager, uioler ne prendre esclau aucun des Syracusains. En quoy, combien qu'il se portast si modereement & si doucement, si est-ce qu'il luy faisoit encore mal de uoir

une tant belle uille reduitte à si malheureux terme, & ne se pouuoit tenir de monstres parmy la ioye qu'il sentoit de la uictoire, la pitié & compassion qu'il auoit de ce qu'il fattendoit bien de uoir en un instant tant de biens & une si plantureuse opulence dissipée & reduitte à neant. Car on dit que la richesse qui fut lors enleuée au sac de Syracuse, n'estoit pas moindre que celle de Carthage, qui depuis, non gueres long temps apres, fut saccagée, pource que ce qui restoit à prendre de la uille, fut aussi semblablement pris par trahison bien tost apres, & pillé par les soudards bon gré mal gré que lon en eust, exceptez les biens & les finances des Roys, qui furent mises à part pour estre portees au tresor publicque à Rome. Mais il n'y eut rien en ceste prise de Syracuse, qui tât despleust à Marcellus, comme fait l'inconuenient d'Archimedes, lequel estoit d'adventure en son estude, là ou il cherchoit en luy mesme la demonstration de quelque proposition Geometrique, dont il en auoit tiré le portraict, & y ayant du tout fisché non seulement sa pensee, mais aussi sa ueüe & ses yeux, il n'auoit point entendu le bruit des ennemis qui couroyent par la uille, & moins encore la surprise d'icelle. Si fut tout esbahy qu'il ueit aupres de luy un soudard qui luy dit, qu'il sen uinst quand & luy parler à Marcellus. Archimedes luy respondit, qu'il attendist iusques à ce qu'il eust acheué sa proposition,

sition, & reduitte en demonstration, dequoy le
 soudard se courrouceant desguaina son espee,
 & le tua. Les autres disent, que le soudard Ro-
 main d'arriuee luy presenta la pointe de l'espee
 pour le tuer, & que Archimedes l'ayant sou-
 dain apperceu, le requit qu'il uoulust attendre
 un petit, à fin que ce qu'il cherchoit ne demou-
 rast point imparfaict & sans demonstration: le
 soudard ne se soucia point de sa speculation, &
 le tua. Encore y en a il qui le comptent en une
 troisieme maniere, disans que quelques sou-
 dards le rencontrèrent par les rues, ainsi qu'il
 alloit porter à Marcellus quelques instruments
 de Mathematique dedans une queffe, comme
 sont horologes au Soleil, Spheres, Angles, avec
 lesquelz on mesure à la ueuë la grandeur du
 corps du Soleil, & cuidans que ce fust or ou ar-
 gent, ou quelque autre precieux meuble qu'il
 portast en ceste queffe, le tuerent. Mais bien
 est il certain, que Marcellus en fut fort desplai-
 fant, & qu'il eut en horreur & ne uolulut iamais
 uoir le meurtrier qui le tua, comme un homme
 maudit & excommunié, & qu'ayant trouué de
 ses parents, il les caressa & honora pour l'a-
 mour de luy. Or estoient bien pour lors les
 Romains estimez des autres nations, hommes
 entendans comme il falloit conduire une guer-
 re, & estoient bien tenus pour bons comba-
 tans & dangereux à rencontrer: mais d'equité,
 de clemence & d'humanité, & à brief parler de

toute autre uertu ciuile & pacifique, ilz n'auoyent encore fait uoir aucuns exemples aux nations estrangeres iusques à Marcellus, qui lors monstra par effect aux Grecs, que les Romains estoyent plus iustes qu'eulx: car il traitta si humainement ceulx qui eurent lors à faire à luy, & feit tant de graces aux particuliers, & aux uilles entieres, que si d'adventure il y eut adonc quelque chose moins que humainement faite en la uille de Enna, ou à Megares, ou contre les Syracusains, ce fut plus tost par la coulpe de ceulx mesmes qui en souffrirent le dommage, que par ceulx qui le leur feirent: & pour en faire foy i'en reciteray un seul exemple entre plusieurs: Il y a une uille en la Sicile qui se nōme Engyium: elle n'est pas grande, mais fort ancienne & bien renommee pour l'apport qu'il y a, à cause de l'apparition de certaines Deesses qui y sont reclamees, & que lon appelle les Meres. Lon dit que les Candiots ont premierement fondé & edifié le temple qui y est, & y mōstre lon des lances & des armets de cuyure, sur lesquelz il y a le nom de Meriones, & sur d'autres celuy de Vlysses en escript, qui sont consacrez aux Deesses. Ceste uille fauorisoit fort opiniastrement aux Carthaginois: & Nicias le premier homme d'icelle faisoit tout ce qu'il pouuoit au contraire, pour les en diuertir & les faire tourner du costé des Romains, parlant franchement & à la descouuerte en toutes

les assemblees de conseil, en remonstrant par uifues raisons, que ses aduersaires qui conseilloyent la contraire, failloyēt bien lourdement au preiudice de la chose publique : au moyen dequoy ses aduersaires craignans son autorité & sa puissance, conspirerent entre eulx de le saisir au corps, & le liurer entre les mains des Carthaginois: dont Nicias ayant senty quelque uent, & apperceuāt bien que lon l'espioit pour le prendre, usa d'une telle fourbe pour s'en sauuer: C'est qu'il sema en public quelques propos fascheux, & fait plusieurs choses contre l'honneur & contre l'apparition, que lon croyoit pour chose toute certaine, de ces Deesses, disant que c'estoit tout abus, & qu'il n'y falloit point adiouster de foy. Ses ennemis furēt bien aises de ces propos, estimans que la commune incontinent iugeroit, que luy mesme se seroit procuré les maulx qu'ilz pretendoyent luy faire souffrir. Vn iour donques qu'ilz auoyent assigné entre eulx pour le saisir au corps, il aduint que lon teint assemblee de uille, en laquelle Nicias harengua deuant le peuple, conseillant & suadant quelque chose : mais ainsi qu'il fut au milieu de son propos, il se laissa tumber tout de son long contre la terre, dequoy l'assistance se trouua bien esbahie, cōme lon peut penser: toutesfois personne ne bougea, & quelque espace de temps apres, il leua un peu la teste & la tourna ça & là avec une uoix foible & tremblante,

qu'il alloit peu à peu renforçant & haulfant, iufques à ce qu'il ueit toute l'assistance du peuple esprise de frayeur & d'horreur, sans que personne ozaft dire mot : & adonc iettant sa robe & deschirant son saye, il se leua sur ses piedz à demy nud, & s'en courut uers la porte du theatre en criant que les Deesses Meres le tourmentoyent : personne ne luy oza toucher ny se mettre au deuant de luy, pour la superstitieuse frayeur qu'ilz auoyent, pensans que ce fust une punition diuine : au moyen dequoy, il luy fut aisé de gagner la porte de la uille, & s'en foudir, & onques puis ne fait geste, ny ne dit parole d'homme qui semblaft forsenné ny possédé de maling esprit. Sa femme qui s'entendoit avec luy, & luy aidoit à conduire sa trame, s'alla premierement prosterner aux piedz des Deesses Meres en leur temple, comme leur suppliante : & depuis faignant uouloir aller chercher son mary, qui comme homme hors de son bon sens couroit les champs, elle sortit de la uille avec ses petits enfans, sans que personne luy donnast empeschement. ainsi se retirerent ilz tous ensemble sans danger deuers Marcellus à Syracuse. Depuis les Engyeniens feirent tant d'insolences & tant de folies, qu'à la fin Marcellus y alla, qui les fait tous prendre & lier comme pour en faire la punition puis apres : mais Nicias s'en uint deuers luy, qui en luy embrassant les genoux, & luy baifant les mains,

avec les grosses larmes aux yeux, le supplia de uouloir auoir pitié de ses pauures citoyens, commenceant à ceulx qui estoient ses plus grands ennemis. Ceste bonté de Nicias attendrit le cueur à Marcellus, de sorte qu'il leur pardonna à tous, sans faire aucun dommage à la uille, & dōna à Nicias plusieurs terres, oultre plusieurs autres beaux & riches dons qu'il luy feit. Posidonius le philosophe l'escript ainsi en son histoire. Au demourant Marcellus estant rappelé par les Romains, pour la guerre qu'ilz auoyēt dedans leur païs & à leurs portes, s'en retourna emportant quand & luy la plus grande partie des plus beaux tableaux, peintures, statues & autres telz ornemens qui fussent à Syracuse, en intention d'en embellir son triumphe, & puis apres en parer & orner la uille de Rome, laquelle au parauant n'auoit ny ne cognoissoit rien d'exquis ny de singulier en telz ouurages: car ceste poliffure, & ceste grace & gentillesse d'ornemens de peinture & de sculpture n'y estoit point encore entree, ains estoit seulement pleine d'armes barbaresques, de harnois & de despouilles toutes souillees de sang, & couronnee de trophées, & de monuments des uictoires & triumphe gaignez sur diuers ennemis, qui n'estoyent point spectacles plaisans, ains plus tost effroyables à uoir, ny propres pour spectateurs tendres & delicats: ains plus tost, comme Epaminondas appelloit la plaine de la

Bœoce, l'eschaffault ou Mars iouoit ses ieux: & Xenophon appelloit la uille d'Ephese, la boutique de la guerre: aussi me semble il que lon eust peu lors appeller la uille de Rome, le temple de Mars guerroyant, ainsi que dit Pindarus. Et pourtant en acquit Marcellus encore de tant plus la bonne grace & la faueur du commun populaire, pour auoir ainsi embelly & esguayé la uille de Rome des ingenieuses delices & elegantes uoluptez des Grecs: mais à l'opposite Fabius Maximus fut plus agreable aux uieux, pour n'auoir rien emporté de semblable hors de la uille de Tarente, quand il la prit: car il est bien uray qu'il en emporta l'or & l'argent comptant, & toute autre richesse utile: mais quand aux images & tableaux, il les laissa en leurs places en disant une parole, qui depuis a esté bien recueillie & bien notee, Laissons aux Tarentins leurs Dieux qui leur sont courroucez. Et au contraire les gens d'honneur reprochoyent Marcellus, premierement pource qu'il disoyent qu'en ce faisant il auoit suscité une grande haine & enuie contre la uille de Rome, en laquelle non seulement les hommes, mais aussi les Dieux estoient detenus prisonniers & menez en triumphe: & puis pource qu'il auoit emply le commun populaire de curiosité oisifue & de babil, attendu qu'il ne faisoit plus autre chose la plus part du iour, que s'amuser à causer & deuiser de l'excellence des ouuriers & de leurs

arts & ouurages, là ou au parauant ilz n'auoyent accoustumé que de labourer ou de faire la guerre, sans sçauoir que c'estoit de delices ny d'oïfifue superfluité, comme dit Euripides en parlant de Hercules,

²⁵ Simple il estoit grossièrement atourné,

³⁰ Mais des uertus principales orné.

Toutefois Marcellus s'en glorifioit entre les Grecs mesmes, disant qu'il auoit enseigné aux Romains à priser & estimer les beaux & admirables ouurages de la Grece, ce qu'ilz ne sçauoyent pas au parauant: mais à son retour de la Sicile ses maluueillans s'opposèrent à ce que l'honneur du triumphe ne luy fust point decerné: & luy sachant qu'il auoit laissé encore quelque chose à faire en la Sicile, & que la guerre n'y estoit pas de tout point acheuee, avec ce qu'il craignoit qu'un troisieme triumphe ne luy suscitast trop d'enuie, se contenta de son bon gré d'auoir l'honneur du grand triumphe en la montagne d'Alba seulement, & du petit en la uille de Rome. Ceste maniere du moindre triumphe s'appelle en Grec Euan, & les Romains la nomment Ouatio: & y a ceste difference, qu'en l'Ouation, celui à qui elle est adiugée n'entre pas dedans la uille dessus un chariot triumphal, trainné par quatre cheuaux, ny ne porte point sur sa teste du laurier en chapeau de triumphe, ny n'a point les trompettes & clavons sonnans autour de luy, ains marche à pied

avec des pantoufles, au son des flustes & hauls-bois, portant sur sa teste un chapeau de meurtre: de façon que ceste maniere d'entree ne sent point la guerre aucunement, & en est la ueuë plus tost plaisante qu'effroyable. Ce qui m'est un grand argument pour croire que ces deux sortes d'entrees, que lon decernoit aux Capitaines qui retournoient uictorieux, ont esté anciennement distinguees plus tost par la maniere que par la grandeur de leurs faiçts: car ceulx qui avec grand meurtre & effusion de sang humain estoient uenus au dessus de leurs ennemis, entroyent en la magnificence du triumphe qui estoit tout martial & terrible, suyuis de leurs soudards tous armez & couronnez de chapeaux de laurier, ne plus ne moins que quãd ilz faisoient la reueuë & la purification de leur camp en la guerre. Mais ceulx qui sans exploiter les armes, par amiable uoye de remonstrances, ou par eloquence uenoient à bout de leurs entreprises, la loy leur concedoit l'honneur de l'autre façon d'entree pacifique pleine de feste & de ioye, pource que la fluste est un passetemps qui appartient à la paix, & le meurtre est un arbre consacré à Venus, laquelle plus qu'autre Dieu ny Deesse hait la force, la uiolence & la guerre. Et a ceste seconde sorte d'entree esté appelée Ouatio, non comme plusieurs des Grecs ont cuidé, de ce terme Euan, qui est une uoix & un chant de ioye, encore que lon ait

accouſtumé de conuoyer & accôpagner le Capitaine ainſi entrant, en criât & chantant Euan: mais ce ont eſté quelques Grecs qui ont uoulu tirer la deriuation de ce mot d'une couſtume qui leur eſt ordinaire, avec ce qu'ilz ont eſtimé que quelque partie de ceſt honneur apparteinſt au Dieu Bacchus, lequel nous ſurnommons Euius, & quelquefois Thriambus: mais ce n'eſt pas la uraye deriuation du nom, ains eſt, pource qu'à l'entree triumphale le Capitaine triũphateur & uictorieux par les anciennes couſtumes de Rome immoloit un ou pluſieurs bœufs, & en l'Ouation, il immoloit ſeulement une brebis que les Romains appellent Ouem, dont l'entree a eſté nommee Ouation. En quoy fait à conſiderer la difference qu'il y a entre celui qui eſtablit les loix & couſtumes des Romains, & celui qui fait celles des Lacedæmoniens, comment ilz ordonnerent les ſacrifices pour la uictoire à l'opposite l'ũ de l'autre: pource qu'à Sparte le Capitaine qui par aſtuce, ou par amiable uoye a fait ce qu'il a uoulu, ſacrifie aux Dieux un bœuf, & celui qui l'a fait par bataille & force d'armes, ſacrifie un coq: car encore qu'ilz fuſſent gens fort belliqueux, ſi eſt ce qu'ilz eſtimoyêt plus grád exploit & plus cõuenable à l'hõme celui qui eſt cõduit par remonſtrãce, par bon ſens & par raiſon, que celui qui eſt executé avec hardieſſe & force d'armes. Ainſi peult on conſiderer, lequel des deux en

cela a le mieulx ordonné. Au demourant, estant Marcellus eleu Consul pour la quatrieme fois, ses ennemis & malueillans fusciterent les Syracusains, & leur suaderent de se uenir plaindre au Senat & crier contre luy, en l'accusant qu'il les auroit cruellement & inhumanement traittez contre les alliances & confederations qu'ilz auoyent de long temps avec les Romains. Estant donques un iour Marcellus au Capitole, ou il faisoit quelque sacrifice, ainsi que le Senat se tenoit, les deputez de Syracuse y entrerent, & se iettans à genoux requirent que lon leur donnaist audience, & qu'on leur feist iustice. L'autre Consul qui estoit present, les rabroua, estant marry de ce qu'ilz auoyent ainsi malicieusement espié l'occasion que Marcellus ne fust pas en la cōpagnie. Mais aussi tost q̄ Marcellus en fut aduertuy, toutes choses laissees il s'y en alla incōtinēt, & s'asseyt premieremēt en la chaire Consulaire, ou il donna audience, & despescha quelques affaires comme Consul: puis quand il eut acheué, il descendit de la chaire à bas, & s'alla mettre comme personne priuee, en la place d'ou souloyent respondre ceulx que lon accusoit de quelque crime, donnant permission aux Syracusains de dire & alleguer ce qu'ilz uouldroyent à l'encontre de luy. Si furent les Syracusains bien estonnez quand ilz ueirent la grauité de ce personnage, & son assuree contenance en tou-

res choses: & si parauant ilz l'auoyent esprouué non soustenable en armes, encore le trouuerent ilz lors plus redoutable en sa robe longue Consulaire, de maniere qu'ilz ne l'ozoyent pas seulement regarder entre deux yeux. Ce neantmoins à l'instigation des aduersaires de Marcellus, ilz s'asseurèrent à la fin, & commencerent leur accusation meslee de plainte & de lamentation, dont la substance en sommaire estoit, qu'estás amis & alliez des Romains ilz auoyent souffert des choses que les autres Capitaines bié souuent remettoyent & ne faisoient pas souffrir aux ennemis. A quoy Marcellus prôptement respōdit au cōtraire, que pour plusieurs maux & plusieurs torts que les Romains auoyent receuz d'eulx, ilz n'auoyent rien souffert, sinon ce qu'il est impossible que ne souffrent ceux qui resistent iusques à estre pris par force d'armes, de laquelle prise eulx mesmes auoyēt esté cause, n'ayās pas uoulu obeïr ny cōsentir aux raisonnables conditions de paix qu'il leur auoit par plusieurs fois proposees: & si ne pouuoient dire pour leur descharge que c'eussent esté les tyrans qui les eussent forcez de soustenir ceste guerre: car au contraire pour y pouuoir entrer, ilz auoyent esté contens de se soubsmettre à une tyrannie. Apres que les uns & les autres eurent deduit leurs raisons, les Syracusains, comme la coustume est, sortirēt hors la salle du Senat, & aussi feit Marcellus, lais-

fant presider son compaignon au Consulat, & attendit à la porte le iugement du Senat sans rien changer de son uisage, ny de sa contenance accoustumee, ny pour crainte de la sentence, ny pour cholere à l'encontre des Syracusains, ains attendant doucement & attrempeement l'issue du iugement. Apres que les uoix des Senateurs eurent esté recueillies, & que par la pluralité d'icelles Marcellus eut esté absouls à pur & à plein, les Syracusains en plorant se ietterent à ses piedz, & le supplierent de ne uouloir tenir son cueur, ny exercer son ire à l'encontre d'eulx qui estoient là presens: & au demourât d'auoir pitié du reste de la uille, laquelle estoit bié souuenante des graces qu'elle auoit receues de luy, & s'en tiendroit redeuable à tousiours-mais à luy. Marcellus emeu à pitié par leurs prieres, leur pardonna, & tousiours depuis fait tous les plaisirs qui luy furent possibles aux autres Syracusains: car à son instance & requeste, le Senat authorisa & confirma ce qu'il leur auoit otroyé, qu'ilz peussent uiure en pleine liberté sous leurs loix, & iouir paisiblement des biens qui leur estoient demourez: en recōpense de quoy ceulx de Syracuse luy feirent plusieurs grands honneurs, & entre autres feirent une ordōnance, que de lors en auant toutes & quātes fois que Marcellus ou aucun de ses descendants mettroient le pied en la Sicile, les Syracusains en feroient feste publique, portās cha-

peaux de fleurs sur leurs testes, & faisã sacrifi-
ces aux Dieux. Cela fait Marcell^o cõmencea à se
tourner contre Hãnibal, & là ou tous les autres
Cõsuls presque, & tous les autres Capitaines de
puis la desfaitte de Cannes auoyët usé de ceste
seule ruse encõtre luy de fouir la lice, & iamais
ne s'attacher à combatre à luy, il prit un chemin
du tout opposite, estimant que la longueur du
temps, lequel on estimoit deuoir miner & con-
sommer les forces de Hannibal, auroit plus tost
acheué de ruiner & destruire toute l'Italie: &
que Fabius Maximus qui regardoit trop à la
seureté, n'estoit pas bien à propos pour reme-
dier à la maladie presente de la chose publique
Romaine, attendant que ceste guerre se termi-
nast par la defaillance des forces de Rome, &
faisant la faulte que commettent les craintifz
medecins, à faulte d'ozer à bon esciãt remedier
à la maladie pendant qu'il en est temps, estimãs
que la consommation des forces fust diminution
de la maladie. Si s'en alla premierement contre
les uilles des Samnites grandes & puissantes,
qui s'estoyent soubstraiçtes de l'obeissance des
Romains, & les reprit avec bonne prouision de
bledz & de deniers qu'il trouua dedans, oultre
trois mille hommes de guerre que Hannibal y
auoit laissez pour les garder, qu'il prit aussi. Puis
ayant Hannibal occis en la Pouille le Vicecon-
sul Cneus Fuluius avec unze coulonnels de
mille hommes de pied chascun, & ayant aussi

mis en pieces la plus grande partie de son armee , Marcellus escriuit des lettres à Rome , par lesquelles il taschoit à reconforter le Senat & le peuple , disant qu'il s'en alloit celle part, & qu'ilz s'asseuraissent qu'il en chasseroit Hannibal . Ces lettres leuës ne reconforterent point les Romains, ainsi qu'escriit Liuius, ains augmēterent leur crainte & leur soucy , pource qu'ilz estimerent le danger à uenir plus grand que la perte passée , d'autant qu'ilz tenoyent Marcellus pour plus grand & meilleur Capitaine que n'auoit esté Fuluius : toutefois Marcellus suyuant ce qu'il auoit escrit à Rome, chassa Hannibal hors de la Pouille, & le fait retirer en la Lucanie, auquel pais l'ayant trouué pres d'une uille nommee Numistron , ou il s'estoit logé sur les coustaux en lieux forts & auantageux, Marcellus se campa tout aupres emmy la plaine , & le lendemain fut le premier qui presenta la bataille à son ennemy . Hannibal de l'autre costé descendit aussi en la plaine , de sorte qu'il y eut bataille laquelle ne fut point decidee , encore qu'elle fust fort aspre, & qu'elle durast bien longuement: car ayans commencé à combatre environ les neuf heures du matin, à peine se desmeslerēt ilz qu'il estoit ia nuit toute noire: & le lendemain au poinct du iour, il régea de rechef ses gens en bataille parmy la desconfiture des morts, & desfia Hannibal à uenir une autre fois esprouuer à qui demoureroit la uictoire : ce

qu'il ne uoulut pas faire, ains se partit de là : au moyen dequoy Marcellus eut beau loisir de despoiller à son aise les corps morts de ses ennemis, & de donner sepulture aux siens. Quoy fait, il se remeit incontinent à poursuivre son ennemy à la trace, lequel luy dressa plusieurs aguets & embusches, mais iamais il ne donna dedans pas une : & en toutes les rencontres & escarmouches, ou ilz s'attacherēt, eut tousiours l'aduantage, dont il acquit grande estime & grande reputation. A l'occasion dequoy estant prochain le tēps qu'il falloit elire de nouveaux Consuls, le Senat fut d'aduis d'enuoyer plus tost querir l'autre Cōsul qui estoit en la Sicile, que de remuer Marcellus qui estoit attaché à Hānibal. Parquoy arriué que fut l'autre Consul, le Senat luy commanda de nommer Dictateur *Quintus Fuluius*, pource que le Dictateur ne s'eslit point, ny par le peuple, ny par le Senat, mais l'un des Consuls ou des Prateurs en pleine assemblee du peuple nōme tel qu'il luy plaist pour Dictateur, & semble que ce nom de Dictateur ait esté imposé de là, à cause que *Dicere* en langage Romain signifie nommer: toutesfois les autres ueulent dire qu'il a ainsi esté appellé, pource qu'il ne met point les affaires en deliberation du Senat, ny à la pluralité des uoix & suffrages du peuple: ains commande de sa propre autorité ce que bon luy semble, sans en parler ny demāder à personne : ce qui a bien

quelque apparence, par ce qu'ilz appellent les commandemēs des magistrats Edicta, que nous autres Grecs appellons Diatagmata. Estāt doncques uenu de la Sicile le compagnon de Marcellus au Consulat, il uoulut nommer Dictateur un autre que celuy que le Senat luy presentoit, & pour n'estre contrainct de faire ce qu'il n'eust pas uolu, il se partit une nuit & s'en retourna en la Sicile. Ainsi le peuple designa & nomma pour Dictateur Quintus Fuluius, & le Senat escriuit à Marcellus qu'il le cōfirmast. ce qu'il feist, & authorisa la nomination du peuple, & luy fut de rechef eleu Proconsul pour l'annee ensuyuant, en laquelle ayant conferé avec Fabius Maximus des affaires de la guerre, ilz arresterent ensemble que Fabius iroit essayer de reprendre la uille de Tarente, & que ce pendant Marcellus feroit la guerre à Hannibal, pour le diuertir & engarder qu'il ne la peust aller secourir. Ce cōseil pris entre eulx, Marcellus l'alla trouuer pres la uille de Cannusium, là ou comme Hannibal changeast souuēt de logis, pour n'estre point contrainct de uenir à la bataille malgré luy, il trouuoit neantmoins tousiours Marcellus deuant luy, iusques à ce que un iour s'estant arresté en un logis, il le harcela tant par continuelles alarmes & escarmouches qu'il l'attira à la bataille, laquelle fut debatue tout le long du iour iusques à la nuit, qui les contraignit tous deux de soy retirer:

& le

& le lendemain des l'aube du iour Marcellus comparut encore en campagne avec son armee rengee en bataille:dequoy Hannibal estant ennuyé,assembla les Carthaginois & leur fit une harengue , par laquelle il les pria de uouloir encore combatre ceste fois la , si iamais ilz auoyent par le passé combatu pour l'amour de luy : Car uoyez , dit-il, comment apres auoir tant de fois uaincu & gagné tant de batailles, no⁹ n'auōs pas loisir de reprēdre alaine à nostre aise , & ne pouuons auoir repos quelques uictorieux que nous soyons, si nous ne chassons cest homme icy . Apres les auoir ainsi preschez , il les mena à la bataille , en laquelle Marcellus hors de propos & de saison uolut user d'une ruze de guerre qui luy fait auoir du pire : car uoyant la poincte droite de son armee fort pressee , il fait marcher l'une des legions qui estoit derriere en ordonnance au front de la bataille pour soustenir ceulx qui en auoyent besoing : mais ce remuement troubla ceulx qui combatoyent , & donna la uictoire aux ennemis , qui occirent bien ce iour la deux mille sept cens hommes Romains . Mais retourné que fut Marcellus en son camp , il fait incontinent assembler ses gens , ausquelz il commença à dire , qu'il uoyoit bien assez d'armes & de corps d'hommes, mais de Romains qu'il n'en uoyoit point : quoy ouy les soldards luy requirent pardon de la faulte qu'ils

auoyent faite , & il leur respondi qu'il ne leur
 dōneroit point tant qu'ils seroyēt uaincus, mais
 que ouy bien quand ils auroyent uaincu , &
 que le lendemain il les remeneroit en bataille
 contre l'ennemy , à fin que ceulx qui estoient
 à Rome sceussent plustost la nouvelle de leur
 uictoire que de leur fuite . Cela dit , il ordōna
 que lon baillast de l'orge au lieu de fourment
 aux bandes qui auoyent tourné le dos les pre-
 mieres , tellement que combien qu'il y en eust
 beaucoup en dāger de leurs personnes pour les
 grāds coups qu'ilz auoyēt receuz en la batail-
 le , si n'y en eut il pas un à qui les paroles de
 Marcellus ne cuisisēt plus que ses propres ble-
 ceures . Le lendemain au plus matin , fut mise
 hors sur la tente du Capitaine la cotte d'armes
 teinte en escarlatte , qui est le signe ordinaire
 quand il y doibt auoir bataille, & furent les cō-
 pagnies qui le iour de deuāt auoyent esté des-
 honorees , mises à leur requeste au frōt de tou-
 te la bataille, & les particuliers Capitaines tirās
 semblablement aux chāps les autres bādes qui
 n'auoyēt point esté rompues , les régerēt apres .

» Ce qu'entendant Hannibal, s'escria : O Dieux,
 » quel homme est ce cy, qui ne se sçauroit conte-
 » nir ny en bonne , ny en mauuaise fortune !
 » car il est seul qui ne donne iamais repos à son
 » ennemy quād il l'a uaincu , ny n'en préd quād
 » il est batu . Nous n'aurons iamais faiēt à luy ,
 » à ce que ic uoy, puis que la honte, soit qu'il

20 gaigne, ou qu'il perde, luy donne tousiours un
 20 aiguillon de plus ozer, & de plus entreprendre.

Après ces remonstrances d'une part & d'autre, commencerent les deux armées à marcher, & s'entrechoquer: là ou estās les hōmes aussi forts d'un costé que d'autre, Hannibal cōmanda que lon feist marcher en auant iusques au front de sa bataille ses Elephants, & que lon les chassast iusques dedans les ennemis: comme il fut fait: & fut cela cause de troubler un peu & faire branler les premiers rancs, iusques à ce que Flavius Coulonné de mille hommes de pied, prit une enseigne en sa main, & marcha au deuāt de ces bestes, à la premiere desquelles il dōna si rudemēt de la hāte de l'enseigne, qu'il la feit tout-ner arriere. Ce premier la f'estant ainsi tourné, alla heurter le secōd qui le suyuoit, & le destourna: & celui la cōsequemment les autres qui uenoyent apres de main en main. Ce que uoyant Marcellus, commanda à ses gens de cheual qu'ilz donnassent de tout leur effort en cest endroit là, ou il uoyoit les ennemis ia un peu troublez pour ces bestes qui retournoyent contre eulx, & faire qu'ilz s'embarassassent encore dauātage: comme ilz feirent, & chargerent si asprement les Carthaginois, qu'ilz leur feirent tourner le dos à ual de roupte, & les menerent batans iusques dedans leur camp, là ou fut le plus grand meurtre à cause des Elephants, qui là furent tuez, & tumberent dedans

la porte du camp : car on dit qu'il fut tué en ceste desfaite la , plus de huit mille hommes, & du costé des Romains bien trois mille , & tous les autres presque blecez. Ce qui donna moyen à Hannibal de se partir de là ou il estoit , à son aise, la nuit, & de s'escarter bié loing de là, pour ce que Marcellus ne le peut suyure promptement, à cause du grand nombre des blecez qu'il auoit en son cāp , & se retira à petites iournees en la Campagne, là ou il passa l'Esté à seiour en la uille de Sesse , pour faire penser & guarir ses malades . Ainsi Hannibal s'estant à la fin despestré de Marcellus , & ayant son armee deliure pour s'en seruir à ce que bon luy sembloit , alla bruslant , gastant & destruisant l'Italie de tous costez, sans craindre plus rien. Cela dōna mauuais bruit à Marcellus dedans Rome, & ne failirent pas ses ennemis à se seruir de ceste occasion: car ilz susciterent incontinent un des Tribuns du peuple Publius Bibulus, homme uiolent & temeraire, mais eloquent, & qui disoit bié ce qu'il uouloit, pour l'accuser. Si fait assembler en conseil le peuple par plusieurs fois , ou il meit en auant , qu'il falloit rappeler Marcellus , & donner la charge de son armee à quelque autre : car quant à luy, disoit il, pour auoir
 » seulement fait un peu de guerre à Hannibal,
 » comme, par maniere de dire, pour s'estre un
 » petit eschauffé à la lucte, il s'est retiré aux baings
 » chaulds pour se traiter à son aise . Quoy en-

tendant Marcellus , laissa ses lieutenans en son camp, & s'en alla en personne à Rome, pour respondre aux calumnies qu'on luy mettoit sus, & trouua que sur ces calumnies la, on se preparoit à luy faire son proces . Si y eut iour assigné pour ouir les parties, & s'assembla le peuple dedans le grand parc des lices que lon appelle Circus Flaminius, pour en donner sa sentence. Et là le Tribun Publius Bibulus montant en chaire , deduisit bien au long son accusation: & Marcellus apres luy respōdit sobrement , & en peu de paroles, pour se iustifier seulement: mais les principaux & plus notables personnages de la uille prirent la parole pour luy , qui remonstrerent frâchement & libremēt au peuple qu'il ne deuoit pas piemēt iuger de la uertu de Marcellus , en le cōdamnant d'aucune lascheté, que faisoit leur ennemy mesme, attēdu que c'estoit celuy de tous leurs Capitaines que Hannibal fouyoit, & faisoit tout ce qu'il pouuoit pour n'a uoir point à combatre contre luy, là ou il cherchoit à cōbatre tous les autres . Ces remōstrances ouyes , tant s'en fallut que l'issue du proces fust telle comme l'accusateur esperoit , que au contraire Marcellus nō seulement fut absouls à pur & à plein , mais dauantage fut eleu Consul pour la cinquieme fois: & entré qu'il fut en son nouveau magistrat, s'en alla premierement en la Thoscane, là ou uisitant toutes les bōnes uilles , les unes apres les autres , & les appaisant,

il assopit un grand mouuement de tout le païs, qui estoit en branle de soy rebeller . Puis à son retour il uoulut dedier le temple d'Honneur & de Vertu, qu'il auoit fait edifier du butin gagné en la guerre de Sicile : mais les presbtres s'y opposerent, disans que deux Dieux ne pouuoient estre contenus en un seul temple : au moyen dequoy il commença à en edifier un autre tout ioignant le premier , estant toutefois fort mal content de l'opposition & empeschement de ces presbtres , & la prenant en mauuais presage, avec ce mesmement qu'il y auoit plusieurs autres signes & presages celestes , qui d'ailleurs le renoient en peine: car il y eut tout à un coup plusieurs temples attaincts & touchez de la foudre : & les rats & souris rongerēt de l'or qui estoit en la chappelle de Iupiter Capitolin . Et disoit on qu'un bœuf auoit parlé: qu'il estoit fort un enfant de la teste d'un Elephant , & que l'enfant estoit encore uiuant. Qui plus est, les presbtres & deuins sacrifiās aux Dieux pour diuertir & destourner le malheur de ces sinistres presages , iamais ne peurent auoir signes fauorables des sacrifices. Au moyen dequoy ilz taschoyent de le retenir à Rome, là ou il ardoit & brusloit de desir qu'il auoit de s'en aller uistement à la guerre, pource que iamais homme ne desira si ardemment chose quelle qu'elle soit , comme luy desiroit se trouuer en bataille contre Hānibal: car il ne songeoit d'autre cho-

se la nuit en dormât, & ne parloit d'autre chose le iour avec ses amis & compagnons en ueillant, ne requerant autre chose aux Dieux en ses prieres & oraisons, sinon qu'il peust trouuer Hannibal en champ de bataille: & croy qu'il eust encore plus uoluntiers combatu dedans le pourpris d'une mesme muraille de uille, ou d'une mesme closture de camp. Et si n'eust esté qu'il estoit ia comblé de gloire, & que par plusieurs preuues il n'eust fait cognoistre qu'il estoit autant meur, autant sage & prudent que nul autre Capitaine de son tēps, i'eusse dit que c'estoit une passion & affection de ieunesse qui le transportoit, & un desir plus ambitieux que ne portoit l'aage en laq̃lle il se trouuoit alors: car il auoit plus de soixāte ans quand il fut eleu Consul pour la cinquieme fois. Ce neātmoins apres auoir fait les sacrifices propitiatoires, & les purifications telles que les deuins les ordonnerent, il se partit de Rome avec son compagnon pour aller à la guerre, ou il trouua Hannibal de seiour entre les uilles de Baucie & de Venouse, & tascha par tous moyens à le tirer à la bataille: ce qu'il ne uolut onques faire: mais estāt aduertey par ses espies que les Cōsulz Romains enuoyoyent une armee pour assieger la uille des Locriens que lon surnomme Epizephyriens, c'est à dire, Occidentaux, à la difference de ceulx de la Grece, qui à comparaison de ceulx d'Italie sont Orientaulx, il dressa em-

E iij

busche à ceulx qui y alloient au deffoubs de la motte de Petelie qui estoit sur leur chemin, ou il tua bien enuiron deux mille cinq cents hommes. Cela enflamma encore plus le courage de Marcell^o du desir de uenir à la bataille, de sorte qu'il se deslogea de là ou il estoit pour s'approcher encore plus pres de s^o ennemy. Or y auoit il entre leurs deux cāps une butte forte d'assiette, & couuerte de boscages à l'entour, & y auoit des eschoguettes haultes, dont on pouuoit descouurir de loing uers l'un & uers l'autre cāp, & au bas couroyēt force fōtaines & ruisseaux, de maniere que les Romains s'esbahissoyent comment Hannibal qui y estoit arriué le premier, ne s'en estoit saisy, & l'auoit ainsi abādōné à ses ennemis: mais c'estoit pource que si le lieu estoit commode pour loger un camp, encore luy sembloit il plus à propos pour y dresser embusche, auquel effect il aima mieulx s'en seruir. Si emplit les bois, les fonceaux & uallees d'alétour de bon nōbre de gēs de traict, & d'autres combatās avec armes de long bois, s'asscurant que le lieu de soymesme y attireroit assez les Romains: en quoy il ne fut pas deceu de son esperance: car incontinent il courut un bruit parmy le cāp des Romains, qu'il falloit occuper ce logis là, & n'y auoit celuy qui ne se meslast de discourir comme bien entendu au faict de la guerre, combien dauantage ilz auroyent sur leurs ennemis, principalement silz sy alloient

loger, ou à tout le moins filz y bastiffoient un fort. Parquoy Marcellus fut d'aduis d'y aller luy mefme en personne, avec quelque peu de gens de cheual, pour recognoiftre & uifiter le lieu : mais auant que partir il appella son deuin pour sacrifier aux Dieux, & la premiere hostie immolee, le deuin luy en monftra le foye qui n'auoit point de teste : mais à la feconde qu'il immola se trouua une belle & grosse teste du foye, & toutes les autres parties entieres & fraifches à merueilles, de forte qu'il sembloit qu'elles effaceaffent toute la crainte des mauuais signes & prefages de la premiere hostie : toutefois au contraire les deuins difoyent que cela les troubloit & espouuentoit dauantage, pource que ces prefages de sacrifices si beaux & si propices, tout à coup apres d'autres si laids & si triftes, leur estoyent fufpects, à caufe d'une fi efrange & fi soudaine mutation : mais comme dit le poëte Pindarus,

- 20 Il n'est feu bruflant tousiours,
 20 Mur d'acier, ny chose nee,
 20 Qui peult arrefter le cours
 20 De fatale destinee.

Si monta Marcellus à cheual, &, qui plus est, mena quand & luy son compagnon au Confulat Quintus Crispinus, & son filz auffi qui estoit Capitaine de mille hommes de pied, avec deux cents uingt hommes de cheual feulemēt, dont encore n'y en auoit il pas un naturel Ro-

main , ains estoient tous Thoscans exceptez quarante Fregellaniens , qui festoient des le commencement de ceste guerre tousiours mōstrez fort fideles & fort affectionnez enuers Marcellus: mais estant, comme nous auons dit, la bute couuerte d'arbres & de brossailles , les ennemis auoyent mis un homme sur la plus haulte guette qui y fust, pour faire le guet & les aduertir sil uerroit rien uenir. Les Romains ne l'eussent sceu apperceuoir , & luy au contraire descouuroit iusques dedans leur camp tout ce qui sy faisoit, comme lors il aduisa ceulx qui estoient en embusche, de la uenue de Marcellus : & eulx le laisserent approcher iusques à ce qu'il fust tout contre eulx , puis tout soudain se leuerent ensemble , & enueloppans Marcellus commencerent à luy tirer coups de traict & coups de main , les uns poursuyuans ceulx qui fuyoyent , & les autres combatans ceulx qui faisoient teste , qui estoient les quarante Fregellaniens, lesquelz encore que les autres Thoscans eussent pris la fuitte au premier cry qu'ilz ouyrent , se ferrent ensemble pour defendre les personnes des deux Consulz , iusques à ce que Crispinus ayant receu sur son corps deux coups de iaueline , tourna son cheual pour fouir : mais il y eut un des ennemis qui donna à Marcellus un coup de lance ayant le fer plat à trauers les flancs , dont il le percea de part en part : ce que uoyans ceulx des Fregellaniens ,

qui estoient encore demourez en uie en bien petit nombre, le laisserent tumbé en terre, & prirent son filz qui estoit blecé aussi, avec lequel ilz se sauuerent à course de cheual dedans leur camp. Il n'y eut en ceste rencontre gueres plus de quarâte hommes tuez, & de prisonniers y eut cinq des sergens qui portoyent les haches deuant les Consulz, & uingt autres hommes de cheual: l'autre Consul Crispinus mourut aussi des bleceures qu'il y receut, peu de iours apres, qui fut un inconuenient non iamais aduenu auparauât aux Romains, que tous les deux Consulz mourussent en une mesme rencontre. Or quant à Hannibal, il ne fait pas grand compte des autres qui demourerent pris ou morts en ceste rencontre: mais quand il entendit que Marcellus y estoit demouré sur le champ, il sy encourut incontinent luy mesme, & regardant curieusement son corps de pres & longuement, en considerant la force de la taille dont il estoit, & le traict de son uisage, apres qu'il eut le tout bien contemlé, il ne se laissa eschapper de la bouche pas une parole insolente, ny ne monstra à sa face une chere ioyeuse, comme eust fait quelque autré qui fust uenu à bout d'un si aspre & si dangereux ennemy, ains s'esbahissant comment il estoit uenu là mourir ainsi estrangement, luy osta du doigt son anneau, dont il cachetoit ses lettres, & faisant ensepuelir son corps ainsi qu'il luy

appartenoit , le fait brusler honorablement ,
 puis en fait mettre les os & les cendres dedans
 une buye d'argent , sur laquelle il posa luy mes-
 me une couronne d'or , & l'enuoya à son filz :
 mais il y eut quelques cheuaux legers Numi-
 diens , qui par le chemin rencontrerent ceulx
 qui portoyent celle buye , & la leur uolurent
 oster : les autres se meirent en deuoir de la re-
 tenir, de maniere qu'il fallut que les Numidiés
 usassent de force pour l'auoir : & ainsi en tirant
 & combatant à qui l'auroit , les os & les cédres
 furent semez & dispersez ça & là. Ce qu'enten-
 dant Hannibal dit à ceulx qui se trouuerét lors
 20 autour de luy: Voyez comment il n'est pas pos-
 20 sible de faire aucune chose , si elle ne plaist à
 20 Dieu. Si fait bien chastier les Numidiens, mais
 au demourant, il ne se soucia plus de faire cher-
 cher ny recueillir les ossemens de Marcellus ,
 ayant opinion que c'estoit quelque Dieu qui a-
 uoit uoulu qu'il mourust ainsi estrangement, &
 que dauantage son corps demourast sans sepul-
 ture. Ainsi l'escruiuent Cornelius Nepos & Va-
 lerius Maximus : mais Liuius & Augustus Cæ-
 sar disent, que la buye fut portee à son filz, & in-
 humee magnifiquemét. Il y a en plusieurs lieux
 des ouurages & edifices publics, qui ont esté
 faits & dediez par Marcellus , oultre ceulx qui
 sont à Rome, comme à Catane en la Sicile , un
 parc à exercer les ieunes gens, & en l'isle de Sa-
 mothrace au temple des Dieux, que lon appel-

le Cabires , plusieurs imagēs & plusieurs tableaux qu'il y feit porter de Syracuse, & en l'isle de Lindos au temple de Minerue , ou il y a entre autres une siene statue , soubz laquelle est engraué cest epigramme , ainsi que l'escriit le philosophe Posidonius :

- 30 Amy passant, tu uois icy l'image
 30 De Claudius Marcellus, le lignage
 30 Duquel estant à Rome tresillustre
 30 Est esclarcy encore par son lustre,
 30 Pource qu'il fut comme une estoile claire
 30 En son país, ou le lieu Consulaire
 30 Il teint sept fois, & à chacune feit
 30 Des ennemis grand meurtre qu'il desfeit .

Celuy qui a composé cest Epigramme, compte les deux fois qu'il fut Viceconsul pour deux Consulats entiers : mais sa posterité a continué tousiours en grand honneur, iusques à Marcellus filz de la sœur de Auguste César, Octauia, & de Caius Marcellus . Il mourut ieune estant *Ædile* de Rome , & ayant espousé Iulia fille de Auguste, avec laquelle il ne uescut pas longuement : mais pour honorer sa memoire, Octauia sa mere dedia la librairie , & Auguste César le theatre, qui sont encore appellez iusqu'auiourdhy le Theatre & la Librairie de Marcellus.

LA COMPARAISON DE MARCELLVS AVEC PELOPIDAS.



E sont les choses qui m'ont semblé plus dignes de memoire es faicts & gestes de Pelopidas & de Marcellus : mais estans leurs meurs & leurs natures au demourât pareilles & semblables, pource qu'ilz ont esté tous deux uailans, laborieux, magnanimes & courageux, il y pourroit auoir ceste seule difference, que Marcellus en plusieurs uilles qu'il prit d'affault fait de grands meurtres, & espendit beaucoup de sang humain, là ou Epaminondas & Pelopidas iamais ne tuerent homme qu'ilz eussent uaincu, ny ne afferuient uille quelconque qu'ilz eussent prise : & a lon opinion que les Thebains n'eussent pas si cruellement traité les Orchomeniens, comme ilz feirent, si l'un d'eulx ou tous deux y eussent esté presens. Mais quant aux faicts, ce fut à Marcellus un grand & admirable exploit de desfaire une si grosse troupe de Gaulois à pied & à cheual, avec si peu de cheuallerie qu'il mena quand & luy, ce que lon ne trouuera pas auoir onques esté fait par autre Capitaine que par luy, mesmemét qui ait avec sa propre main occis sur le champ le Chef des ennemis : à quoy Pelopidas ne peut aduenir : car taschant à tuer le tyran de Pheres, il fut tué luy mesme le pre-

mier, & souffrit ce qu'il auoit enuie de faire. Toutefois lon peut opposer à cest acte la, les batailles de Leuctres & de Tegyre, qui furent deux tresmemorables & tresglorieux combats: mais en recompense aussi ne sçauroit on alleguer exploit aucun de Marcellus fait d'emblee, qui merite d'estre comparé à ce que fait Pelopidas à son retour d'exil, quand il occit les tyrans qui detenoyent Thebes en seruitude: car ce fut un acte de ruze, de surprise & d'ëblee, le plus grand & le plus digne de memoire qui fut onques. Il est bien uray, que Marcellus auoit à faire à Hannibal, qui estoit un tresdangereux & tresredoubtable ennemy: mais aussi auoyent lors les Thebains à faire aux Lacedæmoniens, lesquelz pour certain cederent à Pelopidas en la bataille de Tegyre & en celle de Leuctres: là ou Marcellus ne uainquit iamais Hannibal une seule fois, ainsi comme escript Polybius, ains demoura tousiours inuincible iusques à la iournee que Scipion le desfeit en bataille. Toutefois nous adioustons plus de foy à ce qu'en ont escript Cæsar, Liuius, Cornelius Nepos, & entre les Grecs le Roy Iuba, que Marcellus ait bien rompu & desfait quelque fois aucunes troupes de Hannibal: mais ce ne furent iamais roughtes de grande consequence, & semble que ce ait esté plus tost quelque tromperie de cest Africain la, qu'autrement: ce qui neantmoins fut meritoirement & à bonne raison grande-

ment loué, prisé & estimé, d'auoir tellement remis le cueur aux Romains, qu'ilz ozassent attendre & faire teste à ce Carthaginois, apres tant de desfaittes d'armees Romaines, tant de Chefz d'exercites occis en bataille, & un si dangereux esbranlemét de tout l'empire Romain. Car celuy qui au lieu de la longue crainte & d'une frayeur esperdue ia par longueur de tēps enuieillie, fait renaiître es courages des soldards Romains une enuie & une ardeur de se trouuer aux prises & aux mains encontre l'ennemy, & qui les assoura & encouragea iusques à ne ceder pas facilement la uictoire, mais aussi à la debatre & quereller uertueusement, ce fut Marcellus seul: pource que au lieu qu'ilz estoient ia tous accoustumez, pour la longue duree de leurs pertes & malheurs, de se reputer bienheureux quand ilz se pouuoient sauuer de uistesse & eschapper des mains de Hannibal, il leur enseigna à auoir honte de se sauuer en routte, à ne uouloir point confesser d'auoir esté en branle de reculer, & à estre marris quand ilz se retiroient sans auoir uaincu & batu leurs ennemis: & pour autant que Pelopidas ne fut iamais rompu en bataille, ou il fust Capitaine en chef, & que Marcellus en gaigna plus que nul autre Capitaine de son temps, il pourroit sembler que le grand nombre des uictoires de l'un uiendroit à s'esgaler & compenser avec le non auoir iamais esté uaincu de l'autre. Il est

uray

uray que Marcellus prit la uille de Syracuse, & Pelopidas faillit à prendre celle de Sparte: mais ie pense que ce soit plus grande prouëlle à luy d'auoir approché si pres de Sparte, comme il feit, & auoir passé le premier la riuere de Eurotas en armes, ce que iamais ennemy au parauant luy n'auoit fait, que ce n'estoit à l'autre de prendre toute la Sicile: si ce n'est que quelqu'un uueille opposer à l'encontre que ce faict appartiene à Epaminondas, & non point à Pelopidas, comme aussi fait encore la uictoire de Leuctres: là ou il n'y a personne qui puisse pretendre part à la gloire des faicts de Marcellus: car il prit Syracuse estant seul Capitaine en chef, & desfeit les Gaulois sans son compagnon, & feit teste à Hannibal, sans que personne le secondast ny secourust en cela: car au contraire tous les autres l'en destournoyent, & luy fut le premier qui changeant le style de faire la guerre, dont les Capitaines Romains usoyent en ce temps là, enseigna le premier aux siens à ozer monstrer uisage à l'ennemy. Quant à leur mort, ie ne louë celle de l'un ny de l'autre, & suis en mon cueur desplaisant & marry de l'estrange façon dont ilz moururent tous deux, m'esmerueillant à l'opposite comment il est possible que Hannibal en tant de batailles ou il s'est trouué, qu'il seroit malaisé de les nombrer seulement, n'y ait iamais esté blecé: & louë singulierement un faict de Chrystantas, que Xe

nophon recite au liure de l'institution de Cyrus, disant que ayant ia haulsé l'espee pour en ferir un des ennemis, quand il ouit la trompette sonnante la retraite, il se retira tout doucement & modestement sans luy mal faire. Toutefois il semble que Pelopidas soit plus excusable : car oultre ce qu'il estoit chault de l'ardeur de la bataille, il auoit un iuste & magnanime courroux qui l'incitoit à chercher de se uenger: car, comme dit le poëte Euripide,

30 Le meilleur est qu'un Chef d'ost pour sa
30 gloire

30 Ayant uaincu suruiue sa uictoire,

30 Ou bien s'il est mort en terre abbatu,


30 Qu'il meure au moins en homme de uertu.

Car ainsi la mort de celuy qui meurt en ceste forte ne se peut nommer accident ny inconuenient, ains acte de uertu : mais oultre le iuste courroux qui tiroit Pelopidas, encore y auoit il une autre chose qui le poulsait, non sans grande raison, à faire ce qu'il fait : c'est, qu'il uoyoit la consommation de sa uictoire en la mort du tyran : car il eust esté bien mal aisé de trouuer ailleurs autre occasion aussi digne & aussi glorieuse pour éployer & môstrer sa prouesse comme celle la : & au contraire Marcellus sans aucune necessité urgente, sans celle fureur & ardeur qui surprenent quelquefois les hommes uaillans au milieu du combat, & les transporte hors de leur entendement, s'alla luy mes-

me inconfidereement precipiter au milieu du danger, ou il mourut, non en Capitaine, ains en cheual leger & en auantcoureur, abandonnant ses trois triumphes, ses cinq Consulats, ses despouilles & trophées, qu'il auoit de sa propre main conquis & gaignez sur des Roys, à des aduenturiers Hespagnolz & Numidiés, qui pour la soude uendoyent leur sang & leur uie aux Carthaginois, de sorte que ie croy qu'ilz s'emportèrent enuie à eulx mesmes, par maniere de dire, pour un si grand & si heureux exploit, d'auoir fait mourir entre des auantcoureurs & descouureurs Fregellaniens le plus grand personnage, & le plus uaillant homme & plus estimé des Romains. Toutefois ie ne uoudrois pas que lon pensast que ie die cela pour blasmer ny accuser la memoire de ces deux grands personnages: ains le fault prendre comme une plainte d'eulx, & une franche remonstrance faite à eulx mesmes & à leur propre uaillance, pour laquelle employer & monstrier ilz ont fait perir toutes leurs autres uertus, en abandonnant, sans qu'il en fust besoing, trop indiscrettement leurs personnes & leurs uies, comme filz enserent uoulu & deu mourir pour eulx, non pas pour leur pais plus tost & pour leurs amis & alliez. Mais encore apres leur mort Pelopidas fut inhumé par les alliez & confederez de Thebes, pour lesquelz il estoit mort, & Marcellus le fut par les ennemis mesmes qui l'auoyent

zue. Si est bien l'un chose heureuse & desirable en tel cas : mais l'autre a bien plus du grand & de l'admirable, que l'ennemy mesme reuere & honore la uertu qui luy nuisoit, que non pas l'amy rende l'office d'amitié qu'il deuoit: pour ce que l'ennemy n'a rien qui le conuie à honorer son ennemy mort, sinon l'admiration de sa uertu : & l'amy bien souuent le fait plus pour le profit & l'utilité qu'il en a receuë, qu'il ne fait pour affection qu'il porte à sa uertu .

Handwritten text, likely bleed-through from the reverse side of the page. The text is extremely faint and illegible due to the quality of the scan. It appears to be a list or a set of notes, possibly including names and dates.



pl. 100 59
nous retourner à nos propres 595





